

BIBLIOTECA NAZ.


Vittorio Emanuele III

XLV

B


66


NAPOLI



















2

HISTORIÆ
NAVALIS
MEDIÆ LIBRI
TRES.

Autore THO: RIVIO,
Regis in ANGLIA
Advocato.

*Qui mare in navibus descendunt, fa-
cientes operationem in aquis multis;
Ipsi viderunt opera ejus, & mira-
bilis ejus in profundo. Psal. 106.*



LONDINI,
Apud Richardum Hodgkinsonne,
Et vaneunt in vico vulgari et dicto
Little-Britaine, Anno Domini,
c MDCXL.





Serenissimo Potentissimoq;
Domino nostro

CAROLO,
D. G.

Angliæ , Scotiæ , Franciæ &
Hiberniæ R E G I.



*Agno planè ausu,
Serenissime Po-
tentissimeq; Do-
mine Rex noster,
Majestati vestræ
Historiam naua-
lem Antiquam olim dicare ag-
A 3 gres-*

Epistola.

gressus sum : Sed enim, placida temporum illorum quies, & profundum à bellis otium, faciles tum ad Celsitudinem vestram hujusmodi munuscula afferentibus aditus præbuerunt. Nunc autem rerum ordo non mutatus sed inversus cernitur. Scotia, quæ te talem genuit, contra te arma rebellis induit, & populari furore concita, non Episcopalem auctoritatem imminuere, sed ipsū (hæc enim sceleris causa prætexitur) sacrosanctum Episcopatus ordinem contra jus & fas, moremque majorū ex Ecclesia illa tollere minatur. Nec de belli enētū, metus. Deus enim, æqui bonique fautor, consilia hæc & scelera in capita autorum vertet. Interim verò Majestas vestra, ut par, utque necesse est, variis curis & vigiliis distinetur, & ad arma, ad acies, ad classes parandas, quamvis inuita, trahitur. Hinc fit, ut ego alteram
hanc

Dedicatoria.

*hanc Historiæ Naualis, (quam ex re
mediam inscripsi) partem, in tanto re-
rum æstu, Serenitati vestræ spectandā
præbere vix ausim. Nec auderem
planè, nisi illa me cogitatio hærentem
traheret, & debilitatum recrearet,
Principi arma toto jam animo cogitan-
ti, & rerum imprimis naualium stu-
dioso, non importunè classes, &
pugnas toto Oceano commissas offerri
posse. Vestra modo Majestas, alteros
hosce seruuli tui conatus, eodem, quo
priores, vultu respicere dignetur. Ita
DEUS Opt. Max. Majestati
vestræ, quia pacem negauit, perpetu-
am in bellis victoriam tribuat; Re-
bellibus verò, vel sanam mentem
propitijs det, vel quam meriti sunt
pœnam iratus reddat.*

Majestatis vestræ

Humillimus Aduocatus,

THO: RIVIUS.





THO. RIVII,
HISTORIÆ NAVALIS
MEDIÆ,
LIBER PRIMUS.


Argumentum.



Continet hic Liber 1^o Breve[m] nar-
rationem de rerum in mari statu
à praelio Acciaci ad sexcentesi-
mum circiter & vicesimum
post Christum natum annum.
2 Quasque res Augustus post
prelium Acciacum ad rem navalem pertinentes
constituerit. 3 Agit præterea de duobus Castris
navalibus in Italia, altero ad Misenum, altero ad
Ravennam ab eodem Augusto institutis, deque in-
solito maris fluxu & refluxu ad Ravennam & alia
tractus illius littora. 4 De Liburnis ab Augu-
sto adhibitis, deque Liburnis rotatis ab anonymo
quodam auctore confectis. 5 De mirabili cuius-
dam Delphini mansuetudine & lusu in litore Cam-
pano. 6 De Navali expeditione Ælii Galli Con-
tra Troglodytas. 7 De Batavia finibus &
B fossis

fossa Drusiana. 8 De Germanici navali contra Fri-
 ges orientales & Caucos apparatu. 9 De ejusdem
 contra eosdem expeditione, & in reditu naufragio &
 morte. 10 Caius Cæsar ludos quinquennales ab
 Augusto in memoriam prælii Acciaci institutos
 antiquavit. Deinde pontem, primò ex navibus, de-
 inde ex lapide quadrato à Baiis Puteolos usque per
 mare ducit. 11 De expeditione ejusdem contra
 mare Britannicum & victoria. 12 De pugna
 navali à Claudio, Cæii successore, in lacu Fucini
 emissione exhibita. 13 De ejusdem in Britan-
 niam expeditione. 14 De portu Iccio seu Gesso-
 riaco in Gallia. 15 De portu à Claudio ad O-
 stiam extructo. 16 Portum. Ostiensem & Roma-
 num diversos fuisse. 17 Ut Taprobane insula ca-
 su Romanis in notitiam venit, deq; rerū à Claudio
 quoad annonam urbis, ordinatione maritima :
 18 De D. Pauli, secundo Neronis anno, naufra-
 gio. Deque hypozomati, instrumento nautico,
 quibus Nauta ad conservandam illam navem u-
 tebantur. 19 Ut Lucius Vetus viam classibus
 à Roma Britanniam usque per Galliam molieba-
 tur. 20 De ingenti Romanorum sub Nerone
 Principe naufragio. 21 De navali Neronis in
 Achaïam ad Fidicines vincendos expeditione, de-
 que tentata Isthmi Achaici perfessione. 22 De
 Averni lacu, & inferno ibi à priscis & qua rati-
 one collocato. 23 Et Neronis matricidio ibidem
 commissò. 24 De Aniceto Pontico, & navibus
 ab eo excogitatis, quas Cameras primò, mox Cum-
 baria corrupto nomine appellabant, & de
 Virbii Gemini victoria navali contra eum parta.
 25 De Civilis hominis Batavi præstantia. 26 De

De vitrea littoris Judaici natura. 27 De Julii Agricolæ in Britanniam adventu, utque Monam Insulam sine navibus intravit, & Britanniam Insulam plane esse, primus deprehendit; utque terre jugum, quod duo estuaria Clotam & Bodotriam interjacet, munivit. 28 De maris Erythrei periplo, ab intimo sinu Arabico ad extremam Chinam ab Arriano Historico tempore Adriani Imperatoris primum instituto. 29 Denique, de Byzantii obsidione maritima & excidio sub Severo Imperatore agit,





CAP. 1.



Uæ à diluvio ad prælium Acciacum in mari contigerunt, prælia, naufragia, cædes, Ducum & Imperatorum seu laudes, seu vituperia, quatuor libris præcedentibus exegi.

Neque vero mihi recentiorum paulò & medi-
orum ut dici solent, temporum Historiam nava-
lem nunc scribere aggresso, quod plerique in
suis scriptis faciunt, præfari licet, certiora me
de inceptis clarioraque omnia perscripturum.
Queri magis libet ad sexcentesium & ampli-
us à Christo incarnato annū, nullam propemo-
dum de rebus navalibus præbitā esse scribendi
materiam. Non quòd certa pax tanto sæculo-
rum decursu terris constitit (haud enim aliās
tam sævæ Martis vicissitudines) Sed quòd bel-
lorum, quæ insequuta sunt, furor penè
omnis in Mediterranea vertit. Ibi enim *Varus*
cum legionibus à Germanis cæsus: Ibi *Drusus*,
post ingentes editas Barbarorum cædes, occidit;
& *Drusi* comprivignus *Tiberius* novies in Ger-
maniam ad feroces populi illius animos con-
tundendos ab *Augusto* missus. Inde Getæ Trans-

istrani, & ultra Vistulam & Boristhenem ad Septentriones positi Sarmatæ, armis Romanis usque lacesciti: donec ad extremum Gothi, Ostrogothi, Austrogothi, Visigothi, Hypogothi, Gothunni, Alani, Hunni, Vandali, Franci, Saxones, diversique alii, sine numero, sine nomine, populi, alii transito Danubio in Græciam & Italiam, Rheno alii in Galliam & Hispaniam, alii Oceano in Britanniam hanc nostram, aliasque provincias Romanas irruerunt. Interim verò multa in mari quies erat, raraque prælia in eo edita memorantur. Nulla ferè ut navium ratio, præterquam ad mercaturas & trajectoryes faciendas, habita fuisse videretur. Sub annum verò à Christo nato sexentesimum & vicesimum, imperante tum *Heracio*, Saraceni, gens impia, sed bellorum in omni genere successibus incredibiliter provecta, maria omnia classibus, veluti ventis & turbinibus immixtis, everterunt. Itaque & Christiani paribus armis in adversum ire, non jam de gloria & imperio, sed de fortunis & fide Christiana decertaturi, cogebantur. Suborta deinde est gens Veneta, parvis illa, ut omnia, initiis: sed quæ navalibus victoriis, contra Gallos primò, deinde, contra Hunnos, infra stagnum suum nobilitata, mox paludibus suis egressa, & mare classibus tentare ausa, vnicum propè in mare contra Saracenos Christiani orbis vallum & propugnaculum esse cœpit. Jamque res magnæ quidem navibus geri cœptæ sunt, sed quæ omni historiæ luce careant. Itaque non ut prius in aperto & pleno rerum Oceano, sed veluti per vada quædam, & freta, &

concur-

concurrentes inter se scriptorum Symplegadas densisque sine omni Cynosura tenebris, navigandum mihi esse video. Sed veteri proverbio, *Quod est: eo uti decet* nec ego unquam mihi in animum induxerim res parvas verbis majores facere; satis persuasus prudentem lectorem simplicem rerum veritatem malle; nec turbas & tempestates in historia (si absint) magis, quam in ipso mari, velle quærere.

Octavius tam insigni ad Accium victoria læ- Cap. 2.
tus, quo perennior ejus memoria ad posteros permaneret, quatuor ipso loco memorabilia instituit. Templum *Apollinis*, pervetustum quidem sed exiguum, auxit, & celebratissimis toto terrarum orbe templis par effecit. Urbem Accium ampliavit, & à victoria *Nicopolim* appellari jussit; Ludos quinquennales ad *Nemæorum* & *Olympiorum* imaginem ordinavit; Locum denique, quem castris ceperat, *Marti* pariter & *Neptuno* sacrum fecit, triremesque suas utrique consecravit. Quibus peractis, quum *Antonium* & *Cleopatram* in *Ægyptum* abiisse comperisset, Samum in hiberna concessit, inde res eorum ex propinquo speculaturus. Quum subito nuntiata ei veteranorum, quos in Italiam præmiserat, seditione, eò sibi sine mora proficiscendum esse cœsit. In itinere bis cum atrocissimis tempestatibus conflictatus est, semel juxta Accium, iterum, nec procul inde, ad *Cæraunia*: utrobique partem classis amisit; ipsa etiam in qua mundi Dominus ferebatur navis, vndam vndique accipiebat; sed cadente mox vento *Brundisium* in Italia, seditionis sedem,

*Metellius
pater & fi-
lius.*

remis enatavit; Ibi haud leviori militum motu exceptus, quam quo nuper in mari jactatus fuerat, totos septem & viginti dies rebus componendis dedit. Ordinatis verò militum desideriis, Samum repetit. Ibi dum recensendis pro more captivis operam dat, inter cæteros victoris judicium subituro producitur *Metellus pater*. Hic in prælio Acciaco Antonianarum partium dux fuerat, idemque Cæsari infensissimus, quique nullis vel præmiis vel promissis adduci poterat, ut relicto *Antonio* ad *Cæsarem* transfret; filius verò ejus *Metellus junior* pari studio & ardore animi *Cæsarem* sequebatur, fortemque & fidelem ei contra *Antonium* navabat operam; quamvis & patrem in adversa classe pugnare non ignoraret; nec ab eo forsitan, si in acie occurrisset, in tanta animorū concitatione declinasset. Fuso verò *Antonio*, ab ignorantibus quis esset, captus & inter alia ignobilia capita Samū ut diximus abductus fuerat. Fortè accidit, ut quum nomine citaretur Pater, filius *Octavio* assideret: qui quum patrem squalore quamvis & sordibus obductum, tamen agnovisset, subito profiliit; & genibus ejus advolutus totum lachrymis perfudit. Mox sedato vultu ad *Octaviū* reversus *Tib. Caesar*, inquit, *hic hostis fuit, ego socius; hic poenam meruit, ego præmium. Tu igitur aut propter me patrem serva incolumem, aut me cum illo simul perde.* Nec frustra tanta pietas in parentem fuit: cæteris damnatis, patrem *Cesar* filij lachrymis condonavit. Nec ita multò post circumito Asiæ Syriæq; & Ægypti littore, *Alexandriam* venit; urbem obsedit, deditamque recepit,

cepit; *Antonium* ad mortem adegit; nec nuntio contentus, jacentem vidit; *Cleopatram* vivam servasse voluit; sed mulier, ad quid asservaretur haud ignara, vitæ simul & conditionis in quam ceciderat vincula, ad motis pectori aspidibus, arripit; frustra indignante *Octavio* quod sui triumphum sibi ipvidisset. Romam inde reversus prima quæque tempora ludis & spectaculis, ad demerendos vulgi animos, eosque à præteritorum malorum sensu avocandos dedit. è quibus longè præcellentissimum erat pugnae *Acciacæ* simulacrum navale, cavato circa *Tiberim* in immensum sblo, & immisso flumine exhibitum; quo peracto, *Agrippam*, cujus forti fidelique opera in ea potissimum pugna usus fuerat, *Vexillo* cœruleo, ipso colore victoriam in mari partam denotante, donavit. Exercitus deinde per loca opportuna toto orbe Romano, & præsidia ad pacem semel partam perpetuò firmandam disposuit.

Inter alia, duo Castra navalia, alterum ad *Misenum*, alterum ad *Ravennam* constituit; Jacet *Misenum* ad mare inferum loco commodissimo, inter *Cumas* & *Neapolim* medio: quique antiquitus celebratus nomen à *Miseno* *Æneæ* tubicini ibi sepulto invenisse creditur. *Ravenna* vero mari supero imminet, inter duorum fluminum *Padi* & *Rubiconis* ostia posita; loco per se classibus haudquaquam opportuno; est enim, (saltem *Strabone* & *Procopio* auctoribus olim erat) totus ille tractus vadofus planè & brevibus impeditior; sed quum castrum navale ad maris superi tutelam omnino statueretur

Antonii & Cleopatre mors.

Cap. 3.

Duo castra navalia ab Augusto instituta.

*De fluxu
Maris ad
Ravennam.*

dum erat, nec alius opportunior ad eam rem ostenderetur locus, eo planè utendum erat; enimvero *cùm res ad consilia nostra trahi nequeant, nostra consilia rebus aptanda sunt.* Accedit eodem, quod in loci hujus difficultatibus enumerandis, illud Procopius Cæsariensis libro primo de rebus Gotthicis inter naturæ miranda recenset; quod primo quoque diluculo mare fluminis in morem, æstu se inferente, incontinentem ad viginti & amplius milliaria procurrat; indeque sero vesperi, æstu soluto, refluat; non tamen æqualem semper æstum esse, sed à coitu Lunæ crescentis, ad semilunium mare minus effervesce, à semilunio vero ad plenilunium, indeque ad alterum, decrescere sidere, semilunium, fluminis, ut dixi, in morem longè in terram proruerè affirmat; idque non solum ad Ravennam, verum etiam toto illo tractu ad Aquileiam usque obtinere docet; Quæ si ita sint, non immeritò ea *Procopius* inter rerum miracula ponenda censuit. & illud quidem sæpe percontando audiui, magis magnos in intimo illo sinu æstus, quam in litore Ligustico, Gallico, Hispanico, aut omni reliquo Mediterraneo mari fieri: idq; multis de causis evenire posse video; sed quod fluendi & refluentis tempora à sole, modus & mensura à luna pendeant, nisi auctore posito, dicere profectò non audeam. Quamquam quid ego hoc, inter naturæ miracula meritò adeo à *Procopio* relatum esse dixi? quum ex doctissimorum virorum scriptis non vnam eandemq; sed diversam planè æstum & reciprocarionum rationem pro locorum varietate esse didi-

didicerim. *Picus* certè Mirandulæ, Comes, dum Astrologos divinantes exagitat, sub zona torrida, nullam planè maris reciprocationem esse confirmat; ubi tamen Luna, utpote in loco perpendicularitèr subjecto, vires suas maximè exercere & ostendere debuerat. Idem ex *A. 022* *zare* philosopho Saraceni o docet, non esse eadem in mare accessuum & recessuum initia, ne quidem ubi nulla de finitore contrarietas reperitur; quod fieri non posset, si à Lunæ aspectibus res hæc penderet. deniq; quum Luna sub pedibus nostris constituta, fluxus tamen soliti in nostra horifonte fiunt, quî tandè id ex Lunæ, sive lumine, sive alia influentia causâ trahere possit, *Plavorinum* philosophum in ea re sequutus, exigit. Quid? quod doctissimus ille *Scaligerus* in quinquagesima secunda exercitatione ad Cardanum, in Oceani Sur littore Boreali nullum, in Britannico nostro vehementem undique æstum esse docet; in Australi Sur ad Beraguam littore validum, in Gallico & Hispanico, quàm mediterraneo obversatur, perexiguum, in Ligustico vestigium fluxus & refluxus nullum apparere contendit. Sed nec eadem ubique fluendi & refluendi spatia esse annotavit; *Maxima* parte senis, inquit, *fluit horis mare, totiesq; refluit*: ad Genegâ tamen Æthiopîæ quaternis horis accedere, octonis recedere testatur; addit deniq; & illud, in mare Calecutio pleniluniis, ad Indi Fluminis littora (nec longè quidè distant) noviluniis maris incrementa fieri equidè mirarer, nisi in nostro hoc oceano utraq; Lunæ mutatione æquè vehementes & ingètes maris auctus fieri viderè.

Caius verò *Cæsar* in libro tertio de bello Gallico, in littore Armoricano æstum bis semper duodecim horarum spatio se incitare, bis recipere affirmat. Eurypum enim septenosque ejus per singulos dies auctus & imminutiones, quis referente fama non audivit? Itaque si intimo illi sinus Adriatici recessui, suus sit, & à cæteris dispar accessuum & recessuum (quod *Procopius* affirmat) modus, ut insoliti forte aliquid, ita nihil planè miraculi in se habere censeretur debet. Illud modò apparet, statas has per diversa littora fluxuum & refluxuum vicissitudines, non à sole, non à luna, non à celestium signorum aliquo, sed à lege sibi à rerum opifice in prima mundi creatione indita, quamquam nobis hætenus incognita, pendere. Nam ad Lunam quod attinet, cum ea deficiente maris fluxus & refluxus nec uspiam nec unquam intermittere videam, equidem si tota è cælo tolleretur, suos tamen mari æstus non defuturos putem. Verum in causa præsentis hoc accedit incommodi, quòd non aliæ nunc dierum sint ad Ravennam & Venetiis, quam alibi terrarum maris vicissitudines; nec jam amplius ad solis ortum & occasum, sed ad lunæ quadras æquoris illius procursus & reciprocationes temperentur. Idem de littore, quod dixi, Armoricano, sat certa fama referente habeo. Non enim bis singulis duodecim, sed viginti quatuor horis fluit ibi refluitque mare. Unde è duobus alterum fieri necessum est, vel tantos authores, *Cæsarem* dico & *Procopium*, in rebus quas suis uterque oculis præsens spectavit, per incuriam hallucin-

hallucinasse, vel æstuum & reciprocationum aliam tunc, quam nunc dierum sit, fuisse rationem. Vtrumvis duriusculum; Sed enim in opinando liberum cuiq; et suū sit arbitrium: ego res, vel ut sunt, vel ut traditas reperi, referre, non juris modò, verum etiam officii mei esse censi.

Verùm ut ad *Augusti* navalia redeam, vtroque, tam ad *Misenum* quam ad *Ravennam* classis cum sex armatorum millibus partitis officiis stabat, & utrique classi suus Præfectus velut Amirallus datus erat. Hii univēsi maris mediterranei curam agebant; ut si quā vel Piratarum vel hostium classes se commovissent, eorum conatus primo impetu opprimerent. officia autem sic dispersita erant, ut *Misenensis*, *Galliam*, *Hispaniam*, *Africam* & *Siciliam*, cum *Insulis circumjectis*: *Ravennatensis* vero classis utrumque sinus *Adriatici* litus, *Peloponesum*, *Græciamque omnem maritimam*, *Propontidem* usque, cum univēso *Asiæ* *Syriæque* litore, & *Ægyptum* curaret. Quod si qua expeditio mari facienda erat, ad hæc duo loca conventus nautici indicebantur. Qua in re veteris Reipub. disciplinam correxit *Cæsar*. Illi enim oneris & impensæ tædio, silente in mari bello, omnē mox classis alendæ curam abjicere soliti. Idem & in ipso *Carthaginensium Imperio* vitium sæpenumero notatum. *Augustus* vero, ejusque institutum cæteri deinceps Imperatores ad aliquot secula sequuti, seu pax, seu bellum erat, classes in procinctu semper habuerunt. Magnū exemplum, & tibi Clementissime Invi-

Cap. 4.
Duc clas-
ses Romæ
na.

ctissi-

tissimeque Domine noster Rex *Carole*, quod jam facis, & semper precor facias, sequendum. Nemo enim eum bello tenerè lacefferit, quem expeditum ad resistendum & paratum ad vindicandum esse viderit. His certè artibus, hac virtute & prudètia tua, septentrionalis huius Oceani imperium longa pace jacens restituisisti, & antiqui illius Regis *Edgari* terra marique successoris verè te esse demonstrasti.

Cap. 4.

Liburnæ.

Magnum etiam *Augustus* in ipso genere navium, quibus ad bella vteretur, eligendo rationem habuit. Prælio Acciaco quanta vis Liburnis inesset expertus, non aliò deinceps genere classes suas constare voluit. Itaq; quas ad hæc tempora, vel ab ordinum numero triremes, vel ab usu bellicas, vel à forma, quæ à rotundis sive vectoriis distinguebantur, longas dixerunt, eas deinceps Liburnas omnes appellabant. Neque verò existimandum est Liburnas has tota sui forma à cæteris diversas fuisse; remis enim, & interdum velis ut cæteræ, totidemque remorum versibus pro magnitudine quæque sua agebantur: solo verò artificio & velocitate reliquis præstabant. unde *Appianus* in Illyricis, naves levitate & celeritate præstantes, *Liburnicas* à Romanis appellari solitas affirmat. Nam quòd ad Liburnas rotatas attinet, quas *Arcadii* deum & *Honorii* temporibus sub annum Domini quadringentesimum inventas, editisque libellis eorum nomini ab Anonymo nescio quo auctore dicatas fuisse legimus, ego eas meras nugas & vigilantis planè hominis insomnia fuisse puto. De quibus tamen elogia tot tamque exi-

*Liburnæ
Rotatæ.*

miæ

mia feruntur, ut cætera omnia navigiorum
 genera præ illis sordere & nihili faciēda esse pu-
 tes. *Liburna*, inquit, pro mole sui, proque machi-
 nis in se operantibus, tanto virium fremitu pugnam
 capessit, ut omnes adversarias *Liburnas* comminus
 venientes facili attritu comminuat, addit & illud,
 singulas rotatas decem aliis quibuscunque navibus
 prestare: quis enim, inquit, hujus viribus resistat
 quæ & terrestris vehiculi nōitur firmitate, & habet
 de navigiis celeritate remedium? Equidem mirari
 soleo, non solum *Stewichium*, hanc scilicet ad-
 mirabilem, ut ait, & novam planè *Liburnæ* ro-
 tatæ figuram, ab ignoti nominis & *Bæotici*
 pectoris autore desumptum, suis ad *Vegetium*
 doctissimis alioqui commentariis inseruisse, ve-
 rùm etiam *Guidonem Pancirolam*, virum Italum
 in suis *Notitiarum Imperii explanatioibus* idem
 ut faceret in animum inducere potuisse. Nam
 quis in bove, lento, ut scimus, animali ad tantam
 vim cum tanta celeritate inferendam impetus?
 quid? quod bobus, omni paulo vehementiore
 navis jactatione, procumbere, mugitusque hor-
 rendos edere, & ad quamlibet navis in alter-
 utram partem inclinationem ruinæ in modum
 procidere, mos est. Consultius profecto adhi-
 berentur equi: hii enim nave ventis agitata, &
 fortius consistunt, & quacunque vis tempesta-
 tis ingruerit, in adversum semper, & quidem
 totis quantum valent viribus, nituntur. Deni-
 que nulla historia rotatas hasce vsu vnquam re-
 ceptas, nedum aliquo in numero fuisse, docet.
Glasses igitur *Augustus* semper duas ad omnes
 occasiones in procinctu habuit. Quo consilio
 non

non illud modò effecit, ut mare omne Mediter-
raneum à bellis conticesceret, sed ut ne latro-
ciniis quidem, quæ pacem maritimam vt um-
bra corpus, sequi solent, infestaretur; Littori ve-
ro Italico, quâ mare Tyrrenum spectat, tanta
repente lux affulsit, vt quâ nemo antea larè fo-
vere ferè audebat, eò nunc, voluptatum cap-
tandarum causa popularitèr conflueretur: quæ
quum magna copia iis in locis humano ingenio
pararentur, tum fortuna ipsa nonnullas illo tem-
pore suppeditabat: è quibus vnâ, quum navi-
gationis speciem quandam præ se ferat, hoc
loco commemorasse, abs re ne fuerit.

Cap. 5.

*Delphini
Mansueti-
do,*

Puer quidam, dum Delphinum, juxta lit-
tus Campanum sub aquis ludentem cernit, in-
jecto sæpe panis frustulo in tantam sui consue-
tudinem pertraxerat, ut cibum de manu ejus
primum caperet, mox voce vocantem sequere-
tur, alluderetque sæpe, & demum terga pre-
menda adolescentulo præberet. crevit & puero
ex assiduitate fiducia. Itaque ut equi sic del-
phini se submittentis terga pressit: & delphi-
nus sessorem suum paululùm primò in mare
proiectum, rursus ad terram, veluti formidini
puerili indulgens referebat. Longiùs deinde
longiùsque, crescente cum consuetudine auda-
cia, in profundum inuictus, totum primum la-
cum Lucrinum, mox quicquid inter sinum Ba-
ianum & Puteolos maris est, per ducenta & am-
plius stadia, insidente semper puero & spectante
populo, peragravit. Nec hoc semel iterumvè
factum, sed sexcenties repetitum fuit: Tota ut
Roma, tota ut Italia veluti ad spectaculum
conflu-

conflueret, donec ad extremum res ipsa toties spectata miraculo spectantibus esse desit. Multi hanc rem grauissimis authoribus prodiderunt. *Caius Plinius* & *Julius Solinus*, ambo spectatæ fidei viri, quâ ab aliis bonæ fidei viris, tum ab ipso *Mecenate*, scriptis proditam fuisse referunt; Quibus ego *Appianû Alexandrinû*, testem, vt ipse de se in *Ægyptiacis* refert, oculatû adjungo. Neque verò hoc in isto vno delphino contigit. Nam & sub eodem fere tempore, alter ejusdem generis piscis in littore Hippo- nensi par sui spectaculum exhibuisse dicitur: eo mirabilius, quod non vni, vt ille alter, adolescentulo, sed cuilibet è populo se insidendum præbuit. Parùm vt absuerit quin ipse *Flavianus* tunc *Africæ* Proconsul rei periculû in se faceret. Manu certe belluam sæpe contrectauit & vnguento demum soporifero incautam inunxit; cujus injuriæ impatiens per aliquot menses hominum consuetudinem & conspectum vitauit; rediit tamen postea cum humano genere in gratiam, & veluti acceptæ injuriæ oblita, iterum se, vt priûs, visendam, palpandam, insidendam dedit. Par portentum de alio delphino ab antiquissimo authore *Egessidemo* in littore Asiatico proditur: planè vt vetus illa poetarum de *Arione* citharædo à prædonibus in mare projecto, & à delphino excepto, & in terram exposito narratio, non fabulæ conuicium, sed historiæ pœnè fidem apud me mereatur.

Rebus in Italia constitutis & *Ægypto* in Cap. 6.
provinciæ formam redacta, magna *Augustum*

E

interiora

*Troglodyto-
rum gens.*

inferiora finus Arabici loca scrutandi, & Romanae ditioni subdendi incessit libido. Itaque *Aelius Gallus* in Arabiam misit, ut eas gentes & loca pertentaret; *Æthiopum*que montes & *Troglodytas*, gentem Sinui Arabico ex *Ægypti* latere conterminam, sed Romanis ad illum diem incognitam, vel terra vel mari aggressus subjugaret; quippe referente fama inaudierat, ex omni tempore ditissimum hoc hominum genus esse, quique auro, & argento, & pretiosis lapidibus aromata sua permutarent, auri verò & argenti filiquam semel illatam, extra terram suam ad merces aliundè quærendas non transmitterent. Qua expeditione è duobus alterum se consequuturū existimabat; aut enim divitibus amicis vsurum, aut locupletes inimicos superaturum se esse non diffidebat. *Gallus* igitur quendam nomine *Sylæum Nabatæorum* populi legatum, tanquam locorum, & itinerum, & cuiusque gentis morum & consuetudinum peritum, itineris ducē adhibebat. In quo tamen nihil fidei reperit. Nam nec tutum iter, nauigantibus monstravit: & per auia, & longos anfractus, & loca omnium indiga, & littora importuosa ducens, classē vñdīq; vel occultis cautibus, vel cœnosis vadis & breuib; obiecit. Enimverò in ipso statim initio, eo peccatum fuerat, quod hortante *Sylæo* naues longas & bellicas *Gallus* ædificari iusserat, quarum nullus usus in illa expeditione futurus erat; neque enim bellum in mare, quod timeretur, erat; & in tantis locorum angustiis ipsa navium longitudo impedimento semper, sæpe &

& exilio erat. Veruntamen *Gallus* octoginta triremes aliaque biremes extruxit, quibus insuper centum & triginta onerarias adjecit. Cum qua Classe, & decem millium exercitu profectus, totos octo menses frustra, & inutiliter insumpsit, rediitq; inglorius, & non solum nullam facti gratiam ab *Augusto* retulit, verumetiam ægrè se, culpam in *Sylæum* rejiciendo, tutatus est.

Mortuo deinde *Augusto* successit *Tiberius* Cap. 7.

Cæsar: quo Imperante nihil planè in Mediterraneo motum est. *Germanicus* verò *Drusi* defuncti filius, dum *Tiberii* auspiciis Germaniam perdomaret, Classe primum fluviatile *Rhenum* amnem obtinebat: Sed quum pacata utraq; fluminis ripa ad aquarum divortia, & *Batauos* descendisset, de majoris generis classe paranda rationem iniit. Omnium quæ in Europa sunt fluminum maximum post *Danubium* est *Rhenus*. Hic longissimo tractu delatus, ubi ad *Cliviam* & *Skenkii* (ut nunc vocatur) *Scansum*, seu Castrum pervenit, in duo cornua se scindit. Quorum quod ad Occidentem vergit, veteres *Belgas* à *Batauis* determinat; & priscis accolis, ut author est *Cæsar*, *Uualis*; ut *Tacitus*, *Vabalis*; ut *Aimoinus* *Monachus*, *Walis* dicebatur: nunc verò *Wæll* dicitur. Alterum verò, nomen *Rheni*, ut ait *Tacitus*, ad Oceanum usque servabat; quod tamen postea *Flui*, & denum *Isle* nomine mutavit. Hoc igitur brachium ubi ad *Arenacum* siue *Arnheimum* descendit, paulatim ad dextram flectitur, & in spaciosum lacum, qui maris

*Rhenus
fluminis.*

instar habet, quique *Zuider Zee* nunc est, effunditur: Ad cuius os, castellum quoddam erat, *Fleuum* etiam vocatum, ut docet *Tacitus*; inter quod & *Helinum* (Castrum illud aliud erat, ad *Vahalis* seu potius *Mosæ* os, ut vult *Plinius*, positum) *Batavia* insula integra collocatur; idque *Adrianus Junius*, *Abrahamus Ortelius*, & alii ex gente illa doctissimi viri tradiderunt. Qua de re tamen, *Philippus Cluverius* litem illis, non ita pridem, acerrimam movit, & gravius in eos quam pro materia, aut quam doctarum gentium Jus finit, inuehitur: idque non solum in libello, quem de *tribus Rheni alueis & ostiis* inscripsit, verum etiam in latiore suo volumine, cui *Illustrata Germania* titulus est, exequitur. Nec tamen video, quid magis in ea re præstiterit. Tres nimirum *Rheni alueos*, totidemque ejus ostia esse vult; quid ni? totidè enim à *Cl. Ptolomeo* libro tertio *Geographiæ Rheni ostia* enumerantur, *Occidentale* nimirum *medium*, & *Orientale*. Sed hæc antiquitus fuisse nego; Indicio fuerit clypeus ille *Ænea* à *Vulcano* olim faberrimè cælatus, & à Poeta in octavo *Æneidis* suæ libro illustratus; ubi *Rhenus bicornis*, hoc est, non triū, sed duorū cornuū seu ostiorū flumē esse dicitur: quibus tertiū postea ex fossa illa, quā *Drusus Augusti* priuignus in illa terra duxit, & *Drusiana* dicitur, hominū opinione, accessisse potuit. Veterum enim plerique *Drusi Fossam*, ut erat, fossam, non *Rheni alueum* appellarunt; Itaq; & *Pomponius Mela*, qui temporibus subinde *Claudianis* scripsit, duorum tantum alueorū & ostiorū meminit;

*Rheni ostia
duo.*

nit; & *Clandianus* Poeta qui *Honorio* denum
 Imperante vixit, veterem morem sequutus,
 Rhenum *bifido* in Oceanum Germanicum *mea-*
tu effundi, in primo de rebus Geticis libro ce-
 cinit; *Plinius* verò, qui medio inter hos tem-
 pore scripsit, tertium Rheni os subindicat, po-
 tius quàm demonstrat; solus *Ptolomæus* *Plinio*
 subtemporaneus, tria, ut dixi, ora posuit. Sed
 major nunc restat controversia, quænam è tribus
 fossa illa *Drusiana* fuerit, aut vbi collocanda:
 ut hoc percepto, quæ natus Rheni ostia, quiq;
 veri *Bataviæ* fines fuerint, intelligatur. Quum
 enim dextrum Rheni brachium, vbi ad *Arn-*
heimum descendit, in duos rursus alueos ab-
 eat, quorum alterum, dextrorsum flectitur,
 & per lacum, qui *Zwider Zee* nunc dicitur, in O-
 ceanum ejicitur, alterum recta *Lugodunum* si-
 ue *Lugdunum Batavorum*, quod *Leiden* nunc
 est, delabitur, *Cluverius* hunc scilicet natium
 Rheni alueum, *Batauos* à Germanis ab Oriente
 terminantem esse contendit; alterum verò il-
 lum ab *Arenaco* usque dum *Nabaliæ* flumini
 conjungitur, *Drusi* Fossam esse pugnât: quod
 nullo mihi iudicio facere videtur; primum e-
 nim, si hoc Rheni ab *Arenaco* ad *Nabaliæ* flu-
 uium diuergiū *Fossa Drusiana* sit, quid tandem de
 tertio Rheni alueo fiet? aperte enim constat
 hunc, qui in *Zwider Zee* exit, ante Fossam illam à
Druso in eum, ut vult *Cluverius*, ductam, Rheni
 alueum non fuisse, sed *Nabaliæ*. Deinde, quid
 si nulla unquàm *Nabalia* fuit, in quā *Drusi* Fossa
 illa duci potuerit? nomen certè *Nabaliæ* semel
 tantum, ni fallor, idq; apud *Tacitum* sub ipsum

historiæ ejus finem inuenio; nullam autem ejus vel *Tacitus* alibi, vel *Strabo*, vel *Plinius*, vel *Solinus*, vel *Mela*, vel *Ptolomeus*, vel antiquiorum quisquam mentionem facit; quæ si non essent, hunc tamen ipsum *Taciti* locum *Iustus Lysius* emendandum, & pro Nabalia Vahalim ponendum esse censuit: & meritò; Res enim ipsa, qua de ibi agit *Tacitus*, non ad Germaniam, quæ dextro Rheni alueo à Batauia excluditur, sed ad Galliam, quæ Vahali terminatur, pertinet; Postremò *Ptolomeus* Orientale Batauorum latus fluuio Rheno à magna Germaniâ determinari monet. Hoc autem quis non videt, de Transisclana regione intelligi? præsertim quum idem *Ptolomeus* Germaniæ magnæ, hoc est, *superioris* situm adornaturus, Occidentale ejus latus Rheno vbiq; amne terminari doceat. Quis autem vnquam aliquam Batauiam particulam, quæ modo inter Fleuû, quod dixi, & Helinum locatur, & Hollandia nunc est, magnæ Germaniæ ascribendam esse censuit? Verum ne qua sit vltra dubitatio, quibus tandem finibus claudatur Batauia, illud primo ex *Taciti lib. secundo Annalium*, constat, duos Rheni alueos Batavorum insulam, alterum ab Occidente, alterum ab Oriente claudere; nec de occideo siue sinistro ejus alueo vlla dubitandi ratio subest; Vahalem enim cum *Tacitus*, ut dixi, appellat; de orientali vero sic; *Rhenus*, inquit, *apud principium agri Batavi, velut in duos amnes diuiditur, seruatque nomen & violentiam cursus, quâ Germaniam præuehitur, donec oceano misceatur.* Ex quo profecto efficitur, quod

quod ubicunque dexter siue orientalis Rheni alueus in Oceanum effunditur, ibi insulæ Batavæ terminus simul ad Orientem statuendus sit: id verò à nullo autore æque certò traditur, atque à Pomponio Mela libro 3. de situ orbis, *Rhenus*, inquit, *ab Alpibus decedens, haud procul à mari huc & illuc dispergitur: sed ad sinistram amnis etiam tum & donec effluat Rhenus. Ad dextram primo angustus & sui similis: post ripis longè & latè recedentibus jam non amnis, sed ingens lacus, ubi campos implevit, Flevo*, (nomen haud dubiè à Latino fluviò detortum) *dicitur, ejusdemque nominis insulam amplexus, sit iterum arctior, iterumque fluviùs emittitur. Addam & doctissimi viri Joachimi Vadiani ad hunc Mela locum Commentarium, Cornelius Tacitus, inquit, libro tertio Fleuum castellum esse ait, propè Rheni in oceanum exitum, à quo aut sumptum nomen, quod alveo daretur, aut certè mox ab alveo natum retereatum est. Ex quibus profectò efficitur, alveum illum quem Tacitus nomen Rheni servare, & Germaniam præteruehi dixit, eundem esse, qui in Fleuum lacum, hoc est, in *Ziinder Zee* primum, & deinde in Oceanum inter Enchusennum & Worchum effunditur. Rhenus itaq; hiis duobus cornibus Bataviam complectitur: & quicquid terrarum hoc spatio continetur, *Batavorum Insule* omne accenseri debet; nec Calculi Pliniani, si quis sit, error tam certos & à natura præstitutos terminos movere debet. Restat igitur, fluviù illum, qui ab Arenaco Lugdunum descendit, & inde olim, nullo lacu medio, in oceanum decurrebat, non*

natiuum, sed factitium, & *Drusi* plane *Fossam* esse, eamque illustrem illam Batavorum Insulam; non ad Orientem finire, quod vult *Clauernius*, sed mediant fecare. Nam ad illam *Vignéri* in suis ad *C. Casarem* *Commentariis* sententiam quod attinet, qua ex doctorum quorundam (vt ait) opinione, *Drusi* *Fossam* illam esse putat, quæ à dextro *Rheni* brachio supra *Arenacum* ducta *Roterodamum* perducitur, planè eum non à *Druso*, sed à *Civili* homine *Batauo*, postea ductam fuisse, non alii modo, verùm etiam ipse *Clauernius* existimauit: & propterea medium *Rheni* ostium haud perperam ad *Lugdunum* in sua *Tabula*, non ad *Roterodamum*, collocauit. Quibus de rebus hactenus dicendum esse existimaui, non vt me *Cosmographorū* litibus immiscerem, sed ne *Batauorū* genti, terrestri militia jam tum claræ, futuris verò temporibus vsu etiam nauali cum primis nobilitandæ, suos interim fines in obscuro (sitamen id hac breuitate perfecero) esse sinerem.

Cap.8.

Germanicus igitur cum *Cauchos*, hoc est, *Frisios* quotquot inter *Amasiam* & *Visurgim* fluuios incolebant, subigere in animo haberet, nec eò terrestri itinere propter vastissimas paludes, terræque labem, & voragines anfractusq; maris longis tractibus in terram procurrentes, sine ingentibus & insuperabilibus difficultatibus perueniri posse peruideret, mille carinarum classem fabricari iussit; nec jam ampliùs scediis & fluuiatilibus ad *Oceani* impetum fidere ausus, iustas triremes magno numero instrui curauit. Hæ verò omnes ambiguæ inter
longas

longas & rotundas, hoc est, inter bellicas & onerarias formæ, ipso *Germanico* modum monstrante, erant; utque longis breuiore, ita onerariis longiores erant, ventre modò ad onera ferenda projectiore. In quo genere navium illud præcipuum erat, quod quum reliquæ ferè omnes, puppes à carina repandas haberent, istæ non minus has quam ipsas proras fastigiatas & acutas, ad vim fluctuum leuius transmittendâ, autore *Tacito*, habuerunt. Multi sæpè duces navibus nouandis animû adjecerunt: sed nemo vnquam *Germanico* solertiùs; quicquid enim alii priùs adinuenerant, id omne suæ Classi instruendæ nulla inuidia adhibuit, carinas nempe ad vada transmittenda planas & tabulata ad tormenta ferenda toto fororû spatio strata. Sed in eo omnes ante se Romanos Græcosq; & Punicos Imperatores inuentionis acumine superauit, quod non solum proram puppinque pariter acuminatas fecit, verum etiam vtrique gubernaculum appendit: in eum scilicet finem, ut si in angustos flexuososq; canales, & veluti angiportus maris, quâ progredi non licebat, incidissent, conuersis saltem remis, tutò & expedite viâ quâ venerant redire possent. Quam rem, loci natura considerata, præsentì ad omnia, quo plurimum valebat, ingenio excogitauit. Erat enim totus ille tractus, ut vbique ferè vadofus, & plerisque in locis hinc arenarum, illinc cœni objectu minimè peruius, ita angustissimis hic, illic, sed profundis vbique alueolis natabilis; in quos si incidissent, nulla circumflectendi, propter navis in arcto deprehensæ longitu-

longitudinem relinquebatur ratio. Restabat modo ut per eosdem tramites quibus venerant, se referrent: id autem per tam multiplices flexus & veluti mæandros sub aqua latentes, nisi pro-
 ra, quæ erat, in puppis vltum versa, & regimine appenso, fieri nulla ope humana potuit.

Cap. 9.

Germanicus instructa classe Fossam Drusianam ingreditur. Quumque aliis Ducibus & classium Præfectis mos esset, inter orarum solutionem, Deos maris, exitis & precibus placare, ille pro omni Numine *Drusum* patrem in summa puppe stans inuocauit. *Druse pater*, inquit, *qui primus hac ducta fossa viam Romanis in Septentrionalem oceanum aperuisti, adsis o: meque tuum filium, tus vestigia, & virtutum tuarum exempla sequutum, rerum à te gestarum memoria præsens iuva. Neve me Imperium Romanum ultra Albim proferre conantem desere: sed vexata olim Italiae pænas à Cimbris exigentem tuo Numine confirma.* Quibus nuncupatis, stricto ense retinacula abruptit: & secundo flumine delapsus in oceanum nunquam ante à Romano remige tentatum euasit. Lestoque Frisiae Occidentalis littore Amisium amnem subit. Hic amnis *Ptolomæo* Amisius, audit. *Straboni* Amasia dicitur: in quo *Bructeros* à *Druso Germanici* huius patre prælio nauali superatos fuisse narrat. Nec aliud habeo, quod de hac pugna referam, quam commissam fuisse. Flumen ipsum nunc *Esme* vel *Eme* dicitur; ad quod nobilissimum Frisiorum emporium *Emdena* civitas conspicitur, pauloq; inferius ad mare & Aquilonem *Nordesme*, vulgò *Norden* dicta.

dicta. *Germanicus* ubi flumen cum classe subiisset, milites ad læuam, quæ orientem spectat, exposuit, Canthosque minores, qui nunc Frisii orientales sunt, multa virtute concidit. Mox interiora regionis illius ubi penitus intrasset, Bructeros iterum, & omnes inter Amisiam & Visurgim, siue Vesurim amnes, (qui nunc variato paulum nomine Weser est,) terras, hoc est Oldenborchiam, vniuersamq; Westphalam & Saxoniam ad Albim vsque fluuium victricibus armis, peragrauit. Erat *Germanico* animus, transmissio Albi flumine, longius ad Orientem, & Septentrionem pergere, & à Cimbris, hoc est, Danis, qui Cimbricam Chersonesam incolunt, vallatæ olim *C. Marii* temporibus Italiæ, pœnas repetere. Idque prius *Druſus* pater tentauerat: sed ut refert *Dion*, mulier quædam insolitæ, & ultra humanam speciem augustæ magnitudinis & formæ, tranſſenti obstitit; & nequid ultra tenderet (quippe rerum gerendarum cum vita finem ei jam instare) monuit. Rediit igitur *Druſus*, & in itinere, contracto cum hoste inter Salam, veterem Francorum sedem, & Rhenum fluuium certamine, & egregia parta (quod multis sæpe ducibus contigit) de hostibus victoris, occubuit. Ad *Germanicum* verò hoc tempore reuocandū Dæmone aliquo opus non erat; ipse enim *Tiberius*, viri successibus inuidens, & virtutem suspectam habens, oculosque non militum modo, verumetiam populi Romani, omniumq; mortalium in eum, veluti in nouū aliquod sidus coniectos videns, & successorem indubiè designatum ti-

mens,

*Germani-
cus sublatu.*

mens, sub specie honoris Romam, ut dixi, reuocauit, & ad motus, longè scilicet in Oriente componendos, amandauit: ubi demum virum omni laude, omni amore & memoria dignum veneno tollendum curauit. Quo uiuo quis homo esset *Tiberium* in occulto fuit, sublato, statim apparuit. Crediderim fati ita datu fuisse, ne *Populus Romanus* ultra *Albim* ad Septentriones imperium promouerent: huncque illis terminum ad *Aquilonem*, ut *Euphratem* ad Orientem positum fuisse. Sua nimirum ciuitatibus & imperiis sunt fata, & fines à Deo constituti: quos ultra si tetenderint, cum clade semper & ignominia mortales redierunt.

Cap. 10.

Germanici verò è *Germania* cum classe reditus, non perinde lætus erat, atque accessus fuerat. Redeuntem infanda tempestas inuasit, disiectamque toto Oceano classem ad nostras has, *Orcadasque* & *Ebudas Insulas* allisit. Magna certè tantæ classis pars fluctibus hausta periit. Quid? quod ipsa, qua *Germanicus* utebatur, triremis vim maris ægrè, nec nisi lacera undique, & auulsis armamentis, effugit. Qui vero ex longinquiorebus quibusque regionibus superstites demùm redierunt, ii omnia in maius augentes, miracula quisque sua certatim referebant. Hic vim turbinum, ille nouas volucrum & belluarum marinarum facies: nec deerant qui ambiguas hominum & ferarum formas in hac nostra *Britannia* visas enientirentur. Tantus certè *Germanicum*, ob eladem sua, ut ipse interpretebatur, temeritate & culpa acceptam, seu dolor, seu pudor ceperat, ut vix sibi, quin vim
vitæ

vitæ suæ inferret, temperauerit. *Tiberius* ægrum animi datis literis consolatur: id vnū agens vt eum inde primo quoque tempore abstraheret. Cladis enim naufragio acceptæ famam, ipse *Germanicus* terrestribus præliis & victoriis de Cheruscis, Cattis, aliisque interioris Germaniæ populis mira virtute & felicitàte partis, captâ statim terrâ, aboleuerat; nec dubitabat, quin breui admodum, si concederetur, spatio, totam Germaniam Romanæ ditionis, & pacatam faceret. Militem etiam sua quemque ex naufragio damna profiteri iussit: & iuxta professionem refarcivit. Quæ res inuidiam & metû *Tiberio* impensius auxit, & recentē insuper causam, iuuenē tanta indole præditū properantiûs domū reuocandi, & demum perdendi præbuit.

Tiberio verò successit *C. Caesar Caligula*; dig- Cap. 11.
nior ille auo *Tiberio* per adoptionem nepos, quàm *Germanico* parente per naturam filius. Ludos quinquennales *Augustus* Accii, vt diximus, ad perpetuam victoriæ naualis ipso loco partæ memoriâ conseruandum constituit. Hos inito statim imperio *Caïus* abrogauit: Rei scilicet tam funestæ sensu animos ciuium quotannis refricari, parum ciuile esse distitans. Mox veluti maius quid & populo gratius ipse facere pararet, ingens inter Baias & Puteolos maris brachium, trium millium & sexcentorum passuum longum, ponte nauali, contractis ad hoc opus vndique è Sicilia & Italia nauibus, junxit. Quarum multitudo quum destinato operi non sufficeret, reliquas à carinis properè ædificari iussit. Duplex autem erat per tam ingens

Pugna Acciæ monumentum à Caligula aboletum.

Pons naualis à Caligula factus.

gens spatium nauigiorum ordo; anchoris vtrinque jactis, superinjectoque terræ aggere, ad viæ Appiæ similitudinem directus; scilicet, ut ipse cum exercitu, terrestre per aquas iter, seu pede, seu equo, seu curru, faceret. Mane igitur quo expeditio hæc suscipienda erât, thoracem, quem *Alexander ille Macedo* dum Persiam subigeret gestasse ferebatur, indutus, gladio se cinxit, clypeumque sumpsit, & quernam coronam capiti aptauit. Tum sacra *Neptuno*, diisque aliis pro more fecit. Præ cæteris Inuidiam impensius placandam esse censuit. Veritus scilicet, ne quis rem tam præclarè susceptam tamque fortiter gerendam transuersis oculis aspiceret. Quibus rebus sic constitutis, à Baiis iter ingressus, naualem aggerem equo phalerato conscendit, equitum peditumque turmis stipatus, vix diei itinere Puteolos sero vesperti peruenit. Ibi tanquam ex longa difficilique viâ & ipse fessus positus armis decubuit, & militem corpora curare iussit: monitos prius, ut manè signum attentius expectarent; quo dato, ocyus omnes ad imperia accipienda concurrerunt. Ipse mora posita, primo diluculo currum conscendit, & eadem, qua pridie equo venerat, nunc bigis inuectus viâ rediit. A dextra læuaque; diversoria, ne tantus exercitus tantum iter ingressus rerum inopia dilaberetur, extructa; nocte vero tota, non solum ex ipso aggere, & diuersoriis ad junctis, verum etiam ex vicinis montibus, faces & tunalia sic illuxerunt, ut par diei lumen esset. Et primæ quidem nox magna sollicitudine, adhibitis vigiliis, utpote ipso

Indupe-

Induperatore in maximo discrimine constituto, exacta; secunda vero epulis & commessationibus, tanquam victoria jam parta, data est; nequè quid pompæ deesset, suggestum collocatur; quo consensu orationem rei accommodatam habuit; militiæ comites & laborum periculorumque socios appellat; & multos quidem Imperatores naue vectos transfretasse, se vnum equo primum, deinde curru etiam, profundum mare percurrisse dixit: *Darium* subinde & *Xerxem* Persarum Reges, quorum ille Bosphorum, hic Hellespontum suo quisque ponte junxerat, tanquam impares & minora ausos cauillatus. Durarent modo, seque rebus secundioribus seruarent; se enim tantæ virtutis tantorumque laborum, & egregiè secum nauati operis memoriam nunquam animo positurum. Inde ad ludicra conuersus multos è plebe qui ad spectaculum concurrerant, & cum illis nonnullos amplissimæ dignitatis viros, è ponte in mare cum cachinno proturbari iussit. Ex hiis magna pars, tranquillo quamuis mari, joco proturbati seriò perierunt: cæteri vel vnda marina inter natandum grauidi, vel fractis nauigiorum collisione membris, mutili deinceps, aut debilitati, & tota vita inutiles emerferunt. Accedat eodè & altera hominis infania, quam non meis, sed *Tranquilli Suetonii* verbis inferam: *Fabricius*, inquit, & de cedris liburnicas gemmatas puppibus, versicoloribus velis magna thermarum & porticum, & tricliniorum laxitate: magna etiam vitium & fructiferarum arborum varietate, quibus discumbens de die inter choras & sympho-

nias littora Campaniæ peragrabat. Isto scilicet modo Demetrium, Ptolomæum, Hierona reges, operum magnificentia & rerum in mare gestarum gloria superaturus. Neque vero ludus iste suo luctu caruit: Temulentus ipse in mare & fluctus non sine periculo sæpe ruebat. Quod idem si quis sobrius aut sanus facere neglexisset, ut desertorem & læsæ Cæsareæ maiestatis reum ad mortem continuò adigebat. Multos hæc pestis absumpsit: Inter alios, ipsum ejus socerum Syllanum: quanquam satis constabat, valetudinarium, & nauseam maris haud quaquam ferentem, abstinuisset. Veritus deinde ne soluto mox ponte nauali expeditionis fama vnà interiret, alium ex lapide quadrato ipso loco, quamuis alienissimo, nec vllò vnquam vsu futurum, extruxit: cujus vestigia etiamnum, ut puto, manent. Villamontius certè Gallus, suarum peregrinationum libro primo, tredecim ejus arcus anno Domini millesimo quingentesimo octuagesimo octauo integras à se vias refert.

*Sinus Baiæ
nunc ponte
lapideo jun-
ctus.*

Cap. 12.

*Expeditio
à Caligula
contra Oce-
anum Brit.
suscepta.*

Cæsar triumphato jam Marî Mediterraneo, majora animo moliri cœpit; nihil actum ratus nisi suis tropæis & Oceanum adjungeret. Quoniam verò tam vastum tamque indomitum & ferum hostem aperta vi, & veluti per fœciales indicto bello, aggredi non audebat, ideo per insidias agere, & incautum opprimere consultius esse judicabat. Expeditionem igitur in Batauos, gentem, ut scimus, maritimam, & Oceano expositam edicit. Fit apparatus, quantus ad vniuersam siue Galliam, siue Germaniam subigendam satis esset, Ostia soluens Marsyliam in Gallia

Gallia peruenit. In itinere bis pœnè submersus est: semel non procul Genoa; iterum ad Stoicadas, quæ vocantur, Insulas. Inde terra iter ingreditur, nunc citato agnoscere, nunc lectica inuectus. Ducem verò sic seuerum, & antiquæ disciplinæ egit, vt Legatos in tempore non occurrentes è vestigio missos cum ignominia faceret. Vbi ad Batavos ventum erat, primum impetum in Rhenum fluvium effudit; cum ponte junxit, sicque transgressus cum exercitu statim rediit; tanta, præ metu nulla causa contracto, festinatione, vt quum pontem turba fugientium obstructum reperisset, per capita & humeros stantium transcurreret. Inde ad mare digressus tentoria in littore statuit. Ipse triremi paululum in Oceanum prouectus, quum nihil incommodi à fluctibus sensisset, eam victoriæ confessionem interpretatus, ad littus rediit. Antequàm oram solueret, militibus seuerissimè edixerat, vt occasionibus intenti starent, signoque accepto mandata maturè exequerentur. Vbi terram reuersus pede attigisset, milites quid tandem imperaret de more expectantes, per præconē, conchas & umbilicos in littore magna copia jacentes pro se quemq; tollere, galeasq; & sinus complere iussit. Has ille nugas, *Oceani spolia*, Joui & Capitolio debita, appellabat. Itaque pro se quisque conchas, alii collo, alii brachiis innectere; vt si quis nunc dierum exercitū per eandem Galliam sic incedentem cerneret, peregrinos votiuos à monte *Sancti Michaelis* redeuntes se spectare crederet. Triremem verò qua vectus tantam
D
victoriam

viſtoriã indeptus fuerat, terreſtri itinere Marſylianã uſque & inde Romã deuehi imperauit. Sed nec hic ſubſtitit hominis inſania. Nam & de Oceano Romæ triumphauit. Totus verò deinceps libidinibus & cædibus vacauit. Cædes autem partim ferro, partim veneno abſoluit. Refert denique *Suetonius* arcam quandam ingentem poſt mortem in ſecretis ejus inuentam diuerſorum venenorum plenam: eam *Claudius* ſucceſſor, ne quæ intus erant venena aerem inficerent, profundo mari demergi curauit. Tanta autem fuit venenorum illorum vis & copia, ut ipſa maria inde temerata fuiſſe conſtet: piſcesque enecti, in vicina littora paſſim ejecti conſpicerentur.

Cap. 13.

De lacu
Fucini e-
miſſione.

Cæſo ſucceſſit *Claudius*: egregius & ipſe in mari bellator. Lacus erat quidam in Italia, qui Fucinus dicebatur, ingens agri ſpatium complexus. Hic lacus, vicini populi multis vicibus ab Imperatoribus contenderant, ut emitteretur. Nec Romæ deerant qui ſuis impenſis id ſe facturos promitterent, ſi ſiccatus ager ſui juris fieret. *Claudius* verò rē ad ſe trahere maluit. Itaq; totis vndecim annis, triginta hominum millibus nocte dieq; operam nauantibus exciſus per tria paſſuum millia mons eſt; & ingens foſſa, in Lirim annem perducta. Sed antequam emitteretur, pugnam naualem in ipſo lacu inſtituit: de qua diuerſi diuerſa tradiderunt. *Suetonius* ut rem haud magnam, ſed crudeliter exercitam commemorat. Claſſes alteram Siculam, alteram Rhodiam vocatas, duodenarum triremium ſingulas fuiſſe, ſcribit: cumque

Pugna na-
ualis ſimulacrum.

cunIQUE concurrENDUM essET, & Gladiatores nautici, *Aue Imperator, Morituri te salutant*, exclamarent, respondisse Claudium, *Vos quoque Aue*: quam iuocem quum sic omnes acciperent, quasi gratia eos dignatus esset, & proinde à pugna abstinerent, diù cunctatum Imperatorem, an ferro, & igne omnes absumeret, tandem profiliisse, ac per ripam indecorè discurrerentem ad pugnam compulisse refert. *Tacitus* aliter rem, & quum ciuilius tum magnificentius gestam narrat: naumachiam enim hanc, *Augusti* illa longè clariorem & genere nauium & pugnantium multitudine fuisse refert; leuia illic nauigia, hic triremes omnes catapultis ballistisque ad pugnam instructas: milites ibi non multos, hic vndeuginti millia fuisse, scribit: & quamuis omnes fontes; & pœnæ serui essent, fortium tamen virorum ingenio vtrinque pugnatum; & post multa illata acceptaque vulnera, & egregia edita virtutis specimina, clementia Imperatoris occidione exemptos fuisse tradit. Illud certè constat, pugnae naualis simulachrum, si verà à *Tacito* traduntur, à nullo vti-
quam Romanorum Duce, huic par exhibitum fuisse: in quo illud spectantium oculos mirificè affectit, quod quendam veluti Deum marinum Tritona medio è lacu cum buccina surgentem, & pugnam cantu cientem intuerentur. Expeditionem deinde in hanc nostram Britanniam *Expeditio in Britanniam.* à *Julii Caesaris* temporibus omissam suscepit, transmissoque à portu Iccio siue Gessoriaci exercitu, paucis diebus, præliis aliquot feliciter commissis insulae partem quæ defecerat recepit,

& in prouincia formant redegit, trecentos inde & amplius annos duraturam, Romamque reuersus triumphauit: triumpho verò adiecit Coronam naualem, quam in Palatinæ domus fastigio, vt edomiti à se Oceani Britannici tesseram, suspendit.

• Cap. 14.

*De Portu
Iccio.*

Quo in loco rem à tot scriptoribus tractatam intractam libens non prætermiserim. *Claudianus* Imperatorem Romanum, quum Britanniam peteret, à portu Iccio siue Gessoriaci, soluisse diximus: Nempe portus is erat, vnde Romani semper, Duces & exercitus trajicere solebant: sed quis tamen ille locus nunc sit, aut vbi positus, Calesiæ, an ad Audouaropolim, Boloniæ, an ad Vitsandiam, Sclusæ, Brugis, Gandauæ, Duinkirkæ an denique Mardicci, inter doctos, non dubitari modo, verum etiam dimicari video. Quæ res eò mirabilior videri potest, quod *Pomponius Mela* Gessoriacum non solum in Morinis statuit, verum etiam ipsos Morinos nihil hoc portu notius in se habere tradat: & nunc tamen (quæ sunt antiquitatis tenebræ) non solum de Iccio & Gessoriaci, verum etiam de ipsis pænè Morinis, qui homines fuerint, vbinam terrarum positi, saltem quibus finibus clauderentur, quæritur. Galli plerique, & inter illos Viginerus, qui *Julii Cæsaris* commentarios, non lingua solum Gallica donauit, verum etiam doctissimis suis annotationibus lucidiores Gallicè scientibus reddidit, portum Icium, hoc est, Gessoriacum Calesiæ ponit. Id vero *Michael Hospitalis*, magnus olim Franciæ Cancellarius, primus

mus refutauit, eunq; sequitur *Gulielmus Camdenus* nostrâs. Rectè quidem vterq; de re ipsa, meo iudicio, sentientes, sed parum firma ratione freti: *Calesiam* scilicet urbem ium fuisse negant: atqui non urbem *Cesar*, sed portum quærebat: utque *Ephesus*, nobilissima postea *Asiæ* ciuitas, à *Lyсандri*, ita *Calesia*, vilis antea porticulus, à *Cesaris* delectu incrementa cepisse potuit. *Camdenus* verò, ut *Calesiam* refutat, ita medium, eam inter & *Boleniam*, locum, qui ab arenularum albedine, *Anglorum* (qui plurimum toto illo tractu aliquot sæculis potuerunt) idiomate, *Whisandbay* dicitur, portum *Cesaris* præbuisse putat: tanto ille, ut opinor, veritati, quanto locus ipse *Bolonix* propior. Prodiit verò non ita pridem libellus à *Jacobo Chisletio*, *Infantis Isabelle Clare Eugenie*, dum vixit, Medico cubiculario, doctè quidem & eleganter scriptus; in quo nouum opus aggreditur, & portum *Iccium* non alibi quam ad *Mardicium* *Flandrorum* collocat. Portum enim *Iccium* & *Gessoriacum* eundem esse dicere, communi planè sensu carentis esse putat. *Nominis* affinitatem, viam à *Casleto* *Mardicium* ferentem, *Pharum* ibi stantem, & fumantem, pro causis affert. Quæ omnia verissima, ut quidem puto, sed sine causæ præiudiciò esse possunt. Nam quod ipsum *Iccium* ad *Flandros* nunc transfert, miror si *Galli* de termino moto, vel finibus regundis, actionem ei non inxendant, præsertim quum fatis ita datum esse contendat, ut ubicunque portus *Iccius* reperiatur, ibi maris imperium simul esse necesse sit. Itaq;

Portus Iccius.

ut liberam aliis quod velint sentiendi arbitrium relinquo, ita quid ipse hac de re sentiam, pari libertate, sed breviter ostendam; quippe qui magis civile esse putem, suam quemque edere, quàm alienam carpere sententiam. Ego igitur eundem Iccium & Gessoriacum portum esse, & omni tempore fuisse, audacter affirmo: & utrumque ad Boloniam Gallorum pari fiducia pono. Ut ut enim tres Romanis portus in adversa Britannia erant, ubi terram capere solebant, *Lemanus*, quæ nunc *Hyda* est, *Dubris*, & *Rutupia*, quæ *Sandouiscus* vulgò esse creditur, vnicus tamen toto Morinorum littore portus, in Britanniam è Gallia trajecturis, erat. Is à *Julio Cesare* Iccius, à cæteris omnibus Gessoriacus dicebatur. Neque enim ego à *Ptolomæo* vestigiū decesserim; sed quum ille Gallia Belgica descriptionem adornaturus, post Sequanae & Phrudis fluminum ostia, Orientem versùs, *Iccium* statuatur promontorium; eique proximum in Morinis *Nauale Gessoriacum* subjungat, quidni ego eundem portum, & à promontorio Iccium *Cæsari*, & ab vrbe, Gessoriacum reliquis dictum fuisse putem? nec ego hac in causa nomina aucupanda esse censeo. Videatur *Antonini Itinerarium*; ibi à Gessoriacensi hoc portu viam, eamque militarem ad Bauacum Beauvoisinorū metropolim per Tetrovanam & Tornacum, Romam denique ducentem reperies; à Vitsandia, à Calefia, à Mardiccio nullam. Tabulas Putingerianas, ad *Antonini* fortè *Itinerarium*, descriptas inspicere: ibi viam militarem eodem ordine delineatam

neatam aspicias : & hoc amplius, verba hæc signanter adjecta, *Gessoriacum quod nunc Bononia*. Extat etiam Rhenani in eandem rem testimonium. *Sunt*, inquit, *de Gessoriaco varie conjecturæ, sed tollit nobis omnem ambiguitatem charta militaris, quam apud Chunradum Putingerum nostrum Augustæ vidimus*; Futile autem est, quod à quibusdam affertur; aliud fortasse portum, aliud vero nauale Gessoriacum fuisse. *Ptolomæi* de portu nihil, de nauale Gessoriaco tantummodò mentionem facere. Quasi verò nauale vllum extra portum reperire sit: aut nauale Gessoriacum, in portu siue Caletano, siue Mardicciano quærere, alterius quam hominis planè cæci esset. Valeat & illa, apud prudentem lectorem ratio : frequentissimus è Morinis trajiciendi locus qui fuerit, eum extra controuersiani portum & Iccium, & Gessoriacum censerì oportere : is autem non Caletæ, non Mardicci, non ad fanum Audomari, nec alibi toto Morinorum littore, quam Bononiæ erat. Author est non vno in loco *Ammianus Marcellinus*; primùm in vita *Constantii & Juliani*, vbi à Constantio Parisiis tum agente Lupicinum ad Britanniarum res componendas missum, *quum Bononiam venisset*, inde in Britanniam tramisisse refert. Iterum vero in vita *Valentiniani & Valentis*; vbi *Theodosium* à Bononiæ littore in aduersam Britanniarum ripam trajecisse scribit. Erat autem hic, vt diximus, non frequentissimus modo, verum etiam vnicus Romanis toto illo tractu ad transmittendum in Britanniam delectus locus. Portus vero ipse, vt à *Julio Cesare* prop-

Morini.

ter vicinum ejusdem nominis promontorium, Iccius dictus erat, ita Claudianis mox temporibus, suo & populari loci nomine Gelsoriacus, & postremo Bononienſis ſive Bolonienſis dici cœpit. Nam ad Morinos quod attinet, vnicus *C. Plinii* in quarto Naturalis Hiſtoriæ ſuæ libro locus, qui homines fuerint, & ubi poſiti, quovis indice certiùs oſtendit; *Albion*, inquit, à *Geffariaco Morinorum gentis littore proximo trajectu quinquaginta paſſuum millia abeſt*. Italicos nimirum, hoc eſt, brevioris menſuræ paſſus intelligit. Nos enim Angli ultra triginta non agnoſcimus; ſed ut videmus totum a *Bolonia* ad portum *Caletanum* tractum, qui veluti frons *Rutupino* noſtro littori objicitur, *Gefforiacum Morinorum gentis litus* appellat. Statim enim ab hiis duabus veluti metis, hinc *Picardia* ad Occidentem, inde *Flandria* ad Orientem ſe ab *Albionis* noſtræ aſpectu retrahunt, & latiore Oceano ab ea dirimuntur.

Cap. 15.

Claudius Cæſar, è *Britannia* Romam reverſus, urbem fame gravitèr laborantem reperit. Cui morbo, quandoquidem in præſenti mederi non potuit, futuram urbis annonam ſollicitè curavit. *Auguſtus*, quum *Ægyptum* in provincie formam redegiſſet, frumentandi ſummam in ea potiſſimum regione ſtatuit. Quamvis autem aliæ plurimæ annonariæ Claſſes vel publico vel privato ſumptu paratæ erant, prima tamen ſemper & præcipua deinceps Claſſis *Alexandrina* ratio habebatur; iſque præ cæteris ei honos eſt habitus, ut quum cæteræ omnes, dum *Puteolos* totamque illam *Italiae* oram præter-

præterveherentur, suppara¹ deducere haberent, soli Alexandrinæ Classi inter prætereundum ea intendere liceret, ut author est *Annæus Seneca*, in sua quadam ad *Lucilium* epistola. Ideo autem angustior Romæ erat frumenti, aliarumque rerum omnium copia, quod æstivis tantum mensibus Tiberi merces inferri potuerunt. Neque enim ullus ibi portus erat, ad quem sæuiente hieme appellerent; nec statio, in qua tutò consisterent: sed erat locus ipse, utpote ad Africam expositus, naufragiis obnoxius. Itaque sunt qui scribant *C. Julium Cæsarem* de portu ad Tiberis ostia extruendo cogitasse: sed vel oborta tanti operis perficiundi desperatione, vel præsentioribus negotiis perplexum & impeditum, omisisse. *Claudius* verò rem & sua & populi Romani majestate indignam esse prædicans; si maris imperium inutilitè teneret, solaque inedia periret vrbs, quæ mundi diuitias possideret, opus aggreditur; Portumque Ostiæ, non effosso juxta Tiberim solo, sed jactis immensi operis in ipso mari aggeribus, effecit. Quo in opere nauem quandam omnibus, ut ait *C. Plinius*, mirabiliorem, qua magnus obeliscus ex Ægypto quondam à *C. Principe* allatus & Puteolis ad illum usque diem pro miraculo asseruatus fuerat, adduci, eamque pulvere Puteolano ad firmitatē oppleri iussit. Hujus nimirum pulveris ea erat, autore *Seneca*, natura, ut ab aquæ contactu in durissimū statim lapidē concrederet. Illud interest; quod *C. Plinius* nauem hanc integrum serè totius portus latus fecisse refert; *Suetonium* verò,

*Pulveris
Puteolani
natura.*

eam

eam extra portus os submersam fuisse narrat. Addidit & Pharum, quò tutius nocturnis horis ad portum appelleretur: Omnia ad portus & Phari, qui ad Alexandriam erant, comparata.

Cap. 16.

*Portus Romanus an
idem fuerit
cum Ostia
ensi.*

Non sum nescius communiter existimari, hunc quem *Claudius* extruxit portum, eundem esse qui in Tuscia ad dextram Tiberis ripam positus, *Portus Romanus* postea appellari cepit, & etiamnum *Porto* appellatur. Ego verò Portum à *Claudio* non in Hetruria, sed in Latio extructum fuisse censeo; Rationem affero, quòd *Tranquillus* Portum à *Claudio* non ad *Ostia* (quæ vox Latine edita verumvis Tiberis os indifferenter significat) sed *Ostie* (quæ urbem certam signanter denotat) extructam fuisse disertè scribit; & *C. Plinius* Portum hunc ad Ostiam ab eo ædificatum fuisse libro tricesimo sexto Historiæ naturalis docet. Erat autem Ostia colonia Romanorum omnium antiquissima, ab *Anco Martio* Rege ducta, eaque non inter Hetruriæ, sed inter Latii (quod nemo nescit) vrbes semper habita; frustra vt fuerit rem tam notam vel rationibus vel autoritatibus defendere. Hanc verò Ostiam vrbis Romæ nauale seu portum antiquitus fuisse, docet *Strabo*; inclytæque ciuitas & magno Romanæ vrbi, quum reliquo vlui, tum præsidio fuit, multisque & magnis eo nomine immunitatibus donata; donec temporibus Marianis à quatuor simul exercitibus obsessa, captaque demùm & diruta, nec vnquam postea pristino splendori restituta fuit. Tunc Portus, tunc naualis tuendi Ostiensibus, vt adempta facultas omnis, ita abjecta planè

planè cura est; itaque breui tempore arenis, quas vel æstus maris expulerat, vel Tiberis decurrens aduexerat oppleri portus, nauibusque inaccessus, & vrbi inutilis esse coepit. Sicque permansit, donec *Claudius* Imperator fame, quæ & vrbs & orbis ipse ex fatali quadâ terræ sterilitate illo tempore laborabat, admonitus, portum eodem loco, magno, ut diximus, molimine adornauit. Nam ad Portus in Hetrusco litore instituti nomen quod attinet, fallor, si ante *Adriani* demùm tempora aliquis eo loci, ubi *Porto* nunc visitur, vel viculus, vel ædicula, vel ad portum struendum lapis cernebatur. *Strabo* certè & *Mela* in suis Geographicis non meminerunt; ac ne *Ptolomæus* quidem: quamuis quum Tiberis Ostia nominasset, *Flexum ejus fluminis* ad occasum subinde memoret. Hic enim *Flexus* est alterum illud Tibridis fluentum, ad cujus exitum Portus Romanus à quocunque extructus nunc collocatur. Cum igitur & Ostiam ciuitatem non in Hetrusca, sed in Latiali Tiberis ripa positam fuisse nemo dubitet, & Portum à *Claudio* non ad Ostia, sed ad Ostiam Ciuitatē extructū fuisse peræquè constet, equidem quæ supersit hac in re dubitandi ratio non intelligo. Equis enim, tam vel rerum, vel verborum immemor repertus, qui aut Ostiam, Portus, aut Portum Ostiæ, aut viam, portum, Episcopum Ostiensem, Portuensis, aut Portuensem Ostiensis titulo nuncupauerit? *Leo* Pontifex, ejus nominis quartus, sub annum Domini Octingentesimum quinquagesimū *Ostiam* contra Saracenos muniuisse dicitur; quis-

quisquamne igitur hoc de Portu intelligendum
 putet? Neque verò eadem est Portuum *Osti-*
ensis & *Romani* apud autores descriptio. *Clu-*
dianus ille ad Ostiam Portus, nullo effosso
 in continente solo, sed aggeribus in ipso mari
 jactis & circumductis brachiis, (*Plinio* & *Sue-*
tonio autoribus) constabat; Portuensis verò si-
 ue *Romanus* in littore *Hetrusco* conditus, ef-
 fossa in ipsa continente ingentis spatii humo,
 fundatus, & crepidine lapidea intus undique
 substructus fuit; aggeres verò exterius in ma-
 ri jacti, non ad Portum, sed partim ad statio-
 nem navibus præstandam, partim ad Por-
 tum ipsum à vi fluctuum tuendum additi
 fuerunt, ut de re ipsa testatur *Dion.* Quem
 istū *Phil. Cluverius* (qui plurimus in hoc est) ita
 vitari posse censuit, si *Trajanū* Imp. interiorē
 scilicet portum exteriori postea addidisse dicat.
 At, inquam, *Dion.* qui omnium primus hac in
 re, & erravit ipse, & aliis errandi causam de-
 dit, geminum Portum, hoc est, & interiorē
 in continente effossum, & exteriorē in ipso
 mari positum ab eodem *Claudio* simul extructū
 fuisse narrat; Qua de re ipsum si placet, Latine
 quamuis, suo tamen sensu loquentem audia-
 mus. *Induxit*, inquit, *Claudius* in animum rem
 dignam, gloria atque magnificentia *Romani* populi
 facere. Primum, quòd loco non exiguo effosso in
 continente, jactisque circum undique fundamentis
 eò mari intromisit: deinde in ipso mari jactis v-
 trinque magnis aggeribus, ac multo mari concluso,
 in ea insulam fecit, atque in ea turrē edificavit,
 ex qua lumen nocturno tempore navigantibus præ-
 beretur;

beretur; Is locus patriæ linguæ, ut est, Portus appellatur. Itaque si verus *Dion*, si *Claudius* geminū illū in littore Hetrusco Portum, qui Romanus dicitur, fabricauit, Quis locus *Traiano*? Aperta igitur, repugnante licet *Clauerio*, res est, aliam portus *Claudiani* ad Ostiam in Latio, aliam *Romani* in Tuscia, à quocunque vel quandoque extructi, fuisse modum. Nam ad *Trajanum* quod attinet, portum quidem & ille sui, ut videtur, nominis, sed longè inde ad Occidentem, & in agri nunc Florentini termino positum struxisse potuit. Ibi certè *Trajanum Portum* à *Ptolomeo* locatum video. Alium verò *Trajanum*, præter ipsum Imperatorem, quem portus hujus autorem faciam, equidem non inuenio. Confer & alia. *Dion*, insulam in exteriori portus *Romani* spatio jactam, eique turrim impositā, & in summa turre Pharū signat. Quæ omnia de Portu in Hetruria structo verissimè affirmantur. At *C. Plinius*, unicā illā quam dixi nauem, qua ingens obeliscus ex Ægypto afferebatur, integrum ferè portus totius ad Ostiā positi latus, fecisse, nec in insula, (quæ nulla ibi erat) sed in ipsa naue, puluere Putcolano oppleta turrim, quæ Pharū ferebat, fundatam fuisse narrat. Quæ diuersa adeò inter se sunt, ut in ejusdem rei descriptione cohærere nequeant: nisi fortè quis *Dioni* potius quam *C. Plinio*, hoc est, homini, qui aliquot post *Claudii* defunctū annos viuere cœpit, ei qui (præter reliquā dignitatem) se *Claudio*, dum portus ipse ad Ostiam strueretur ex causâ affuisse, libro nono Historiæ suæ naturalis refert, hac in re credendum

credendum esse putet? Quæres igitur fortasse, quis, me Judice, *Portus Romani* in *Hetrusco* litore extructi, author fuit? Equidem nescio: nec rem tanta vetustatis mole obrutam eruere, & in lucem proferre valeo. *Ptolomeum* modo, qui temporibus *Traiani* & *Adriani* vixit, nullam *portus Romani* mentionem facere, sat scio. *Philippum* etiam *Melancthonem*, & *Petrum Birtium*, qui ambo *Ptolomei* scripta, ille, ut ita loquar, carbone, hic penecillo in Tabulas retulerunt, locum ubi *portus* fuisse dicitur, vacuum reliquisse video. Ac ne *Plinius* quidem in sua historia, vllum inter *Alfium* in *Hetruria*, (quæ nunc *Sancta Senerina* dicitur) & *Tiberim* locum præter *Fregenas* ponit. De *Portu* enim ne grû quidem. Enimvero ante *Antonini Pii*, qui *Adriano* successit tempora, nullam vsquam *Portus* mentionem inueni. Is in suo demùm *Itinerario*, sic habet. *A Roma per Portum Centum cellas, mille passus sexaginta novem: sic: In Portum mille passus octodecim. Fregenas mille passus novem: persequitur deinde Alfium, Ad Turres, Pyrgos, &c.* sed & illud ex eodem *Itinerario* elicitur, utrumque, tam *Ostiensem* quam *Romanum Portum*, eodem tempore floruisse; ut enim *Itinerarium* suum terrestre Imperator à *Roma Centumcellas* per *Portum*, sic maritimum à *Portu Augusti*, hoc est, *Ostiensis Arelatû* vsque instituit: hoc modo: *Portuum vel positionum navium ab urbe Arelatum usque. Sic: A Portu Augusti Pyrgos positio, mille passus 38. à Pyrgis, &c.* E quibus utrisque facile colligitur, non solum *Portum*, & *Portum Augusti*

gusti, (quod nonnulli negant) fuisse diuerfos, & utrumq; eodem, vt dixi, tempore floruisse, verum etiam vsu nauali hunc illi, ea ætate, præcelluisse: ni esset, nunquam ille iter nauale ab hoc potius quàm ab illo instituisset. Tempore tamen Portus Romanus frequentiore hominum ore celebrari cœpit, Hostiensis verò cum vsu nomen ipsum portus perdidit. Vnde dictum illud *Ulpiani I. C.* emanauit, *Portus nomine, ubi nihil additur, intelligi Romanum, vt Poeta Virgilium.* Verum res ista Italici curæ fuerit, nam ad ipsos Portus quod attinet, obruti illi arenis & aquis longo jam sæculo vtrique jacuerunt. Sed tamen ea agri Romani, ea soli Italici fortuna fuit, vt nulla gens tam remota, nulla posteritas tam sera est, eritue, quæ regionis illius, tot rebus olim gestis nobilitatæ notitiam, & curam ad se non pertinere putet. *Dionem* modo hominem quauis Consularem, tamen Asiaticum, ejusq; seu correptorem, seu corruptorem *Xiphilinum*, Portum in aduerso littore posterius à quocunque conditum, facili propter viciniam errore, *Claudio* ascribere potuisse puto. Nedum eam rem vel *Blondo*, vel *Volaterrano*, vel *Pancirole*, vel *Cluuerio* summiis in omni genere doctrinæ viris, vel aliis quibuscunq; *Dionis* & *Xiphilini* auctoritatem sequutis vitio vertendum esse censeo.

Verum vt è diuerticulo in viam redeam, tanta fuit *Claudii* in annona vrbis alleuanda, hoc est, in ipsa, si verum volumus, vrbe conseruanda diligentia, vt negotiatoribus, annonam vndecunque inferentibus, certa & stata lucra proponeret,

Cap. 17.

neret; nec eo contentus, pericula insuper maris omnia hiberno fidere contracta in se suscepit, & suscepta cum fide præstitit: multaque in hoc genere Imperator iste, stupidus alioquin habitus, omni laude digna, & vel prudentissimis principibus in exemplum trahenda fecit; quibus rebus effectum est, ut frumentum Romani hibernis juxta ac æstivis tempestatibus deinceps comportaretur, quum prius hiemali fidere clausum semper haberetur mare. Verba sunt *Vegetii*, Ex die, inquit, undecimo Novembris, usque in decimum Martii maria clauduntur. Rarè enim hoc fidere, priusquam quisquam mari se olim credere solebat: nedum exercitus temerè transportandi erant; aut aliud quidvis publico nomine in mare tentandum. Extatque in eam rem *Valentiniani* posteriori quamvis sæculo edita constitutio; qua discretè cautum sit, ne provinciales, quæstoribus, aliisquè Romani Imperii Magistratibus hieme navigare volentibus naues præbere cogerentur; ad quod munus alioqui ex formula tenebantur. Decimus verò dies Martii, qui in ante diem æquinoctii vernalis cadit, navigationis Natalis priscis dicebatur. Nempè ab illo die mare apertum & tranquillum esse cœpit: Festaque lux illa Conso, *Neptuni* scilicet, & *Isidis* filio, ferebatur, & ludicræo titulo exhibita, *Consualia* dicebantur: publica quidem lætitia, ab omni hominum genere, sed majorem in modum, à nautis celebranda.

Cap. 18. Debellata Ægypto & in provinciæ formam redacta, mare rubrum *Augustus*, ut superius diximus,

diximus vectigale fecerat. Quorum vectigalium hiis demum temporibus redemptor *Annius Plocamus* Eques Romanus erat. E cujus libertis vnus dum maris Arabici portus ex officii ratione inuifit, vento abreptus, longè ad Orientem, & ad Taprobanem infulam mediis tempeftatibus delatus eft. Vbi à Rege, vrpote peregrini habitus orifque homo, hospitalitèr acceptus, & ſex menſium ſpatio commoratus, multa diligenter præſens vel oculis notauit, vel ſciſcitando perquiſiuit, quæ prius occidentali huic mundo, vel prorsus inaudita fuerant, vel fabulis paria, aut certè proxima habebantur. Quin & ipſum loci Regem, ea de Romano *Cæſare* opinione homo ingenioſus imbuerat, ut is non ſolū abeunti com meatū magnificè præberet, verum etiam cum eo quatuor Legatos ad *Claudium* vel ſalutandi, vel, ſi videretur, amicitiaæ jungendæ cauſa mitteret. Hic caſus totius orientis notitiam & commercium Romanis aperuit; viaque ab Alexandria ad Indos, *Adriani* mox temporibus, tam certa tamque trita patuit; vt Itinerarium ejus, terreſtre in *Gaii Plinii* Hiſtoriæ libro ſexto inſertum reperiatur, multaque quæ prius ex *Nearchi*, & *Oneficrati*, quos *Alexandro* magno militaſſe diximus, libellis, pro vèris ferebantur, aliter ſe habere comperta ſunt: Ab eſt autem hæc inſula à continente quinque dierum navigatione ad Auſtrum, vndeſiſſimo mari, ſed alueis, vt profundiffimis ita anguſtiſſimis permeabili. Itaq; naues ſuas ſine puppe, ſed cum altera pro puppe prora fabricati ſunt, vt ſine flexu, ſeu velorum,

Taprobana
inſula re-
perta.

seu remorum ministerio, non minus retrò quam porrò nauigari posset. Quo eodem ingenio *Germanicum* ad Batauorum superanda vada vsum fuisse diximus. Quippe eadem ratio, vbi res eadem sunt, immutabilis est; motusque animorum eosdem excitat, & paria consilia paribus ingeniis subministrat. Hoc igitur primo tempore divites illæ Orientis opes, gemmæ, lapides, aromata, & odores, argento, vt hodieq; fit, permutari cœpta sunt. Adeo quidem vt singulis annis argentea numismata ad duodecies centena coronatorum millia cum graui imperii damno mercaturæ faciendæ causâ transmitterentur. Parum hoc: *Minima*, inquit *C. Plinius*, estimatione millies centena millia sestertium omnibus annis ad odores funeribus conquirendos exportantur: neque mirum, si pars furor temporum illorum mercatores inuaserat, qui nostros nunc tenet; quum centuplum ex omni argenti filiqua inde redactum reportarent.

Cap. 19. *Claudio* vero successit *Nero*, quo imperante nulla in mari memorantur prælia: rarò enim vlla tam diuturna tamque certa terra marique pax stetit: præterquam ad *Euphratem*; vbi *Domitius Corbulo* Dux rem Romanam ingenti cum gloria & incredibili successu aduersus *Persas* promouebat. Huius vero *Neronis* Imperii anno secundo incidit memorabilis illa in mari, Apostolo *Paulo* nauigante, tempestas, de qua in Actis Apostolorum fit mentio. Locum si quæris, *Adria* fuit; vbi sexaginta Romanorum cum Consule & classe millia primo bello *Punico*, vnico naufragio periisse diximus. Tanta
autem

autem maris ira fuit, tantaque jactatio, ut nemini ex illo nauigio per totos quatuor & decem dies, totidemque noctes ad jejunium solvendum quies daretur. Itaque in tanto periculo constituti, nihil ad summam curam, artem, industriam, reliqui faciebant; quo vitam quisque & priuatim suam, & communiter omnium conseruarent. Inter alia, quum nauem ipsam vi fluctuum à carina fatiscentem animaduertissent, nec vlla in anchoris superesset spes, ad *Hypozomata* confugiebant. Mos erat antiquis inter reliqua nauis armamenta, *Hypozomata* semper in parato habere. Ea autem funes erant, tantæ longitudinis, ut ipsum nauis corpus multipliciter ambire & circumligare possent. Hujus armamenti mentionem facit *Athenæus* in lib. 5. Deipnosophiston, ubi nauis Ptolomaicæ instrumenta referens, eam duodecim *Hypozomata*, sexcentorum cubitorum singula, habuisse memorat. *ὑποζώματα*, inquit, ἐλέμματα δίδεκε. ἑξακοσίων δ' ἑκάστον πηχῶν. Quem locum vertendo interpres, *Nauis*, inquit, *costa & tabulata duodecim erant, sexcentorum cubitorum singula.* Quo nihil alienius cogita ei potuit? primum enim, quid miri erat, tantæ molis nauē duodecim costas, seu statumina habuisse? quinimò verisimilius erat costas sexcentas, ad tantæ compagis molē vix sufficere potuisse, Sed fuerint costæ: quis tantæ costarū longitudinis in naue, non dico vsus, sed locus esse potuit? subrectæ enim sunt, ut scimus, costæ, & in altum surgentes, non in longitudi-

Athenæus
lib. 5.

nem protensæ. Atqui navis ipsa à summo aplustre ad aquam quinquaginta haud amplius, & trium cubitorum fuisse ab *Athenæo* dicitur. Demus autem tantundem fabricæ sub aquis latuisse: centum & sex cubitos efficiunt. Quid igitur de quingentis, qui supersunt, cubitis fiet? tantundem opinor, ac si quis hoc in tauri aut elephantis costis contingere posse diceret; Quod verò sequitur, quam rationem habet? quem sensum? *Coste*, inquit, & *tabulata duodecimerant*. Quid? an ea costarum & tabulatarum in naue, vel similitudo, vel affinitas erat, ut unico vocabulo utrumque sic indiscriminatim significari debuerit? Atqui par in hoc error versatur, atque in priore cernebatur. Tabulata enim spatia inter contestata navis sunt; quæ ut maxima splendidissimæque in illa naue fuerint, sexcentorum certè cubitorum longa esse non potuerunt, quum ipsa navis ducentis octoginta cubitis, eodem *Athenæo* referente, longior non esset. Aperta igitur res est, interpretem doctum alioquin, & infinitis pœnè difficultatibus in spinosissimi libri versione colluctatum, sed in hiis rebus non versatissimum conjectura captasse, quod ratione & sensu assequi non valebat. Hypozomata enim non ligna, sed funes erant: nautici quidem illi, non tamen anchorarii, nec quibus à terra religantur naues, quos *retinacula* alii, alii *oras* vocabant, sed quibus, ut modo dixi, urgente tempestate, naues ipsæ in medio sæpe mari subligabantur. Ad quem morem respexit ingeniosissimus ille inter Latinos

nos Lyricus; *Vides*, inquit, *ut malus celeri fau-*
cius Africo, Antennæq; gemant, ac sine funibus vix
durare carina possit imperiosius æquor? Luxatur
enim sæpe fluctibus carina, nique funibus
substringatur, dissilit, juncturæque laterum &
costarum ab imo diffractæ rimas agunt, & a-
quam penitus accipiunt: Ad quod incommo-
dum, quin potius exitium cuitandum, vnicum
sæpe remedium ab Hypozomatis petebatur.
Itaque & *Appianus Alexandrinus* libro quinto
de bellis civilibus, *Sext. Pompeio* Magni filio
vitio dat, quòd quum *Octavianos* prælio na-
uali in fugam coniecisset, eos ultra non fuisset
insequutus; sed passus sit eos nauigia *ἑλκεῖν*,
hoc est, *circumcingere* sicut poterant, & *secundo*
vento Vibonem perferri. Hinc igitur diuinus ille
Astorum Apostolicorum Scriptor nauem, in
qua sacratum Apostoli corpus ferebatur, à nau-
tis substrictam, seu subligatam fuisse memorat.
ὑποσφύζοντες, inquit, *τὸ πλοῖον*, hoc est, *Nauem sub-*
stringentes, ventis se permisierunt. Nec mirandū
profectò est, si tam utili tamq; necessario navis
instrumento nullum à Latinis nomen impositū
reperiatur. Rectè enim illud à *Lillio Giraldo*, in
elegantissimo suo de nauigiis libello traditur
nauium partes & instrumenta diligentius à
Græcis tradita fuisse quàm à Latinis: quanquā
nec ipse quicquam de hoc armamenti genere
alterutro sermone attigit. *Mist* modò nemi-
nit; quò funis genere nauem mediam vinciri
ait; sed, ut videtur, rem obscuram non attinge-
re, quam non explicare maluit. Multo ille
prudentius, quam Lexicographi, qui ne quid

ignorare videantur, *ἡρώδης* tabulata ferè vertunt: quod quàm appositè, ex Platone in decimo de Repub. libro constat, vbi Eri Panphili fabulam moralem referens, *Lumen quoddam Iridi simile cælum velut vinculum, & ut hypozomata triremem, ambire narrat.* Verùm ut ad rem redeam, illud certè constat inter paucas memorabilem hanc qua periclitabatur Apostolus, & è qua, sine summi Numinis interuentu eripi nauigantes non potuerint, fuisse in mari tempestatem.

Cap. 20,

Sed ut hæc sub imperii Neroniani initio contigit, ita sub ejusdem exitu par atrocitate maris ventorumque exarsit rabies, qua magna Romanorum classis depressa periit. Quippe à Formiis in Campaniam à Nerone, non exceptis maris casibus, ad diem venire jussi, dum Domini jussa magis quam maris sæuitiam exhorrescunt *ναυαγῶν*, ut est in proverbio, *πὸντος ἐγρηγορήσαντες*, in itinere, littori allisi, omnes perierunt. Quæ quidem clades tanta fuisse à Tacito perhibetur, ut prodigii loco populo Romano fuerit: Medio vero Imperii tempore portum Antii, viginti millibus passuum ab Ostia disfiti, *ἐκδοτικὸν*, ut ait Suetonius, operis extruxit. Expeditione deinde ex Italia in Achaïam suscepit Nero. Causa itineris, ingens cum scenicis & fidicinibus æmulatio & certamen erat; & præconcepta in tam duro bello victoriæ laus; nec votis successus defuit. Itaque detriumphatis Achaïæ totiusque adeo Græciæ cantoribus, citharædis & choraulis, in Italiam gloria satiatus rediit. Ante tamen quam reuerteretur, Isthmum Achaicum

*Ναυαγῶν
ἐκδοτικὸν
πὸντος ἐγρηγορήσαντες*

Achaicum perfodere est aggressus. Nihil illo ^{Isthmi A-} terræ jugo in historia notius: in cujus medio ^{chaici per-} fossio ^{fossio ten-} ta olim erat nobilissima illa Corinthiorum ^{tata.} vrbs, mare vtrunque subiectum habens, & ad vtrumque mare suum portum, alterum ad Orientem, qui Cenchræ, alterum ad Occidentem, qui Lechæum antiquis dicebatur. Hunc igitur hominem ingens incessit Achaïam à reliqua Græcia, immisso gemino mari, abruptendi libido: ad quod opus exercitum quidem omnem, sed impensius Prætorianos pro concione hortandos esse censuit. Quos quum oratione sua ad opus accensos animaduertisset, sequimini me nunc, inquit, commilitones mei: & cum dicto rastellum è manu astantis rapuit; humumque effossam, & in corbulam congestam ipse suis humeris extulit; quo tam præclaro Imperatoris exemplo excitati milites, ocyus omnes operi incubuerunt. Sed inter opus, venæ sanguinis passim ex humo scaurientes, gemitusque sub pedibus, & ex terræ cauernis horrendi veluti mugitus exaudiri coëpti, fodientium animos religione & metu impleuerunt. Itaque ipse Nero accurrit, vitiumque animi fessoribus exprobrans, & increpitans, ligonem arripit, operique manum rursus admouet: nec tamen euicit; rerum nouarum rumoribus in vestigio reuocatus, vt refert *Dion.*

Nec minoris insanix opus in Italiam reuer- Cap. 21.
sus tentauit: scilicet ab Aueruo tota Campania
Vmbriæque longitudine per saxeta & rupes in
Tiberim fossam, nauigabile quidem, sed nullo
vsu, si perficeretur, futuram perducere molitus.

Auernus.

Erat Auernus, lacus in extremo Campaniæ limine sulphureus, & collibus undique præalti conclusus, nisi quæ per Lucrinum sinum in mare effunditur. Totus nimirum ille Italiæ tractus igne subterraneo abundabat, & etiamnum abundat: priscis vero temporibus siluestris insuper, & vel ipsius Solis radiis inaccessus erat. Crassæ etiam nebulæ è sulphureis terræ venis, lacubusque aeri offusæ visum undique auferbant. Hæc nimirum erat illa apud Homerum undecimo Odyssæidis suæ libro, *Cimmeriorum patria*, quam Solem nunquam vel surgentem, vel cadentem radiis suis illustrasse memorat. Quam rem à Poeta penitus confictam fuisse existimarem, nisi is, quem modo dixi, *Villamontius* ei fidem astrueret. Refert nimirum lacum Auerni tam celsis ad Orientem & Occidentem collibus obseptum esse, nullus ut eo matutinis vespertinisque horis radiis solaribus aditus pateat. Solo verò meridie, quum Sol in medio Cæli positus Septentriones aspicit, per ostiolum, quæ lacus in mare Austrum versùs effunditur, Solem irruentem recipit.

*Regio Phlegæ.**Phlegeton.*

Tota verò regio Phlegæa ab incendio nominata erat: & alius juxta fluuiolus pares cum Auerno halitus eructans, Phlegeton dictus. Calida verò Baiarum balnea quis fando non audiuit? antrumque Sybillæ ad Cumas juxta positas etiam nunc ostenditur. Mons etiam *Vesuvius* non longè inde positus, si jam non ardet, attamen veteris vestigia flammæ seruat. Nec qui ex nostris Italiæ vrbes & loca peragrant, quum redierint, quicquam libentius quam locorum

corum illorum antra, & ignea spiracula ex an-
 tris erumpentia, & experimenti causa caniculos
 injectos, & semineces statim extractos referunt:
 Erat autem temporibus Trojanis hoc in loco
 oraculum insuper Phœbo diabolo sacrum. Hoc
 ab *Ulyssæ*, si fides *Homero*, adibatur, & ex ora-
 culo via inde ad inferos per vatem ostensa: quã
 fabellã, *Maro* postea, vt alia plerãq; ad *Æneam*
 transtulit. Refert etiam *Strabo* fani hujus Sa-
 cerdotes, lucri sui causa hanc de inferis ei loco
 subiectis opinionem studiosè in hominum ani-
 mis aluisse. Ab hoc igitur lacu *Nero* fossam na-
 uibus ferendis aptam in Tiberim perducere
 instituit. Sed, natura repugnante, rem frustra
 coeptam subitò abrupit: non quod ille naturæ
 morem vlla vnquam in re gerendum censuit;
 (quippe qui omnia ejus jura confundere & in
 aduersum semper niti consueuerat) sed quòd
 ea res esset quæ nulla ope humana perfici potu-
 erit. Erat autem totus ille Campaniæ tractus
 vbi veteres Auernum & inferos collocabant,
 hiis demum temporibus, de quibus nunc agitur,
 non cultura modo agrorum, verum etiam villa-
 rum, castrorum, vrbium, naualium, balneo-
 rum & aliorum ædificiorum, non ad volupta-
 tem, sed ad luxum comparatorum structuris,
 supra reliquã omnem Italiã, exornatus. Por-
 tum *Pompeius*, ex foetidissimo Auerni lacu pul-
 cherrimum effecerat. Baulos *C. Cesar*, in vici-
 no colle, vnde despectus, hinc in Misenum, in-
 de in sinum Baianum patuit, ædificauerat. *Aug-*
ustus nauale ad Misenu juxta positu toto or-
 be celeberrimum extruxerat: *Agrippa* regio-
 nem

nem omnem sylvis purgauerat. Quarum in locum laureta manu confixa sic vbique surgebant, nihil vt illi regioni toto orbe simile, nihil secundum conspiceretur. Hinc Imperatoribus Romanis, in illa semper loca, animi causa, secedendi mos. Hoc *Augustus*, *Tiberius*, *Caius*, *Claudius*, hoc ipse *Nero* factitalot, & inter vireta, & fontes, calida hos, illos frigida manantes, voluptates concessas, veritas, omnes exercebant; dubium vt esset terranè an mari lasciui-
rent magis.

Cap. 22.

Agrippina
cades.

Nero verò eodem facinore vtrumque simul elementum polluit, & regionem hanc verè infernalem, infando parricidio vtrobiq; admisso, fuisse ostendit. Mater ei *Agrippina* erat, quam quùm ille semel tollere statuisset, *Baias* venit: *Agrippina* tum *Baulis* agebat; quumque ministrum cædis quæreret, incidit in *Anicetum*, claffis *Misenensis* Præfectum. Hic, seu ferro, seu veneno Imperatoris mater tolleretur, cædè ipsam nec commodè celari posse, & proditā non ferendæ infamiæ futuram præfatus, & ab ipso loci aspectu quid posset admonitus, rē & aliter, & faciliùs, & occultius transigi, & mulierem in subiecto mari, sine omni suspitione submergi posse monet. Modum exigenti *Neroni*, inquit *Anicetus*, posse se nauem solutilem excogitare, ea arte constructam, vt inter remigandum nullo negotio, subito à carina resolui possit. Placuit ingenium. Quinquatria celebrantur: *Nero* matrem festo adhibet; mater à *Baulis* ad mare descendit: ibi nauigio recepta *Baias* ad cœnam venit, inde eadem nocte ad *Penates* suos cubitum

cubitus reuerſura. Venientem filius gratulabundus & officioſè admodum ſuſcepit, non alia re iratior, quàm quod tam vili nauigio mater Imperatoris adueheretur; Itaque illa ſepoſita, adducitur triremis ab Aniceto comparata, multo auro, & tapetibus inſtructa: Poſt cœnam, ſera nocte ad mare à filio mater deducitur; nec longè à littore progreſſa, quibus cædis miniſterium mandatum erat, nauem luxare & reſoluere parabant. Sed ea res ad votum integrè non ſucceſſit; tabulatum modo in triclinium vbi *Agrippina* cum comitibus recumbebat, decedit: & famulam oppreſſit. Ancilla dolū non ſentiens, an matrem Imperatoris occiderent muliebritèr interrogabat? illi *Agrippinam* ex voce rati, ancillam in tenebris pro Domina confodiunt; & inter agendum, ipſi *Agrippina* inſcii humerum vulnerabant. Quæ præſenti ingenio uſa, & ſe alienæ mortis beneficio, ſi non ſoſpitem, attamen ſuperſtitem eſſe ſentiens, nullo eſulatu, ac ne gemitu quidem propter acceptum vulnus edico, inter nautarum remigumque turbas è triclinio in foros aſcendit: inde in mare deſilit, & in terram vicinam enatauit. Vbi terram attingiſſet, nuntios ad filium nūttit; fortuitum caſum ſimulat: ſe deorum beneficio, periculo ereptam: ne ea res Aniceto ſociiſuè naualibus aut remigibus fraudi eſſet, petit. Sed non is erat *Nero*, qui in re tam impiè ſeria, ludibriis falli poſſit. Itaque eundem Anicetum primo mane Baulos cum miniſtris miſit. Illa venientes, ecquid ſalutandi, an occidendi cauſa veniſſent, rogat? Vbi tela ad jugulum intenta vidit,

nihil

nihil morata ventrem præbuit; quin tu, inquit, Anicete, hunc vterum, qui *Neronem* tulit, primum feri: Ita multis vulneribus, confecta, & pœne concisa, mater nequam filii nequioris iussu, partim in mari, sed penitus in terra, *Agripina* periit.

Cap. 23. *Neroni* successit *Galba*; Dux ille haud quamquam in suo genere aspernandus. Sed nullo unquam nauali facinore commendatus. Vnum tamen beneficium mari debuisse dicitur. Etenim quum insidiæ Romæ *Neroni* undique struerentur, nec deessent qui *Galbam* ad Rempublicam capeffendam sollicitarent, classis vnde unde abrepta, nullo remige, nullo nauta, nedum vectore aut milite instructa, sed omni bellico apparatu farta, ad Hispaniæ portum quendam, ubi tum *Galba* sollicitus agebat, appulit. Res statim prodigio habita est; nec vlla res æquè cunctantem impulit, aut inter spem metumque nutantem magis confirmabat.

Cap. 24. *Galba* extincto successit *Otho*, *Othoni* *Vitellius*, *Vitellio* *Vespasianus*. Inter *Othonianos* & *Vitellianos* levis pugna in Pado flumine commissa memoratur. Cum classe etiam *Misenense* *Narbonensem* *Galliam* contra *Vitellium* inuasit

Pseudo *Otho*. Interim falsus *Nero* subito exortus, nomine *Andriscus* multorum animos rei nouitate excitauerat: sed diuturnum non erat istud, vnde cunque ortum, Romani Imperii ludibrium: *Gallatiam* & *Pamphiliam* Asiæ minoris prouincias illo tempore regebat *Calpurnius* *Asprenas*. Is in itinere, dum inter maris *Ægæi* insulas versatur, quosdam è *Trierarchis* suis *Neronis* nomine

mine sollicitari comperit. Itaque eniſſis paul-
 culis nauigiis Pſeudo-Neronem iſtum, viriliter
 ſe tuentem occidit. Corpus defuncti Romam
 miſſum, nec quicquam in eo *Neronis*, præter
 prominentiam oculorum, & vultuſtoruitatem
 agnitum. Sed quum comperta *Othonis* morte,
Veſpatianus, qui tum Judæam tenebat, impe-
 rium appeteret, præmiſit ad hanc rem Mucia-
 num. Is diutiùs intermiſſam rei navalis cu-
 ram renouauit. Itaque contracta mediocri in
 Ponto Euxino claſſe, ad Byzantium deſcendit:
 auſtisque ibi copiis navalibus Italiam petiit,
 & Brundiſium, Tarentum, Calabriamque om-
 nem & Lucaniam cum claſſe valida innaſit. Ad-
 uerſus quam nihil opis aut ſubſidii in claſſe vel
 Miſenenſi vel Rauennatenſi; (vtpote quæ vnica
 jam legione ſingulæ conſtarent) inerat: Quid?
 quod Rauennatenſis claſſis ſtatim ſtudio par-
 tium, & maximè *Vitellii* odio, ad *Mucianum*
 deſecit. Sed dum *Mucianus*, abducto claſſis
 Ponticæ præſidio, Italiam magno cum ſucceſſu
 inuadit, ſubitò in ipſo Ponto bellum exoritur,
 duce *Reguli* cujuſdam in illis partibus man-
 cipio, nomine Aniceto. Is nouum nauigii ge-
 nus excogitauit; in quo nullus ferri calybiuè,
 (quanquã in regione quæ ejus generis metallis
 præter cæteras abundabat) uſus erat; ſed ligneis
 clauiculis & paxillis compingebantur naues.
 Quin & noua forma nauibus data, ex qua Ca-
 meræ dicebantur. Arcta illis latera ſurſum e-
 rant, ſed lato alueo ſubnixa: & ab ipſa ſtatim
 aqua, non in rectum ſurgentia, ſed paululùm
 inclinata. Quoniam verò fluctus, tollente ven-
 to,

Mucianus.

*Camera,
ſive Cum-
barie nanis
genus.*

to, alius consurgentes, superatis laterum, ut sæpè fit, marginibus, ipsos foros inuadebant, idè ad fluctus excludendos, nouum quoddam instrumentum comparauerat; tabulas scilicet mobiles, quas pro modo tempestatum alias super aliis surgentes, & leniter fastigiatas addebat; donec ad extremum, si tempestatis ratio id poscebat, testi in modum desuper coirent. Cujus generis nauigium, Græci, *λάρυγας*, hoc est arcas & capfas antiquitus vocabant. *Tacitus* à tabularum curnatura & fornicatione Cameras appellare maluit. Has verò Cameras ad multa deinde sæcula Ponticæ oræ incolæ retinuerunt: sed vitiato paulatim sono, pro Cameris Cumbras eas primò, mox Cunibarias, & denum Gumbaria appellabant. Hac classe fretus Anicetus Trapezuntem, aliasque Ciuitates Asiaticas inuasit: & propter crebras victorias in ore hominum esse cœpit. Quibus de rebus certior factus *Vespasianus*, eò properè Virbium Geminum, spectatæ virtutis virum mittit. Is quum vnde classem contraheret, non haberet, raptim cæsa materie, nouam totam extruxit. Cum qua mare ingressus, primo impetu Anicetum in terram, fugauit, Cameraſque ejus incendit, ipsum verò deditum, ut Vitellianis paribus fauentem, interfecit.

Anicetus.

Cap. 25.
Vespasianus
1115.

Interim *Vespasianus* ex Judæa in Ægyptum frumenti modum, antequàm Romam proficisceretur, in potestate habiturus, descendit. Qua maximè re partes Vitellianas in Italia afflixit. Urbem verò ipsam fame jam laborantem missa eò Classe Alexandrina recreauit: Erat hiis temporibus

temporibus quidam genere Batavus, nomine
 Civilis; vir impiger, & manu promptus; Is *Civilis Ba-*
 rapta ex *Neronis* primum, tum *Galbæ*, & *Othonis* *tanus*.
 cædibus, deinde & ex *Vitellii* cum Legionibus
 ad Imperium quærendum discessu occasione,
 Romanos omni militiæ genere variè fatigabat.
 Vir, si quis vnquam ex Batavorum Insula, in-
 signis, Sed prima ei cū Romanis pugna navalis
 in occiduo Rheni fluminis brachio erat. In qua
 Classẽ Romanam omnem quidem, quamvis
 non magnam cepit: victoriamque reportavit,
 clarã in præsens, vt ait *Tacitus*, & in poste-
 rum vsui; armaque & naves, quibus indige-
 bat, adeptus, magna per Germanias Galliasque
 fama, *libertatis auctor* ferebatur. Quippè
 qui cum Tutore Germano, & Classico Gallo
 conjunctus multa Romanorum millia in acie
 ceciderat, castra & præsidia expugnauerat, na-
 ualibusetiam incurſibus & præliis classes op-
 presserat; vt supremum Romanis diem illis in
 locis facturus videretur, ni cæso mox *Vitellio*,
 summa Imperii ad *Vespasianum* recidisset. Cu-
 jus fortunam reuereri simul & horrere Civilis
 cœpit: nam & distractæ primùm Legiones Ro-
 manæ omnes vni *Vespasiano* sacramentum dixe-
 rant; & quia Batavia Insula erat, ideò classis
 ex Britannia ad eam inuadendam accersēbatur:
 omni enim tempore post *Claudii* in hanc Insu-
 lam aduentū, classis quæ Britannica dicebatur,
 ad Oceani hujus tutelam data fuerat, & in ea ad
 omnes occasiones intentā stabat. Quibus rebus
 motus Civilis maturè *Vespasiano* manus dedit.
 Nec *Vespasianus* tam fortem virum aspernari,
 aut

aut prava ultionis spe hominem ad arma natum, & in armis tanta prius cum Romanorum strage & sui laude versatum ultra laceffere è re vel sua, vel publica, esse existimabat.

- Cap. 26. *Vespasianus* in Ægyptum descensurus oram Judææ maritimam peragrauit: inter cæteras urbem Ptolemaiden adiit: ea priscis temporibus Ace dicta, postea Ptolemais fuit. Sed bello demum sacro à Christianis sub annum Domini millesimum & centesimum suscepto, pristinum nomen, leui immutatione facta, recepit, & Acon appellari cœpit. Eam Belus siue Beclus Fluius præterlabitur, profunditate magis quam latitudine conspicuus: & religionibus sacer olim magis quam usu bonus. Est enim potu insaluberrimus. Belus ad duo ab urbe stadia se in mare effundit; in ipso verò fluminis ostio vitrea arena reperitur; omni illa admiratione dignissima: vtpote quæ nitro prius perfusa, igne deinde molliciem capit, & liquefacta in vitrum transformatur; idque inexhausta quadam penu: multæ ut naues eodem conuenientes, nullam copię imminutionem vel faciant, vel sentiant. Addunt & illud: locum ipsum stupenda quadam natura non solum arenas quascunq; siue è mari egestas, siue per fluuium expulsas, siue è vicinis collibus eò ventorum turbinumque vi impulsas, verumetiam quælibet alia metalla, si locum contigerint, breui temporis spatio in vitrum transmutare. Idque *Strabo* & *Tacitus*, inter priuata littoris, quod Beli amnis os & urbem Sidona interjacet, miracula recentent. C. verò *Plinius* tricesimo sexto.

Ptolemais
urbs.

Acon.

Belus am-
nis.

Arena vi-
treæ ad Be-
li, in flu-
uio flumi-
nis os.

sexto Naturalis Historiæ libro similem arenæ vim ad Vulturii fluminis os in Italia, itemque in Galliæ & Hispaniæ littoribus suo tempore repertam fuisse tradit. Sed ut nostra hac Venetum, ita illa ætate nobilius cæteris erat vitrum Sidone confectum; utpote quod non solum flatu formari, verum etiam torno teri & in argenti moreni cælati potuit. Itaque *Vitri* nunc artificem, nunc officinam Sidonem dictam legimus; nec illa minus suo Vitro, quam vicina Tyros sua purpura se efferebat.

Vespasiano verò defuncto successit *Titus*, generis ille humani delicia dictus, cujus felicitàti illud in mare accessit: quod eo imperante Britannia nostra omnis, in Romanorum potestatem primum venit. *Claudius* enim, quod antea à me dictum est, partem ejus tantum in provinciæ formam redegit; quam diversi subinde Præsides rexerunt, *Plautius*, *Ostorius*, *Vespasianus*, *Didius*, *Paulinus*, alii, qui suas cum Britannis, vel laudes, vel clades nunc prospero, nunc adverso Marte miscuerunt. *Vespasiano* verò regnante, missus eò est *Julius Agricola*, vir pacis bellique artibus insignis. Qui quum exacta jam pœnè ætate, (quo tempore reliqui ferè Imperatores loca hibernis circumspicere solebant) provinciam intrasset, cum exercitu statim profectus in Monam Insulam, non mediocri intervallo à continente disjunctam, pedibus mare ingressus, sine omni navium ministerio penetravit. Id miraculo Insulanis primò habitum mox metum incussit, & in ultimam demùm desperationem egit: quid ni enim illi cederent,

Cap. 27.

Mona insula, sine navibus perita.

F.

cui

cui mare cecidisse & tutum inter fluctus iter præbuisse cernerent. Scilicet, quod *Alexander* olim in Lyciæ littoribus, quod *Scipio* in Carthaginis novæ obsidione fecit, æstus decessum, & latentia sub aquis vada cæteris attentius & solertiùs notauerat. Veruntamen Monam Insulam debellasse tanti fuit, vt non victoriæ modo, verum etiam summæ moderationis laudem inde retulerit *Agricola*, quod literas alias quam laureatas super ea re ad Senatum miserat. Quum verò cætera omnia Britannię littora cum Insulis adjacentibus populo Romano jamdudū innotuissent, ingens *Agricolam* incessit cupido, terminum ejus Borealem, si quis esset, inuenire; nec vlrà Britannia insula an continentis pars foret, in ambiguo esse pati. Itaq; contractam classẽ à Mona insula Aquilonem versùs nauigare iussit. Ita tamen vt litrus vsque legerent, & in conspectum exercitus sub noctem semper venirent. Hac nauigatione Glotam siue Clotam, æstuarium, (quod nunc *Dunbrium Frithum* appellant) ad Occidentale Scotiæ latus quæ Hiberniam spectat positum, adueniunt. Quumque compertum haberet, in aduerso Insulæ latere, quæ Orientem respicit, aliud perinde magnum æstuarium, *Bodotris* dictum (quam nunc *Fortham* vocant) in terram incurrere, cœpit animum aduertere, & quod interjacet spatii castellis & præsiidiis firmissimis muniuit. Saltẽ vt barbaros à reliqua Britannia eo obice excluderet: & in aliam veluti insulam summoueret. Inde Glascouiam vrbem, & illustris Hamiltonum familiæ castrum ad Cluidæ,

Britannia
insula esse
deprehen-
ditur.

Cluida, Sterlingiam verò ad Forthæ fluminis ripâ quamvis diuersis forsitan nominibus, originē olim traxisse reor. Quumq; variis jam, & si vnquā, dubiis & sanguinolentis præliis, omnes terræ illius populos fregisset; misit qui vltimam rerum, vt putabant, metam explorarent. Hii primi Romanorum Cluida egressi mare Deucalidonium, vt Myniæ olim Pontum Euxinum *Jasone* Duce, maiori ausu, quamvis non pari fama nauigari posse docuerunt; Orcadæq; insulas circum circanauigarunt. Inde ad Australe demùm latus reuersi, Britanniam verè insulam à toto orbe diuisam esse retulerunt. Reuerso verò *Agricolæ*, *Titus* triumphales honores & ornamenta detulit: Triumphari enim Romæ ab *Augusti* temporibus desitum est. Duos verò *Titus* imperauit annos: quo tempore nihil, ad bella quod attinet, seu terra, seu mari fecit: præterquam quod prælia naualia duo, alterum sub Corcyrensiū & Corinthiorum, alterum sub Atheniensium & Rhodiorum (adeò jam præstantissimarum olim gentium nomina cuiuerant) exhibuit. Ad reliqua quod attinet, nullum illo biennio generi humano tristius, aut funestius, vel terra, vel mari vlla ætate tempus contigit. Imminet mari non procul Neapoli mons Vesuius, flammæ fumosque, vè *Ætna*, euoment, cineresque in vicinos campos cum mugitibus, horrendisque tremoribus sæpenumerò eructans. Sed hoc tempore tam insolita rerum facies omnia; in illo Italiæ tractu occupauit; vt qui prius mundum æternunt fore non dubitabant, omnia jam ne in anti-

quum Chaos protenus reciderent, timere cœperint. Primum enim magnus numerus hominum inusitata magnitudine, quales gygantes finguntur, in eodem monte & regione finitima, ac vicinis ciuitatibus interdium noctuque vagari, versarique in aere visus est, ut refert *Dion*; Ad hæc, sonitus tubarum, armorum, tonitruum, non solum è monte ipso, verum etiam sub pedibus audiri. Nec in terra tantum, verum etiam in mare fremitus ad aures accidebant. Itaque properabant alii ex ædibus in vias, alii è viis in ædes confugere; quemlibet præterquam in quo erant locum tutum fore rati. Tanta verò erat copia cineris, ut terram mareque, atque adeò ipsum aerem compleret. Quæ res non solum hominibus prædiisque, & pecoribus, & satis daniosa fuit, verum etiam pisces volucresque peremit, duasque integras vrbes, Herculaneum & Pompeios, populo tum sedente in theatris, & spectaculis intento penitus obruit; nec hiis finibus contenti, cineres in Africam porro & Ægyptum, & Syriam, globis delati, peruolant; stupentibus rei miraculo gentibus, quum causam rei ignorarent. Equidem non ita pridem nauem in alto mari nauigantem, cinere undique conspersum esse accepi; quid mirum? quum tam dissitæ, tanquam longinquæ regiones simile quid passæ, hoc exemplo, reperiantur? multi mortales hac peste absumpti sunt, sed præter alios, *C. Plinius*, Classis tum Misenenfis Præfectus; qui quum atram ex Vesuulo nubem volui primo diluculo conspiceret, triremi conscensâ, eò statim visendi & cognoscendi causa properabat,

properabat. Quamvis autem cinis jam, & densior, & feruidior nauiganti incideret, nullo tamen vel amicorum, qui vnà erant, suasset, vel ipsius magistri, cui monenti paruisset debuit, consilio adduci potuit, vt retrò cursum flecteret. Dum nauigat, hîc montis in littus prolapsi ruina longius à terra sumimouetur: cursum illic in alto tenenti, vadum subito exortum obstitit; sed pertinax propositi animus, non priùs miraculum illud naturæ speculari desinit, quàm cinis cum tetro sulphuris odore magna copia incidens spiritum occluderet. Anno sequenti *Titus* in Campaniam ad res ibi tot incendiis desolatas ordinandas proficiscitur; quo absente magna Romæ pars, igne subito ex ipsa terra passim erumpente, conflagrauit; Deo profectò, vt mihi videtur, templi Hierosolymitani ab illo recentèr tū euerfi pœnas exigente: nam præter priuatas ædes, falsorū etiam Deorum, *Serapidis* ac *Isidis* fana, templum *Neptuni*, *Pantheon*, & *Iouis* ipsius Capitolini ædes, eodem igne hausta funditus perierunt. Quidni enim ego, hæc omnia in templi sui (quamvis à se jam derelicti) vindictam à Deo immissa fuisse censeam, quum ne ipsi quidem tum Romani (vt author est *Dion.*) gentiles quamvis & à vero Deo, cuius & templum & urbem vastauerant, alieni, hoc malum *dinum* planè, hoc est, diuinitus immissum & inflictum fuisse dicere non dubitarent.

C. Plinii
Mors.

Roma igne
ex ipsa terra
erumpente deso-
mata.

Tito vero successit *Domitianus* frater, *Domitiano* *Nerua*; à *Nerua* res ad *Trajanum* delata est; hic expeditionem in *Parthos* suscepit;

Cap. 28.

Euphratemque & Tigrim transgressus ultra
Alexandri tropæa tendere constituit: major ta-
 men eum impetus maris Erythræi siue Oceani
 Orientalis littus visendi cepit. Itaque ad dex-
 tram deflebens, voti quidem hujus compose-
 uasit, nauigiisque in Oceanum euectus illa
 maris jactatione veluti ludo quodam (quod
 olim *Alexandrum* in Oceano Indico fecisse
 constat) se aliquantisper oblectabat; conspecta-
 que naue quæ in Indiam nauigabat, se fiqui-
 dē annis junior esset, eo profecturū professus
 est; *Alexandrum* subinde, quod eò penetrâset,
 fœlicem vocans. Inde reuersus in itinere mor-
 tem obiit; eique summo omnium studio succes-
 sor datus est *Adrianus*, qui res quas sciam in
 mari nullas gessit. Eo tamen imperante par-
 tim mercaturis, partim expeditionibus effe-
 ctum est, vt via ad Indos notior, quam prius,
 mari fieret. Etenim *Arrianus* quidam vir pacis
 militiæque studiis clarus, Periplon siue mari-
 tiniani itinerationem, hoc tempore, maris Ery-
 thræi accuratissimè conscripsit; in quibus iti-
 nerum, regionum, gentium, oppidorum, por-
 tuum, promontoriorum, fluminum, quæ maris
 vtriusque littori adjacent, ea fide & diligentia
 perscripsit vix vt aliquid hac nostra ætate iis
 addi possit.

Cap. 29.

Dixi superius temporibus *Claudii* Impera-
 toris, *Annei Plocami* libertum tempestatibus
 abreptū Taprobanem insulam & orbem orien-
 talem Romano Imperio aperuisse. Romani
 verò hac arrepta occasione, quousque poterant
 armis omnia subegerunt, & vestigal deuictis
 indicebant:

indicebant: sed mercaturis faciendis nullum deinceps finem posuerunt. Itaque *Adriano* imperante periplus hic maris Erythræi ab *Arriano* institutus est. Qui ab intimo sinus Arabici portu initium faciens dextrum primum lītus ad Caput ferè bonæ spei Occidentem versùs persequitur; singulis promontoriis, insulis, portubusque sua nomina, ut tum ferebant, apponens; quæ Portugalli deinde auorum nostrorum memoria magna parte immutarunt. Inde reuersus Orientem petit, statimque ab ostio sinus Arabici, Arabiam fœlicem attingit: non illam regionem, sed urbem, & emporium toto orbe à multis antèa sæculis celeberrimum. Eo enim ex reliqua Arabia omni Persideque & India, aromata, & si quid diuitius natura in illis regionibus procreabat, terra marique aduehebantur. Hæc nimirum est illa urbs quæ nunc Aden, seu Adem Belle foresto, & *Ludomico Patritio* dicitur: centum & viginti milliariibus ad Orientem ab Arabici sinus ostio posita. Inde Alexandrini postea petebant, quas toti orbi Romano communicarent, merces. Sinum deinde Persicum radit, & Ormusam siue Harmosam insulam intrà sinus Persici ostium positam perstringit; non quidem sub Ormusæ nomine, sed erat illa vna de tribus insulis infra ostium sinus Persici locatis, quas Callaias vocat. Tum littus Indicum inuifit: signa regionis in vasto illo Oceano nauigantibus occurrentia designat: *Serpentes nigros anguillis aut murenis magnitudine pares toto mari natantes*: eo indicio & Indiæ regionē sub sinistris non longè

Aden emporium in Arabia celeberrimū.

Indus.

Lacteus
maris In-
dici color.

Cambaia.

habere noscunt. Quã tamẽ rem Gubernatores Portugalli in suis itinerationibus tanquam suũ inuentũ jactant, vt ex *Linschottenii*, *Tho. Lopezii*, & *Andreae Corsalii* libris editis apparet. Indum verò fluuium nullum nominat *Arrianus*, sed *Synthum*: siue illud priscum fluuii ipsius nomen erat, siue præcipui ejus fluminis ostiũ appellatio; à quo totum ab *Arriano* nominatum videatur. *Ptolomæus* enim *Synthum* inter septẽ Indi fluminis ostia præcipuũ recenset. *Plinius* verò *Syndũ* vocat: vt existimare liceat, vel ab Indo *Sindum*, vel à *Sindo* Indi, literula vna vel addita, vel subtrahita, quod sæpè fit, fuisse nominatum. Idem quem dixi *Corsalius* tanquam rem nouam & prius inauditam, sibi in sua nauigatione mare vicinum Indiæ lacteo colore apparuisse refert; quasi verò non & hic, noster *Arrianus* in hoc suo periplo id ipsum tradidisset. *Cambaia* nunc celebrant nostri; quo vocabulo siue ciuitatem denotent, ea *Arriano* *Syrastrena* est, siue sinum, in quem *Indus* effunditur, is *Canthicolpus* Græcè, hoc est, *Canthi* sinus dicitur. Sed ne multus in hiis sim, periplus hic, non solum ad *Gangis* ostia, *Malacancæ* in aurea *Chersoneso* positam, & *Taprobanem*, siue *Sumatram*, verumetiã longius ad Orientem & ad vsq; *Sinensium* regnum, quod *Chin* siue *China* nunc dicitur, se extendit; idque tam certo ordinẽ, vt nihil sit facilius, quam difficillimas plerasque inter scriptores hisce de rebus subortas lites, ex hoc periplo componete. Multi erant hoc in quo nunc versor sæculo, qui res Indicas diligentèr admodum tractabant

tractabant. *Strabo*, qui temporibus *Tiberii* vixit: sed ille magis *Mediterranea* sequutus. *Plinius* deinde, solertissimus naturæ in omni genere scrutator. Mox *Ptolomæum*, qui Marinum quendam sequutus, sed eum emendans, pinacas illas suas, siue Tabulas Geographicas, ad Cælorum gradus ita statuit; vix ut illarum rerum experientia ad hanc usque ætatem aliqua ex parte refellantur. Sed *Arrianus* hic noster in rerum Indicarum explanatione plus cæteris elaboravit. Nam & in Historia de Expeditione *Alexandri Magni* scripta eas diligentissimè persequutus est; & singularem insuper de rebus Indicis librum edidit; & hunc denique ejusdem littoris periplum accuratissimè conscripsit: Quem librum *I. Strabonem*, genere Germanus, doctissimis suis scholiis illustravit, novaq; nomina, ut erant nuper à Portugallis imposita, priscis vrbiù, portuù, promontoriù & insularù appellationibus subjunxit. Quibus de rebus latius paulò, veluti stadio egressus, scripsi. Sed id eo animo feci, ut rerum mundanarum (quod mihi sæpè facio) vicissitudinem legentibus antè oculos videndam constituâ. Quoties enim ditissima illa & naturæ dotibus omni in genere refertissima regio ad hujus nostri orbis notitiâ pervenit? quoties & recessit? *Alexander*, (ne quid aliùs repetam) *India olim* eam olim terra marique aperuit: anno deinde *varie &* ducentesimo, sic evanuit; ut nisi homulus qui- *reperita, &* dam fortuitò ventorum casu abreptus eò perue- *amissa.* nisset, esset India, esset Taprobane, necne, tantùm non dubitari posset. Illo igitur sæculo
rursus

Caput Bo-
nae spei,
alias Tor-
mentosum.

rursus innotuit; sed paulò post sic è notitia, veluti è conspectu, abiit, vt recognita beneficium Portugallis debeamus: Hii enim circitèr annum 1496. à *Johanne* Rege suo missi multis sudoribus, quū Guineæ littus præterlegissent, ad promontorium quoddam longissimè in austrum procurrens pervenerunt: vbi præter solitas maris injurias fulmina cæteraque cæli prodigia passi, tandem industria sua caput ipsum superarunt, qua re contenti, ad *Johannem* redierunt; suisque chartis huic promontorio nomen Tormentosum inscripserunt. *Johannes* verò re diligentius & maturius perpensa, quum caput illud ad tricesimum secundum latitudinis Australis gradum pertingere, vtrâque ad Austrum terrarum nihil, vasti modo pelagi famam inaudisset, tanquam voti compos Indiam jam manibus teneret, & spe plenus, locum ipsum pro Tormentoso, Caput Bonæ spei appellari iussit. Nec eum sua fefellit spes: anno enim reparatæ salutis 1499. *Vascon Gama* ab *Emanuele Johannis* hujus filio missus totam Indiam perlustravit: paulatimque eo Portugalli missi totum ferè littus primum, deinde & interiora continentis, sui juris, structis vbique castris & munitionibus additis, fecerunt. Quibus de rebus explicatiùs, quam ad ea tempora devenerimus, fauente numine, dicturi sumus.

Cap. 30.

Adrianus anno reparatæ Salutis centesimo & quadragesimo in humanis esse desiit; *Adriano* verò successit *Antoninus Pius*; Multa ille bella per Legatos aduersus Britannos, Mauros, Germanos,

Germanos, Dacos, Judæos, Græcos, Aegyptios, Alanos & Scythas gessit; multa etiam toto orbe inter infensissimas gentes suborta, vel auctoritate, vel conditionibus composuit; sed præter trajectus in mare nihil. Idem de *Marco Antonio* Philosopho dicendum; per omnes terras victrices Aquilas circumferebat; sed nullam ei in mare bellandi causam oblatam legimus. Nec alia sub *Commodo*, *Pertinace*, *Juliano*, *Severo*, belli gerendi ratio; quamvis enim ingentia fuerunt & luctuosa horum temporum facinora, omnia tamen terrâ perpetrata erant, præterquam ad Byzantium: cujus urbis & sæpè antè à me facta est mentio, & sæpè posthac facienda veniet; neque enim vlla toto orbe terrarum urbs est, fuituè, quæ per tot casus, totque rerum discrimina, diuersasque fortunæ nunc prosperæ nunc aduersæ vicissitudines ad id fastigii ascendit quo Byzantium, quæ nunc Constantinopolis est, aspiravit. Hæc urbs *Nigri* partes eousque aduersus *Severum* sedit, ut ne exso quidem eo, pro quo stabant, ad *Severum* ciues trahi potuerint; urbs ipsa, loco, quod sæpè diximus, opportunissimo posita, magna sui parte mari clausa erat; & muri quidem urbis, quæ continentem spectabant, ingenti altitudine atrollebantur, frustra ut omni ab ea parte oppugnatione esse videretur. Ad mare verò versi humiliores quidem à fundamentis erant; sed scopuli tamen ipsi quibus impositi erant muri, prærupti adeò vel potius abscissi magna parte erant, & tanta altitudine ab aquis extabant, nullum ut

*Byzantii
obsidio &
excidium.*

ab ea parte periculum ostenderetur; duo scilicet portus intra murum extructi, ingentibus catenis ferreis clauderantur, & projectæ exteriorius in mare moles ex saxo ædificatæ, arctiores utriusque portus fauces efficiebant; & molibus turres impositæ ipsis faucibus imminebant; quæ omnia inaccessa planè à mare ad utrumvis portum viam hostibus efficiebant. Neque verò situ modò & munitionibus tuta hoc tempore urbs illa erat, sed erant insuper in ea machinæ omnis generis ad quaslibet naues confringendas per muros dispositæ. Hiis immanis ponderis saxa trabesque in hostem, si propius accessissent, mittebant, lapides verò telaque atque hastas, si longius stabant, in eos euibrabant. Erant & nonnullæ machinæ quas harpagonas, seu manus, ferreas appellabat. Has in naues manibus succedentes demittere, raptasque in sublime tollere & manibus appendere solebant. Quarum omnium Machinarum Artifex erat quidèmi nomine *Priscus*, veteris illius *Archimedi* æmulus. Habuerunt etiam Byzantini quingentas naues, magna parte uniremes, nonnullas etiam biremes, & triremes alias, sed rostratas omnes; quasdam etià utrinque hoc est tam à puppi, quàm à prora, gubernaculis instructas; duplices etiam gubernatores, ac nautas, paribus officiis habuerunt, ut nulla vel nauium ipsarum conuersione, vel ministeriorum interturbatione, vel hostibus inferrent se, vel si res posceret, se reciperet, eosque tam accessu, quàm recessu fatigarent. Quod genus navium, *Germanicū*, dum *Frisios* olim & *Saxonas* debellaret,

*classis Byzantine
modus.*

debellaret, primum excogitasse diximus; mirū
 vō sit, nostræ hujus ætatis pugnis naualibus
 tantoperè deditæ neminem ad hujusmodi na-
 uium genus fabricandum, animum adjecisse.
 Infinitum esset singula quæ in illa obsidione,
 præsertim mari, contigerunt enumerasse; toto
 enim quo obsidebatur vrbs triennio, rarò à
 præliis naualibus vlllo die cessatum est; in qui-
 bus grauià plerumque incommoda & vulnera
 obsessi obsidentibus inferebāt, quos nec in otio
 tantillum temporis agere patiebantur; sed si
 quando pugna fessi, lōgiùs à muris ad anchoras,
 obsidendi magis quam oppugnandi causā sta-
 rent, vrinatores subinde ab vrbe submitte-
 bant, qui præcipuis quibusque nauibus fu-
 nes, clauis affigebant; mox præcis anchora-
 libus abibant: tum Byzantini in littore stantes
 fixas ad se cum risu pertrahebant: stupente Ro-
 mano, quod velit, nolit, nulla apparente causā,
 sed vi quadam diuina ad hostes cædendi, veluti
 victimæ, traherentur. Accedebat eodem, quod
 Mercatores sæpè se Byzantinis vltra capiendos
 offerebant; qui postquam magno pretio mer-
 cimoniam suam vendidissent, simulata fuga se ad
 suos recipiebant. Quo maximè commento
 longo tempore fallebant, & obsidionem vltra
 spem suam aut opinionem hostium produce-
 bant. Verum quum hac fraude detecta arctiùs
 clauderentur, consumptis demum rebus omni-
 bus quæ intus erant, quamuis in summis
 angustiis constituti fortiter tamen, resistebant;
 cumque summa eorum spes in rei maritimæ vfu
 esset,

esset, veteres Carthaginienses imitati, detracta ædium materia ad naues fabricandas, mulierum verò capillis pro sparto ad eas funibus instruendas utebantur; cumque hostes muros jam contemptim subirent, nec illi lapides majores, quos machinis emitterent, in vrbe reliquos habebant, lapides marmoreos, ingentes & multa arte politos, nec hos solùm, verum etiam equos ex ære lapideuè solidos, statuasque, & alia nobilia signa, quibus vrbs illa inter primas terrarũ orbis ciuitates ornata erat, in aduersos integras jaciebant; planè vt nouo quodam & inaudito equitatus peditatusq; genere hostes se in mari peti mirarentur. Postquàm verò cibi consueti omnis generis copia consumpta iam esset, ad pelles animalium aqua calida maceratos vescendos se vertebant, nec muribus, aut soricibus, aut felibus & canibus abstinebant. Quibus etiam consumptis, magna pars medijs tempestatibus & procellis pro occasione freti, inter hostium stationes magno periculo nauibus impositi auferunt; nullum fati genus recusantes, dummodò fame (peste omnium terribilissima) mori non cogerentur; qui verò in vrbe remanserunt, ad mutuas cædes conuersi, non aurum, non suppellectilem, non reliquas diuitias, non denique vindictam appetebant, sed id modo agebant, vt occisi cadauere ad sui corporis sustentationē, & famem pellendā potirentur. Cujus moris pertæsi rursus ad fugā mari faciendā non priuato jã, sed publico consilio, animos aduerterunt; nec singulis, vt antè nauibus, sed

. vniuersis

vniuersa, quantam quantam ex omni nauigio-
 rum genere facere possent classe comparata.
 Quæ sententia quum sterisset animis, tanto re-
 pentè numero in singulas inuolabant, vt
 multæ ipso in portu, aliæ statim egressæ irru-
 entiū, vt in talibus ferè sit, vectorū pondere de-
 pressæ mergèrentur. Reliquæ verò dū sæuiente
 pelago sic ferrentur, vt ipsi laterum margines
 aquis vix extarent, facili hostium in transuersos
 impetu deprimebantur. Nec pugna hæc erāt,
 sed ingens miseris clades à crudeli hoste, nullo
 discrimine, illata. Id verò quum Byzantini è
 mœnibus conspexissent, non iam ad lachrymas,
 quas ingens dolor compresserat, sed ad lamen-
 ta & ejulatus conuersi, Deos quisque vel priua-
 tim suos vel publicè patrios nunc inuocabant,
 nunc accusabant. Tanta enim erat fractarum
 tabularum multitudo, vt quum multò maxima
 pars ad vrbs mœnia appelleretur, ingens tamen
 earum copia in Insulas & in Asiam ipsam ven-
 tis delata perferrentur : ex quibus gentes lon-
 gè distitæ cladem Byzantinorum, nullo nuntio
 perferente, perceperunt. Hac clade fracti By-
 zantini deditionem demùm faciunt: qua hostes
 crudellitèr vsi omnes qui Magistratum in vrbe
 gesserant, trucidarunt : nuntio verò victoriæ
 ad *Seuerum* perlato, tantam læticiam indè cepit,
 vt hac voce homo minimè alioquin vanus ad
 amicos sæpius vteretur, *Tandem & Byzantium*
cepimus : Ipsi verò ciuitati libertatem & jura
 dēmpsit; bona ciuium publicauit; ipsamque &
 agrum omnem vicinum Perinthis æmulis qui-
 dem,

dem, sed dignatione haudquaquam comparandis concessit; Hii moenia vrbis euerterunt, eamque in ignobilis vici formam redegerunt. Ferunt Byzantinos non alia re æquè ac murrum subuersione indoluisse. Erant enim operis magnificentia cum mundi miraculis comparandi; in quibus septem turres fuisse perhibentur, quæ à Portis Thraciis ædificatæ spectabant ad mare; in quarum prima, si quis vocem emisisset, tale erat in ea artificium, vt is statim sonus ad secundam, indeque ad tertiam, & denique ordine ad septimam integer perferretur. Sunt qui ferunt hanc (vt ita loquor) vocalitatem in mœnibus olim Thebanis ab *Amphione* extructis fuisse; In Ecclesia certè Cathedrali Claudiocestrensi notissima apud nos res est, & mihi ipsi experiundo compertissima, esse locum similiter vocalem, quem *Clausitrum susurrans* vocant; in quo si quis vocem lenissimo spiritu & tenuissimo susurro emisserit, longè indè sonus, isque articulatissimus, & perceptu facillimus perfertur. Quod quamuis primùm audientium animos variè versare soleat, nihil tamen habet hiis, de quibus nunc loquor, mœnibus comparandum. Hic tum Byzantii casus erat: sed ea fuit loci ipsius opportunitas, vt non ita multo pòst pristinam non solum libertatem, verumetiani claritatem reciperet, dignaque demùm videretur ciuitas, quæ altera Imperii Romani sedes & *Nonæ Roma* vocaretur. Scio non indiligentem Lectorem ducum, qui hanc tam diuturnam præclarissimæ vrbis obsidionem,

Turres v-
cales.


vel

vel fecerint, vel defenderint, nomina desideraturum. Quis enim vel *Homerum* Trojanam, vel *Maronem* Lauinii obsidionem tradentes legeret, si res gestas narrâsse contenti, *Hectoris* ille & *Achillis*, hic *Ænea* & *Turni* nomina tacuisset? sed enim hanc gratiam *Xiphilino* & *Theodosio Dionis Nicæi* temporum illorum scriptoris longè præstantissimi non abbreviatoribus, sed exectoribus debemus: qui ut sua oscula nitidiora paululùm & effeminatiora populo venditarent, quicquid in autore roboris, aut virilitatis inerat, rapuerunt.

Libri primi finis.

G

THO.





THO. RIVII
HISTORIÆ NAVALIS
MEDIÆ,
LIBER SECVNDVS.

Argumentum.



*C*Alieno primùm Imperante, Scythæ siue Gothi Romanum Imperium magna classe inuadunt. 2 Repulsi, iterum paulò post cum sex mille nauium classe redeunt : & à Claudio Imperatore delentur. 3. Franci à Probo Imperatore à sedibus suis ad Pontem Euxinum transferuntur. 4. De Carausio Gallo, ejusque in mari gestis. 5. De Francis & Gothis prælio nauali à Constantio deletis. 6. Pompeii & Constantii in Piratis debellandis comparatio. 7. Constantius in Britanniam transmittit. 8. Confusus rerum status sub Dioclesiano, Maximiano, & eorum Cesaribus, Galerio & Constantio, ad Constantinum magni tempora. 9. Memorabilis inter Constantinum & Licinium pugna naualis ad Hellespontum. 10. Constantinus Byzantium restituit, ampliat,

ornat, à suo nomine Constantinopolim, & Novam Romanam vocat. 11. Obeliscus, quid? 12. De Juliano Imperatore. 13. De 80 Sacerdotibus Valente imperante submersis. 14. De mirabili terrarum inundatione sequuta. 15. De Mose Cyprio. 16. Gentis Boreales in Romani Imperii terras, quaquaversum effusa. 17. De Clemente Maximo rerum in Britannia potito. Et de Ursula virgine, cum comitibus in mari cesa. 18. De Valentiniani, ab Aquileia, ad Thessalonicam per mare fuga. 19. De memorabili Prothincorum in Istro flumine strage. 20. De Valentinii in Italiam à Thessalonica cum classe reditu; & Andragathii in mare mortuo, & rebus in Occidente à Theodosio constitutis. 21. De altera Theodosii in Italiam expeditione, & morte. 22. De Alarico Gothorum Rege à Stilicone, ut ferunt, in Italiam attracto, ejusque morte, & Roma à Gothis capta. 23. De navali inter Fraxitum & Gainem in Hellesponto pugna. 24. De classe à Theodosio Juniore Honorio in subsidium missa: & pugna navali inter Heraclianum & Athaulphum Gothum ad Gades commissa. 25. Heracliani cum ter mille septingentarum navium classe cedes. 26. Insigne Gothorum in freto Gaditano naufragium. 27. De Vandilorum ex Hispania in Africam trajectu, & de Actii cede. 28. De Attila Hunnorum Regis in Italiam descensu. 29. De Venetiarum urbis origine. 30. De Britannorum à Romanis imperante Honorio defectione, & Rege è suo corpore delecto. 31. De Saxonum, Hengisto Duce, in Britanniam appulsu. 32. De Uterpendragonis ex Armorica in Britanniam


niam redita, & gestis contra Vortigerum tyrannum, & Hengistum Saxonem. 33. De Vandilorum regno à Genserico in Africa instituto, deque ejus potentia navali & Roma ab eo capta & direpta. 34. De Classe Romana à Genserico Vandilorum Rege ad Carthaginem oppressa. 35. De Constantinopoli à Vitaliano obsessa, & de classe ejus à Proclo Philosopho speculis vstoriis incensa. Denique de Belisarii Ducis in Africam ad Vandilos debellandos expeditione agit.

G 3

CAP.

ornat, à suo nomine Constantinopolim, & Nouam Romanam vocat. 11. Obeliscus, quid? 12. De Juliano Imperatore. 13. De 80 Sacerdotibus Valente imperante submersis. 14. De mirabili terrarum inundatione sequuta. 15. De Mose Cyprio. 16. Gentes Boreales in Romani Imperii terras, quaquauersum effusa. 17. De Clemente Maximo rerum in Britannia potius. Et de Ursula virgine, cum comitibus in mari cesa. 18. De Valentiniani, ab Aquileia, ad Thessalonicam per mare fuga. 19. De memorabili Prothincorum in Istro flumine strage. 20. De Valentinii in Italiam à Thessalonica cum classe reditu; & Andragathii in mare mortuo, & rebus in Occidente à Theodosio constitutis. 21. De altera Theodosii in Italiam expeditione, & morte. 22. De Alarico Gothorum Rege à Stilicone, ut ferunt, in Italiam attracto, ejusque morte, & Roma à Gothicis capta. 23. De nauali inter Fraxitum & Gainem in Hellesponto pugna. 24. De classe à Theodosio Juniore Honorio in subsidium missa: & pugna nauali inter Heraclianum & Athaulphum Gothum ad Gades commissa. 25. Heracliani cum ter mille septingentarum nauium classe cedes. 26. Insigne Gothorum in freto Gaditano naufragium. 27. De Vandilorum ex Hispania in Africam trajectu, & de Actii cede. 28. De Attila Hunnorum Regis in Italiam descensu. 29. De Venetiarum urbis origine. 30. De Britanniarum à Romanis imperante Honorio defectione, & Rege è suo corpore delecto. 31. De Saxo-
num, Hengisto Duce, in Britanniam appulsu. 32. De Uterpendragonis ex Armorica in Britan-
niam

niam reditu, & gestis contra Vortigerum tyrannum, & Hengistum Saxonem. 33. De Vandilorum regno à Genferico in Africa instituto, deque ejus potentia navali & Roma ab eo capta & direpta. 34. De Classe Romana à Giferico Vandilorum Rege ad Carthaginem oppressa. 35. De Constantinopoli à Vitaliano obsessa, & de classe ejus à Proclo Philosopho speculis vstoriis incensa. Denique de Belisarii Ducis in Africam ad Vandilos debellandos expeditione agit.





CAP. I.



Secro successit *Antoninus* filius,
Antonino Macrinus, eique *He-*
liogabalus. Quorum neuter
quicquam nauibus gessisse
proditur, nisi illud fortè
commemorare libeat, quod

Heliogabalus iste, naumachiam populo præbi-
turus, effossum campum Martium non inmisso,
vt alii, Tiberi, sed infuso vino impleuit: nec vl-
trà quicquam de hoc ipso pugne naualis simu-
lacro à scriptoribus traditum reperio. Hunc
Heliogabalum sequutus est *Alexander Mammæe*
filius, *Alexandrum Maximinum*, vir pedibus
octonis vno digito altior, *Maximinum Gordi-*
anus, *Pupienus*, *Maximus*, & *Balbinus*, *Gordianus*
Junior, *Philippus Arabs*, *Decius*, *Gallus Volusia-*
nus & *Valerianus*, is qui à *Sapore* Persarum Re- *Valerianus*,
ge non in prælio sed in colloquio, ad quod im-
par venerat, captus, omnes captiuitatis & serui-
tutis indignitates & misérias à barbaro victore
pertulit. Cui prandenti, pro scabello, currum
verò scandenti pro gradu dorsum præbuit. Sed
huic tamen ad vltimum infelicitis fati accessit,
quod *Galienum* filium se viuo Imperatorem re-
liquit. Quibus omnibus imperantibus quan-

quam nulla terrarum orbis pars à cæde & sanguine immunis fuit, atrocissimaque bella multis cladibus vbiq̃ue terrarum gesta sunt, nihil tamen in mare motum est. *Galieno* verò imperante, omnia, non terra solùm, verumetiã mari, sanguine redundabant. In hoc enim tempus incidit triginta illa tyrannorum diuersis orbis partibus exortorum rabies: quippe nemo tam exiguæ existimationis toto orbe Romano Dux, aut quantularumcunque copiarum præfectus tum erat, qui non se quam *Galienum* digniorem imperio esse duceret. Quid? quod gentes barbaræ se à Romanorum armis hætenus defendisse contentæ, nunc vltrà terras imperiî omni parte inuadebant; & cæteri quidem terra: Scythæ tum primum re nauali, & maris vsu gloriam quærere cœperunt, tramissoque Euxino *Heracliam* primo & *Cyzicum* in Asia, *Mysos* deinde, & alios *Istri* accolæ in Europa cum tota Græciâ diripuerunt. Interim bis tetuè classibus concursum: quibus in præliis Scythæ, prædâ *Heraclien*si & *Cyzicen*a grauem trahentes classem, à Romano, quisquis ille fuit, classis præfecto ingenti hominum nauiumque clade affecti, ad suos redierunt. Indè relictis copiis & reparatis classibus Europam rursus incurere parabant. Sed à *Veneriano* classis Romanæ, quæ ad *Byzantium* tum stabat, Archigubernò cladem alteram acceperunt. Verùm ipsi paulò post *Veneriano* sortem cum fœnore rependerunt; cæso enim *Veneriano*, totam classem Romanam in fugam coniectam ingenti clade affecerunt; qua victoria elati, omnem *Thessaliam*,

Prima
Scytharum
maritima
expeditio.

liam, Eæotiam, totamque adeò Græciam vsq;
ad vltima Epiri littora, vndè Italiam tantùm
non despicere possent, armis peragrarunt; adeò
quidem vt ipse *Galiennus* cædes interim dome-
sticas, familiares, & ciuiles, quibus omnia Ita-
liæ loca fœdauerat omittere, & Scythis in Illy-
rico (veritus ne per illum tractum in Italiam ir-
rumperent) occurrere cogeretur. Ibi hostes in-
signi clade ex prælio terrestri temerè, vt sæpè
fit, contracto affecit; quo facinore edito ad
pristinæ sordes reuolutus belli reliquias Mar-
tiano, vel, vt alii, Macriano duci persequen-
das tradit; Is vario euentu cum illis sæpè
confluxit, magno tamen molimine eos ad naues
demùm compulit. Scythæ igitur ad naues com-
pulsæ suam terram repetunt, sed mox cum in-
gentioribus copiis terrestribus & maritimis
reuersuri; iurati ex illo tempore nominis Ro-
mani hostes, nec bello alium quam Romano
Imperio finem imposituri. Hii enim Scythæ, *Scythæ,*
Gothi illi sunt, qui concitato vniuersæ Scythicæ *qui?*
gentis nomine Romani Imperii terras simul &
maria infandis deinceps cladibus affecerunt,
auulsisque primo membris, ipsam demùm sub
quadragesimum & decimum secundum à
Seruatore nato annum vrbeni Romanam re-
rum caput & mundi gloriam seniel, iterùm, ter-
tiòque hostiliter diripuerunt, septemque col-
libus, quibus superba sedit, detractam solo affli-
gere (mundi arbitro sic volente) valuerunt.

Verùm, vt ad Scythas redeamus, hii à *Macri-* Cap. 2.
ano in suas solitudines repulsi, cū sex mille na-
uium (vt auctor est *Zozimus*) classe paulò post
ad

*Claudius
secundus.*

*Alia Scy-
tharum
expeditio
navalis.*

ad Bosphorum venerunt. Sed rerum maritimarum rudes adhuc & locorum imperiti, dum ventis secundioribus acti confertim fretum ingrediuntur, nihil enim illo freto rapidus, incredibile dictu est, quantam jacturam, ex mutua nauigiorum compressione, in angustiis illis fecerint. Itaque ad suos reuersi rursus classi reficiendæ & exercitui nouo comparando operam dant: & *Galieno* interim defuncto, *Flavius Claudius* contra nouum hostem arma induit. *Tito* ille *Vespasiani* filio omni virtutum genere par, nisi forsàn major: sed & spatium regnandi compar; biennium vtrique imperandi finem fecit. Hoc biennio Scythæ rursus terra marique bellum Romanis intulerunt: exercitus trecentorum viginti millium erat; classis duobus nauium millibus constabat; classe eo usque processerant, vt maximam insularum in *Ægæo* positarum partem diriperent; *Cretam* etiam & *Cyprum* tentarent: neque enim facile Romano principi erat, vel exercitum, vel classem, tam itrenuo, tamque populoso hosti parem in vestigio contrahere: sed *Claudius* rebus demùm ad tantum bellum necessariis comparatis, aduersus hostem ducit. Classem verò sibi ad *Byzantium* occurrere iussit. Ipse eodem per *Illyricum*, *Myfiam*que, & *Thraciam* cum pedestri exercitu contendit. Terra marique bellum erat. *Claudius* ad *Istri* ostia congressus, vniuersam hostium classem depressit. Cætera deinde pari virtute & fœlicitate in terra gessit; vix vt nuntium cladis ex tanta multitudine relinqueret. Extat ipsius *Claudii* ad *Bracchum* apud *Pollionem*

Pollionem epistola: Delevinus (inquit) trecenta viginti milia Gothorum: duo millia navium merfimus. Claudio deinde Aurelianus suffectus est, Aureliano Tacitus, Tacito Probus: de quo extat illud Aureliani Imperatoris elogium, si Probus Probi nomen non habuisset, cognomen habere potu- Imp. isse: Vir, si quis vnquam in illo imperio, magnus simul & bonus. Hic omnem Germaniam quam armis se maximè tum efferentem multiplici vbique strage edita pacavit; populosque à sedibus quemque suis ad alias, velut æstiva pecora de saltu ad saltum, demigrare fecit.

Inter alios, ingentem Francorum (qui non Cap. 3. longè ab Oceano Germanico inter Salam & Rhenum terras incolere) vim bello captam ad Pontum Euxinum (vbi Gothos & Scythas *Franci è Germania ad littus Euxinum translati.* habitasse diximus) transtulit. Eo consilio, vt gentem pari feritate & robore præditam, Scytharum & Gothorum cervicibus veluti iugum imponeret Quod sequiùs postea, quam ille tum animo destinabat, accidit. Probo verò militari facinore sublato successit filius ejus *Carus*: is qui, dum Persas magna virtute debellaret, in tentorio suo fulmine ictus perlit. Hic duos filios, vel, vt quidam scribunt, fratres, Numerium & Carinum in Imperio reliquit. Filies magis existimo; quandoquidem id de Numerio memoriæ proditur, cum *Carum* Imperatorem tam misera sorte abreptum perpetuis adeò lachrymis prosequutum esse, vt in incurabilem planè oculorum valetudinem incideret. Rarum in filio, incredibile in fratre, præsertim in imperio successuro, exemplum. Hunc Numerium

Numerium focer ipsius Aper in hospitio jugulavit. Quo facto imperium veluti hæreditatem jacentem inuasit. Id verò exercitus non tulit, sed *Dioclesianum*, depulso Apro, Imperatorem salutavit. Imperante verò *Dioclesiano* memorabilis in re nauali castis incidit; cui si summa virtute & festinatione obuiam itum non fuisset, illo demùm sæculo res Romana naualibus copiis ab hoste barbaro concussa concidisset.

Cap. 4.

Carausius.

Erat quidam nomine *Carausius* ex Menapiis in Gallia oriundus, vir strenuus & multis vbiq; militaribus factis, sed præcipuè in mari nobilitatus. Is quum eodem tempore Cimbri, Saxonesque & alii maritimi Germaniæ populi, mare Britannicū latrociniis infestarent, dignus habebatur, qui provinciales ab eorū incurſibus, seu terra, seu mari tutaretur; quam ille potestatem adeptus, ea ad suū commodum & utilitatem nefariè exercebat. Piratas ut prius liberè grassari patitur; nec nisi præda onustos aggredi solebat; captis verò pro spongiis utebatur; bona fukulit, sed nec ipsos in crucem, quod fieri oportebat, egit, nec bona recepta vel Dominis restituit, vel arario intulit. Qua de re certior factus *Dioclesianus*, Cæsaribus *Constantio* & *Maximino* in mandatis dat, ut hanc pestem è medio quamprimum tollerent. *Maximinus* quo minimo cum negotio rem conficeret, percuſſorem submisit. Quod quum comperisset *Carausius*, unicam salutis spem in eo posuit, si non jam amplius pro Classis Britannicæ Archiguberno, sed pro ipso Britannicæ Domino, & mundi

mundi *Augusto*, se gereret; idque magno suorum assensu fecit, rarò ut ullus majore exercitus sui favore purpuram induerit. Itaque præter Classẽ Romanam quam ad Britannici Oceani tutelam in potestate habuit, innumeras alias, eadem forma & robore ædificatas, ascivit, Legionemque Romanam occupavit, & tam ipsam, quam peregrinos alios, & Mercatores Gallicos quoscunque adipisci poterat, ad munia nautica volentes exercuit, inuitos astrinxit. Quæ omnia eò majore fiducia agebat, quod *Constantio* & *Maximino*, (propriam enim Romanorum Classẽ unà cum veteribus sociis navalibus sibi sociaverat) nouo & milite, & remige vtendum esse sciret. Cæsares, quum tantam belli molem terra marique imminere cernerent, partito labore rem aggrediuntur. *Maximinus* mille nauium bellicarum classẽ, structis ad Rhenum navalibus, parabat. *Constantio* terrestris militiæ cura obigit; qui quum *Carausium* ad Portum Gessoriacum appulisse, moramque ibi trahere, & Gallorum animos tentare, & ad defectionem sollicitare comperisset, eò subitò cum exercitu accurrit. Munitissimus tum erat Gessorigia locus: quam quum *Carausius* obtineret, mareque ad comneatus inferendos apertum, & in potestate haberet, facile ille obsidionem omnem terrestrem contempsit. *Constantinus* verò ludibrium illud non tulit. Ingens igitur opus aggreditur: portus os ingentibus defixis arboribus, aggestaque arena & cespite inducto, paucis diebus, sæuiente quamuis pelago, & ipso *Carausio* in opera

dies

dies noctesque pugnante obstruit. *Carausius* immensi operis nouitate attonitus, nec, erepro jam mare, necnibus vrbs vltra fidem tum esse ratus, nocte intempesta per intermissas stationes cum fidissimis quibusque suorum elapsus profugit, & nauigio receptus in Britanniam ad exercitum & classem venit. Quam suam temeritatem ipse paulò post acerrimè damnavit: quum postero, quam inde abiisset, die, aggerem fluctibus dissolutum corruisse inaudisset.

Cap. 5.

De Francis.

Dixi superiùs Imperatorem *Probum* Francos à suis sedibus ad Pontum Euxinum transfuisse. Hiî Franci cum Getis aliisque Scytharum (quibus hostes à *Probo* destinati fuerant) populis, seu fœderum, seu morum similitudine sociati, incredibilem statim classem per Bosphorum Thracium in omne mare mediterraneum immiserunt, omnesque maris illius oras, Hispaniam vsque & Africam & columnas *Herculiæ*, latrociniis suis infestabant; nulla vt insula, nulla vrbs, nulla regio, quæ modo mare spectaret, ab eorum direptionibus tuta esse posset. Ipsas etiam in Sicilia Syracusas in itinere occuparunt, & incenderunt; quibus gestis, Columnis egressi omnia in auerso Africæ & Hispaniæ littore fœdum in modum depredabantur, spoliisque onusti, nemine interpellante, in Pontum ad suos redierunt. Cum hiis *Carusius* tot cœli regionibus disjunctis societatem & fœdus iniit. Itaque Franci (horum enim iam, non Getarum aut Scytharum, nomen in ore hominum esse cœperat) ne fœderato suo deessent, cum pari qua priùs classe egressi

Carausii cum Francis confectio.

egressi ad fretum Gaditanum veniunt; id vnum agentes vt *Carausio* jungerentur. Haud aliâs tantus terrarum orbem circumstetit terror; apparebat enim nihil à piratica ista conjuratione tutum fore, quâ nauibus pateret accessus. Itaque intermissæ toto mari mercatorum & negotiatorum navigationes. Quùm si æstate vela facerent, in hostium omnia loca classibus occupantium potestatem veniendum esset: sin hieme, venti & tempestates imminerent. E duobus tamen satius visum, hiemi quantumvis sæulenti fidere, quam aduersus barbaros æstiuo cælo periclitari. Nec dubium erat quin si *Carausius* & *Franci* in vnâ classem coiissent, insignè aliquod daninum Romano Imperio illaturi essent. Maturandum igitur *Constantius* ratus, mille nauium classem à *Maximino* ad Rhenum, vt diximus, constructam accepit; aliasq; quàm potuit plurimas naues contraxit, & nouas insuper festinato opere extruxit. Quibus fretus omnes per Britanniam, Galliam, Hispaniam, ad Gades vsque, portus occupauit; nusquam vt *Carausio*, copias suas nauales in vnum corpus contrahendi, nedùm cum Francis cœundi facultatem relinqueret. Quibus sic dispositis ipse cum validissima copiarum suarum parte Francis extra fretum Gaditanum incredibili celeritate occurrit, leuiaque cum nonis istis in Oceano aduenis certamina, quibus vires eorum tentaret, contraxit. Mox verò cum vnâ classe congressus, internecino prælio sic commisit, nunquam vt deinceps Francorum nomē in regione Pontica, vnde tum veniebant, auditum

auditum fuerit; vir omni ævo memorabilis; qui vno prælio mare hoc exterum pacavit, & terrarum orbi pacem & securitatem reddidit.

Cap. 6.

*Constantii
cum Pom-
peio magno
comparatio.*

Nihil unquam *Pompeio* Magno maiorem vel gratiam vel gloriam peperit, quam quod interius illud mare latrociniis perpurgâisset. Ingens enim videbatur res vnum virum totum illum sinum maris consilio primum atque animo, deinde virtute & classibus complecti: nec aliter quidem quam videbatur erat res. Sed mare tamen Mediterraneum suis finibus, latis quidem illis, veruntamen finibus continetur. Quantulum verò hoc, si ad Oceanum comparatur? cujus omnia per Britanniam, Hiberniam, Germaniam, Galliam, Hispaniam, cum insulis vel interjectis, vel adjacentibus loca classibus *Constantio* complenda erant. Facile autem erat *Pompeio*, vel ipso imperio, & nominis Romani fulgore piratarum & latronum oculos perstringere; *Constantio* verò non autoritate, sed virtute tota conficienda res erat. *Pompeius* piratas nec opinantes ita indagine cinxit, & in suo quemque portu, ut feras in speluncis aut caueis, conclusit, nusquam ut se ad prælium commouere possent. *Constantius* & hoc ipsum contra *Carausium* pari consilio & celeritate præstitit, & Francos insuper ex alio veluti orbe venientes, aperto Oceano nactus, non cum clade repressit, sed funditus deleuit, vastique hujus Oceani dominium, quod *Caligula* inepro; *Claudius* parùm iusto titulo occupauerat, populo Romano ipso jure vindicavit: verè ut ab *Eumene* in Panegyrico ei dictum fuerit, addi-
disse

disse eum imperio terris omnibus majus elementum.
 Sublatis Francis rediit in Galliam *Constantius*,
 indè cum copiis terrestribus aduersùs *Carau-*
sium in Britanniam transmissurus.

Dum hæc parantur *Carausius* ab *Allecto* fa- Cap.7.
 miliari suo indignè trucidatus periit, ipseque *Carausii*
Allectus, nullo laudis genere cum *Carausio* cædes.
 comparandus, purpuram illi detractam sibi in-
 duit. Quumque compercuni haberet *Constan-*
tium ad Sequanæ fluminis ostium stare, ipse
 classeni suam ad Vectem Insulam tenuit; cer-
 tus prælio nauali configere, si copia congre-
 diendi fieret. Nec *Constantius* quancunq; pug-
 næ conditionem detrectare in animo erat; sed
 fortè accidit, ut suborta tempore matutino ne-
 bula, neutra classis in alterius conspectum ve-
 niret; terramq; *Constantius* in Britannia priùs
 caperet, quam *Allectus* eum mare ingressum
 fuisse sat certò sciret. *Constantius* exposito in
 terram milite classi ignem subjecit. Illo argu-
 mento militi denuntians spem reditus nisi
 victoribus esse interclusam. *Allectus* quum *Con-*
stantium terram cepisse accepisset, properè &
 ipse terram repetit, declinansque à *Constantio*,
 cujus virtutem horrebat, cum *Asclepiodato* ejus
 Legato congreditur. Sed quum primo statim
 congressu ruere circa se omnia animaduertis-
 set, abjecta quam temerè sumpserat purpura,
 & capite, ne agnosceretur, obuoluto, ultro in
 tela hostiū ruit & occubuit. *Constantius*, summa
 post duplicem victoriam moderatione usus, in
 nullius provincialium vel corpus, vel fortunam
 scivit.

Cap. 8.

Sed redeo ad *Dioclesianum*. Hic à initio statim, quum Imperii molem majorem esse prævidisset, quam ut vnis humeris sustineri posset, consortem sibi *Maximianum* adsciuuit, & *Augustum* appellauit. Hii rursus suum vterque Cæsarem, alter illum quem diximus *Constantium*, *Flauii Claudii* nepotem, & *Constantini* Magni patrem, alter *Galerium* dixit. Quumq; totos viginti annos Imperium tenuissent, posita purpura Imperio se & Augustali titulo abdicarunt, rerum potestate *Constantio* & *Galerio*, non jam Cæsaribus, sed Augustis permissa. Quod eo mirabilius in *Maximiano* videri potest, quod *Maxentium* filium tunc habebat, quem Imperii vel consortem assumere, vel hæredem relinquere potuisset: Sed ut videtur Imperii charitatē paterno amorī prætulit. *Constantius* igitur & *Galerius* terrarū orbem inter se partiti, ille Italiam, Africā, Hispaniam, Galliam, Britanniam, & qua Rheno contigua erat, Germaniam; hic Græciam, Illyricum, Asiam & Ægyptum, cum vltra-Danubiana regione omni, obtinebat. *Constantius* verò homo frugī quum esset, ne plus agri possideret, quam colere posset, Italiam & Africam deposuit. *Galerius* autem terras illas pro derelictis à *Constantio* habitas *Severo* filio suo natu majori, Asiam verò omnem *Maximino* minori tradidit. Ipse veluti mundi arbiter in Illyrico sedem fixit, ut altera quasi manu Asiam & Orientem, altera Italiam & Occidentem contingeret. Interim Prætoriani *Maxentium Maximiani* filium Imperatorem Romæ salutant. Accurrit igitur veluti ad nouū incendium

incendium restinguendum *Severus*, qui Italiam à patre provinciam acceperat. Sed ab exercitu suo destitutus *Ravennam* fugit. Vbi percussoribus à *Maxentio* immixtis, confoditur. Deinde *Maximianus* pater, *Maxentium* filium tollere, & Imperiū quod deposuerat resumere oprat. Sed spe dejectus in *Galiam* ad *Constantinum* nuper *Constantii* defuncti filium, suum generum, profugit. Agit cum filia, ut *Constantino* marito infidias struat: illa, vxor quam filia melior, rem marito aperit. *Constantinus* socerum tanquam cocleris manifesti reum occidi iubet. Inde in Italiam ad *Maxentium* debellandum transit, eumque ad *Miluium* pontem super *Tiberim* nactus acie vicit. *Maxentius* dum pontem transiit in *Tiberim* lapsus mergitur. *Licinius* sororem *Constantini* vxorem duxerat, aduersus quem *Maximinus Galerii* filiorum alter, qui *Auram* & *Orientem* tenuit, mouens, in itinere subito morbo correptus periit; alii ferro periisse tradunt.

*Maximiani
cadit.*

*Maxentii
mors.*

Restabant jam duo (*Galerius* enim suo fato interim decesserat) *Constantinus* & *Licinius*, quibus de rerum summa contendentibus, quum, diuiso inter se terrarum orbis Imperio, alter *Orientem*, *Occidentem* alter possideret, *Hellepontus* interfluens maritimiis præliis & causam & locum præbuit. *Licinius* tamen præter *Asiam*, aliquantulam in *Europa* *Thraciæ* partem, vrbesque *Adrianopolim* & *Byzantium* occupauerat. Qua re cognita *Constantinus* ad *Thessalonicam* (quæ *Salonicæ* nunc est) in intimo sinus *Thermaici* recessu positam

*Pugna navalis ad
Hellepontum.*

*Constantini
classis.*

*Classis Li-
ciani.*

cùm exercitu venit; vbi locum non inoportu-
num nactus, portum tumultuario opere ex-
truxit. Quumque animaduertisset, quanti
momenti res futura esset, si medium Europam
inter & Asiam fretum prior occupâisset, classem
ex tota Græcia, Dalmatiaque & Illyrico con-
tractam ad Pyræum in Attica conuenire iussit.
Conueniunt naues bellicæ triecôteris non ma-
iores ducentæ; onerariæ, quæ rostris appositis
bellicarû vice fungi possint, bina millia. *Licinius*
veritus ne Propontide, Bosphoroque & Helle-
ponto ab hoste occupatis, ab exercitibus suis,
quas validissimas in Asia habuit, excluderetur,
classeni & ipse adornare instituit. Itaq; ex toto
Oriente classem ciet. Triremes octoginta Æ-
gyptus, totidemque Phœnicia apprimè instru-
ctas mittit: Dorienses & Iones qui Asiam in-
colebant, sexaginta, Cyprii triginta, Cares vi-
ginti, Bythini triginta, Africani quinquaginta
suppeditabant. Hanc classem *Licinius* magna
celeritate confecit. Moram pugnæ attulit, quod
eodem tempore *Rausimodus* (Sauromatarum
Europæorum, hoc est, Scytharû Transistrano-
rum, siue Getarum, Rex) Istro transmisso, siue
suo nomine *Constantino* hostis, siue *Licinio* fa-
uens, *Constantinum* ab incæpto mauali reuoca-
bat. Itaque in *Rausimodum* mouens *Constanti-
nus* eum primo impetu auertit: ille Istrum
fuga repetit; premit fugientis vestigia *Constan-
tinus*. Quumque Istrum transgressum compe-
risset, contractis lintribus flumen & ipse traji-
cit. Ibi ferum & atrox prælium committitur:
Sed victoria, cæso *Rausimodo*, cum ingenti cap-
tiuorum

riorum numero *Constantino* cessit: qui *Theſſalonicem* reuerſus claſſi, vt à *Piræo* ad *Helleſpontum* veniret, mandat. Ibi Dux *Licinianus Abantus* cum ſua claſſe ſtabat. Nauarchi *Conſtantiniani*, habita loci ratione, octoginta tantum naues, non trirenes, vt temerè *Sigonius*, ſed triginta remorū ſingulas in prælium educunt. Non enim fretum illud maiorem ad dimicandum numerum capiebat. *Licinius* nauium cū genere tūn numero longè ſuperior apparebat. Claſſem enim ſecum ducentarum nauium verè trirenium, hoc eſt, ſi cum *Conſtantinianis* conferantur, triplo maiorem traxit. Sed quantò cæteris omnibus ſuperior, tantò arte & conſilio impar erat; ſolaque nauium multitudine ſuperbus, cæterorū immemor, incompoſita, & in nullam formam directæ claſſe, ſed vt mole præualens, & veluti vmbone hoſtē propulſurus, in *Conſtantinianas* irruit; *Conſtantiniani* locorum anguſtiis freti, denſatis ordinibus, & compoſiti venientes exceperunt; id modo cauentes, ne primo ſtatim congreſſu loco moti propellerentur. Eratque hæc pugna prælio ad *Eubæam* juxta poſitam inter *Athenienſes* & *Perſas* olim commiſſo perquam ſimilis. Vbi verò *Conſtantiniani* primos conatus hoſtium magna virtute, & immoti excepiſſent, toto ſtatim corpore in Claſſem *Licinianam* ſe inſinuant, extraque fretum progreſſi territis inſtabant, ſtipatoſque alteros in alteros agebant, & nunc in latera, nunc in puppes incurrendo, modo ſingulas carpebant, modo in confertas & impeditas vim inferebant, nec à conſternatis

disiectisque; ne circumuenirentur, vllus jam amplius restabat metus; sed velut in aperto deprensos campo liberè inurrebant. Veruntamen *Abantius* tot aduersæ pugnx incommoda tota die fortissimo animo sustinuit, restituitque sæpe, suis à fuga reuocatis, prælium; saltè ut victæ potius quam fugatæ Classis Licinianæ decus hosti relinqueret. Nox pugnantibus superuenit: Constantiniani ad Eleuntem, portum extra fretum Græciam versùs positum, redierunt, ut cum reliqua classe jungerentur: *Abantius* ad Æantium, urbem intra fretum versùs Byzantium sitam, se recepit. Postero die *Abantius* veluti rursùs pugnaturus classem educit; sed quum fauces vacuas reperisset, ex speculatoribus verò compertum haberet, Classem hostilem triginta nauibus auctorem in vicino ad Eleuntem stare, dubiùs animi, hostemne quæreretur, an ipso loco quo pridie pugnatum fuerat operiretur, substitit. Dum dubitat, fera tempestas à Caucasogræcia ingruit, totamque ejus classem in vicinum Asiæ litus, non procul Lampfaci eiecit; in quo naufragio centum & triginta naues cum apparatu omni, & vniuerso suo milite desideratæ sunt. *Abantius* tempestate elapsus cum quatuor tantùm nauiculis in Asiam se recepit; eodem & *Licinius* à Byzantio, ubi à *Constantino* obsidebatur, per custodias elapsus, properè venit, ut res quæ prælio nauali, quæ naufragio afflictas restitueret. Quare intellecta *Constantianus* exercitum classi imponit, & fœlici cursu Chalcedonem tenuit. Undè classis partem ad Byzantium maritima
etiam

etiam obsidione arctius claudendum remisit, seque ad terrestre cum *Licinio* prælium de-
venero imperio conferendum parat: nec *Lici-*
nus longam pugne moram fecit; inter Chal-
cedonem & antiquum *Junonis* sanum, ad ipsum
Bosphori Thracii os positum, æquo campo
concurritur: ibi non prælio sed bello victus *Li-*
cinus, centum suorum millibus amissis, ex acie
fugit, sed paulò post viuus in *Constantini* ma-
nus venit. Itaque ut prælii navalis fortunam
terrestre, sic terrestrem hanc pugnam Byzantiæ
deditio sequuta est. *Licinius* vitam paulisper
Thessalonicae retinuit. Sed quum periculosa *Licini*
imperio res videretur superstitem esse qui im- *mors.*
perasset, paucis post diebus, jussu *Constantini* è
medio tollitur. Inde *Constantinus* solus Impe-
rium Romanum tenuit. Salve *Constantine*, Vi-
ctorum maxime: Salve ô Prime Religionis *Chri-*
stiane in terris Vindex. Hac enim tu victoria
fretus post 324 servitutis, qua tenebatur annos,
jus ei & libertatem nullo vnquam sæculo mi-
nuendam, restituisi.

Constantinus, rebus in Asia constitutis, By- *Cap. 10.*
zantium redit; Byzantini victorem ultro rece- *Byzanti*
perunt: deditos ille, (nec causa sæviendi erat) *ampliatio.*
clementer accepit: urbis deinde situm quum
attentiùs considerasset, dignam esse censuit in
qua alteram Imperii Romani sedem figeret:
Itaque binum ferè millium spatium muro com-
plexus veteri urbi addidit, totamque Isthmum
(quam Chersonesum vocabant) ædificiis quæ
priuatis, quæ publicis explevit. Antè omnia
portus & naualia (omissa Thessalonica) summa

cura instruxit. Porticus etiâ & fora, & fornices, Circoſque, & Baſilicas, & templa, & Palatium veteri illi Romano par extruxit. Quin & incolas non ex plebe modò Romana ad habitandum, verum etiam ex Senatoribus ad nouam urbem, vel conſiliis firmandum, vel ſplendore ſuo decorandum, dedit. Veterum etiam ſigna, & Deorum Heròumque ſimulacra, quæ urbi ornamento quuiſmodo eſſe videbantur, non ſuſtulit, ſed leuiter immutata ad Chriſtianæ religionis & melioris hitoriæ ſignificationem tranſtulit. Quibus rebus effectum eſt, vt ingens hominum multitudo eò certatim confluerent, & ſuas ibidem ſedes collocarent, dum alii militiæ, alii mercaturæ, alii artium & diſciplinarum, alii aliorum negotiorum cauſa, relictis ſuis ſedibus eò demigrarent. Vnde breui tempore effectum eſt, vt muris longè capacioribus, quam eſſent ii quos *Constantinus* ſtruxit, clauderetur. Magna etiam vicini maris pars urbi acceſſit, defixis vndique palis, & ædificiis in eos impoſitis, quæ ſearſim ſumptæ, ad amplam urbem conſtituendam ſatis fore viderentur. Cuius rei, loci ipſius ratio admonebat, illius præſertim, qui *Ceras*, ſiue *Cornu* dicebatur. Erat autem Cornu ſinus quidam maris, ſexaginta penè ſtadiis ad occaſum extenſus, cornui non ſimplici, ſed ceruino, vt author eſt *Strabo*, ſimilis: vtpotè, qui in plures ſinulos, veluti ramos quosdam ſcinditur; Quod omne ſolum, quum vadofum eſſet, ædibus inædificandis facile ſe & oportunitum præbuit. Urbem verò ipſam *Constantinus* à ſuo nomine *Conſtantinopolim* appellauit.

Mortuus

*Ceras.**Conſtanti-
nopolis.*

Mortuus deinde est *Constantinus*, & *Constantinus* Cap.11.
Constantino sepultus. Imperium verò tribus filiis,
Constantio, *Constanti* & *Constantino*, per omnia
 discordibus, nec eandem vel regendi, vel cre-
 dendirationem tenentibus reliquit. Sub quo-
 rum imperiis nihil, ad mare quod spectet, me-
 moratū dignum referre habeo, nisi illud for-
 tasse quod *Constantius* obeliscum è Thebaide *Obeliscus.*
 in Ægypto Romam convehendum curavit.
 Est autem obeliscus asperrimus, ut tradunt, la-
 pis, in figuram metæ cujusdam sensim ad pro-
 ceritatem immensam consurgens, & ab imo ad
 summum specie quadrata gracilescens & manu
 artificis leuigatus, formarum autem innumeras
 notas, quas Hieroglyphicas vocabant, descrip-
 tas habens. Id autem inter Obeliscum & Pyra-
 midem intererat, quod ille vno lapide, hic va-
 riorum structura constabat, multorumque
 sæpè jugerum, *Herodoto* authore, basim habuit.
 Vtrumque verò genus sub formis Hieroglyphi-
 cis initialis sapientiæ tabulas continebat. E-
 quibus & *Pythagoram* primū, & post illum
Platonem philosophiam suā hausisse refert *Iam-
 lichus*.

Mortuis deinde sine prole *Constantini* liberis Cap.12.
 successit *Julianus*; Imperator ille, quam vir, *Julianus.*
 melior. Et infinitas ille quidem pugnas cum ho-
 ste conseruit, varias etiam victorias cum summa
 laude reportavit, sed terrestres omnes; Persi-
 dem deinde ex Gallia petiturus, cum ad Rhæ-
 tos, ubi Danubius fluviū ortum capit, terrestri
 itinere venisset, structa ibi classe fluviatili se-
 cundo flumine in Thraciam descendit. Inde
 Constanti-

Roma
Nova.

Constantinopolim originis suæ locum venit. Ibi portū novum, sed cæteris ad id tempus exstructis longè ampliorem versùs Austrum extruxit, & ipsi vrbi ad instar *Roma Veteris* Senatus habendi jus dedit, vt author est *Zozimus*. Inde æmulatio inter duas vrbes nata, & Constantinopolis *Roma Nova* appellari cœpta. Quibus sic peractis festinato itinere Persidē petiit. Vbi ad Euphratem peruenisset, classē rursum fluuiatilem, qua sæpè ad varios fluuii illius mæandros, Trigridisque vortices superandos vsurus esset, confecit. Ea sexcentis ligneis, quingentis è corio sutilibus constabat, & iis addebat sexaginta bellicas trieconteras, & latiores alias ad pontes jungendos, vt, vbi vellet, rapidissimos paritèr, & latissimos fluuios vno impetu transmitteret. Sequebatur deindè infinita nauium vis, quæ annonam & forum, & machinas deferrent, quibus omnibus duos, vt iustæ classi, Nauarchos *Lucium* & *Constantium* præfecit. Vbi verò & Tigrim transisset, quandoquidem in Meditæranæa Assyriæ penetrandum erat, vniuersam classē incendi iussit, exceptis viginti duabus nauibus, quas ad emergentes casus vehiculis impositas seruari, & inter impedimenta exercitum sequi iussit.

Cap. 13.
Jonianus.

Mortuo verò mox *Juliano* successit *Jonianus*, utilis Ecclesiæ, sed daninosus Imperio habitus Imperator: sitamen ille Ecclesiæ utilis appellari debeat, qui statim Imperator ab exercitu salutatus, turpem illam & flagitiosam cum hoste pacem iniit, qua totas quinque regiones Transigritanas, præter tres vrbes Nisibin, Singarum, &

& Castra Maurorum, quæ à Pompeii Magni vſ-
que temporibus firmissima ſemper Imperii Ro-
mani propugnacula fuerant, & in illis, tot fide-
deliſſimorum Chriſtianorum millia, qui ſuis
opibus, viribus, manibus, ſe contra Perſas de-
fendere parabant, immani hoſti nunquam de-
inceps recuperandas deditit. *Jouiano* verò in- *Jouinia-*
fra octauum ab Imperio ſuſcepto menſem, ſeu *nus.*
caſu, ſeu crapula, (erat enim helluonum maxi-
mus) deſuncto, imperare cœpit *Valentinianus*. Is
conſortem Imperii ſibi adjunxit *Valentem* fra-
trem, bono quidem animo, ſed euentu triſti.
Valens enim Imperium beneficio fratris adept-
us Chriſti ſtatim fidem cum Arriana commu-
tauit, ingentemque Chriſtianorum vim ſuſtu-
lit. Inter alios memorabilis eſt illa octuaginta *80 Sacer-*
Sacerdotum Orthodoxorum in mari mors; *dotum in*
quos quum *Valens* Conſtantinopoli publicè *mari mar-*
occiſi imperaſſet, Præfectus vrbiſ, nomine *tyrium.*
Modestus, veritus ne ſi palàm in eos ſæuiretur, tur-
barum indè aliquid oriri poſſet, clàm cum Sa-
cerdotibus agendum cenſuit. Imperatoris
mandatum, fœdum, crudele, ſanguinolentum,
exponit; monet, hortatur, ſuadet, vt fuga ſibi
conſulere, vtque exilium voluntarium, quam
mortem neceſſariam ſubire mallent; neue im-
merenti ſibi duram hanc electionem, vel triſte
Imperatoris mandatum exequendi, vel miſerè
pereundi, imponerent. Illi conditionem gra-
tantè accipiunt: quis enim dubitaret? Quo-
niàm verò res cunctationem non recipiebat;
ideò ille nauem à ſe extra portus fauces clàm
paratam oſtendit: illi ad eam veluti ad ſalutis
ſuæ

suæ portum confugiunt; sciscisque protenus retinaculis in altum velis remisque properant. Vixquæ jam à conspectu vrbs abrepti fuerant, quum Nauarchus mandata præfetti suis aperit, quidque faciendum sit, edocet. Illi confestim, igne in imum navis coniecto, in schapham, ad id à Nauarcho paratam, se ejiciunt; navis ipsa flammis correpta subito deflagrauit; quo incendio octuaginta illi Sacerdotes, dum confessorum laudem ambiunt, Martyrii coronam meruerunt, ut author est *Socrates*.

Cap. 14.

*Horrenda
maris inun-
datio.*

Quo facto incidit statim miranda illa rerum in mari, veluti tot innocentum cæde efferato, facies, qua undæ marinæ suos passim fines egressæ cernebantur. Etenim, quasi rursùm Deus vel novum terris diluvium inducere, vel in antiquum chaos omnia reuocare parasset, naues vi fluctuum expulsæ, hic tectorum, illic montium, & quidem à littore longè dissitorum, summa occupant: aliæ in aperto mari velificantes, subito vel aquis destitutæ in profundas valles subsidebant, vel extuberato solo in præruptis veluti montium jugis pependerunt. Ut mihi quidem seriò hæc cogitanti cum Psalmista exclamare libeat, *Mirabiles elationes mari, mirabilis in altis Dominus*. Hæc ad Alexandriam in Ægypto contigisse refert oculatus testis, & integerrimæ fidei author, *Ammianus Marcellinus*; eadem verò ad Epidaurum in Achaia sub eodem tempore euenisse memorat *Hieronymus* in vita *Hilarionis*. Quis igitur miretur, si vel vetus interdum anchora summis in montibus, vel procul à pelago conchæ marinæ terra inclusæ reperi-

reperiantur? Neque enim semel hæc, aut iterum, nec vno in loco, sed sæpius & diuersiter rarum regionibus acciderunt. Nota est disertissima illa & rerum ex omni historia repetitarum refertissima *Pythagora* apud *Nasōnem* in decimo quinto *mutatarum formarum* libro de mirandis rerum conuersionibus oratio; in qua priscis temporibus terram in mare, mare in terram, versum fuisse memorat; *Helicem* & *Burim*, celebres olim in *Achaia* vrbes, nec longè ab illa quam diximus *Epidauro* positas, non alibi tum quam sub aquis quærendas fuisse monet. Quid tota *Ægyptus*? quæ etiamnum à maris Arabici, à fluminis *Nili*, ab ipso *Mediterraneo* & consuetis ejus æstibus vix defenditur? Quid ingens illa Insula, quæ *Atlantica* *Atlantis*. olim dicebatur? non illa à *Platone* tantum ex sapientissimi *Solonis* libris commemorata, verum etiam ab ipso *Homero* in sua *Odyssæide* celebrata, & extra columnas *Herculis* ad Occidentem posita; *Europæ* nimirum aut *Asiæ* par fuisse dicitur. Cujus tamen nihil jam, præterquam exigua quædam reliquiæ, septem scilicet *Ganariæ* Insulæ, & *Madera*, & *Azores*, remanent. Quid? quod apud *Batavos* patrum nostrorum memoria idem ciuitatibus quibusdam, & sexaginta vicis contigit, quod *Helici* & *Euri*, quod Insulæ illi *Atlantiæ* contigisse diximus. Hæ verò tam stupendæ in mari mutationes, aut rarè, aut nunquam sine infandis terræ motibus euenerunt. Hiis enim tremoribus concussa tellus, vel in terra montes, vel in mari insulas protrudit; aliisq; vicissim in locis,

completis

Theodosii
gesta.

completis cauernis subfidens, vrbes secum, & ciuitates traxit. *Valentiniano* verò defuncto successit in Occidente *Gratianus* filius: qui, *Valente* patruo mox à Gothis cæso, vniuersum in se suscepit imperium. Sed se tantæ moli haud parem sentiens, retento apud se *Valentiniano* fratre, puero nempè, nec per ætatem rebus administrandis adhuc idoneo, *Theodosium* genere Hispanum, & magni nominis Ducem imperii socium adrogauit, & patru *Valentis* loco Orienti præesse iussit. Multas ille res summa virtute & fœlicitate, antè susceptum Imperium gesserat. Britannos se effèrentes compressit, Scotos intra paludes & æstuaria sua tenuit. Batavos terrestribus præliis attriuit, Alemannos, Sarmatas, Mauros, profligauit. Sed inter omnes se effert laus illa ejus de Saxonibus in mari parta; quos ille præliis naualibus non fregisse sed consumpsisse à Latino Pacato in sua ad ipsum Panegyri memoratur. Ex quo profectò intelligitur, Saxonas olim & antè hoc sæculū rebus naualibus multum valuisse, & ad magnam in mari potentiam aspirasse; Ni esset, non illi jam à tam forti duce non vice simplici superandi, sed multis in mari pugnis debellandi demum & consumendi restitissent. Veruntamen quibus locis, copiis, artibus, ducibus, res tantæ gestæ sint (silente historia) ignoratur. Quamuis autem Saxonia victoriis, & imperiis tum grauida abortum hoc casu fecerat, resumptis tamen paulò post viribus, quâ suo, quâ communi *Nortmannorum* nomine, latè se per omnes terras classibus prouecta, propagauit, sedesque

sedesque & regna in Britannia hac nostra, in Gallia, diuersisque aliis mundi partibus constituit.

Sub hoc tempore homo quidam, *Moses* nomine, in Cretam venisse dicitur, in qua insula ingens tum Judæorum turba sedes suas collocauerant. Is se à Deo missum ferebat, vt populum Judæorum per medium mare, nullo nauium ministerio, ad *terram promissionis* veteris illius *Mosis* exemplo, reduceret. *Neque verò gens superstitionibus dedita, & falsis prophetis ab antiquo auscultare solita, ab huiusmodi vocibus abhorrebat. Dies igitur annum ante ad proficiscendum à *Mose* isto constituitur. Interim omnē rei familiaris augendæ curā non omisā, sed abjectā cerneret. Dies verò statuta quū venisset, certatim Judæi omnes ad mare loco præstituto veniunt. *Moses* diuina monita & imperia præfatus, viā intrepidi vt ingrederentur, jubet; cessurum mare, viam per fluctus ad *terram sanctam*, & patrum suorum sepulchra pedibus mare ingressos inuenturos vaticinatur: nec illi dictis fidem abrogare. Itaque alii pedibus ingressi, alii è rupibus saltu se dantes, fluctibus hausti miserè perierunt. Aderant in vicino Christiani nonnulli. Hii facti atrocitatem videntes, accurrunt: natantes, quos possunt, tollunt, alios prona cupidine in mortem ruentes vi tenent, alios ne prauo furore perditum se irent, monent: magna tamen pars fluctibus inmersa periit. Rem fabulæ, quam prodigio similiorem me referre scio: Sed author *Socrates* omnē dubitandi rationem tollit. Enimverò

Cap. 15.
*Moses Cre-
tensis.*)
Creta

Creta insula omni sæculo monstrorum & mendaciorū parens habita, nihil vnquam huic portento simile, aut suppar vidit. Ipse verò *Moses*, post sedatam populi rabiem, vel ad notitiam, vel ad supplicium quæsitus, nusquam inueniri potuit. Indè vulgò creditum Dæmonum aliquem, specie humana toto anno obuersatum, populum Iudaicum à Deo jam diù derelictum suis præstigiis fascinaſſe.

Cap. 16. *Gratianum* interim variæ distinebant curæ; jam primū gentes ab Aquilone omnes Romanum imperium vno impetu inuaserant.

Gratianus. Quos ille partim ad Argentoratū, triginta Alemannorum millibus vno prælio suoque ductu cæsis, partim ad Istri ripam, Hunnis, gente tum noua, & hætenus Romanis auribus inaudita, per Legatos profligatis, satis fortiter & fœliciter repressit. Sed maior eum, isq; fatalis, à *Clemente Maximo*, natione Hispano, sed qui purpuram in Britannia induerat, circumstetit terror. Omnes jam indè ab *Augusto* Imperato-

Clementis
Maximus.

Pontificatus insignia res Romani vnà cum Imperii insignibus stolam etiam Pontificalem & insulas acceperant. Hec *Constantinus* magnus, hoc filii ejus, hoc *Jonianus*, hoc *Valentinianus Gratiani* pater fecerat. Quam stolam quum *Gratianus* ipse, tanquam rem profanam & ethnicam, & Christiano nomine indignam, à Flauine, vt mos erat, oblatam recusasset, conuersus Flamen obmurmurasse dicitur, *Quandoquidem hic Pontifex esse non vult Pontifex Maximus erit*. Vocem ambiguam & ab astantibus non intellectam res breui comprobauit. Cæso enim *Gratiano*, *Maximus* imperiū,

periū, & cum eo Pontificatus insignia de more accepit. Enimvero *Maximus* vnā cum *Theodosio* olim à *Valentiniano* ad res in Britannia componendas, & *Nectaridii* (qui tractus maritimi, vbi nunc quinque qui vocantur portus sunt, Comes & Custos erat) mortem à *Pictis*, *Saxonibus*, *Attacottis*, & *Scottis* illatam vindicandam missus, quum *Theodosium* paulò post Romanum reuersum in imperii consortium à *Gratiano* acceptum fuisse percepisset, flagrans inuidia, imperium non delatum occupare statuit.

Hic est ille *Maximus*, qui Britannia huic nostræ vltimorum malorum causam dedit, dum non solum Romanas Legiones omnes, verum etiam quicquid vel in iuuentute floris, vel in constante ætate roboris inesset, ad Armoricam in Gallia, nouis incolis frequentandam, abducit. Ex quo regio illa *Britannia minor* appellari cœpta est. Verum quum Britanni sic abducti vxores sibi è gente sua peterent, *Maximus*, quos antè viros abstulerat, totidem nunc virgines ad connubia jungenda & genus in Armorica faciendum abducendas curauit. Fit igitur deportandarum virginum Londini conuentus. Inter quas præcipuè nobilitatis & formæ *Ursula* fuit, virgo optimis moribus, & religio-

Cap. 17.

Britannia minor.

Ursula virgo.

ue veri illi Hunni erant, siue Saxones & Franci
 aliique Oceani Germanici accolæ, & maritimi
 prædones qui hoc eodem tempore terra mariq;
 omnia infesta faciebant, & in Hunnorum, nouæ
 tum, vt dixi, sed inclytæ gentis, nomen transie-
 rant) *Gratiano* aduersus *Maximum* nauabant
 operam. Itaque iustam suam in has virgines
 siue iram, siue libidinem esse rati, vim parant.
Ursula verò non se castam seruasse contenta, cæ-
 teris etiam, vt pudicam mortem turpæ vitæ
 præferrent, autrix paritèr, & exemplum fuisse
 dicitur. Itaque quum barbari vim veneream
 intentarent, illæ pro se quæque jugulum præ-
 buerunt; Quo viso Hunni à rabie ad rabiem,
 hoc est, à libidine ad iram versi omnes ferro ma-
 ctatas in mare proturbarunt; & virginum cæ-
 de adhuc madentes in Britanniam, quam copiis
 omnibus à *Clemente Maximo* nuper exutam
 fuisse intellexerant, impetum fecerunt. *Maxi-
 mus*, re cognita, duas eò confestim Legiones
 remisit; Hæ Hunnos ipso aduentu Britannia
 eiecerunt; sed quam promptè indè cesserunt,
 tam facilè digressi in Hiberniam appulerunt,
 paremque ibi stragem, vt latronum marinorum
 mos est, quacunque terram ceperant, intule-
 runt. *Ursula* verò cum conitibus, pudicitæ
 & Christianæ religionis laudibus omni æuo
 memorabilis, aliquot post sæcula, more tum
 Christianis inuito, in diuarum numerum, opi-
 nione hominum, relata fuit. Hæc ex *Astaphensi*
 nostrate recitare & referre malui, quam *Car.
 Sigonium* in libro decimo tertio occidentalis
 imperii historiæ sequi, vbi *Ursulam* hanc cum
 vndecim

vndecim millibus virginum Roma, quò limina Apostolorum scilicet salutatum juerant, redeuntes talia in flumine Rheno passas fuisse fabulatur. Neque enim iste peregrè Romam proficiscendi mos eò vsque hac ætate inualuerat. Nec quicquam à veri similitudine tam abhorrens esse potuit, quam vndecim virginum millia, veluti exercitu factò, è Britannia Romam tam immenso itinere petiisse: *Beda* verò rem totam onùtit.

Sextum jam annum *Maximus* Imperium Cap. 18.
in Britannia & majori Galliarum parte tenuerat, quum *Gratianum*, clam, palamue, seu dolo, seu vi aperta, omninò tollendum esse statuit. Itaque Lugdunum Gallorum cum exercitu profectus, *Gratianum* ibi ab exercitu suo desertum Italiam cursu petere cognouit. Et mox à fuga retractum, immisso percussore *Andragathio* (quo & principe militiæ & scelerum ministro plurimùm vrebatur) è medio tolli jussit. Quo nuncio territus *Valentinianus* frater, qui Aquileiæ tum agebat, cum matre *Justina* & sorore *Galla*, trepidè profugit; nactusque in vicino littore nauigium, cum ingenti fortunarum omnium & vitæ discrimine, Theffalonicen tandem, tot maria emensus, & tam longinquo itinere fatigatus, venit. Indè ad *Theodosium*, qui Constantinopoli tum erat, Legatos misit. Fratris cædem, *Maximi* tyranni in Italiam aduentum, Aquileiam occupatam, suam matrisq; fugam, pericula; miseriam exponit; fraternæ cædis vindictam de *Maximo* sumendam exigit; sibi, matri, sorori, perfugium, opem, auxilium,

& afflictæ fortunæ sublevariæ petit. Quibus rebus intellectis, *Theodosius* ipse properè ad eum Thessalonicem venit; bono animo esse jubet, classem parat, sororem ejus *Gallam* vxorem cepit, ipsam, vt Romam cum classe petat, monet, se cum exercitu Aquileiam belli sedem extemplo petiturum spondet.

Cap. 19.

Dum hæc aguntur, prodiit quædam noua Scythiæ gens, *Prothingi* *Zozimo*, *Grutungi* *Claudio* Poetæ, appellati: gens vtrovis nomine, ad illud tempus, Romanis inaudita. Hii quum, suis syluis & paludibus egressi, ad Istri fluminis ripam peruenissent, transeundi copi-
Prothingi à Promoto
Promoto
deleti.
 am à *Promoto* Duce Romano, & limitis illius Comite sibi dari petunt; ille negat; Hii vim parant, & ingentem nauigiorum copiã procul à ripa, ne consilium suum ad hostis notitiam perferretur, struunt. Res tamen ipsa, siue per transfugas, siue per speculatores ad *Promotum* deferretur. Ille confestim ripam fluminis, ne quis vel speculator veniendo, vel transfuga abeundo falleret, diligentissimè obseruari jubet, & vt hostium conatus frangeret, incredibilem & ipse, quã lintrium, quã iustarum nauium vim contrahit. Jamque de tempore, quo hostes transmittere statuerant, per exploratores certior factus, primis tenebris classem omnem ad flumen deducit, aciemq; ex jis triplici nauium ordine latant, ad duum millium & quingentorum passuum longitudinem, prora vnius ad alterius puppim, sic vt nullis in medio hiatus relinqueretur, iuncta, lateribus in hostem obuersis, extendit. Has verò naues veluti vallum mi-
 lite

lite compleuit; aliam verò classē, quæ hostem medio flumine pugna exciperet, exteriùs collocavit. Nox erat illunis, & ad id ab hoste delecta, ne inter trajiciendum conspicerentur. Itaque nihil consiliorum suorum ad Romanos delatum suspicati, tertia vigilia primùm militem suum onanem, deinde conjuges etiam & liberos, servosque & impedimenta arctiùs in lintribus collocantes, ut in adversam ripam vno comitatu exituri, properabant. At Romanì aduentum eorum ex pulsu remorum præsentientes, ubi appropinquassent, veluti ex insidiis coorti, cum ingenti clamore impetum fecerunt. Barbari & spe sua falsi, & cum tenebris, tum clamore hostium, & suorum ejulatibus conturbati & attoniti, hærebant. Sed nec ipsi Romani, quo ordine res gererent, satis intelligebant; verùm quum lintres hostium à suis impulsos subverti senserant, ubicunque clamor incidisset, eò naues suas dirigebant, & stragem, ut fors tulit, pro tempore inferebant; ubi verò jam illuxisset dies, tum & classis ipsa, quæ ad pugnam veluti structa acies instructa acies hætenus stabat, ordinesque servabat, simul naues reliquæ, quas pro vallo antè immobiles juxta ripam stetisse diximus, quum hostē toto flumine disjectū animadvertissent, stationibus quæque suis egressæ, in petum dederunt. Tum ferro res geræpta, nec vlla barbaris, ut qui nullam in navibus firmitatem haberent, resistendi ratio erat. Sed alii jugula ultro præbuerunt, alii in flumen vel deturbati sunt, vel sponte sua defilierunt. Nec enatandi spes, inter tam confusam

suorum & hostium navium multitudinem supererat. Itaque totum flumen, aut lintrium & cadauerum stragibus & naufragiis inductū latuit, aut si quā patebat, sanguine ibi non mistū modò, verumetiam auctum apparebat. Tanta autem fuit ex hac pugna strages, vt *Zozimus* rarò vnquam nauali prælio maiorem editam fuisse prodat; idem & *Claudianus* Poeta facit, regemque insuper iis, quod *Zozimus* historicus oniserat, *Odotheum* fuisse, & in illa pugna periiisse refert. Parta victoria, *Prometus Theodosius*, qui non longè aberat, ad hostium cædera oculis fruendam vt veniret rogat: aduenit ille, sed, vt erat ingenii ad omnem humanitatem procliuus, barbarorum reliquias conseruauit, suæque militiæ ascripsit, forti deinceps, & fideli eorum opera ad *Maximum* Tyrannum debellandum vsurus. Jam enim paratis omnibus *Theodosius* Aquileiam terrestri itinere, sic vt promiserat, petituruserat.

Cap. 20.

Maximus, ne sibi in tantis periculis deesset, fauces montium, à Constantinopoli Aquileiam per Illyricum ducentes, ab *Andragathio* occupari & insideri iusserat. Sed quam tantam classem ad Thessalonicen parari fama deferente inaudisset, nihil cunctatus, quin ipse *Theodosius*, terrestri itinere omisso, classe in Italiam appulsurus esset, *Andragathium*, relictis quas occupauerat angustiis, ad mare properè descendere, & contracta quanta posset classe, *Theodosio* in ipso sinu Adriatici ore vt occurreret, imperauit. Id mandatum *Andragathius* summa cura exequi parabat; & omne Corcyram inter & Siciliam

Siciliam Italiamque spatium occupat; Omnes etiam portus, omnes sinus, dispositis per summa montium toto Epiri littore speculis, ne qua transeundo falleret, observat. Interim *Theodosius* tota Pannoniæ, Mæsiæ, Macedoniæ, Illyrici, longitudine emensa, quum præter spem claustra montium, quæ *Andragathius* reliquerat aperta reperisset; magno silentio Aquileiam venit. Quo tam repentino casu perculsus *Maximus*, intra Aquileiæ mœnia se tenuit. Eum *Theodosius* ut Tyrannum, & nefandæ cædis in *Gratianum* admissæ reum, si urbem saluam esse, si vivere vellent, sibi à civibus dedì postulat. Tota cum exercitu ciuitas imperata faciunt. *Theodosius* deditum occidi iubet. *Andragathius* quum instructa classe *Theodosium* in mare aliquot dies frustra expectasset, jamque præter spem de ejus ad Aquileiam terrestri itinere aduentu, captaque vrbe, & cæso *Maximo*, nuntium accepisset, tot aduersorum casuum vno impetu incidentium imagine confusus, ne viuis in *Theodosii* potestatem veniret, ipse se obuoluto capite præcipitem in mare dedit. Classis se *Theodosio* dedit. Ita *Valentinianus*, *Gratiani* frater natu junior, Imperio Occidentis virtute aliena refutuitur, redditaque est *Gratiano* defuncto, beneficii, quod viuis in *Theodosium* contulerat, cum fœnore ab eo cummulata merces.

Maximi tyranni cædes.

Andragathii mors.

Rebus verò in Occidente sic constitutis, *Theodosius* Constantinopolim redit, vbi se profundis voluptatum voraginibus immerfit. Erat enim hoc illi homini proprium, ut si res pos-

sceret, nemo eum industria, vigiliis, laborum, æstus, frigoris tolerantia vinceret; sin remissæ bellorum contentiones essent, luxu & libidine nemini cederet. Et multa quidem ille millia Scytharum & Gothorum Transistranorum, quos Hunni suis sedibus expulerant, in Thracia variis præliis, sed terrestribus omnibus, nec ad rem præsentem pertinentibus concidit; Regem verò eorū *Athanasium*, ad se ultro venientem, ut multo in honore habuit, ita in tantam sui admirationem traxit, quantam ne *Salomon* quidem olim Sabæorum Regina de se fecisse memoratur. Vires enim jam antè quam persensisset, nunc quo ordine res Imperatoris domesticæ administrarentur, quantaque in veneratione apud suos esset, præsens quum conspexisset, in eam vocem prorupit, qua Imperatorem Romanum verè *Deum terrenum* esse dixit. A quo forte initio invidiosum illud, & Deo inuisum Imperatores deinceps titulum vsurparunt, quo in omnibus ferè edictis *Numen suum & Divinitatem* prædicabant. Nec ita multò post, *Valentiniano* etiam ab *Eugenio* in Italia cæso, rursus in Italiam cum exercitu venit *Theodosius*; & *Eugenium* Tyrannum in faucibus Alpibus, duro, & cruento, sed in omne ævum memorabili, prælio fudit & occidit; rebus verò deindè Romæ & in Occidente ordinatis, quum jam vniuersum Imperium Romanum suis manibus teneret, dum Constantinopolim reuertitur, fato cessit.

Cap. 22. Decedens *Theodosius* filios duos *Arcadium* & *Honorium* Imperii hæredes, in Urbe Romæ, hunc Constanti-

Constantinopoli reliquit; Præfectos verò tres, rebus imperii ordinandis, *Rufinum* in Oriente, *Gildonem* in Africa, *Stiliconem* in Occidente dedit. Prior *Gildo*, contempta *Honorii* ætate, (erat enim annis junior) Africæ imperium inuasit; aduersus quem *Mastazelus Gildonis* frater operam *Honorio* pollicitus, & promissis insuper à *Stilicone* oneratus, vnicam rei perficiendæ Legionem poscit, cum qua in Africam transmissit; *Gildo* octuaginta militum nullia in armis habuit, quem tantum exercitum *Mastazelus* tantillis copiis subnixus profligauit. *Gildo* ad mare fugit, vbi nauigio exceptus fuga salutem in Hispania quærere instituit. Sed tempestatibus rejectus, viuis in *Mastazeli* potestatem venit. A quo, in liberorum prius à *Gildone* cæsorum vindictam, nullo fraterni sanguinis respectu caditur. *Stilico* verò frustra *Gildonem* sublatum ratus, si *Rufinus* rerum imperio in Oriente, sub *Arcadii* vmbra, potiri pergeret, eum per *Gainem* fortissimum bello ducem, præsentem & inspectante *Arcadio*, interfici mandauit. Alii ipsius *Arcadii* iussu factum ferunt. Vtrumvis rationē habet. Viuis enim *Rufinus*, & *Stiliconis* lunuibus officiebat, & aduersus *Arcadiū* se non pro præfecto militiæ, sed pro iusto Domino gerebat. *Gildone* verò & *Rufino* sublati, *Stilico* natione Vandalus, sed magno & acri ingenio præditus, hiis veluti gradibus viam ad imperium, sed occultioribus consiliis, munire cæpit. *Theodosius* Scythas siue Gothos, ab Hunnis, vt diximus, sedibus suis pulsos in fidem receperat, & sedes in Thracia habendas dederat,

dederat, stipendiariisq; imperio fecerat; eo consilio, ut eorum opera pro firmissimo aduersus Hunnos muro & propugnaculo vteretur. *Stilico*, post *Rufinum* cæsum, Constantinopolim venit, omnia ibi, ut prius in Occidente, suo arbitrio moderaturus; idque sibi priuatim à *Theodosio*, dum adhuc in viuis ageret, in mandatis datum aserebat. Ibi primum omnium cum *Arcadio* agit, ut Gothos confestim exautoraret. Viginti jam & quinque annos Gothi stipendia Romana summa fide meruerant, nec alium, quam quem Imperator dabat, militiæ Ducem habuerant. Jam verò hac tam insigni injuria lacessiti, sibi Regem *Alaricum* creant. Quo facto *Stilico* statim in Italiam redit, nullis tamen prius ad *Alaricum* nuntiis, qui illum è Thracia in Thessaliam, & inde per Thermopylarum claustra in Bæotiam, in Atticam & ipsam Peloponnesum traherent. Quibus rebus intellectis *Stilico* classe validissima parata in Epirum venit, nec quisquam iam erat, qui graue ibi prælium fore non existimaret. *Stilico* verò nihil ibi nisi prædas egit, planè ut omnibus appareret, res inter ipsum & *Alaricum* priuatis colloquiis & consiliis agi. Itaque nullo conferto prælio diuersi, hic in Thraciam, ille in Italiã, abeunt. *Alaricus* in Thraciam reuersus, ingenti contracto exercitu, per Noricos, qui nunc Buarisunt, & Aquileciam & Venetorum regionem in Italiam descendit. Quam omnem, nusquam se mouente *Stilicone*, infandù in modù vastat, & ipsum Imperii Romani caput Romã petit. Jam inde fugerat *Henricus*, seque Ra-

uennæ

uennæ condiderat: Vbi, intellecta *Stiliconis* *Stiliconis*
 fraude, misit, qui eum è sacrario, quo confuge- *caedes.*
 rat, extractum jugularunt. Interim Romam
Alaricus obsidione premit. Quoniã verò eam
 fame quamvi capere malebat, ideò Portum vi
 aggreditur, & capit. Vbi quum vrbs anno-
 nam reperisset, eam se comminatus est incensu-
 rum, ni Romani imperata confestim facerent.
 Qua victi necessitate, portas Romani *Alarico*
 aperiunt. Ille ingressus cum exercitu, vt san-
 guini pepercit, ita bona fortunaſq; ciuium ex-
 hauſit. Incidit autem hæc Romæ strages in o- *Roma ab*
 ctauum *Honorii*, quadringentesimum verò & *Alarico*
 decimum secundum æræ Christianæ annum, *capt.*
 primo mensis Aprilis die. Hæc qui de *Stilicone*
 tradunt, illud etiam addunt, eum tam insigni
 perfidiæ animum adjecisse, vt filio *Euttherio* im-
 perium conciliaret. Alii, in quibus *Zozimus*,
 eum falsis Olympii, (cui *Honorius* se jam totum
 regendum permiserat) criminationibus oppres-
 sum scribunt. Certè quum litteras de morte sua
 Rauenna allatas accepisset, ad Ecclesiam con-
 fugit: vndè extractus, quum concursu multi-
 tudinis periculo eximi potuisset, commotam
 ab incœpto deterruit, jugulumque vtrò feri-
 entibus præbuit: post cujus mortem quâ infi-
 nita poenè hominum vis tormentis subjiceretur,
 vt de *Stilicone* fatèrentur, nemo tamen vnus re-
 pertus fuit, è quo tantillum indicii exprimi
 vel extundi potuit. Ego post mille trecento-
 rum ferè annorum spatium tantum virum tan-
 tisque honoribus per viginti tres annos in Im-
 perio defunctum prodicionis suspectum pro
 conuicto,

conuicto, quod plerique faciunt, ponere non audeo.

- Cap. 23. Capta Roma *Alaricus*, seu contemptu *Honorii*, seu quod majus esse duceret Imperatorem facere quam esse, *Attalum* quendam Romani sanguinis hominem, & Præfectum vrbs dudum ab *Honorio* constitutum, Imperatorem Romæ creat. Interim *Honorius*, quum tantis barbarorum exercitibus obsistere non posset, *Ra-uennæ*, vrbe & situ & operibus munitissima se tenuit, missisque ad *Arcadium* fratrem Legatis, classem ab eo ad se mitti petit. *Attalus* Imperatoris titulo subnixus, in Africam misit, qui jus ibi more Romano dicerent. Quam rem *Alaricus* vt importunè & contra mandata sua gestam adeò non improbauit modò, verum etiã indignè tulit, vt *Attalum* confestim, detractis imperii insignibus, in ordinem redigeret, & ei *Athaulfum* consanguinem suum substitueret. *Honorius* verò *Heracianum* cum classe in Africam, ad iudices ab *Atilo* constitutos deturbandos, misit. Nec quietiores in Oriente res *Arcadio* erant, ubi *Gaines*, quo ministro *Stiliconè* in *Rufino* tollendo vsum fuisse diximus, placido Imperatoris ingenio ad libidinem suam abutebatur; donec ad extremum, *Frajutus* quidam, natione barbarus, cultu Ethnicus, sed consilio pariter & militia bonus, Dux aduersus *Gainem* designatur. Is accepto exercitu nihil ad summam diligentiam reliqui fecit, quò *Gainem* terra marique profligatum tolleret. *Gaines* quum per *Hellespontum* in *Asiam* trajicere vellet, ut *Tribigildo* con-
- filiorum

filiorum suorum consorti jungeretur, sed classem ad manum non haberet, cæsa è proxima sylva materie, classem caudicariam extempore construxit; rudem adeo, ut nec clavum, nec paxillum, nec remum, nec scalmum haberet; ligna modò funibus vel restibus colligata homines & equos impositos, ferre poterant: ea verò ventis & fluctibus in Asiam tum ferentibus temerè impellebàtur. Id videns *Frajutus*, qui omnia *Gainis* consilia speculabatur, cū classe paulò expeditiore in prætereuntes inuehitur; atrox ibi cædes in hostem editur, nec vlla navis ex classe *Gainis* euasit: qua clade suorum perspecta, *Gines* retrò ad Thraciam flexit iter, ut Iistro transmissò ad Hunnos se conferret. Insequitur *Frajutus*, & extremū agmen carpendo *Gainem* ad vniuersæ pugnæ aleâ descendere coegit; in qua cæsus est *Gines*, & *Arcadius* ab imminenti periculo magno Dei beneficio liberatus.

Nec diù post superfuit *Arcadius*, ei verò successit *Theodosius* filius, qui classem à patre paratam, *Honorio* patruo, Rauennæ tum agenti, cum quadraginta millium exercitu, nulla à morte patris interposita mora, misit. Nihil ea re ad *Honorii* animum labentem jam, & fugæ consilia agitantem confirmandum, aptius aduenisse potuit. Quanquam ne sic quidem ultrà confirmatus est, quam ut rerum in Africa ab *Heracliano* gerendarum exitum attenderet; ut si res ibi ex voto succederent, exercitu ad pugnam, sin aliter, classe ad fugam vteretur. *Alaricus* exhausta Roma omnem deinceps Italianam

Cap. 24.

liam victricibus armis peragrauit; unde, cum Siciliam in conspectu haberet, classem ad *Ahegium* conuenire iussit, impositoque exercitu soluit, Messanam ex aduerso positam petiturus. Nihil illo freto angustius: sereno tamen cœlo quum soluisset, medio itinere, oborta tempestate, classem cum maiore exercitus parte amisit: quo veluti prodigio territus, mare deinceps abstinuit, seque ad reliquâ Italiam, si quid adhuc intacti restaret, populandam conuertit. Sed in ipso conatu, Consentia, validissima Calabriae vrbe, quam multa vi expugnauerat, morbo correptus obiit; eique successit *Athaulfus*, qui accepto statim imperio omnia ferociter administrabat; nec aliud quam de tollendo Romano nomine, & urbem ipsam pro Roma Gothiam, & Successores suos pro *Augusti Athaulphos* appellando cogitabat. Sed *Placidia Honorii* sororis, quam ex captiua vxorem fecerat, precibus delinitus, & conditionibus scribendis ab *Honorio* elusus, præter omnium suorum votum & voluntatem, relicta Italia in Galliam primû abiit; inde Hispaniam à Vandalis prius occupatam petiit; Africam deinde, vt illam etiam prouinciam Romanis ereptam Hispaniæ ad jungeret, petituras. Sed *Heracianus* ab *Honorio*, vt dixi, in Africam ad Iudices ab *Attalo* institutos deturbandos missus, quum *Athaulphi* confilia non ignoraret, in mare cum classe apparatissima descendit; ei *Athaulphus*, qui Bæticam, pulsus inde Vandalis, tum tenuit, cum pari nauigiorum numero occurrit. Fit prælium, in quo pulsus *Athaulphianis* *Heracianus* insignem

victoriam

Pugna navalis.

victoriam navalem reportavit. Gothi aduerso prælio irati *Atbanulphum* cum sex liberis occidunt, pari fato & *Gifericum*, (quem *Orosius Sigericum*, inuersis paulò litteris appellat) *Atbanulphi* successor periiit.

Sed enim *Heracianus*, praua Imperii cupidine flagrans, victoriarum suarum fructum ab *Honorio* ad se vertit, Africæque primum tyrannidem inuasit, dabatque operam ne frumentum inde aliusuè commeatus Romam, siue ex formula, siue Mercatorum opera, submitteretur. Quare intellecta, *Honorius* eum perduellem & Imperii hostem declarauit: *Heracianus*, verò contractater mille septingentarū nauium classe, & exercitu quantum tanta classis capere posset imposito, in Italiam tanta celeritate transmissit, vt omnem aduentus sui non solum nuntium, verumetiam rumorem præuerteret; populum scilicet Romanum, contempto *Honorio*, vltro sibi in occursum proditurum ratus; nec eum planè fecellit opinio sua: signo enim de classis peregrinæ appulsu è speculis edito, & nuntio alio super alium incidente, quidque & à quo pararetur cognito, tota quidem vrbs Romana portis suis effusa, Duce *Marino* Comite, ei in ipso litore occurrit, sed armata. Acre ibi prælium committitur, dum hii terram capere, illi hostem descensu prohibere contendunt. Ipse *Heracianus* in terram jam descenderat; & ad urbem properabat; *Marinus* suos adhortatur, & *Heracianum*, vt rebellem & perfidum voce increpitans, irruentem excipit. Quo tam inexpectato casu perculsus *Heracianus* retrò gressum

Cap. 25.

3700 nauium classis

*Heraclianus
1707.*

gressum ad mare tulit, ubi onerariæ nâvis schapha exceptus, Carthaginem reuertit; ibi militari manu, ne tantæ classi, tantoque exercitui, in fraudem & prodicionem à se pellecto, solus superesset, confoditur. Classi ipsi, qua nulla major, ne Punicis quidem temporibus, mare illud nauigâsse dicitur, quid aduenerit non traditur; tanta erat temporum illorum in maximi momenti rebus memoriæ tradendis, vel incititia, vel incuria.

Cap. 26.

*Vallia Gothorum in
Hispania
Rex.*

*Ingens
naufragiū.*

Athaulphum & Sigericum Visigothorum Reges à suis alterum post alterum sublatos fuisse commemoravi; causa cædis illi fuit, quod, conditionibus scribendis ab *Honorio* elusus, Italiæ, quam manu tenebat, possessione excidisset, sedesq; nouas in Gallia primùm, deinde in Hispania quæsiuisset, & infœlici demū prælio aduersus *Heraclianum* in mare pugnasset: Huic, quod bellū contra *Honorium*, frustra suis tendentibus, mouere recusasset. *Vallia* igitur qui *Sigerico* successit, ne ad eundem lapidem impingeret, naues fabricare, instruere, socios nauales conquirere, exercere, totus denique in classe paranda esse; eo consilio, vt exercitum ex Hispania in Africam aduersus Romanos transmitteret; Itaque classe ingenti comparata mare ingreditur. Ea verò in freto Gaditano tempestatibus deprehensa vniuersa periit. Cladis magnitudo, vt alia re nulla, eo certè argumento constat, quod post naufragium Siculum, quo primo bello Punico bini Consules tum trecentarum quinquagemium & sexaginta millium exercitu, auctore *Polybio*, perierunt, nihil æquè horrendum

in

in mare contigisse, *Paulus Orosius* Beato *Augustino* laudatus autor memoraverit. Quæ tanta clades Vandalos, qui se contra Gothos ægrè admodum ab *Athaulphi* in Hispaniam ingressu tutati fuerant, rerum in ea terra ad tempus rursus potentes fecit. Sed brevis ea Vandalorum potentia in Hispania fuit. Omissio enim mare *Valia*, bellum in terram retulit, quo Vandalos aggressus, eos acie sæpiùs profligavit, nec priùs destitit, quam ad sedes novas in Africa classibus quærendas eos adegisset. Nulla vnquam ætas tantum sanguinis, lachrymarum, incendiorum vidit. Omnes enim gentes Boreales, Gothi, Alani, Vandali, Suevi, Burgundiones, Hunni, Angli, Franci, alii terra, mare alii transmissi, hii Oceano in Britanniam, illi Mediterraneo in Africanam, sedes novas, nullo alieni, nullo sui sanguinis respectu, quærere instabant. Interim *Honorium* sororem *Placidiam Valentini* mi primum Imperatoris, mox *Maximi* Tyranni, & ex tertiis demum nuptiis *Athaulphi* Regis relictam, *Constantio* Comiti, viro forti, & verè con-

Constantius
Coires.

uerse fortunæ culpam. Quicquid enim causæ erat, (nam nulla traditur) *Placidiam* sororem, cum filio ejus *Valentiniano*, ex *Constantio* Comite suscepto, & adhuc in cunis vagiente eiecit. Illa fugâ se cum filiolo suo ad *Theodosium*, Constantinopoli tum agentē recepit; quo ut amita honorificè suscepta, & multo in honore habitata fuit; nec diù superuixit *Honorius*. Anno enim sequente, post tot exantlatos labores, suo tamen fato, obiit. Quo defuncto Imperium in Occidente arripuit quidâ nomine *Johannes*: is accepto imperio classem in Africâ, Duce *Castino*, ad *Bonifaciū* Comitē debellandū misit; sed frustrâ. Interim *Theodosius* *Valentinianū* Augustū in Occidente creat; eumque cum matre in Italiâ cum classe & exercitu dimisit. Venienti, cum cæteræ vrbes, tum ipsa Roma portas cupidissimè aperuerunt. Sola Rauenna clausas tenuit. Ea verò post aliquantulum temporis, (reperita per paludes, quibus vrbs illa vndiq; claudebatur, via) capta est, & in ea *Johannes* Tyrannus; In quem crudelitè *Valentinianus* sæuiit. Deinde & *Aëtium*, post longè clarissimâ illâ de *Attila* in agris Catalaunicis victoriam, falsis à *Maximo* Patricio criminationibus insimulatum sustulit; indignus *Aëtius* qui talia pateretur, nisi ipse atrociora in *Bonifacium*, virum omni laude & præconio dignum, perpetrâset; Quæ res ista se modo habuit.

Cap. 27. Duo erant sub *Valentiniano* summi rerum moderatores, *Bonifacius* & *Aëtius*, è quibus *Bonifacius* Africam tenebat, ingentemque laudem & gloriam rebus gestis comparabat;
Quibus

Quibus rebus commotus *Aëtius* (qui omnia in aula poterat) Imperatori persuasit, *Bonifacium* res novas in Africa moliri; indicio, inquit, fuerit, si eū accersiueris; non enim veniet. Extemplo mittuntur litteræ, quibus *Bonifacius* reuocatur. Interim *Aëtius* clam alias litteras ad eum dat, quibus monet, ut sibi ab Imperatore caueret; actū enim de ejus vita & fortunis esse, si redierit. Itaque in tanto, ut putabat, periculo constitutus *Bonifacius*, primum provincia decedere jussus recusauit, deinde *Mauortium* & *Galbionem* Duces, cum classe & exercitu ad eum debellandum missos, in ipso littore, dum terram capiunt, aggressus interfecit; quumque nullum innocentiae perflugium in Imperatoris fide esse crederet, Vandalos denique ex Hispania in Africam vocauit. Illi contracta classe sedes novas quæsitum, quæ fata vocabant, cum quinquaginta hominū millibus vela faciunt, & Vandalicum Imperium, eluso *Bonifacio*, per octoginta & amplius annos in ea terra duraturum constituunt. Interim *Valentinianus* de *Bonifacii* innocentia, prolatis *Aëtii* ad eum litteris, fit certior; quo cognito, à *Bonifacio* in *Aëtium* iterum vertit. Et *Bonifacium* quidem ad se vltro venientem quum comiter accepit, tum multo in honore habuit; *Aëtium* verò nunquam ex illo tempore æquis oculis aspexit. Paulò verò post aliorum insuper scelerum, seu conuictum, seu à *Maximo* falsò infimulatum tolli iussit. Non sum nescius quæ infamia: circumferturque argutulum hominis nescio cujus dictum, qui Imperatori quid

ei de *Aëtii* morte videretur interroganti respondisse fertur, *Rectène an sechis Aëtius sublatus sit, tute ô Imperator videris; ego hoc tantum scio, te laeva dextram precidisse tuam.* Sed hoc commune omnium Imperatorum & Regum est, ut eis in huiusmodi periculis rarò credatur, nisi demùm occisis.

Cap. 28. Sublato verò *Aëtio*, in quo plurimum ad barbaros repellendos momenti & virium esse videbatur, *Attilas* Hunnorum Rex, qui viuo *Aëtio* se mouere non audebat, cum quingentorum millium exercitu in Italiam descendit. In itinere Aquileiam longa obsidione fatigatam cepit. Quo velut obice perfracto, rupitque clathris, fera & agrestis bellua Venetam primò regionem omnem depopulatur; mox transito Apennino non procul vrbe Roma castra facit. Ibi ad eum *Leo*, ejus nominis primus, Episcopus Romanus cum vniuerso Senatu Legatus venit. *Leo* verba facit, urbem dedit, vestigal promittit, tantùm ne urbem suam jam dedicatione factam, vel deleret, vel deformaret, vel deditorum sanguine inundaret, rogat. Effecit denique vir ad salutem illius vrbis natus, ut ferocissimus alioqui Tyrannus, loquentem reueritus, ferociam poneret, & vrbi parceret. Veritus quinetiam *Attilas* ne si urbem cum exercitu intrasset, eam ab auari & barbari militis direptione tutam & integram præstare non posset, ea non intacta modò, sed nec inuisa, retrò vestigium flexit, & per regionem Venetam, qua venerat, in patriam suam, hoc est, in Hungariam, (ibi enim jamantè sedes fixerat) remeavit.

*Leo primus
Legatus ad
Attilam
venit.*

uit. Incidit autem hæc *Attilæ* cum Hunnis suis in Italiam descensus in annum Domini quadringentesimum quinquagesimum secundum.

Cæterum quoniam de regione Veneta mentio hoc primum loco incidit, & præclarissima Venetiarum ciuitas, circa hæc tempora, & hac occasione initium cepit, multaque de ea, & maximè memorabilia in sequenti hac historia dicenda venient, operæ pretium fuerit excedere paululum ad enarrandum inclytæ urbis originem, quæ temerè primum & fortuito incepta, ratione & consilio ea post modum incrementa cepit, ut cum præstantissimis omnium gentium & ætatum urbibus comparanda venerit, emporiis verò, (nec Tyrum, nec Carthaginem excipio) præferri debeat. Anno igitur salutis humanæ per verbum Dei incarnatum reparatæ quadringentesimo decimo secundo, Gothos sub *Alarico* Rege per Venetos in Italiam irrupisse, vastataque prius circumjacente regione omni, Romam ipsam fame domitam cepisse superius diximus. Nec ita multo post *Attilæ* Hunnorum (gentis ultra Mæotidem inter Tanaim & Volgam, quæ nunc Russi siue Moschouitæ latè dominanter, positæ) Rex, in Pannoniam venit, indeque Auares vel expulit, vel, quod magis putem, leuiter victos fœdere iunxit; & ex utraque, sua nempe & illorum, gente, mistum *Hungariæ*, siue *Hungariæ* nomen regioni indidit. Vbi paululum moratus recentorum millium exercitum secum trahens, per Germaniam, Danubii capite ad læuam relicto, ad Rhenum descendit; quo transito in

Cap. 29.

Venetiarum origo.

Galliam penetrauit, & incampis demùm Catalaunicis, ab *Ætio* Romano, & *Theodorico* Visigothorū, & *Meroneo* Francorum Rege fusus, in Hungariā rediit; bellū deindè Italiæ, & ipsi vrbi, & Romano Imperio, quod apertè præ se ferebat, illaturus. Veneti igitur, qui ad intimum sinus Adriatici angulum, à Troianis vsq; temporibus, *Antenore* conditore, habitauerant, memores quid ab *Alarico* Gotho in transitu pridè perpeffi fuerant, & grauiora subindè à ferociore hoste incommoda metuentes, consilium ineunt terram, quam defendere non possent, relinquenti. Erant in conspectu septuaginta insulæ, quarum præcipuæ erant, *Caprulæ*, *Equitium*, *Metamaucum*, *Albula*, *Philistina*, *Fossa Clodia*, *Turcellum*, *Maiorbium*, *Boreanum*, *Amiahum*, *Constantianum*, & *Amorianum*: Erant & minus nobiles, *Castratia*, *Marcelliana*, *Castropuntium*, *Centenaria*, *Mussiones*, *Vigilia*, *Barbaria*, *Brentillæ*, *Bæbiæ*, *Caput aggeris*, & aliæ, velut minora in cælo sidera, nomine carentes insulæ. Sed præ omnibus eminebat *Riuus altus*, qui nunc *Rialto* dicitur, totius vrbis arx & Capitolium suo tempore futurus. Hanc insulam, quòd altiùs ab aquis extrabat, nomen initio sortitam fuisse non ambigitur. Cæteræ enim, magna pars, humiles adeo erant, & depressæ, vt, si ab alio, quam languentis planè maris fluctu alluerentur, facilè superfundi potuissent. Enimuerò tumuli potiùs arenarum aggesti, quam satis enatæ insulæ dicendæ erant. Patavini igitur, *Opitergini*, *Concordiæ*, & *Alfini* aliarumque Venetæ ditionis vrbiū & villarum

ciues,

Rialto.

ciues, paritèr & agrestes, non quidem popularitèr, sed vt suus quemque animus ferebat, in has insulas, dum tempestas Hunnica desæuaret, se transtulerant; sex enim millibus à continente aberant: Æstuario, nec terrestri aciei peruiro, nec nauigiorum aut vbiq;, aut semper patiente, clausa; nec operæ moræue pretium Hunno fuerat, in insolitudoines illas refugos veluti pisces in undis quærere. Ex hac turba non deerant, qui, quum loci situm & naturam attentius considerassent, ad maioris momenti rem & ipsi animos adjicerent, & sociis significarent: primum enim tumulos illos, quamuis humiles plerosque, firmos tamen omnes & substructionibus aptos esse ostendebant; deindè ad duodecim millia versus mare aquam breuem planè esse, & in ejus extremo aggerem aquis extantem, sed spatiis intercisum, insularum in morem surgere eumque fluctibus marinis, si quando violentius concitarentur, obsistentem, vniuersam stationem interiorem quouis portu tutiorem reddere, monstrabant. Deindè commercii facultatem, ad animum reuocabant. Nulla ope res humanas faciliùs & citiùs quàm maritimæ crescere solere. Et cæteras quidem vrbes, eo ipso quod maritimæ, hoc est, ad mare positæ sint, latari; sic Carthaginem in Africa, Alexandriam in Ægypto, Marsiliam in Gallia, Syracusas in Sicilia, Corinthum in Achaia, mōdò Constantinopolim in Thracia, & infinitas per orbem terrarum vrbes, eo ipso diuites & fœlices factas, quod maritimarum nomine conferentur: hanc verò sedem, non ad mare, sed in mare positam

cernere; Vnicam olim vrbeculam Tyrum non
 ablimilem nitum habuisse; & eam quidem ad
 inuidentas planè opes breui tempore aspirasse.
 Sed quantum tamen illam inter & istam esse?
 Quatuor illa mstadiis à continente abesse; sex
 istam millibus; Profundo illam mari, vt obfi-
 deri posset, cinctam, hanc æstuario & breuibus
 inaccessis conclusam esse. Quam igitur hic vr-
 bem surrecturam speremus, inquiunt, si, relicta
 continente, res opesque nostras huc transferre
 in animum induxerimus? templa, turres, arces,
 fora, tribunalia, sacerdotia, quicquid in am-
 plissimis vrbibus splendidū, quicquid magnificū
 alibi vidimus, aut nos hic videbimus, aut certè
 nostri visuri, nobisq;, de nauata nunc opera, aut
 viuus, aut mortuis gratias acturi sunt. Quin opus
 fauente numine aggredimur, & arborem alteri
 sæculo profuturam manibus nostris consera-
 mus; nec *Æneæ* Romanis, quàm noster ille
Antenor suis aliquando Venetis, felicitàs in
 Italiam appulisse existimetur. Quæ res sermo-
 nibus apud vulgus sæpius agitata, & crescens in
 dies Hunnici apparatus fama, eò profugos ade-
 git, vt, de continente minimè solliciti, tuguria
 primum ex vluis cannisque palustribus, quas
 ipse locus magna copia suggerebat, in tumultis
 illis struerent. Hunno deindè vniuersam Ita-
 liam, & ipsam in prinis regionem Venetam,
 vtpotè in ipso statim ab Aquileia liuine & in-
 troitu Italiæ positam vastante, quum nihil illi
 interim injuriarum aut incommodi pertulif-
 sent, locum ipsum pluris quam antea facere cœ-
 perunt. Quibus rebus perspectis, ingens etiam
 eorum

eorum, qui Aquileiæ cæterisque in illo tractu
 urbibus ab *Attila* recentè dirutis superfuerunt,
 eodem confluit multitudo. Neque verò de-
 sunt qui Venetiarum originem Aquileiæ ab
Attila tum captæ & dirutæ ruinis acceptam
 referant; quod fieri, ut puto, sat rectè non po-
 test. Romam enim ab *Alarico* Gotho anno
 quadringentesimo duodecimo, vel, ut alii vo-
 lunt, supra quadringentesimum decimo cap-
 tam fuisse constat: Aquileiæ verò ab *Attila* ex-
 cidium in tertium indè circitè & quadragesi-
 mum, nempe in annum quadringentesimum
 quinquagesimum secundum tertiumuè, ut *A-*
brahamus Bucholcerus in sua *Isagoge Chrono-*
logica colligit, rejicitur. Venetiarum verò Venetia-
rum nati-
uitas.
 lux natalis ad *Antonio Coccio Sabellico*, rerum
 Venetarū diligentissimo Scriptore, ad Calendas
 Aprilis Anno Domini quadringentesimo vice-
 simo primo refertur. Id si ita est, potuit Veneti-
 arū vrbs triginta & eò ampliùs à natiuitate sua
 annis ante *Attila* in Italiā aduentū mediocritèr
 adoleuisse, nedū originē suā ad Aquileiæ exci-
 diū referre debet. Quicquid autè de vrbs na-
 tali statuendum sit, (setui enim tam tenerè con-
 cepto, certum & legitimum nascendi diem dif-
 ficile est tribuere) illud haud ambigitur, ve-
 netiarum ciues ortum & originem suam *Pata-*
nio, Troianæ, quam Aquileiæ, Romanæ coloniæ
 libentiùs ascribere. Ab hiis igitur initiis pau-
 latim crescere & suis progressionibus uti cœpit
 vrbs; quam nos hic interim relinquemus, do-
 nec adaltior facta rebus terra marique gestis
 caput attollere, seque mundo ostendere, & cum
 potentissimis

potentissimis quibusq; regnis & imperiis, nunc de salute, nunc de gloria certare cœperit.

Cap. 30.
*Saxorum
in Britan-
niam de-
scensum.*

Sub eodem verò tempore, quo *Attila* in Italiam terra venit, Saxones mari in Britanniam hanc nostram descenderunt. Causa hæc erat; *Ætium*, dum copias omnes contra Hunnum in Galliam irrupentem contrahit, legionem etiam Romanam è Britannia euocauerat. Quo præsidio destituti Britanni, Scottis & Pictis, & totius Aquilonis latronibus maritimis in prædam protinus concesserunt. Itaque pulso è Galliis Hunno rursus *Ætium* de præsidio submittendo precibus fatigant. Rursusque legio mittitur, sed ad quemlibet subinde in Gallia motum, & legio & classis, qua sola ad hæc tempora à maritimis incursumbus tuti fuerant, abducitur. Quo animaduerso Britanni, ne semper sub cultro linquerentur, rejecto in quibus nihil ampliùs subsidii superesse viderant Romanorum imperio, rebus suis, suo Marte consulere statuerunt. Ante omnia Regem sibi *Constantinum* ex Armorica, quo veteres Britannos à *Clemente Maximo* abductos fuisse dudum diximus, delegerunt. Is Totnesium in Deuonia cum classe appellit, & magna cum virtute tum felicitate irruens, nunc terra, nunc mari, nunc omni parte Pictorum, Scottorum, Noruegiorum & Dacorum, seu Danorum vim repellebat. Hic *Constantinus* tres filios, *Constantem*, *Autelium*, & *Uterpendragonem* habebat. Equibus *Constantem* natu maximum, quòd ingenio hebetior videbatur, religione sacrauerat: & ipse paulò post, cujus cujus insidiis, veneno per-
riit:

riit: quo sublato, suborta est quæstio, vter è duobus, *Aurelius* nè an *Uterpendragon*, ambo adhuc in cunis tantum non vagientes, in regno succederet. Erat hoc tempore in Britannia *Vortigernus* quidam, vir ortu nobilis & magnæ *Vortigernus.* autoritatis: is, vt viam sibi ad regnum consilio muniret, *Constantem* natu maximū, & adultiorem jam ætate factum, cœnobio extractum populo ostendit. Et quid nos, inquit, vtrum è duobus infantulis, in quorum alterutro nihil opis aut subsidii per ætatem inest, in regem eligimus, stulto consilio deliberamus? quum iuuenem hunc & natu maximum & adultum annis, & ad res gerendas non inidoneum, regni hæredem habeamus? quisquam inè vestrum patris, qui puerum hunc impuberem adhuc, nec voti faciendi compotem, in monasterium veluti in carcerem detrussit, iudicium, pluris quàm vel gentium, vel naturæ jus, faciendum esse putet? aut tam simplex quisquam, vt iudicium illud patris, potius quàm injuriam appellandum esse censeat? & cum dicto coronam adolescentis capiti, inspectante & applaudente populo, imposuit. Hoc igitur Rege creato, *Vortigernus* ipse omnia regni negotia domi militiæque pro suo arbitrio administrabat. Quum verò res suas paulò confirmasset, moræ pertæsus, regnum ipsum, nefario scelere occupauit. Qua re cognita, qui *Aurelium* & *Uterpendragonem* infantes in potestate habebant, clam eos ad mare deferunt, vbi nauem utcunq; nacti, in Britanniam minorem, ad *Budecium* Regem infantulorem patruum, magno quidem

dem periculo, sed sine quo nulla salutis ratio ostendebatur, deportarunt.

Cap. 31.

Omni ætate gentes illæ Germanicæ, quæ Oceanum & hoc nostrum mare spectant, latrociniis maritimis deditæ fuerunt. Hoc verò tempore quum Saxones, pube, vltra quam victus suppeteret, abundante, more gentis, colonias forte ductas, veluti propagines ad sedes exteras, seu terra, seu mari quærendas emittere vellent, fors in duos fratres, *Hengistum* & *Horsum* cecidit. Hii quum eodem tempore omnia Pannoniæ, Illyrici, Italiæ, Galliæ, Hispaniæ, Africæ loca, à diuersis populis, Hunnis, Gothis, Burgundis, Francis, Vandilis, Alanis & Sueuis à cardine Septentrionali profectis occupari cernerent, fortunam sibi mari faciendam esse censuerunt. Itaque nauibus profecti, Cantium Britanniæ prouinciam appellant. Ibi tum fortè *Vortigernus* erat; & Doroberniæ, quæ nunc *Cantuariæ* est, animo, ex ingentibus post regnum occupatum cladibus acceptis, ægro & afflicto solatium quærens demorabatur. Cum igitur noui & peregrini habitus homines appulisse inaudisset, eos ad se venire iussit. Quumque viros & statura plus quam mediocres, & animo elatos, & omnia Regi suis armis pollicentes reperisset, dignos statim censuit, quos suæ militiæ ascriberet. Ascripti, omnes militiæ labores & pericula deposcunt; profecti verò, pauci quamuis numero, (non enim vltra nouem mille armatorum erant) ingentes Pictorum exercitus, quâcunq; nacti, nullo negotio profligabant; facile vt appareret, eos non stolidi

stolida ferocia, sed armorum usu & belli peritia cæteris præcellere. Fugatis demùm Pictis ad *Vortigernum* redeunt, & sibi quidem ad rem gerendam copiarum satis esse docent; ad perficiendam aliquantulum deesse aiunt. Si Regi videretur, se quos possent è gente sua in supplementum excituros; ut Pictos & Scottos non solum à finibus Britannorum arceant, verumetiam arma perduellibus ultro inferant, & debellatos Britannorum Imperio subditos reddant. Quæ si non essent, in mentemne tibi, ô Rex, non venit, inquit *Hengistus*, quanta bella è Britannia Minore, à defuncti Regis fratribus *Aurelio* & *Uterpendragone* nunc intent? infantes scilicet eos è manibus emisisti, ut essent, qui nunc & fratris à te occisi mortem ultum veniant, & jus suum armis repetant. Jam si (quod omen auertant Dii) sed si, quod in omni consimili causa fieri consuevit, nunc contingeret, ut hinc illi Britonum opibus subnixi, inde Picti & Scotti veteres hostes in te tanquam in communem hostem arma conjunctis viribus & communibus consiliis inferrent, quid reliqui est, nisi ut à duobus potentissimis hostibus oppressus, & ipse cedas, & nos simul, numero pauciores & aduersus tantas hostium copias impares, misere pereamus? *Vortigernus* ad hæc, & quanta me pericula domi, forisque circumstant, & acerba meorum in me odia, non ignoro. Itaque rem mihi pergratam feceritis, si ampliores è terra vestra copias huc accersueritis. Quo audito *Hengistus* *Oëtam* filium cum delecta manu accersit. Ille cum decem & octo nauibus, citius quàm

quàm putari posset, appulit, secumque sororem suam, *Hengisti* filiam, *Roiennam* adduxit. Quam Rex primo visu ita adamavit, ut nulla mora eam sibi à patre in uxorem dari peteret. Britannii quum tantam classẽ appulisse animadvertissent, quantumque ex novis istis aduenis periculi instaret considerassent, *Vortigerum* patrem, cujus vitio id accidisset, Regno exuunt, & *Vortimerum* filium Regem asciscunt. Is, accepto Imperio, bellis & terrestribus & naualibus Saxones debellabat; quumque intra *Thonetum* insulam conclusisset, eos arcta ibi obfatione (classe, qua ad mare patet, circumfusa) pressit, donec ad extremum Saxones *Vortigerum* patrem rogant, ut ad *Vortimerum* Legatus iret, id vnum agentes, ut inde liberè in Germaniam abire liceat: quo impetrato, vno conmeatu omnes in Germaniam abierunt. *Vortimerus* verò paulò post *Roiennæ* nouercæ insidiis periit, & *Vortigerus* ad regnum veluti postliminio rediit. Verum quum omnia circa se intuta esse animadvertisset, rursus *Hengistum* è Saxonia malis auibus accersit: ille cum ingenti classe & trecentis millibus hominum in Britanniam veluti ad notum cubile redit; quo tanto exercitu conspecto, non alios modò, verum etiam ipsum *Vortigerum* obstupuisse ferunt. Sed quum frenum ore semel accepisset, equitem tergo depellere frustra laborabat. Interim *Hengistus* rem ad regem excusare, Quod tantas copias adduxisset, causam fuisse à *Vortimero*, quem vsque viuere putabat, metum; quo benignitate Deum sublato, satis scire se tantis jam exercitibus opus

non

non esse. Itaq; quantis sibi copiis opus sit, ipse diceret, reliquos se in Germaniam extemplo remissurum. Interim verò exercitum in partes diuidit, & in interiora regni se insinuat; utque tempus extraheret, procerum concilium sibi dari petit: Ne quid (inquit) illi deinceps, se inconsulto, à te factum esse dicant. Hujus verò concilii exitus is erat, ut proximis Calendis Maii, omnes regni Duces & Proceres edito signo, *Hengisti* perfidia tollerentur. Ipse modò *Vortigernus* morti exemptus est, ut sub ejus umbra regno ipso *Hengistus* potiretur.

Vortigernus, quum eum serò stultitiæ suæ per- Cap. 32.
nituisset, in montana & inaccessa Cambriæ loca se recepit. Ibi *Merlini*, celebris tum Magi, vaticiniis & responsis vacare cepit, quum subito *Aurelius* & *Uterpendragon* ex Armorica Totnesium, in agro Deuonienfi, cum classe valida & exercitu appellant. Auctis verò copiis, quamuis pari tam in *Vortigernum*, quam in *Hengistum* ira ferebantur, acriores tamen odiorum stimuli in *Vortigernum* incitabant; Itaque primum in hunc mouent, eumque turri inclusum subiectis ignibus comburunt. Quo edito facinore, Britanni omnes certatim ad *Aurelium* veniunt, Regem salutant, duceret quò vellet, se sequuturos, fraternæ cædis vindictam à *Vortigerno* jam sumplisse, pergeret modò, & *Hengistum* aduenam, vel in acie Deo iuvante sterneret, vel præcipitem ad naues ageret. Esse sibi manus, esse animos ad obsequia & pericula juxta paratos, nec nisi victores ex acie reuersuros se esse spondent. *Aurelius* hoc ardore militum
vtendunt

Archiep.
Armacha-
nus.

utendum ratus, *Hengistum* quærere instituit; nec *Hengistus* pugnam detrectabat. In campo *Maisfelio*; vel, ut alii volunt, *Maisbeli*, ingentibus copiis, sed longè majoribus animis concurritur. Hic campus, ubi tandem jaceat, quum primùm ista scriberem, me ignorare, stilo fassus fueram; & semper forsitan ignorâsem, nisi currente jam prælo, Reuerendissimi in Christo Patris & Domini, *Jacobi Usserii* Archiepiscopi Armachani, incomparabilis doctrinæ viri, librum *De Britannicarum Ecclesiarum Primordiis* inscriptum, recentè editum, & ad me à Paternitate sua muneri missum, opportunè admodum accepissem. Ex eo, quùm infinita alia, quæ vetustatis tenebris prius obruta me fugerant, tum hoc etiam intellexi, Campum *Maisbeli* planitiem quandam esse juxta *Conani urbem*, *Britannis* *Caer Conan*, *Anglis* olim *Coningburg*, nunc *Conisburgh* vulgò dictam in agro Eboracensi, ad *Donum* fluvium positam fuisse. In hoc igitur campo *Hengistus* cum ducentis armatorum millibus *Aurelio* occurrit. Fit pugna qualis inter homines pari spe, pari fiducia præditos, & de regno paribus armis decertantes esse solet. Inter reliquos exercitus *Aureliani* Principes, vnuserat nomine *Eldol*, *Claudiocestræ* Comes. Is quum *Hengistum* primis semper ordinibus pugnam cientem cerneret, cum juvenum globo irruit, & *Hengistum* comminus congressus vi victum cepit. Saxones amisso Rege fugæ se dant, magnamque exercitus partem amittunt. *Hengistus* in tot procerum per fraudem ab eo ad *Amisburiam* castrorum

rum vindictam morti traditur, anno Domini quadringentesimo octogesimo nono. At nos hic Saxonas interim relinquamus, & ab extero hoc mari ad Mediterraneum, vnde digressi sumus, ventis ferentibus redeamus. Dixi superius *Bonifacium Aëtii* fraudibus impulsum Vandalos ex Hispania in Africam euocasse; Rex Vandalorum illo tempore erat *Genferichus*, qui, cum classe in Africam trajecisset, omnia statim armis ab Oceano ad Ægyptum à Mediterraneo, Æthiopiam usque, veluti fulmen quoddam penetrabat, & Carthaginem demum ipsam, rerum in Africa caput, cepit. Quo eodem tempore *Valentinianus*, Occidentis Imperator, à *Trafyla* quodam *Aëtii* (dum viveret) cliente, sed impulsu *Maximi Patricii*, interficitur. Causa *Maximo* fuit, quod Imperator uxorem ejus vitiauerat. Eo verò mortuo *Maximus* imperium inuasit, & *Eudoxiam Valentiniani* relictam in uxorem, inuitam licet & reluctantem, cepit: Cui inter lecti conjugalis blanditias breui post confessus est, falsò quidem (suas enim injurias ultum ibat) sed tamen factus est, se, ejus amore captum, *Valentiniano* mortem consciuisse. Mulier rem animo ea nocte coquebat; mane verò surgens, nec ultra rem distulit, fidū nuntium ad *Genferichum*, Africæ jam Regē, mittit: rogat ut in Italiam transmitteret, & *Valentiniani* cædem in sui gratiam vlcisceretur. *Genferichus*, accepto nuntio, classē, qua nuper ex Hispania venerat, quamque ad novum Imperium stabiliendum in procinctu semper habebat, deduci jubet, & cum trecentorum

Roma ca-
pta.

Vandalo-
rum in ma-
ri potentia.

torum milliū exercitu in Italiā vela facit. Vbi primo statim aduentu Romam (cui *Atilius* percerat) portas, odio tyranni, vltro aperientem cepit, captāq; exhaust, auerrens inde quicquid, vel in vrbe, vel in templis, publicè priuatiuē, aut diuitiarū, aut ornamentorū erat. Nec, quæ *Atiliā* mouerant, *Leonis* Pontificis Romani preces & lachrymæ *Genserichū* flectere valuerunt. Fatavrbū! Carthaginē & Romam, duo rerū in Africa & Europa capita, hosti vni, externo, crudeli, barbaro, infrā sedecimannorum spatium in prædam data Sol vidit. Ingens enim hac ætate erat Vandalorum in mari potentia. Et *Genserichus*, gustata semel Italiæ dulcedine, sæpius eam cum classe repetebat; in quamcunque verò partem appulisset, omnia, scđum in modum, impunè diripiebat. Erat enim ei hoc in mare positum, vt primo statim vere quotannis cum classe ex Africa solueret, & quamcunque terram vento delatus attigisset, eam velut antè destinatam hostilitèr inuaderet. Sic omnes Italiæ, omnes Siciliæ oras, omnes Italiam inter & Africam jacentes insulas vastauit. Sardiniam verò & insedit. Mox Sinum Adriaticum penitus ingressus, omnem Illyrici, Dalmatiæ, Epiri oram depopulatur; longiùs etiam ad Orientem progressus Peloponesum ingreditur, omnia agens ferensque; aut, si quæ nec agi nec fieri possent, ea vel ferro vel flamma absumebar. Nec vllus in toto Imperio Romano reliquus jam erat, vel *Fabius* qui clypeum, vel *Marcellus* qui gladiū, hoste viū inferente, prætenderet, *Maximo* verò sublato, Senatus Romanus

Romanus, qualiscunque tumerat, *Anitum* suffecit. *Theodosio* verò in Oriente successit *Martianus*: priuatis ille beneficiis *Genfericho* obstrictus, utpote qui captiuus olim in Africa vitam à *Genfericho*, fide prius data, ne vnquam contra Vandalos arma sumeret, acceperat.

Martiano deinde defuncto Imperii gubernaculum accepit *Leo*. Is, Imperium adeptus, omnes animi simul & Imperii vires aduersus *Genferichum* intendit. Centum millium exercitum sub *Heractio* Duce in Africam misit: Classis verò curam *Basilisco*, *Verina* vxoris suæ fratri tradidit. *Heraclius* primo aduentu non incommodè terra rem egit, Vandalosque ad Tripolim in Africa acie profligauit. *Basiliscus* *Basiliscus* *ignauia*. verò classis curam turpiter administravit. Nec tamen, quo turpitudinis genere maximè peccarit, facile existimari possit, ignauiae, an simplicis in re militari imperitiæ, an denique, quæ ex auaritia causam traxerit, perfidiæ & proditi-
onis. *Heraclius* enim expositis in terram militibus, classem, ut iussus est, *Basilisco* tradidit. Eam *Basiliscus* ad *Mercurii* promontorium, in conspectu Carthaginis, per otium tenebat. Quare perspecta, *Genferichus* quinque dierum inducias à *Basilisco*, (interim de conditionibus scilicet, quibus se *Leoni* dederet, deliberaturus) petiit. Neutè gratis petere videretur, rem pretio emit: pactis induciis *Genferichus* Carthaginem continuatis diei noctis operibus & permuniuit, & milite repleuit. Collapsa enim fuerant magna parte mœnia, & vrbs ipsa præsidio vacua. Inde classem, quam re non potuit, in speciem

*Victoria
navalis à
Gensericho
adversus
Basiliscum
parva.*

instruxit, & *Basilici* inertiae maioris, quàm suis viribus confusus, in hostem movit. *Basiliscus* primo statim appulsu manifesta timoris signa dabat. Quo conspecto, hostibus animi crescere, suis minui cæperunt: nec *Genserichus* occasione defuit: factaque impressione naues, alias pertusis lateribus submersit, alias cum sociorum naualiu militumq; cæde cepit; nec ex tanta classe vlla navis (unica prætoria in qua ipse *Basiliscus* ferebatur excepta) rediit. Id metunè vero, ut dixi, an simulatò *Basiliscus* fecerit, parum inter autores conuenit; quoniam verò nulla metus causa suberat, ideo frequentiore autorum calculo proditoris reus agitur. De pedestri deindè exercitu, quid factum sit, non reperio: periisse putauerim, quòd Vandalorum res altiores subinde in Africa radices egisse constet. Non defunt qui totam hanc rem aliter referant: narrant enim *Sabelliscus*, *Abbas Tubingensis*, *Vassens*, & *Rodericus Toletanus* *Genserichum*, dum Siciliam secundò peteret, à *Basilisco* prælio navali non procul ab Italiæ littore victum in Africam refugisse. Ad meipsum verò quod attinet, equidem ita statuo: quum neminem vprum autorem duplicis pugnae mentionem facere inueniam, nec tamen ipsæ quæ memorantur pugnae, vel locum, vel tempus, vel rei gerendæ modum, vel aliud quicquam, præter ipsos Duces, commune habeant, ut in diuersa me trahi non diffiteor, ita nihil video, quòd minùs duas has pugnas fuisse, & suam vtrique fidem constare putem; siq; vna tantùm fuit, *Procopii* Cæsariensis autoritatem facile apud me valere patior.

Nam

Nam & illis ipsis temporibus proximus fuit, & perpetui deinceps Vandalorum successus *Gen- serichum* victorem, non victum, fuisse clamant.

Erat hic *Leo* pace & bello, terra marique Cap. 34.
juxta clarus: & ut in tam degeneri ætate,
quânquam Cæsaribus, *Trajano*, *Severo*, *Con-* *Leo mag-*
stantino, nullo genere par, aut comparandus, *nus.*
Magni tamen cognomen inuenit, eoque titulo
ad posteros commendatus obiit. *Leoni* Magno
successit *Leo* junior, & ei *Zeno*, post quem *Ana-*
stasius Imperator Romani Imperii modera-
men in se suscepit; aduersus quem *Vitalianus*
genere Thrax arma mouit. Sed quum nihil
aduersus urbem Constantinopolim copiis ter-
restribus proficeret, bellum ipsum à terra in
mare transtulit, & numerosa classe comparata;
aditum in urbem, quem per portas inuenire
non potuit, per portus quærebat. Urbem tum
Marianus præfectus tenuit; variis verò in
mari contractis præliis, in quibus maxima par-
te superior *Vitalianus* fuit, vir vnus, non manu
armata, sed ingenio & mente, laborantibus jam *Proclus.*
rebus opem tulit. Is *Proclus* erat; qui quum vel
subeuntes mœnibus naues injectis vncis sæpè
suspendisset, vel longè stantes libratibus ponderi-
bus magno numero confregisset, nec vllum, pro-
pter incomparabilem nauium in muros pugnan-
tium multitudinem, exitum reperiret, nouo
commento animum aduertit. Specula ærea à
mœnibus ad Solis radios eo tempore ardentius
irruentes suspendit, quorum percussu in na-
ues juxta stantes facto, non secùs quàm fulmi-
ne, tota classis correpta deflagauit. Urbis po-

Procli phi-
losophi præ-
stantia.

tiundæ spe dejectus *Vitalianus*, quum nullam
classis reparandæ facultatem in propinquo ha-
beret, obsidionem soluit. Sunt qui *Proclum* hoc
commentum ab *Archimede* traxisse memorant;
idque *Zonaras* scilicet ex *Dione* (vt ait) *Niceo*
prinius memoriæ prodidit. Quasi verò *Dion*
ille cum rebus ab *Alexandro*, *Mammeæ* filio, Im-
peratore gestis suam non clausisset historiam,
aut quasi tam *Alexander*, quam *Dion* ipse
diem suum non clausisset extremum, aliquot
sæculis antè Constantinopolim à *Vitaliano* ob-
fessam. Erat hic *Proclus* Platoniorum Philoso-
phorum, quotquot vnquam fuerunt, summus;
idque opera ipsius, quæ etiamnum extant, satis
inducant: sed vt erat mente omnium discipli-
narum capacissima præditus, ita in Mechanicis
ipsum *Archimede* vicit. *Linus* certè, qui tor-
menta & machinas ab *Archimede* ad Syracusa-
rum tutelam excogitatas exquisitissimè com-
memorat, de speculis huiusmodi vistoriis men-
tionem nullam facit; quam laudem, vtique, in
tanto viro non siluisset, si rei fama quantumuis
leuissima, ad ejus aures peruenisset: sed nec
Plutarchus in vita *Marcelli*, vbi *Archimedes*
omnibus laudibus prosequitur, hoc ingenii
humani portentum commemorauit. Itaque
sua *Archimedes* laude contentus memoria ho-
minum sempiterna viuat. *Proclus*, vt omnia ab
illo relicta hausit, ita multa addendo vnum
Archimede omnia non vidisse ostendit. *Ana-
stasio* verò successit *Justinus*, vir *C. Mario* in-
doctior, bellator tamen strenuus & manu fortis,
& sub quo (quod in vltimis laudum ne fuerit)
Imperium

Imperium Romanum nullum detrimentum passum memoratur.

Justino verò in Imperio Romano, quod nul- Cap. 35.
lum jam in Occidente erat, successit *Justinia-*
nus, vir magnus planè & omni virtutum gene-
re, bello, pace, prudentia, constantia, fide &
Christiana religione memorabilis. Is quum
varia bella viuo *Justino* magna cum gloria ad-
ministrâset, Imperium jam adeptus, pleraque *Justinia-*
nus.
per Duces, sed tria præcipua, Persicum, Van-
dalicum, & Gothicum, per *Belisarium* gessit.
Quorum Persicum terrestribus omninò copiis
gestum fuit. Nec vlla in eo, vel navis, vel ma-
ris mentio. Quo sexto demùm Imperii anno,
cum *Cabade* Persarum Rege conditionibus fi-
nito, omnes statim & cogitationes, & Imperii
vires, ad Vandalos in Africa debellandos con-
uertit. Vandalorum tum Rex *Gilimer* erat,
duos enim *Genferichus* (quem primum Vanda-
lorum regnum in Africa constituisse diximus)
filios habuit, *Honorichum* & *Gensonem*; quorum
ille *Hilderichum*, hic *Gilimerem* genuit. *Hilde-*
richus, lege à *Genfericho* de regni successione la-
ta, regnum adeptus, per septem & ampliùs an-
nos tenuit; Vir ingenio mitis, religione rectus,
& *Justiniano*, viuento adhuc *Justino*, multis
magnisque beneficiis obstrictus: contra *Gilimer*
natura ferox, & sanguinis appetens, sed Imperii
magis; quique innatum quoddam odium ad-
uersus Romanos, præsertim orthodoxos, præ se
ferebat: quo etiam nomine *Hilderichum*, tan-
quam Imperatori Romano impensius studen-
tem, apud milites incusabat, perucitque de-

*Belli Van-
dalici origo*

mum vt, depulso *Hildericho*, & luminibus orba-
to, ipse in Regem præter jus & fas assumeretur.
Quarum rerum fama ad *Justinianum* jam im-
perantem perlata, cœpit ille statim animum sic
advertere, vt injuriam *Hildericho*, veteri amico,
& in sua veluti clientela posito, & rectæ religio-
ni innutrito illatam, ad suam fidem pertinere
interpretaretur; quam si inultam esse siuerit,
si armis non vindicârit, si denique *Gilimerem*
ad sanguinem *Hilderichi* euomendum non ade-
gerit, nec Imperatoris titulo, nec ipsius *Justi-
niani* nomine vltà se dignū censeri velle dixit.
Justinianus igitur, siue vera hæc belli inferendi
causa, siue causam quærenti color erat, septimo
Imperii sui anno, contracta classe, eam milite
impleuit, & vniuersam tam classis, quam ex-
ercitus administrandi curam, cum libera re-
rum terra marique gerendarum potestate, *Beli-
sario* tradidit, & in Africam properè nauigare
iussit. Tota classis quingentis nauibus consta-
bat: è quibus nonaginta duæ longæ quidem,
sed moneres tantum, hoc est, quæ vnico remo-
rum ordine, nec amplius quàm vnico ad remum
remige vterentur, erant; rectæ tamen, ne in-
ter pugnandum remiges telis hostium desuper
incidentibus paterent. Has huius demum æta-
tis homines, vt author est *Procopius*, repetito
veterum vocabulo, propter eximiam in cursu
celeritatem, *Dromonas*, hoc est, cursorias ap-
pellabant. Triremium enim & Liburnarum
cum vsu nomen jam olim antiquatum fuerat.
Qui verò Dromonibus istis, navis nauigandæ
causa, inerant, ad duo millia omnes Constanti-
nopolis

*Classis Beli-
sarica.*

Dromones.

nopoli oriundi censebantur; cæteri milites e-
 rant; seruitia & impedimenta nulla. Reliquæ
 classis nautæ, ex Ionibus, Caribus & Ægyptiis,
 ad viginti millia constabant. Navium verò
 nulla vltra quinquaginta medimnorum fuit: *Medimnus,*
 medimnus autem, auctore *Suida*, sex modio- *quid?*
 rum mensura erat, pondere verò centum octo
 libras efficiebat. Classis præfectura *Cleonymo*
 deferebatur. Paratis igitur jam omnibus, &
 die ad proficiscendum ad Solstitium æstivale
 constituto, *Justinianus*, Constantinopoli tum
 agens, naudem prætoriam ad Regiam littori
 imminuentem appellere iussit. Ibi *Epiphanius*, *Classis lu-*
 vrbis Episcopus, cum clero solemniter pro- *strandæ au-*
 gressus, pro sælici classis expeditione, & belli *pud Chri-*
 euentu solemnes ad Deum orationes fudit, fau- *stianos mos.*
 sta omnia & sælicia aduersus Vandalos, perduel-
 les, perfidos, rebelles, Arrianos, & orthodoxæ
 Christi religioni infestos precatus. Tum ad fi-
 dem conuersos, (quos Catechumenos voca-
 bant) ipso in littore baptisabat. Ea enim olim
 Christianos opinio imbuerat, opere baptismi
 operato, peccata omnia ablui & dimitti; ideo-
 que regenerationis suæ lauacrum in extremum
 vitæ tempus differebant, nec baptismum, nisi
 graue vitæ periculum adituri, demùm suscipie-
 bant. Peracta militum regeneratione, naues
 conscendunt; tum silentio per præconem fa-
 cto, tubis clangi cœptum, solutisque oris om-
 nes remis, spectante Imperatore, incubuere.
 Primo die Heracleam tenuerunt, ibi quinque
 dies, qua qua de causa, morati, ad Hellepontum
 inde vela faciunt: Vbi huiusmodi res accidit.

Erant

Cap. 36.

Erant in exercitu duo viri, genere Massagetæ siue Hunni, inter suos bellatores clari, & multis fortibus factis illustres. Hii inter potandum stricto ferro quendam ex auxiliariis interfecerant. Quumque apertior res esset, quam ut negari, grauior verò quam ut, salua vel religione, vel disciplina militari dissimulari posset, *Belisarius* damnatos palis infigi iussit. Persicum hoc erat supplicii genus; & tunc primum, quantum reperio, à Romanis vsurpatum. Massagetæ grauitèr rem ferre; se ut amicos *Justiniano*, non ut subditos militare. Grauitèr & ipsos facinus à popularibus suis perpetratum ferre, & factum nolle: non ea tamen pœnæ acerbitate in amicos & socios, ut in seruos, animaduertendum fuisse dicere, palamque ferebant, sublati signis abituros. Nec deerant, qui motos semel Massagetarum animos seditiosis insuper sermonibus accenderent. Qua re animaduersa, *Belisarius*, non vltra suppliciis grassandum ratus, concionem aduocat, & è suggesto ita disseruit, ut non solùm factum suum in præsens tueretur, verumetiam proditum in homicidas exemplum ad suscepti belli summam pertinere affirmaret. Nam quid læti, inquit, ab eo milite in acie sperandum, qui manus suas civili priùs quam hostili sanguine cruentauit? Justus Deus, iusque & æqui cultoribus adesse, sceleratis & impiis aduersari solet. Mihi parum & pium bellū cum Vandalis, gente impia, barbara, Arriana gerendum mandauit Imperator; id ego quo tandem modo exequar, si exercitū in acie sociali cæde madeptē eduxero?

qua

qua oratione, & efferatos Massagetarum animos placavit, & suis spem fecit, rei prosperè gerendæ, quæ sic à justitia, & in sceleribus vindicandis constantia inciperet. Ne uè seditio, eodem loco morando, ut sit, cresceret, militem properè naues conscendere jubet. Abydo profectus Sigæum venit; inde ad finem Maliacum applicuit; & circumita mox Peloponneso, decimo sexto, quam Constantinopoli soluerat, die Siciliam subiit. Ibi jactis anchoris substitit: quoniam verò tam ingentem classem trahebat, metusque suberat, ne forte vel noctu, vel interdium, siue errore quo, siue tempestatum vi distraheretur, primum omnium, trium nauium, in quibus ipse & familia sua ferebantur, vela minio infecit. Rubeus quippè color cælo, siue fulgido, siue nubilo facile conspicitur. Ex earundem verò nauium puppibus noctu lumina suspendit: Quæ omnia magna tum ratione facere *Belisarius* videbatur; utpotè re navali ad eam jam infantiam reuoluta, quantane *Jasonis* quidem tempore olim laborasse dicitur. Dum circa Siciliam hæret, triplex incommodum classem inuasit; nam & aqua temporis diuturnitate corrumpi cœperat, & panis penitus vitiatum fuerat; & fama repens de Vandalorum classe aduentante ferebatur. Et aquationis quidem incommodum *Antonius*, *Belisarii* vxor quæ vnâ cum viro ad hoc bellum nauigabat, muliebri consilio pro parte leuauit. Vitrea enim vasa, aquis dulcibus repleta, imo nauis, in sabulo condiderat; eaque res *Belisario* ejusque familiæ, cæteris siti laborantibus, priuatim

uatim vsui erat; reliquæ verò classi nihil leuamenti attulit. Neq; verò magni momenti res hæc erat: Mare enim mediterraneū nauigantibus, armaq; tenentibus, huic malo facillè aliunde remedium adhiberi potuit. Corrupti verò panis, cum periculum ingens, tum intolerabilis exempli crimen erat. Erat quidam *Johannes*, Præfectus Prætorio, homo avarus, & tota vitæ ratione improbus; Is multis sæpè rationibus apud Imperatorem contenderat, ne bellum Vandalis illatum vellet; peruiceratque ad tempus, vt ejus rei curam *Justinianus* abjiceret, nunquam forsitan resumiendam, ni Monachus quidam ex Oriente, veluti lymphaticus occurrens, se in somnis diuinitus admonitum, dixisset, vt malum Imperatori denuntiaret, ni Vandalos, gentem impiam & Arianam, quàm primùm extirpandam curaret. *Johannes* igitur quum consilium Imperatoris ratum jam fixumque ampliùs discutere non posset, contrario consilio rem abrupte apud se statuit. Mos tunc erat, vt nunc est, longas expeditiones, præsertim maritimas, suscepturis, bis coctos panes pro conimeatu sumere. *Johannes* igitur, quum ad hoc iter hujus generis panes natibus inferendi essent, eam rem sibi committi & denandari petiit. Præfectusque Prætorio quum esset, Quæstoris ministerium obire non dubitauit. Egit igitur cum Pistoribus, vt panes crudos, in furnos, suprà quàm oportuit, calefactos imponerent, nec nisi affatim externùs incrustatos & torridos extraherent, vt sic bis coctorum speciem præ se ferrent,

rent, quum quod intus esset ignis vini vix per-
sensisset. Hoc igitur modo comparati panes, &
navibus immissi, bonitate simul & pondere fal-
lebant. Idque vitium primum diebus vel inob-
servatum, vel à Quæstoribus metu *Johannis*
dissimulatum fuerat. Vbi verò procedente
tempore, idque in mare, in farinam suam soluti
recidissent panes, militesque insuper nausea af-
fecti sic corruptos stomacho non admitterent,
vulgari statim morbi tota classe cœperunt;
paucisque diebus, quadringenti milites in libi-
tinam relati. Id videns *Belisarius*, properè in
Siciliam novos commeatus quæsitum misit.
Eo tempore Sicilia sub Gothorū Imperio erat,
præeratque ei *Amalasuntha*, *Theodorici* defun-
cti ex filio *Eutharico* nurus, *Athalarici* pueri o-
stennis, sed Regis ab auo testamento instituti
mater simul & tutrix. Hæc post soceri sui de-
cessum (vir enim, viuo adhuc *Theodorico*, in fata
concesserat) sibi metuens, cum *Justiniano* ami-
citiam priuatim junxerat. Quæ res *Belisario*
totiq; classi, impræsentiarū saluti fuit: *Amala-*
suntha enim Legatos à *Belisario* missos benignè
accepit, nec panes modo, verumetiam comme-
atum reliquum omnem, idque facili pretio sub-
ministrauit. Quibus rebus recreatus, rei benè
gerendæ spem, qua pœnè exciderat, recepit
Belisarius. Scripsit tamen ad *Justinianum* li-
teras, quibus *Johannis*, vnde vnde, siue ex aua-
ritiæ, siue ex prodicionis fonte profectam frau-
dem, & ingens ex ea totius exercitus discrimen,
& tot fortissimorum virorum exitium signifi-
cauit. Quam tamen rem siue metu potentiæ,
(erat

ὁ πρῶτος
 τῆς αὐλῆς.

(erat enim, ut dixi, *Johannes* Præfectus Prætorio, & *Belisarius* cum classe aberat) siue alia qua de causa in præsens dissimulabat. Sed hic ipse tamen *Johannes*, non ita multò post, miro Dei judicio, forsitan & justissimo Imperatoris eodẽ spectantis decreto totam à Chalcedone Alexandriam vsque in Ægypto viam pedibus conficere, & in itinere panem, in quo conficendo tam nequiter fefellerat, mendicare coactus est. Longè verò maximum erat tertium, quod diximus, incommodum; Quum enim fama de Vandalis mare tunc tenentibus, in exercitu percrebuisse, murmur tota classe exortum est, missisque de naue ad naue nuntius, omnes in eandem sententiam conueniebant, idque palam præ se, & intrepidè ferebant, si pedestri sua opera uti velit *Belisarius*, se militum & fortium virorum officio non defuturos; sin ad naualem pugnam duceret, sublati velis confestim migraturos. Tantum jam Romanus miles à majorum suorum nauali virtute & disciplina degenerauerat. Id videns *Belisarius* Duces & Ductores ordinum ad se vocat, grauitérque increpuit, quod rumorem nullo certo indicio subnixum, auribus primùm tam temerè admisissent, admissum deindè animis sic aluissent, ut illorum magis, quam militum vitio, res ad seditionem jam spectaret. Nam quis, inquit, ventosissimæ hujus famæ author? quæ origo? An *Amalasuntha*? an Procerum, an Magistratuum, an Nauarchorum, vel Gothicorū, vel Siculorum aliquis, siue nuntio, siue litteris significauit? quæ hoc animorum

conste-

consternatio? quam fœda? quam probrosa? Ego vos in acie Vandalos profligaturos putem, ad quorum nomen nunc in classe contremiscitis? scilicet, id virorum est, pugnandi conditiones quærere; non ubicunque hostem fors objecerit, terra, mari, noctu, interdium, loco æquo, iniquo, fortitè se gerere. Et Panicos quidem terrores, hoc est, subitos & nulla causa contractos, sed veluti à Deo immisos totis sæpè exercitibus incidisse fando audiuisse memini: sed hii relecto statim errore, vel in fumum, vel in risum abierunt. Vos vestræ formidini vsque inhæretis, nec ab ea vel consilio & ratione, vel Ducis autoritate & imperio, vel disciplinæ militaris & sacramenti, quo tenemini, reuerentia vos dinoueri finitis; planè ut militiæ electione ignaviæ vestræ prætereundum videamini; pari inertia, qua in mari versamini, in acie, si res postularet, versaturi. Quumq; silentio defixi & veluti stupentes starent omnes; Agedū, inquit *Belisarius*, vestro huic tã inconsiderato timori hætenus deferā, ut nuntios in Siciliā percontatū & exploratū mittam, qui de inani ista Vandalorum classe certi aliquid ad vos referant. Vos tantisper dum redierint expectate, & milites quisque suos in officio continete. Mittuntur igitur extemplo exploratores; illi nullum Vandalorum scalmum toto mari Siculo per hos dies comparuisse referunt. Vbi confirmatos militum animos vidit, vanam eorum sed jam excusam formidinem non vltra probris exagitauit, sed quam primū venti addixissent, vela fecit. Nec tamen circumito Pachino promon-

promontorio, quod *Passaro* nunc dicitur, Leli-
bæum, quod *Capo Caci* nunc est, petiit, (ut
Carthaginem petiturum facere oportuit) sed
relieto ad dextram Pachino, rectâ ad Melitam
Insulam nauigavit; APachinò verò ad Meli-
tam ducta linea, mare Tyrrhenum ab Adriatico
distinguit. Author est *Procopius*. Melita
verò ad læuam relicta, & nulla nauicula in tot
dierum itinere amissa, nec incommodo, nisi
quod ex pane contigerat, accepto, leni sed fa-
uente Euro, ad Africæ littus, quinque dierum
itinere à Carthagine ad Orientem positum, ter-
tio jam mense, ex quo Constantinopoli solue-
rat pœnè exacto, peruenit.

Cap. 37. Hic priùs quam signū terræ capiendæ daret
Belisarius, Nauarchos omnes & Ductores or-
dinum conuocari iubet; resque in disceptati-
onem venit, illenè in terram excenden-
dum foret, an alius ad terram capiendam opor-
tunior quærendus locus? Nauarchorum mag-
na pars, maris nauseam pertæsi, eo sententiis in-
clinabant, ut in terram primo quoque tempore
descenderetur. Nec *Belisarius*, quum militum
studia à naualibus certaminibus auersa, ad Si-
ciliam stans, persensisset, ab hac sententia planè
abhorrebat. Vnicus modo *Archelaus*, adole-
scens summo loco natus, & Quæstor exercitui
à *Iustiniano* datus, pro reliquis, qui diuersum
sentiebant, verba fecit: Quibus contendebat, nè
alibi, quam in conspectu Carthaginis exercitus
exponeretur. Quippè desertum & importuo-
sum hoc omne littus, & syrtibus vicinum esse,
ob oculos proponebat. Si exercitum hîc in

terrâ

Disceptatio
de terra in
Africa ca-
pienda.

terram exposueris, quid, ô *Belisari*, de classe fiet? subducine, exercitu abeunte, hoc ipso in loco naues? an in anchoris, dum res terrâ geritur, stare? an hostem in mare, hieme instante, quærere? an *Byzantium* reuerti? an denique, ut spes reditus, nisi victori, militi tollatur, subiectis ignibus incendi, aut quid denique (omnia enim variè versando exigebat) de classe fieri placet? loci deindè, si in terram excenderetur, solitudinem, & vastitatem, commeatus penuriam, aquationis in arenoso agro difficultatem suggerebat. *Belisarius*, nihil offensus admonitione tam clari adolescentis, sed laudato studio ejus paritèr & ingenio, utpotè qui & liberè & non sine ratione diuersum à cæteris sententiam tutatus fuerat, sibi quidem ea omnia, quæ metuebat *Archelaus*, curæ fore respondit. Portum nullum toto illo tractu reperiri. Estos: se castra naualia, quæ portus ministerium præbeant, militari opere, ipso loco, si è re fore videretur, effecturum. Sic *Agamemnonem* ad *Troiam*, sic *Julium Cæsarem* in *Britannia*, sic alios sæpè duces in causa pari factitasse. Ea verò vallo fossaque munita, vel exercitui terra, vel classi in mare laboranti receptui fore, donec si non ipsam *Carthaginem*, saltem maritimam aliquam ciuitatem, *Carthagini* vicinam, *Hipponem*, *Uticam*, *Tuneta*, quarum omnium moenia *Genferichus* non ita pridem stulto consilio demolitus fuerat, in potestatem redegisset. Classem enim tam alieno anni tempore (æqui-noctium autumnale jam erat) importuoso litore, in anchoris, dum res terra gereretur, sta-

re, ne sibi quidem placere dixit: Nedum eam (quod majore sæpè animo quàm consilio nonnulli fecerant) incendi pateretur. Nam quod exercitum non alibi quàm in Carthaginis conspectu nunc descendere velit *Archelaus*, utinam, inquit, tam forte consilium, dum adhuc in Sicilia littore pauidi hæsisitis, placuisset. *Pachinum* circumuecti, & lecto, quod illud inter & Lelibæi promontorium jacet, Sicilia latere, inde Carthaginē cursus & tutius multò & expeditius dirigi potuisset. Nunc autem, quum exercitum, post trimestrem nauigationem, nauſeantem habemus, & Africa, quam petimus, littori insistimus, rursus vela ventis dare, & Carthaginē mari potius quàm terra quærere, cujus tandem ingenii esset? siue enim cursum teneamus, nilitem-nausea confectum, hosti recenti & vegeto sub Carthaginis mœnibus objiciemus; siue cursu depulsi, & aduersis tempestatibus acti in aliena littora, nunquā forsitan iterū Africam visuri, ejiciemur, quibus tandem oculis *Justinianum* Imperatorem reuerſi aspiciemus? aut quibus persuadebimus, nos consilio potius & ratione, quàm metu Vandalorum & formidine, ab Africa littore refugisse? Quoniam verò, quid fieri placeat, omnia variè versando, exigis *Archelaus*, ego non solum quid facturum sum, edere, verum etiam consilii rationem quærenti reddere non grauabor. Viam, inquit, hinc ad Carthaginem juxta litus ferre vides. Ego exercitum hinc exponam, inde Carthaginem terrestri itinere contendam. *Cleonymus*, ut classem juxta litus ducat, imperabo; ut
siue

siue classis exercitu, siue exercitus classe indiguerit, alter alteri inter proficiscendum subsidio esse possit. Vbi verò Carthaginem, Deo propitio, peruenero, siue urbem, primo, quod spero, impetu cepero, siue in ejus obsidione paulisper hæsero, classem ibi occurrere jubebo. Neq; verò à classe Vandatica quicquam timendum esse censeo, quæ aut nulla plane est, aut certè non tanta, ut, viginti sociorum naualium, ex gentibus omni ætate mari assuetissimis electorum millibus, ei resisti non posset. Ne tamen classem sine milite reliquissè videar, binum millium & quingentorum Sagittariorum auxilium classiaris adjiciam. Et cum dicto signum descendendi dari jubet. Milites ocyùs in terram se ejiciant; Castra, ut in hostili terra, eadem die egregiè muniuntur; dies vnus & alter, ad comæatum & arma exponendum, dati: tum milites corpora curare jussi. Vbi satis à fastidio ex diuturna nauigatione contracto recreari visi, *Belisarius* *Chonymo* Carthaginem versus vela facere jubet; ipse eadem hora castra mouit. Interim speculatores emissi, qui palatos exciperent, & de Rege *Gilimere*, vbi esset, quidue strueret, certiùs aliquid exquirerent. Reuersi referunt, Regem quatuor dierum itinere in Maurusiorum regno abesse; sed quid ibi strueret, ignorari. Quo audito *Belisarius*, cò magis maturandum ratus, victoriæ spem in eo posuit; si prior Carthagineni præsidio vacuam occupasset. *Gilimer* verò, quum de *Belisarii* appulsu accepisset, misit extemplo ad fratrem suum nomine *Ammatam*, eiq; imperat, ut cum, quas habebat;

*Belisarius
in Africa
terram ca-
pit.*

bebat, copiis *Belisario* in itinere, antequam
 Carthaginem peruenisset, occurreret; se ponere
 cum exercitu sequuturum; ut Romanus, à
 fronte & à tergo hostibus, à dextra læuaque
 hinc mari, illinc Africæ solitudine conclusus,
 nec pugnae, nec effugii locum inueniret. Nec ali-
 ter cecidisset res, nisi Dei benignitate *Belisarius*
 presenti periculo, tanquam incendio, ereptus,
 pro victoria suam & suorum vitam retulisset.
 Quæ res hoc modo accidit: Prior *Ammatus*
 Regis frater cum exercitu occurrit, dumque
 primis ordinibus inter confertissimos hostes
 fortissimè rem gerit, telo ictus cadit: Nec cor-
 poris cæsi recipendi suis, vel facultas, vel cura
 erat; id modo agebant, ut pugnam in aduen-
 tum *Gilimeris*, qui non procùl aberat, extra-
 herent. Itaque seruatis ordinibus retrò cede-
 bant Vandali. Jamque *Gilimer* in eo erat, ut ex-
 tremum hostium agmen carperet, quum subito
 triste spectaculum, jacentis fratris corpus, vidit.
 Quo conspecto ad luctus & funera conuersus,
 omiſsa pugna, abiit. Quum si importunam
 hanc in fraternos manes pietatē ad tempus dis-
 tulisset, & regnum suum conseruasse, & fratri
 inferias, Romani exercitus internecone, tulisse
 potuit. Sed hac ejus fuga perspecta, alter eti-
 am exercitus, tanquam à Rege suo destitutus,
 ruptis ordinibus, & abjectis armis, intima A-
 fricæ loca petiit. *Belisarius*, quum omnia circà
 loca hoste vacua cerneret, Carthaginem, ut in-
 stituerat, contendit; de qua facilem & incru-
 entam victoriam reportauit: Nam neque ope-
 ribus munitissima, nec vlllo præsidio militum
 firmata

firmata erat ; & , si quid ad repugnandum animi
 ciuibus supererat , id omne , partim nuntiatâ
Gilimeris fugâ , conciderat , partim recitatis *Ju-*
stiniani litteris , quibus se *Belisarium* , ad libe-
 randam à Vandalorum tyrannide Africam mi-
 fuisse significabar ; ad Imperium accipiendum
 conuersum fuerat . Itaque vrbe à ciuibus sum-
 mo omnium studio receptus , in palatium *Gili-*
meris venit , solioque Regis victor consedit .
 Postero die *Calonymus* , quum *Mercurii* , quod
 dixi , Promontorium superâisset , quid Cartha-
 gine contigisset inscius , cum classe rectâ ad por-
 tum Mândracium contendit . Carthaginenses
 ferream , qua portus claudebatur , catenam ve-
 nienti submitunt , eumque cum classe intus re-
 ciunt . Classarii verò , veluti ipsi primum vr-
 bem aggressi expugnâissent , ad prædam conuer-
 si , omnia hostiliter diripuerunt . Qua de re
 certior factus *Belisarius* , rem grauitè tulit , &
 vt temerè factam ad ciues excusabat ; prædam
 verò omnem , læsis vt restitueret , *Calonymo* se-
 uerissimis verbis imperauit : nec eò contentus ,
 iurijurandi etiam religione palàm astrinxit :
 Quibus omnibus spretis , *Calonymus* , proxima
 nocte , clàm *Belisario* , cum præda omni Constan-
 tinopolim aufugit . Vbi paucos post dies mor-
 tem , quam legibus debebat , naturæ , sed ira-
 ræ , per mille cruciatus persoluit . Nec ita mul-
 tò post ipse *Gilimer* è fuga retractus ad *Belisa-*
rium adducitur . *Belisarius* victoriæ compos ,
 quum se tanquam regnum Africæ affectantem
 apud *Justinianum* ab inuidis premi non igno-
 raret , quò eam suspitionem factis potiùs quàm

verbis dilueret, relicto ad reliquias belli persequendas *Salomone* Duce, cum parte classis Constantinopolim reuertitur, & *Gilimerem* captivum *Iustiniano* tradidit. Imperator *Belisarius* omni honorum genere & amplissimis elogiis prosequutus, eum repetito veterum Romanorum more triumphare iussit. *Gilimer*, quum de classe Romanâ aduentante famam inaudisset, Legatos properè in Hispaniam miserat, qui subsidia à *Theuda* Visigothorum Rege peterent. Tardiùs hii, quàm rei necessitas requirebat, in Hispania appulerunt; fortèque accidit, vt, quo die *Belisarius* Carthaginem ingrederetur, navis quædam è portu soluens, portum in Hispania pridie teneret, quàm *Gilimeris* Legati ad Regem venirent: ex ea aliquis de statu rerum, quæ Carthagine contigerant, omnia Regem edocuerat. Rex rem silentio premi iussit. Postero die, quum Legati ad Regem introduci obtinuissent, *Gilimeris* mandata exposuerunt; Graue sibi bellum ab Oriente instare; Si successerit, facile in Hispaniam veluti incendium transiturum; Fœdus, amicitiam, militem denique & pecuniam petunt. Quumque *Theudas*, satim saluæ Carthaginî res essent, interrogaret, illi non modò saluas, verum etiam sospites & florentes esse responderunt. Atqui, inquit *Theudas*, non satis de rerum vestrarum statu instructi ad me accedere videmini. Reuertimini igitur, & vbi certiora omnia exploratoriaque habueritis, ad me redite. Legati se à Rege elusos existimantes, seq; ad eum, quum seriò legationes audire cœpisset, reuersuros

furos dictitantes, abeunt. Quum verò Cartha-
 ginem venissent, ibi omnia hostium plena, &
Gilimerem, non jam Regem, sed captivum, & in
Belisarii potestate positum reppererunt. Hæc
 rerum humanarum vicissitudo est, & erit. Hic
 Regni Vandalici, in Africa, quum per nona-
 ginta quinque sterisset annos, finis fuit, Anno
 Redemptionis nostræ per Christum, quingen-
 tesimo tricesimo tertio; Anno, si quis alius,
 multis magnisq; rebus gestis memorabili. Hoc *Annus æræ*
 enim anno, pax inter Persas & Romanos inita. *Christianæ*
 Hoc, Lybia, tertia mundi pars, Romano Impe- 533.
 rio restituta. Hoc Juris civilis corpus (opus to-
 ties in præcedentibus Imperatoribus nequic-
 quam tentatum) in lucem editum, & perpetuam
 firmitatem obtinere jussum. Hoc eodem anno,
 Consulatus Romanus, quum per mille qua-
 draginta durasset annos, dejecto per Gothos,
 omnia jam in Italia obtinentes, *Paulino*, finem
 cepit. Nam quod nonnulli æram Christi, à *Di-*
onysio Exiguo Abbate Romano institutam ad
 hunc ipsam annum referunt, in eo quidem, ut
 puto, errant. Anno enim antè compositam fu-
 isse, ex *Beda* nostratis autoritate constat. Sed
 non sine numine contigisse puto, ut unius viri
 ingenio & studio reperta, & in lucem edita
 Christi servatoris nostri ærâ, altera illa
 per Coss. temporum digerendo-
 rum ratio, quæ tot annos
 obtinuerat, conti-
 cesceret.





THO. RIVII
HISTORIÆ NAVALIS
MEDIÆ,
LIBER TERTIVS.

Argumentum.




HIC Liber causam belli a Justiniano adversus Gothos in Italia suscepti continet. Belisarius classē in Italiam profecturus, in itinere Siciliam, dejectis Gothis, occupat : Italiam ingressus, Romam belli sedem facit. Vitigēs Roman obfidet. Portum Romanum urbis horreum, capit : eum postea Belisarius recipit. Belisarius mare tenendo uniuersam Italiam fame premit. Totilas Rex à Gothis electus classē parat ; Romanos mari pellit. Justinianus parum utiles bello Duces classi præficit, Totilas Demetrium naufragio ejectum ad Neapolim capit. Totilas Portum terra marique obfidet. Belisarius Portum classē petit. Totilas Tiberim injecto ponte munit : eum Belisarius expugnare nititur ; sed fortuna destituitur. Totilas omnes maris Tyrrheni insulas occupat. Johannes

(2) Argumentum.

in Italiam missus, victoria navali, ad Anconam potitur. Narses in Italiam mittitur. Victoria navalis contra Hunnos ad Constantinopolim parata. Longobardi à Narsete in Italiam vocantur: quorū adventus Venetorum urbi novam crescendi causam dedit. Heraclio imperante exoritur Mahometes. Mahuia Saracenus Rhodum expugnat: Insignis victoria navalis per Olympiū Exarchum Ravennae adversus Mahuiam parata. Mahuia Aradum insulā expugnat. Classis Saracenica ad Tripolim incenditur. Constans Imperator gravi clade navali à Mahuia afficitur. Constans contra Longobardos in Italiam vela facit. Mahuia Constantinopolim mari obsidet. Justinianus secundus Cypro Saracenos pellit: ipse ab Imperio à Leontio depellitur, restituitur: apparatus ejus navales, & varii in mari casus, & demum cades. Creta à Saracenis occupatur; à Basilio Imperatore recipitur. Narsanis virtus. Procopii & Leonis Ducum navaliū dissidium. Danorum sine Normannorum in omnem Europam maritimi incursus. Temporum circa annum Domini nongentesimum, confusio. Venetiae ab Othone obsidentur. Vrseoli Ducis Veneti virtus, & Narentanorum status ab eo eversus. Venetorum in freto Adriaco dominium. An mare dominio teneri & possideri possit. Deniq; de Edgari Regis in mari copiis & potentia, hoc in libro agitur.



CAP. I.


 Andalicum in Africa excepit Gothicum in Italia bellum. Gothos enim jam antea, Imperante *Honorio*, Italiam magna parte occupasse, ejusque consiliis inde demum ejectos in Hispaniam abiisse dixi. Quo defuncto, *Odoacer* Rugiorum (qui & ipsi, ut autor est *Procopius* gens Gothica erant) Rex, in Italiam venit, dejectoque *Augustulo*, Imperatorum Romanorum ultimo, Italiae regnum inuasit. Idque anno salutis per Christum reparatae quadringentesimo septuagesimo septimo contigisse traditur. Sub eodem verò tempore Ostrogothi, qui Thraciam siue Mysiam Inferiorem sub Imperatoribus Graecis longo tempore tenuerant, Regem nati *Theodoricum*, virum omnibus animi, corporis, fortunae dotibus instructissimum, cum viris & mulieribus, & utriusque sexus infantulis, bonis, quae vel agi vel ferri possent, abductis, quae non possent, diuenditis, migrationem à Thracia, Italiam perentes, faciebant. Quumque per Macedoniam ad Sinum Adriacum peruenissent,

(4) THO. RIVII Historiæ

nissent, nec classẽ ibi ad transmittendum inuenirent, continuato itinere supra Venetos in Italiam descenderunt, & *Odoacrum*, Italiæ tum Regem, Rauennæ mœnibus inclusum toto triennio obsiderunt. Tandem verò, pace facta, Regnum Italiæ inter se partiti sunt *Theodoricus* & *Odoacer*. Sed *Theodoricus*, regio mox ingenio vsus, consortem ad carnã inuitatum sustulit : partum tamẽ per scelus regnum, triginta & octo annos nec instrenuẽ nec infelicitẽ administrauit, multasque & illustres de Gallis & Francis victorias reportauit. Decedens verò nepotem *Athalaricum* ex filio *Eutharico*, nomine *Athalaricum*, impuberem sub regimine & tutela *Amalasuntbæ* matris ad fælicis successionis spem erudiendum reliquit : fœminæ supra sexum fortis, prudentis, bonæ. Hæc pupillum ea cura habuit, vt dignum patre Regem Gothis datura videretur : & dedisset, nisi gentis fortuna in fastigio jam rerum posita ipsorum vitio ad terram præceps reuoluta cecidisset. ægrè quippe ferebant Gothi, *Theodorici* nepotem sub tutoribus & pædagogis & muliebri imperio enutrirı : quin potius more Barbarico potare, scortari, ludere assuesceret : quibus rebus effectum est, vt Adolescens remotis Custodibus, matrem minùs minùsq; indies curaret, & sana ejus consilia sperneret, suoq; & gentis vitio in omnem libidinem effusus rueret. Itaq; potationibus & scortationibus prima statim pubertate deditus, ea non dũ exacta, totis artibus debilitatus periit. Qua re præuisa, *Amalasuntba*, quoniam Regno consu-
lere non valuit, ad Imperatorem *Justinianum* fi-

Navalis mediæ Lib. 3. (5)

fidissimū ex amicis vnum sub specie quidem legationis misit, sed qui re vera priuatim sibi, quicquid post mortem filii accideret, præsidium peteret, Regnum Italiæ, si quid filio suo humanitū contigisset, Imperatori in manus se vicissim tradituram pollicita. Erat eodem tempore quidam nonine *Theodatus*, *Theodoric* ex *Amalefred* *Theodatus.* sorore nepos: vir prouectæ jam ætatis, & litteris Platoniciis ab ineunte ætate multum deditus, sed pecuniis per fas & nefas coaceruandis, magis. Itaque; multa auarè, multa crudeliter in clientes, quos tota Tuscia multiplices habebat, perpetrabat. Qua de re certior facta *Amalasuntha* hominē uiuo adhuc *Atthalarico* ad se accersit; & quā monendo, quā minando id agebat, ut eum ad meliorē frugem reuocaret. Hæc contumelia altius, quā putabatur, in Platonici hominis animū descendit. Itaque quum animo jam sterisset muliebri imperiū amplius nolle pati, fortè accidit, ut Imperator *Iustinianus* nuntiis quosdam ad Episcopum Romanum de rebus ad Religionem pertinentibus mitteret. Cum hiis *Theodatus* priuatim agit, ut fide ab Imperatore certis conditionibus accepta, traditaque Imperatori in manus Tuscia omni, ipse bonis suis Constantinopolim transuectis, cum patriciatus honore ibi frueretur: idque ei facere planè in animo erat: sed *Atthalarici* mors, consiliorum omnium, tam *Amalasunthe* quā *Theodati* ordinem turbauit, & omisso jam uterque; *Iustiniano*, imperium ad se trahere festinabat. Prior *Amalasuntha*, quā ipsa contumeliarum, quibus *Theodatus* affecerat, immemor erat, tam

(6) THO. RIVII Historiæ

sum oblitum fore rata, pravo consilio vſa, hominem accerſiit; egitque cum eo, vt quandoquidem genere proximus filio ſuo jam defuncto eſſet, ſed litteris & otio quam rebus gerendis potior, nomen ille regni in ſe aſſumeret, rerum verò adminiſtrandarum curam ſibi, quantumuis mulieri, attamen in Repub. tractanda multis jam annis exercitata permitteret. Enimvero *Theodatus*, gratias agere, nihil recuſare, id modò vereri, nè ipſum regni nomen quantumuis inane plus ſibi quàm vellet negotii faceret, animumque philoſophiæ vnice intentum à ſtudiis auocaret. Contra, *Amalaſuntha* metum demere, ſolari, & eam rem ſibi curæ fore dicere; ſat otii, nedubitaret, habiturū; & laudare ſubinde viri propoſitum: cumque duo ſumma eſſent in rebus humanis veluti faſtigia, imperii maieſtas, & Philoſophia, hoc nimirum illo celſius longè & præſtantius, rectè res æſtimantibus eſſe affirmare. Itaque inuito & reſultanti purpuram induit; qua accepta, *Theodatus* philoſophum conſeſſim exiit, & primo quoque tempore *Amalaſuntham* rerum adminiſtratione depulſam ſub arctiſſima custodia carcere incluſit; quumque *Juſtinianum* Imperatorem pro mulieris ſalute & libertate interceſſurum non ignoraret, ne eſſet pro qua intercederet, eam immiſiſis percufforibus è medio ſuſtulit. Id ſatis *Juſtiniano* cauſæ viſum, cur bellum internecinum cum Gothorum gente in Italia gereret. Duplicem deinde claſſem armat, quarum *Belifario* alteram, alteram *Conſtantiano* tradidit; imperat *Conſtantiano* vt *Sa-lonas*

Navalis mediæ Lib. 3. (7)

Ionas in Dalmatia peteret, Gothosque inde, & è toto Illyrico pelleret, vel. saltem ita distineret, vt ne suppetias *Theodato* contra *Belisarium* ferre possint. Id *Constantianus* impigrè executus & portū Salōnitānum cum classe ingressus, non magno conatu urbem cepit, totamque Dalmatiam & Liburniam, pulsus inde Gothis, Romanq̃ imperio restituit.

Belisarius in Italiam intentus cum quinque non ampliùs millium exercitu vela facit. In itinere ad Catanam in Sicilia, quam omnem Gothi tum tenebant, descendit: urbem capit; inde Syracusas cum classe & exercitu cōtendit; eaque vrbe, minore multò quàm sperari poterat, conatu potitur. Quarum duarum vrbiū *Siciliā Belisario occu-* fortunam reliquæ per Siciliam omnes sequutæ *patius.* quasi fatali quadam rerum inclinatione à Gothis ad *Belisarium*, tanquam ad innictum bello virum, desciverunt: sola Panormus aduenienti & portus & portas clausit. *Belisarius* ne terrestrium copiarum tenuitatem proderet, mare rem aggreditur; portuque perfractō, mœnia subit. quumque altiores essent ea parte muri quàm vt è nauibus conjici in propugnacula tela possint, nec tabulatis & turribus, quas nauibus imponderet, extruendis materia suppeteret, nouo & expedito inuento animum adjecit: lembos milite completos ad fastigia malorum funibus suspendit. Hii turrium vicem præbuerunt: inde milites muros defensoribus nudabant, & vrbs vno impetu capta, nihil non *Belisarii* armis peruium esse Siculis ostendit. Rebus in Sicilia constitutis, *Belisarius* classe ad

Cap. 2.

Panormus capitur.

(8) THO. RIVI Historiæ

Messinam conuenire iussa, inde Rhegium transf-
milit. nec pugna hætenus opus erat: certatim
omnes aduentum gratulantur: siue Ducis id
famæ datum, siue odio Gothorum contigit.
Lætus hiis rerum initiis *Belisarius* Romanus
cum exercitu ire pergit, classe iuxta sequi iussa.
Nec tam longinquum in hostili terra iter emen-
sus, vllum prius hostem vidit quàm Neapolim
peruenis; ea prima Ciuitas valido Gothorum
præsidio frata venienti portas clausit, & obsi-
dionem omnibus belli & oppugnationis arti-
bus exercitam magna virtute tolerabat. Cui
cum *Theodorus* Romæ desidens subsidium non
pararet, Gothi eam non ignauiam sed prodicti-
onem, & voluntariam cum *Iustiniano* conuen-
tionem esse interpretati, illum inimilis percus-
soribus obtruncant, & *Vitigem* è suo corpore
hominem, sed virtute bellica, quam natalium
splendore commendatiore Regem creant *Belisarius*
verò capta Neapoli, confestim Romam
cum exercitu contendit; eiectione inde Go-
this, eam belli sedem delegit; & ad obsidionem
quantumuis diutinam tolerandam operibus
munivit. Quod vt fieri sensit *Vitiges*, statim cum
centum quinquaginta militum exercitu Ro-
mam venit, eamque septenis castris obsessam
aliquandiu tenuit: sed tanta erat in *Belisario*
animi ingenique vis & vigilantia, vt nullis vn-
quam vel rerum difficultatibus cederet, vel
occationibus aut hostium pateret, aut deesset
iuis; rem verò frumentariam ex Sicilia ad Por-
tum magna semper copia comportari curat.
Quam verò continuis præliis quantumuis pro-
speris

Theodorus
cades.

Vitiges Rex
Gothorum
creatur.

Navalis mediæ Lib. 3. (9)

speris, suum carpi exercitum, & paulatim minui animadverteret, militū turmas ex præfidiis undiquaque, adeoque ex ipso, per imprudentiam, Portu ad Rōmam tuendam euocat. Id conspicatus *Vitiges* cohortes quasdam ad Portum milite jam vacuum occupandum mittit: missi quum aduenissent, locum nullo resistente capiunt. Id ægerrimè ferre *Belisarius*, culpamque *Portus à Vitige occupatur.* agnoscere; sed quam eadem rei necessitas, quæ expresserat, excusabat. Itaque Portus Romano exclusus, Antio, vrbe viginti milliaribus à Roma distitā, non sine magnis difficultatibus, pro portu vti ad tempus necesse habuit: Hostiamq; interim ciuitatem, Portui Romano ex aduerso positam munire, & antiqui portus vestigia scrutando, locum ad naues vtcumque subducendas commodum efficere cogeatur. Cui rei eò enixius operam dabat, quòd suppetias sibi ab Imperatōre missas partim ad Hydruntē in Calabria, partim ad Neapolim itare intellexerat. Quarum rerum famam vetus Dux sermonibus in majus ad populum diuturna obsidione fessum, & vel pacem vel pugnam in remedium malorum poscentem, extulit: Classē & exercitum toto orbe contractum, cum, qui tribus exercitibus satis esset, cōmeatu ab Imperatore missū aduentare, & tota Campaniæ, tota maris Jonici littora nauium multitudine compleri subinde iactitans. Quæ res ad ciues consolandos & in officio continendos solertèr vulgata, quum ad hostes etiam permanasset, eos ingenti terrore perculit. Itaq; *Vitiges* legatos confestim ad *Belisariū* de pace, aut si ea non succederet, de induciis faciendis

endis mittit. *Belisarius*, quum Portu amisso frustra sibi copias mitti intelligeret, ad quas alendas com meatum aduerso flumine subuehi, manente bello, non posse cerneret; de induciis haud abnuere; pacem verò si vellent, eam ab Imperatore per legatos petendam esse dixit. Non quòd ipse belli pacisq; arbitrium non haberet, aut pacem nisi victis dari velleret; sed ut illo induciarum tempore ad com meatus vrbi obsessæ inferendos abuteretur. Trium igitur mensium induciæ petentibus concessæ, & itineris comites seu potiùs custodes legatis ad Imperatorem proficiscentibus dati. Dum hæc geruntur, classes & ab Hydrunte & à Neapoli Hostiam veniunt; ibi milites, impedimenta, com meatus expositi, & aduerso flumine, partim ventis, partim hominum iumentorumque viribus ad urbem subuecti; Gothis interim silentibus: siue id induciarum religione factum, siue quòd spem pacis interrumpi nollent. Jamque *Belisarius* non solùm ad obsidionem tolerandâ, verùm etiam ad confligendû affatim instructus, induciarû exitû expectabat: quum ei affertur, Portum Romanum à Gothis ob famem desertum, & præsidio penitus esse destitutum. Qua re intellecta, extemplò *Paulum* Hostiæ præfectum transmissò Tiberi Portum occupare iussit: quumque *Vitiges* de Induciis turbatis apud eum per legatos quereretur; responsum tulit, *nihil fœdere Induciarum de locis derelictis cautum esse*: quo titulo & Centumcellas maritimam etiam ciuitatem, aliaque Gothorum loca munitiora cepit, & præidiis, nondum

Portus à
Belisario re-
cipitur.

Navalis mediæ Lib. 3. (11)

nondum exacto Induciarum tempore firmavit : planè ut jam Gothi non tam Romam obsidere , quàm ipsi obsidionem sub mænibus Romanis pati viderentur. Jamque Induciarum tempus excesserat , quum pars utraque , non expectato legatorum reditu , bellum parat.

Vitiges prior : qui per Induciarum tempus quosdâ ex *Belisarianis* sollicitatos , ad urbem sibi , ipsa quæ Inducias sequeretur nocte , tradendam , traxerat. Sed frustra. *Belisarius* verò , quod jam antea animo agitauerat , Ariminum (quam *Rimini* nunc vocant) in agro Piceno non procul Ravenna urbe , vix dum finito Induciarum die , occupat : Quæ res tanti fuit , ut Gothi statim de ipsa Ravenna solliciti , obsidionem urbis *Ravennæ* soluerent. Hæc obsidio annum & novem dies tenuit , quo tanto tempore , vix dies vlla , præterquam Induciarum tempore , sine conflictu abiit ; eo partium successu , ut Romanis , quamvis numerus non mediocriter minueretur , animi tamen in dies fiducia crescerent , Gothis verò & vires & spes caderent. *Belisarius* abeuntes in angustiis nactus , magnam illis stragem intulit : inde ad reliquam Italiam perdomandam conuersus , Mediolanum , Auximum reliquasque urbes vel se dedentes recepit , vel resistentes vi expugnauit ; donec ad extremum , *Vitigem* ipsum Ravennæ inclusum obledit , seque cum omne Gothorum gaza dedentem cepit. Quibus de rebus certior factus *Iustinianus* , *Belisarium* extemplò Byzantium reuer-ti iussit. Duo erant quibus *Belisarius* toto hoc bello grassabatur ; ferrum & fames : è quibus

Romæ obsidio soluitur.

Vitiges se dedit.

fames

endis mittit. *Belisarius*, quum Portu amisso frustra sibi copias mitti intelligeret, ad quas alendas com meatum aduerso flumine subuehi, manente bello, non posse cerneret; de induciis haud abnuere; pacem verò si vellent, eam ab Imperatore per legatos petendam esse dixit. Non quòd ipse belli pacisq; arbitrium non haberet, aut pacem nisi victis dari vellet; sed ut illo induciarum tempore ad com meatus vrbi obsessæ inferendos abuteretur. Trium igitur mensium induciæ petentibus concessæ, & itineris comites seu potius custodes legatis ad Imperatorem proficiscentibus dati. Dum hæc geruntur, classes & ab Hydrunte & à Neapoli Hostiam veniunt; ibi milites, impedimenta, com meatus expositi, & aduerso flumine, partim ventis, partim hominum jumentorumque viribus ad urbem subuecti; Gothi interim silentibus: siue id induciarum religione factum, siue quòd spem pacis interrumpi nollent. Jamque *Belisarius* non solum ad obsidionem tolerandâ, verum etiam ad confligendû affatim instructus, induciarû exitû expectabat: quum ei affertur, Portum Romanum à Gothiis ob famem desertum, & præsidio penitus esse destitutum. Qua re intellecta, extemplò *Paulum* Hostiæ præfectum transmissis Tiberi Portum occupare iussit: quumque *Vitiges* de Induciis turbatis apud eum per legatos quereretur; responsam tulit, nihil foedere Induciarum de locis derelictis cautum esse: quo titulo & Centumcellas maritimam etiam ciuitatem, aliaque Gothorum loca munitiora cepit, & præsidii, nondum

Portus à,
Belisario re-
cipitur.

Navalis mediæ Lib. 3. (11)

nondum exacto Induciarum tempore firmavit : planè ut jam Gothi non tam Romam obsidere, quàm ipsi obsidionem sub manibus Romanis pati viderentur. Jamque Induciarum tempus excesserat, quum pars utraque, non expectato legatorum reditu, bellum parat.

Vitiges prior : qui per Induciarum tempus quosdã ex *Belisarianis* sollicitatos, ad urbem sibi, ipsa quæ Inducias sequeretur nocte, tradendam, traxerat. Sed frustra. *Belisarius* verò, quod jam antea animo agitauerat, Ariminum (quam *Rimini* nunc vocant) in agro Piceno non procul Rauenna vrbe, vix dum finito Induciarum die, occupat : Quæ res tanti fuit, ut Gothi statim de ipsa Rauenna solliciti, obsidionem vrbs *Rauennæ* soluerent. Hæc obsidio annum &

nouem dies tenuit, quo tanto tempore, vix dies vlla, præterquam Induciarum tempore, sine

Romæ obsidio soluitur.

conflictu abiit ; eo partium successu, ut Romanis, quamuis numerus non mediocriter minueretur, animi tamen in dies fiducia crescerent, Gothis verò & vires & spes caderent. *Belisarius* abeuntes in angustiis nactus, magnam illis stragem intulit : inde ad reliquam Italiam perdomandam conuersus, Mediolanum, Auximum reliquasque vrbes vel se dedentes recepit, vel resistentes vi expugnauit ; donec ad extremum, *Vitigem* ipsum Rauennæ inclusum ob-

edit, seque cum omne Gothorum gaza dedentem cepit. Quibus de rebus certior factus *Ju-*

Vitiges se dedit.

stianus, *Belisarium* extemplò Byzantium reuer-ti iussit. Duo erant quibus *Belisarius* toto hoc bello grassabatur ; ferrum & fames : è quibus
fames

Maris usus. famēs tanta per vniuersam Italiam non in Gothorum castris niodò & præsiidiis, verùm etiam in agris fuit, vt multa & horrenda hominum, homines, matrum filios, mulierum viros deuorantium, exempla passim ederentur: quam illis famem *Belisarius* mare tenendo fecit; nam vt ipse suis è Sicilia, Dalmatia, totaque Græcia annonam abundè suppeditabat, ita Gothos ab omni à mari commineatu exclusit: nullam enim *Vitiges* rei maritimæ vel facultatem vel curam habuit. *Belisarius* Constantinopolim reuersus non eodem vultu quo priùs ex Africa rediens, ab Imperatore excipitur; siue quòd *Justinianus* eum à Gothis Italisque in Regem communiter enixeque & sæpè postulatum fuisse acceperat, siue quòd *Vitigem*, sua potiùs ignauia deditum quam bello fractum, parum dignum populo spectaculum esse iudicabat.

Cap. 3. Et verò digressus *Belisarius* bellum tam integrum in Italia aduersus Gothos, quàm quo primuni die illam ingressus est, reliquit: siue quòd alterum iam Regem captiuum vtcunque traxisse, satis sibi ad gloriam esse putabat, siue quod tantillis copiis ad Italiam obtinendam amplius fidere non audebat. Nam ne quid ei vitio verteretur, mandatum Imperatoris, quo Prouincia decedere iussus est, omni excusatione majus erat. Digresso igitur cum *Vitige Belisario* *Ildeprandus* iussu populi Regnum suscepit. cui paulò post per quendam nomine *Belam*, ob priuatam injuriam cæso successit *Ataricus*; eo vero paucis post diebus sublato, *Totilas*, *Ildibaldi* nepos, cõmuni populi Gothicis consensu regnum accepit.

Totilas Gothorum Rex creatur.

Navalis mediæ Lib. 3. (13)

accepit. Hic statim belli rationē mutavit; quāq;
rem *Vitiges* magno suo incōmodo neglectui ha-
buerat, eam ille ante omnia curandam cœsivit:
Primoq; statim ingressu validam classem cōpa-
rauit; nihil actum ratus, nisi quam primum, &
Romanos toto mari pepulisset, & Siciliam, ho-
sti ademptam, in potestatem suam redegisset.
Interea temporis à Romanis Ducibus quos *Be-
lizarius* reliquerat, res quā segnier aduersus
hostes tam aduersus ciues improbè & crudeliter
administrantur; vndecini jam pro vno erant
Romanorum Duces; quorum neuter alteri pa-
rebat, nec in commune quicquam consulebant,
sed militum libidini omnia permittebant. Quo-
rum si quis forte stupris aut rapinis obuiam i-
taret, *non soluta stipendia* statim audiebat. De-
nique nihil sanctè, nihil strenuè, nihil pro more
militari apud Romanos gerebatur. Quibus de
rebus certior Imperator factus, errorem passus,
quod *Belisarium* tam præcipiti consilio, nec
dum rebus in Italia constitutis, reuocasset, non
tamen vt eundem, vnicui bello virum, remitte-
ret in animum induxit, sed quendam nomine
Maximinum, cum Classe è tota Græcia contra-
cta, & exercitu ad bellum persequendum cum
Imperio misit hominē, imbellem, inertem, non
animo, non vltro fretum. Is quam primum in
vltimo Italiae angulo terram cepisset, suæ igna-
uiæ conscius, Classē statim subduxit; pedem
inde non moturus, ne uno forsitan vestigio ho-
sti propior fieret. Deinde *Justinianus* alium *Demetrius*
quendam nomine *Demetriū*, ducem haud inde- *Nauarchus*
corem, & multis sæpe præliis terra marique
sub

(14) THO. RIVII Historiæ

Totile
virtus.

sub *Belisario* exercitatum, cum alia Classe & exercitu misit: eo Consilio, ut dum *Maximus* res terra gereret, ipse mare cum imperio teneret. *Demetrius* quum Siciliam attigisset, quo in statu res Neopolitanæ erant intellexit. Etenim *Totilas* profligatis aliquoties Romanorum, ut quemque assequebatur, ducibus, per totam Italiam cum victore exercitu volitabat; oculos vero omnium tanto non virtutis modo bellicæ, verum etiam clementiæ in devictos, & iustitiæ in omnes fulgore perstrinxerat, ut cum flagitiosis Romanorum Ducibus collatus, vnicus in terris vir cælitus ad Italiæ tutelam demissus videretur. Is cæteris penè omnibus urbibus vel vi captis vel conditionibus receptis, Neapolim, cui tum non contemnendus Dux, *Conon* præerat, arctissima obsidione cinxit. *Demetrius* animo anxius, quod nec ad obsidionem soluendam, nec ad openi omnino obsessis ferendam sat virium haberet, omnes tamen ex Sicilia naues contraxit; iisque sociorum naualiū, quantum ad eas nauigandas sat esset, imposuit. Saltem ut adueniens ipsa multitudine & auxiliorum opinione hostem eludere & terrere posset. Quæ cum eum fefellisset ratio, nec vllam in castris Gothicis motum sentiret, vrbe Neapoli præternauigata, Portum Romanum petiit, spe ductus, posse se aucto demum eo loci exercitu, obsessis suppetias ferre; idque, quum ad Portum appullisset, summo studio agebat: sed neminem toto illo tractu inuenit qui se Romanorum militiæ ascriberet. Siue id militum ducumque Romanorum odio, siue *Totile* metu

& reuerentia factum erat. *Conon* quum rerū inopia magis magisque in dies premeretur, nuntium per medias hostium stationes ingenti periculo ad *Demetrium* in Portu Romano adhuc hærentem misit. *Demetrius* nihil ultra cunctandum ratus, cum Classe Neapolim redire parat. Qua de re certior factus *Totilas*, & ipse cum Classe instructa non procul Neapoli improuiso occurrit, primoque impetu classeni *Demetrianam* auertit. Non Dux; non miles pugne memor fuit: vna salutis via erat, si è nauibus in lēbos defilire possent, lembo *Demetrius* exceptus fugit. Vniuersa Classis in hostium potestatem venit; militum & sociorum naualium, pars gladio cæsa, pars mari submersa periit. *Demetrium* fuga abreptus ad *Maximum* Hydrunti sedentem contendit, eumque impulit, vt si minus terra rem gerere placeret, sua saltem Classe ad Italiam retinendam ab Imperatore missa, Neapoli obsessis auxilium ferret; multisque tandem rationibus peruicit, ut Syracusas in Sicilia peteret; quò cum peruenisset, nulla vi moueri potuit, vt inde oram ipse solueret. Classen tamen *Demetrio* tradidit, isque Neapolim contendens, cum valida tempestate in itinere aliquamdiu conflictatus, ad extremum vi ventorum victus, Africo impellente, cum vniuersa Classe in litus Italicum inter medias hostium stationes ejicitur. Ingens strages in ejectos edita est. *Demetrius* viuis in *Totile* potestatem venit, qui injecto collo captiui recte ad mœnia Neapolitana vinctum traxit; populumque in hanc sententiam affari iussit: Duabus jam

Demetrii
classis oppressa.

Demetrius
à *Totila*
capitur.

Classibus

(16) THO. RIVII Historiæ

Classibus, altera prælio, altera tempestate amissis, nihil Imperatori superesse virium, quibus vrbi auxilio esse posset: proinde victas victori manus darent; ejusque clementiæ demum se permitterent, cujus vim ultra sustinere non possent. Qua viri oratione, & deformi insuper, quo tunc astabat, habitu commota vniuersa ciuitas ad ejulatus & lachrymas conuersa, pectora tundere, crines vellere & capita offensare cæperunt. *Tosilas* quum inter tot lamenta & fletus nullam de pace, de deditione mentionem nullam excidere animaduerneret, veritus ne dolor iste in desperationem & furorem verteret, ad muros ipse accessit, factaque dicendi potestate; orationem habuit, non ira eam & opprobriorum plenam, sed, Arrianus quamuis & barbarus esset, ea pietate, ea modestia, & tam justis rationibus subnixam, vt non obsidione, non fame & inedia pressos, sed in plena libertate, & rerum omnium affluentia positos, ab Imperio Romano auulsos ad se pellere & attrahere potuerit. Auaras Romani militis manus, profusas libidines, iniusta imperia, inaudita flagitia, muliebrem timorem & ad quorumuis armorum vel sonitum vel conspectum fugam; suam vero contra & Gothorum moderationem, iustitiam, continentiam, fidem, virtutem, arma, victorias, & perpetuam in præliis felicitatem, vera omnia, & obsessis non cogitatione sed sensu, non auditu sed visu, non leuiter inspecta sed penitus explorata eis ad memoriam, eo verborum flumine, ea animi fiducia reuocabat, vt interloquendum arma audientibus

Navalis mediæ Lib. 3. (17)

dientibus penitus è manibus exciderent. Tringinta modo dierum inducias pacti sunt : infra quos si suppetiæ ab Imperatore non mitterentur, dedituros se pollicentur. *Totilas*, vt fiducia ostenderet, tres menses dedit. At obsessi fame prius & rerum omnium inopia, nunc verò fide & clementia hostis victi, non expectato Induciarum decursu, paucos post dies se dedunt. Enimverò *Totilas* ea clementia deditos habuit, non vt victorem in eos, sed ut parentem ageret, ea cura viuos conseruando, vt defunctos si posset ad vitam reuocare se velle fidem faceret. Inde ad Romam obsidendam se vertit.

Hiis rebus cognitis *Justinianus Belisarium* è Media, vbi contra Persas bellum ingenti cum gloria tum gerebat, reuocatum iterum in Italiam misit; sed nec armis, nec pecunia, nec milite instructum; itaque frendens eò abijt *Belisarius*, per superiora Macedoniæ loca Dalmatiam & Salonas ad mare Adriaticum positas petens. In itinere ad quatuor millia hominum collegit, quos nauibus impositos Rauennam transvexit. *Totilas* quòd *Belisarii* vires, quam essent exiguæ, intellexisset, facile cum Rauenna torpescere patiebatur. Ipse interim Romam obsidione premit. *Belisarium* verò nouus repente circumstetit terror. Pars major exercitus, miles Illyricanus erat. Quare animaduersa, *Totilas* facili linguæ cōmercio cum iis per occulta colloquia agit, vt copias inde abducant. Præsentē rerū Romanarum statū, quamq; essent infirmæ, ex inermi *Belisarii* in Italiani reditu remonstrat: contra, quam florentes

Cap. 4.

& validæ Gothorū tum vires essent, ipsos cerne-
re; nec se illud petere, ut arma in Romanos ver-
terent; bellum modò non suum ne gererent:
domum redirent, bello in Italia finē non bel-
lando sed abeundo imposituri. Illyricani,
quum & vera esse quæ à *Totila* proponerentur
non ignorarent, & ducum Romanorum auari-
tiam, libidinem, reliquæque vitæ nequitiam, &
toto quinquennio non soluta stipendia, & Hun-
norum illo ipso forte tempore, transmissio Da-
nubio, in Illyricum irruptionem factam, anni-
mis reputarent, accepta quam pepigerant mer-
cede, lignis repente sublati abeunt; Causam
requerentibus, & per quicquid sanctum es-
set ut manerent obtestantibus respondentes, non
soluta sibi esse stipendia. *Belisarius* postquam
socios nec vi nec precibus retineri posse, & quo-
tidiana per eandem causam ad hostem transfu-
gia fieri animaduertit, veritus ne res, si iisdem
in castris maneretur, ad vniuersam defectionem
verteret, ocys Rauennā mōuendum ratus, Py-
saurum contendit; hucque & illuc per Italiani
vagatur, id modò sollicitus, nè quā æquo in lo-
co hosti se præberet. Interim Romæ, non ob-
sidione modò, verumetiam fame toratur. To-
tam enim ferè inter Siciliam & Portum Roma-
num viam *Totilas* classibus sic infederat, ut
ne tantillum quidem frumenti, aut cuiusque-
modi commeatus inde Romam subnectari
posset.

Cap. 5. Erat eo tempore Romanus præsul *Vigilius*.
Is in Sicilia tum degens magnum nauium nu-
merum frumento compleuerat, & ad Por-
tum

tum Romanum miserat. Civitas ipsa, quæ Portus dicebatur, in potestate Romanorum erat; nauale verò, quod extra civitatis muros, & in ipso mari ingenti opere constructum fuisse diximus, tri duo ante occupauerant, & modò tenebant Gorhi. Qui quum classem frumentariam à Sicilia aduentare cognouissent, in ipso nauali sub vrbis moenibus se condiderunt. Romani verò qui in propugnaculis murorum protectione erant, quum classem *Vigilianam* in conspectu jam haberent, signa tollere, & manu significare, cursum, vt vel sisterent, vel aliò flecterent. Sed (vt signa plerumque, nisi ex condito edita, videntes, non minùs quam verba parum intellecta audientes fallunt) magistri navium quæcunque edebantur, lætitiæ signa esse interpretati, plenis velis in portum, hoc est, in hostium potestatem veniunt. Ibi sæda edita in classiarios cædes. Neque enim aut ipsi ad pugnam parati venerant, & qui in vrbe erant, nihil in se viriù ad eruptionem tentandam habuerunt. Erat in hac classe quidam nomine *Valentinus*, quem *Procopius* Episcopu fuisse ait; cuius verò loci antistes fuit, memoriæ non prodit; sed nec causam aduentus narrat: fuit tamen qui eum Vicarium Romam à *Vigilio* missum referunt. Quicquid fuerit, captus & ad *Totilam* adductus, quum causam aduentus sciscitanti perplexè responderet, & mendacii demum aperte convinceretur, vtraque manu præcisa, quo vellet abire iussus est. *Belisarius* quum se *Narsesis* annuli sui inuidia & artibus usque premi cerneret, & nec militem in supplementum

tum, nec pecuniam in stipendium mitti, & transfugia tam Romanorum quam auxiliarium ad *Totilam* noctes diesque fieri animaduerneret, & Romæ ipsi dies noctesque timeret, nec propter copiarum tenuitatem terra iter arripere vlla probabili vel salutis vel artis disciplinæ Imperatoriæ ratione posset, misit primò literas ad Imperatorem, in quibus de statu rerum gravissimè, nec sine indignatione querebatur; *Si in Italiam*, inquit, *Belisariū mittere duntaxat in animo habuisti, bene est; sum enim in medijs fere nunc Italia.* At si hostem debillare vñ, bello utique necessaria, arma, vestem, milites, stipendia mittenda sunt; aut Italia servanda spes abjicienda. Quibus literis datis, quum frustra Rauennæ tempus teri animaduerneret, præsidio ei relicto, cum classe Dalmatiani petit, inde Dirrachium in Epiro venit; ibi ei *Isaces* & *Johannes* copiarum Duces occurrunt; quibus *Belisarius* consilium suum aperit; se Romam non terra, sed mari petiturum. Ibi quippe bellum esse, vbi *Totilas* esset, frustra enim cætera teneri, si imperii sedes amitteretur. *Johanni* tamen, quandoquidem id cupiebat, in aduersum Italiæ litus vt transmitteret permisit, vtque Romæ sibi quam primùm poterat occurreret, in mandatis dat. Ipse ventum & apertum mare nactus, *Portum* petit.

Cap. 6. *Totilas* quum ripas Tiberis, dispositis per oportuna loca præfidiis, antea muniuisset, cognito jam *Belisarii* consilio, & quantum in vno viro ad omnia momenti esset secum reputans, ipsum flumen, ne quâ comineatus ad urbem sub-

mitte-

mitterentur, claudere instituit. Contracta igitur ex vicinis montibus materiæ vi, flumen ponte tanta firmitate simul & laxitate constructo junxit, ut valli non solum speciem præ se ferret, verum etiam usum præberet. Additæ utrinque præcellæ turres; quibus viri fortissimi toto exercitu delecti præsidio dabantur: catena insuper ferrea inusitata crassitudinis ponti inferiùs, ne qua in ipsum vis fieret, prætendebatur. Quibus operibus perfectis, *Belisarius* cum classe ad *Portum* applicuit; ubi quum tantum obicem flumini à *Totila* injectum comperisset, anxius animi, multa secum volutabat; Capiis impar, terrestri itinere inde Romam petere non audebat, quippe non jam *Vitigem*, sed *Totilam*, virtute & rerum terra marique gestarum gloria conspicuum, cum ingenti exercitu occursum. Flumen igitur profectò tentandum. Atqui præterquam quod adverso subeundum esset, cum præsidiis tota ripa utrinque dispositis perpetuò esse dimicandum occurrebat; & subibat animum, quod siue terræ siue flumine ad urbem penetrasset, pari ibi virtute, sed imparibus viribus, conflegendum esset. Fortunè igitur, inquit, dum Roma obsidetur, dum capitur, dum excinditur, dum incenditur confidendum? Ne fin, inquit, *Belisarius* si tantum flagitium animo admisero. Audendum est aliquid & novandum, quod hostibus improvisum & inopinatum accidat, terroremque non vanum injiciat, & Romanam urbem perfidis barbarorum faucibus eripiat: & cum dicto ad navium stationem descendit. Ibi duas

acatas (navigii genus erat) firmissimas sinuul & latissimas delegit. Has funibus asseribusque junxit, iunctis turrim inædificari imperat. Interim fidum speculatorem mittit; qui quum se præfidiis hostium ad pontem inferuisset, turrium altitudinem penitus perspectam ad se referret. It, redit, turrium altitudinem perspectam ad unguem refert. Quo cognito ipse turrim acatis impositam multò altiore extrui curavit: qua perfecta, quod ad Panormum priùs fecerat, id nunc rursus tentandum esse censuit: summo malo lembos appendi iussit. Eò seuum, picem, sulphur, aut si quod aliud rapidius flammæ alimentum esset, congerit: ducentas insuper dromonas, com meatibus priùs affatim repletas & milite instructas, armat. Quarum singulis vallum ligneum exterius adjecit, ut hoc commento milites duplo plures, quam simplici navigio ferri solèt, ad pugnam instruerentur: non enim in tabulatis modò turribus stantes, verum etiam per hæc valla dispositi, vel gladiis vel missilibus pugnabant. Id autem quomodo factum fuerit, ita (ut puto) rectè animis concipiemus, si quas nunc porticus in extremis navium nostrarum partibus, extructas dicimus, eas amplioribus spatiis, tantaque laxitate, ut milites in iis stantes membra ad pugnam movere possint, toti naui circumjectas ob oculos posuerimus. Et hoc quidem *Belisarius* ad pugnam excogitavit. Enimvero *Ptolemaum Philadelphum* in *Thakamego* illa sua, quam ad voluptatem in flumine Nilo capiendam ingenti mole extruxit, binas exterius peripatas, sive ambulation-

*Vallum
Navale.*

bulationes circumdedisse cognouerat. Siue igitur valla hæc, siue porticus, siue ambulacra appellare libet, inuenta ad luxum *Belisarius* ad belli vsum transtulit. Sic igitur instructa classe, *Isacem* ducem ad se vocat; illi vrbs, illi *Antonina* suæ, utriusque vita sua sibi carioris custodiam & curam longa, interfusis lachrymis, oratione commendat: *Vides enim*, inquit, *Isaac* quo in statu res sit. Vnicum toto hoc Italiae tractu locū in potestate habemus, ad quem vel læti victoria redeamus, vel aduerso casu perculsi refugiamus. Ego audaci incæpto ad pontem perripendum, cum quod roboris & floris in exercitu sit, vado, copiasque è terra in flumen transfero: Et tu hostem milite abundare vides. Quid si me hinc profecto, quid si cum hoste demum congresso; *Totilas* vel ipse accurrat, vel partem exercitus ad hæc mœnia oppugnanda mittat? Te presente omnia in tuto fore confido; absente, quid futurum sit, horreo dicere, & reformidat mens cogitare. Si pontem non perripiero, & hæc interim vrbs ab hoste intercepta fuerit; Roma simul & omnia funditus perierunt: Sin perripito ponte, Romani com meatu & militum supplemento iuvero, capto tamen Portu, in easdem planè angustias, in quibus nunc versamur, reïncidemus; nec Portu amisso Roma vnquā obsidione soluta censi poterit. Itaq; per *Justiniani* salutem, per Imperii maiestatem, per si quid in me vel autoritatis, vel erga te amoris incit, rogo, jubeo, obtestor, oro, ne te quacunque occasione hinc vsquam moueris: Et adiecit, non si fama *Belisarium* in

(24) THO. RIVII Historiæ

pugna cecidisse venerit. Quibus dictis acatam conscendit, & quâ vi hominum, quâ jumentorum opera aduerso flumine ad pontem contendit. Gothi nouam classis faciem mirati, obstupuerunt; sed à ducibus admoniti, terricula-menta illa esse & ludibria ad oculos fallendos adhibita, pristinos animos induerunt, & ad pugnam se parant. *Belisarius* quum ad pontem appropinquasset, ferream ingentis magnitudinis catenam objectam reperit: addita etiam erant ad vtramque ripam quæ catenam tutarentur castella; sed ea pugna non diu tenuit: fusa quæ in castellis erant præsidia, & vel soluta vel perrupta catena, facilem ad pontem ferrum-pendum viam præbuerunt. Ibi ingens contractum cum Gothis certamen. Vna præcipue turris erat, quam *Osdaus* cum bis centū fortissimis militibus tenebat. *Belisarius* quum iam ad ipsum pontem peruenisset, lembos seuo & pice flagrantes in pontem iuxta turrim deijci mandauit: qua flamma correpta turris, & *Osdaus* & qui cum eo erant milites ad vnum omnes perierunt, ipseque pons velut fulgure concepto deflagrauit; quæ omnia sic vt erant feliciter gesta, nuntius nescio quis ex acie properans ad Portum detulit. Ingens ibi ex re bene gesta lætitia erat; *Isaacus* verò ad loci custodiam relictus, abominando flagitio, spretis *Belisarii* mandatis, spreto more, spreta disciplina militari, scilicet ne solus in tam insigni victoria exors gloriæ haberetur, transmissis Tiberi, cū cētum equitibus, via Ostiensi aduersum hostes tendit. *Rothericus* Gothorum, qui in illis castris erant, dux, subito

subito hostium aduentu territus, & majores copias pone sequi ratus, properè fugā arripit; Nec *Isaaci*, vel hostem in fugam versum insequendi, vel ad pontem ducendi cura erat; sed tam ipse, quam qui cum eo erant milites castra ab hoste deserta inuadere, tētoriiis se inferere, inde quicquid poterant, auferre, denique non amplius in pugnam sed in prædam omnes intenti esse. *Roibericus* verò quum paululum recessisset, nec quenquā se insequi animaduertisset, fugam sistit: quumque castra à se relicta respiciens, hostium paucitatem, simul & inscitiam considerasset, suos hortatus, ut flagitium admissum virtute eluerent, neue fugæ quam victoriæ fama prior ad *Totilam* perueniret, ad castra redit: ibi hostem intentoriis plerosque deprehensos ferro mactat, & *Isaacem* viuum capit. Forte accidit, ut vnus aliquis prælio elapsus ad *Belisarium*, qui pontem iamjam perrupturus videbatur, trepidus accurreret: isque non reiserie, non loco pugnæ, non causâ narrata, id vnum renuntiavit; *Isacem* cum suis, ab hoste captum periisse. *Belisarius* ratus Portum, & in ea *Antoninam* vxorem, spesque Romanorum omnes cum *Isace* vnà interiisse, relicto ponte, properè ad Portum recuperandum redit. Ibi & *Antoninā* & urbem & omnia quæ in ea erant salua reperit. Sed quum *Isacem* cum turma equitum, in aduersâ ripam trajecisse cognouisset, rerum primū imagine confusus stetit: Deinde, quum quantam rem, qua sui ab *Isace* contumelia, quo errore suo, sibi è manibus elabi passus esset, animo voluisset, præ incrore in

in febrim, & grauem & diuturnam incidit: nec cui rem caprâ exequendam committeret, habebat; quum spretam suam vbique auctoritatem cerneret. *Belisario* decumbente, *Totilas* Romanam proditione capit. Qua præfidiis firmata, ad alias longè positas ciuitates, quæ à Romanorum partibus adhuc stabant recipiendas abiit. Præcipua tamen eum cura, de Sicilia Gothorum imperio restituenda tenuit.

Cap. 7.

Proditum memoriæ est, quo tempore *Totilas* urbem Romanam obsidione primùm premeret, nec dum *Belisarius* ad Portum appulisset, *Pelagium* Diaconum à S. P. Q. R. legatum de conditionibus quibus vrbs dederetur, missum ad eum accessisse: sed ante quam orationem institueret, præuenisse *Totilam*, & edixisse, ne de tribus rebus verbum mitteret; è quibus vna illa erat, ne de Sicilia quicquam moueret. *Totilas* enim à suscepti statim regni initio insulam illam *Belisarii* dolo Gothis ereptam fuisse querebatur: præque se ferebat, nisi ea restituta, arma nunquam positurum. Itaque quadringentarum statim nauium classem contrahit, præter infinitum nauicularum numerum, quarum omnium longè maximam partem à Romanis, dum trajectus facerent, captas habuit. Cum hiis freto in Siciliam trajecit: & primo appulsu Messanâ cepit; deinde vniuersam insulâ infandis populationibus vastat: & demum ipsas Syracusas terra mariq; obsidione clausit; classis deinde maiorem partem ad Græciam primùm & insulas ei adjacentes, Corcyram & Cephaloniam & Zacynthum populandas

das mittit: inde ad occidentem conuersus, Corsicani & Sardiniam infedit. Dum hæc aguntur, *Belisarius*, missis prius ad Imperatorem litteris, per causam valetudinis, petiit & obtinuit ut domum reuocaretur; sed recuperata interim sanitate Romanum recepit, & decedens urbem in possessione Imperii Romani reliquit. Reuersum Imperator summo apud se in honore habuit, & Prætorio Orientis præfecit. Tanta autem apud populum dignatione fuit, ut ipsi Consules ei, non solum aduenienti assurgerent, verum etiam occurrenti de via decederent. Interim *Justinianus* de successore toto animo cogitare. Quem autem ei muneri potius destinaret, quam *Germanum* suum ex sorore, nepotem, & virum multis magnisque facinoribus conspicuum? nam & *Stozam* Tyrannum se in Africa efferentem acie victum occiderat, & Antiarum gentem, qui Istro transmissa Constantinopolim inuadere parabant, penitus deleuerat, & omnium opinione Dux bello egregius, & *Belisario* secundus habebatur: magna etiam autoritate & prærogatiua ad hoc bellum gerendum accessurus videbatur, quod *Amalsuntham Theodorici*, ex filio *Entharico* neptem, uxorem duxerat. Sed dum ille per superiora Macedonia, via in Italiam ferente, duceret, Sclauini, gens tum noua, Istro transito, Imperii fines inuaserant. Itaque *Justinianus* eum, Italia ommissa, contra Sclauinos arma vertere iubet, & *Liberium* cum classe in Italiam mittit; dato in mandatis, ut in itinere Siciliam tentarat. Ille impigre rem aggreditur; sed vix Siciliam attingeret

tigerat, quum Imperator, graues ejus annos
causatus, ei successorem *Artabanem* mittit. Pro-
fectus verò *Artabanes*, quum *Cephaloniam* ap-
pulisset, ibi *Liberium* viam vi in *Syracusarum*
portum fecisse certior fit. Itaque eodem per
Adriam cursum dirigit, sed in itinere totam
classem, vel fluctuum vi obrutam, vel in *Pelo-*
ponesum ventis rejectam, vel in diuersa & ig-
nota littora ejectam amisit. Ipse ad *Melitam*
insulam naufragus exponitur; inde classe exu-
tus, *Byzantium* reuertitur, & *Germanus*, pro-
fligatis *Sclauinis*, moritur.

Cap. 8. Quibus rebus intellectis, *Justinianus* quen-
dam nomine *Johannem* belli Ducem in *Italiam*
mittit. Qui quum *Salonas* in *Dalmatia*, cum non
contemnendis copiis peruenisset, litteris ab
Imperatore datis jussus est, ibi *Narsetem*, *Eunu-*
chum quidem, sed fatalem hujus belli Ducem,
expectare. Non desunt qui *Justinianum*, hoc in lo-
co, inconstantia arguant. Ego verò summi viri
consilia & rationes leuitatis arguere inciuile
esse puto; præsertim quum consiliorum exi-
tus felices videam. *Totilas* enim inani tot no-
uorum Ducum, classium, exercituum ab Im-
peratore in *Italiam* missorum fama territus,
Siracusas, quas frustra aliquot menses terra ma-
rique arctissima obsidione clausas tenuerat, &
cum illis totam *Siciliam*, abductis inde properè
copiis, terrestribus pariter & maritimis, Impe-
ratori vt prius possidendam reliquit; Veritus
scilicet, ne dum insulam illam retinere conten-
dit, totius *Italix* possessione excideret. Duo verò
erant quæ inde digressus in animo facere habe-
bat:

Navalis mediæ Lib.3. (29)

bat alterū, ut Romam reciperet, alterum ut Anconam, urbem maritimā, ad sinus Adriatici flexum positam suæ potestatis faceret. Tres enim tantum vrbes toto illo tractu Romani reliquas habebant; Hydruntem, Anconam, & Rauennam. *Totilas* igitur in Italiam reuersus, ante omnia Anconam obsidet. Rauennæ illo tempore *Valerianus*, vnus ex vndecim ducibus, à *Belisario* relictis, præfuit. Qui quidni quantis copiis Ancona, præsertim à mari, obsessa teneretur, & quanta iam fame obsessi laborarent, intelligeret, litteras ad *Johannem*, Salonis expectantem, dat, quibus & præsentem rerum ad Anconam statum, & loci oportunitatem, & rerum omnium in Italia momentum, ab illius vrbis salute pendere, ob oculos proponebat. Rogabat igitur, ut quandoquidem classem paratam haberet, eam, mora posita, ad Anconam mitteret, eamque, si posset, obsidione, si minus, saltem fame liberaret. Quibus litteris perlectis *Johannes*, quamuis aliud ab Imperatore in mandatis habebat, naues tamen triginta septem comœatu simul & milite refertas deducit, & aduersus hostem nauigare incredibili diligentia pergit. In itinere consilii author *Valerianus*, cum duodecim apparatissimis nauibus occurrit: eæ classem Romanam Gothicæ, quæ quinquaginta circiter nauibus constabat, paræ faciebant. *Johannes* supra Anconam Rauennam versus terrestrem militem exponit. Inde Anconam de summa rerum nauali prælio decertaturus venit, & ante portum aciem explicuit. Nec classis Gothica pugnx moram fecit; prius
tamen

tamen quam concurreretur, vterque Dux suos milites alloquendos censuit. Vtriusque oratio in eo plurimum versabatur, vt Italiæ imperium ab ejus pugnae euentu pendere suos edocerent. Nec aliter oratio quam res erat. Vix orationes finierant, quum milites clamore sublato rostra dirigunt, Aquis igitur, vt in tam parinauium numero, frontibus concurrunt, in directum vtrinque nitentes, paribusque primò & armis & animis gerebatur res; & sagittæ grandine densius omni parte volabant. Sed quum proras prorsus percussissent, resque gladiis jam & hastis geri cæpta est, victoria statim ad Romanos inclinavit, & hinc *Johannes*; inde *Valerianus* inscitiam hostium suis ostendebant. Gothorum enim hic manipulos à reliqua classe seclusos, illic mediam aciem confusis ordinibus stiparam cerneret, aliique aliis impedimento erant: tum contis alteri alteros protrudebant; jamque clamoribus & conuitiis strepebant omnia, vix vt manibus temperarent. Romani, quâ solutos ordines cernebant, ibi se medios insinuabant, manipulosque auulsos, multitudine freti, facile superabant. Mediam verò aciem, ne se vsquam explicaret, vndique circumfusi impediabant: jamque antennarum hostilium cornua alia aliis implicantur, & obstantes nauium suarum mali, ne sagittæ in hostem missæ, ad eos pertingerent, veluti densa aliqua filum objecta, magna parte impediabant. Romani verò quum magna virtute in eo prælio se gerebant, tum pugnam multa arte inibant; nauibus iusto spatio à se inuicem distantibus, sicque dispositis, vt

Navalis mediæ Lib. 3. (31)

si qua hostis se inferret, ordines densare; sin pluribus in locis res gerenda esset, eodem laxare, rursusque coire possent; vbi verò tumultuari barbaros conspexissent, paulum recedentes, sagittas in eos undique emittebant; quarum nulla ferè incassum cecidit; adeo enim conferti stabant Gothi, vt singuli destinatis ab hoste ictibus peterentur. Itaque abjectis demum armis nuda hostibus corpora terienda præbuerunt; stabantque nec fugæ nec pugnæ memores. Undecim modò nauium cohors quæ se ab acie sub ipso pugnæ initio disjunxerant, fuga salutem petierunt: in cæteros Romani, vt in barbaros par erat, sæuierunt: paucos modò cædendo demum fessi seruauerunt. Qui verò aufugerant, vbi terram attigissent, naues suas incenderunt, ne earum potestas hosti fieret. Quæ re perspecta, Gothi, soluta obsidione, ab Ancona Auximū trepidi aufugerunt. *Johannes & Valerianus* Anconam ire pergunt, simul vt comæatū famelicis inferrent, vtq; hostem (fugisse enim hætenus ignorabant) junctis copiis in ipsis castris aggredierentur. Sed quum solutā obsidionem, & omnia ibi in tuto collocata animaduertissent, *Johannes* Salonas, *Valerianus* Rauennam properè redierunt.

Multiplex erat hæc Gothis, quàm pro numero vel nauium vel virorum amissorum clades; multiplex etiam Romanis victoriæ, quàm pro hostiū cæsorū multitudinis fructus. *Totila* enim & Gothis animi statim contiderunt, *Narsesi* verò patefactū, seu mari seu terra maluit, in Italiam iter erat; sed terra iter facere placuit, itaque

Cap. 9.

transmisso Istro Romanum Imperium in- Hunni Con-
uadebant; emensaque rota Thracia ad stantinop.
Longos, qui vocantur *maros*, qui vnius inuadunt.

tantum diei iter ab vrbe distant, castra
fecerant. *Justinianus* igitur accersitum
Belisarium rogat, vt extremam hanc Im-
perio nauaret operam, hancque pestem à
Byzantiî mœnibus auerteret. *Belisarius*
quanquam senectute iam incuruis, vix
vt equo hærere possit, iuuentutem tamen
ad arma vocat. Omnes properè conue-
niunt: nec quisquam tam iners Byzantiî
reperitus, qui *Belisario* vocanti, non re-
sponderet. Isque quamuis inconditam
urbicorum hominum multitudinem duce-
ret, ea tamen cura & arte aciem instruxit,
vt Hunnis primùm ejus impetum non su-
stinerent. Sed fuga effusi retrò ad Istrum
abierunt: quod eo libentiùs, quanquam
ad mare nil pertineat commemorari, vt
eorum inscitiam refellerem, qui *Belisarium*
à *Justiniano*, scilicet in exilium ejectum
& ad panem mendicandum adactum fu-
isse fabulantur. Summa enim semper &
Imperatoris & populi caritate vixit. Pau-
cos verò post annos rursus Hunni ad
Constantinopolim obsidendam redeunt;
nec vltra vires *Belisario* ad aciem instu-
endam suffecerunt. Sed erat illo tempore

Alter Hæ-
norum in
Constanti-
nop. incur-
sit.

Constantinopoli Germanus, adolescens
nobilis, & Germani, quem diximus de-

functi filius, & *Justiniani* pronepos. Is omnes, quotquot *Belisario* nomina dederant, ad arma pro patria rursus induenda convocat; hortaturque ut, qua virtute Hunnos istos ad *longos muros*, Duce *Belisario*, antea vicerant, eadem nunc, se Duce, mœnia urbis defenderent; movit omnes juvenis oratio; itaque arma omnes capiunt: multisque præliis terrestribus hostem sub ipsis urbis mœnibus, Germano semper inter primos ordines pugnante, fatigarunt. Fessi deinde, quâ pugnando, quâ obsidendo Hunni, ad maritimum commentum animum aduertunt; quo succedente, urbe se protenus potituros non dubitabant. Sin aliter res cecidisset, obsidionem solvere & ad suos redire statuebant. Harundinum igitur præcipuæ longitudinis simul & crassitudinis vi magna coacta, eisque inuicem intertextis, & cratibus compluribus, quibus pro lateribus interiorius vterentur, factis, perticisque grandioribus transtrorum in usum positis, hæc omnia committebant restibusque & victis viminibus (neque enim ferri, aut copia, aut, usus erat) colligabant; commissuras vero ipsas palea explebant, ita ut crates tres, vel ad summum quatuor, naviculam vnam conficerent, tanta laxitate, ut quatuor homines singulæ caperent, tanti vero fundi, ut inuecta pondera firmiter & tutò deherent

herent, nec sui leuitate subuerterentur. Hujus generis nauigia centum & quinquaginta fabricantur: in quibus partem anteriorem in proræ speciem leuiter inflexam protendebant, à lateribus verò remigium adornabant. Quibus rebus sic constitutis, classem hanc arundineam è regione occidentalis litoris in mare clam mittunt; sicque rudi remigio in altum à terra longiùs prouehuntur, rati se facile sinum superaturos, & ad locum aliquem infra portum præsidio vacuum & incustoditum peruenturos. Quibus de rebus per exploratores certior factus *Germanus*, hostium quidem irrisit temeritatem, veruntamen actuarias viginti, multiplici remigio instructas, armatis complet, & in muri interioris angulo, veluti in insidiis collocauit. Vnde signo dato coorti impetum in Hunnos, portus fauces jam ingressos, faciunt. Hunni qui nihil minus quàm pugnam expectabant, nec aliud curabant, quàm vt confisterent duntaxat dum in terram alicubi descenderent, vbi hostem incursantem conspexerunt, præ metu obtorpuerunt: Romani interim omnia cum risu exequabantur, junceasque cymbarum compagine falcibus dissecantes, hostes ipsos in mare effuderunt. Ita stolidum barbarorum incæptum, parem consiliis exitum habuit; nec ex sexcentis illis, qui arun-

dines hæc conscenderant, quisquam vel evasit, vel vivus in hostium potestatem venit: reliquus verò exercitus hac primum clade territus, deinde eruptionibus ex vrbe quotidie factis agitur, retrò ad Istrum, Germano insequente, abit, eoque demum transmissis qui supererant in patriam suam afflictis & inopes reuerterunt. Paulò deinde post *Iustinianus* moritur; anno nempe Domini quingentesimo sexagesimo quinto: vir pacis bellicæ & artibus & successibus, si quis unquam, memorabilis.

Cap. I. *Narses* quum Ostrogthorum & imperium & nomen, non ex Italia modò, verum etiam ex terrarum orbe sustulisset, Francoque in subsidium ab illis serò vocatos memorabili insuper strage edita profligasset, fatisque subinde cesserat Imperator *Iustinianus*, contempto *Iustino*, qui *Iustiniano* successerat, omnia in provincia veluti in regno suo administrabat. Quæ res *Iustino*, miti alioquin ingenio homini, animum, *Sophia* verò ejus vxori etiam stomachum mouebat. Itaque *Longinus* successor ex templo missus est, & sub novo Exarchi titulo Italiæ præesse & Ravennæ sedem habere iussus. Quo quum appulisset, confestim *Narses* Neapolim, urbem multis sibi beneficiis obstrictam, concessit. Ibi reliquas duodecim tredecimque

cimue vitæ, vt autor est *Blondus*, annos voluntarius exul egit; & indè nuntios litterasque ad *Aboinum*, Longobardorum Regem, mittit; totam se ei Italiam, modò cum exercitu venire non grauaretur, in manus traditurum spondens. Quòque munitiorem ei in Italiam ex Pannonia, quam Longobardi priùs occupauerant, per vallem Telin in viam strueret, *Dagistann*, summum virum, qui omni oræ Transpadanæ, Venetæque regioni Aquileiam vsque, præerat, cum exercitu abduxit, Ea enim erat autoritate *Narset*, vt in priuata quamuis fortuna constitutus, plus tamen vel verbo, vel nutu, quàm *Longinus* nouus Exarchus pro Imperio posset. Magno omnia & inexcusabili flagitio. Quid enim si Imperatrix (justène an injustè non morror) cum se ad pensâ ancillis distribuenda (quod vulgò fertur) reuocaturam esse per ludibrium denuntiabat? satîn illa iusta causa videri debuit, cur ille Italiani, Imperiû nuper, tum certè religionis Christianæ sedem, hosti barbaro, immani, idololatræ, nec affectanti, nec petenti, ac ne cogitanti quidem, sed vltro accersito & inuitato proderet? Atqui non sic *Lysander* olim, Lacedæmoniorum Dux; qui quum opibus & gloria floreret, talisque per omnia in Græ-

cia tum esset, qualis jam *Narses* in Italia erat, iussus tamen est ab *Agelao* Rege, quod inter vilissima exercitus ministeria habebatur, carnes militi dividere. Quumque rei indignitate motus liberè Regem, *sicine amicos bearet*, interrogasset, responsum tulit, *si quidem Rege ipso maiores esse volunt*. Quo verbo sensit *Lyfander* cuius moris sibi obliuiscendum esset; clientelas, seruatorumque turbas à se amouit; non ipse omnia ut prius, exequi, sed Regis iussa expectare cœpit; errorem correxit, in fide inquit; non Regem, non Regnum, non rem Spartanam, vel Atheniensibus æmulis, vel Persis hostibus, per stomachum prodenda esse censuit. Sed erat *Narses* ingenio, ut magno & capaci, ita inuido & maligno præditus. Testis Mediolanum vrbs; quæ quum à Gothis ad *Belisarium* defecisset, & propterea à *Totila* grauissima obsidione premeretur, subsidia quidem *Belisarium* petentibus cum fide milit, sed, ne missa peruenirent, effecit *Narses*. Itaque capta breui & excisa est à crudelissimo hoste nobilissima Italiæ post Romam ciuitas, & trecenta hominum millia à victore irato, nec tam de victoria quam de vindicta sollicito, neci tradita. Maluit nimirum *Narses* florentissimam urbem funditus perire.

ire, quam servatæ gloriam æmulo relinquere. Nam ad Italiani quod attinet, jam tum illam Gothis prodidit, quum pro ea, qua apud Imperatorem valebat, gratia, *Belisario* fortissimo viro & præstantissimo Duci, & militem & belli sumptum tam malignè semper præberi procurabat, ut præter damnum opprobrium etiam *Justiniano* esset, tantum bellum à tanto Imperatore tanta penuria administrari.

Longobardorum sub *Alboino* Rege in Ca. p. 2.
 Italiam per Venetam regionem (ea enim *Nova Venetæ urbis incrementa.*
 plerumque barbaris patuit via) descendit. Tunc *Paulus* Episcopus Aquilei-
 ensis, recentibus vrbs restauratæ mœnibus diffusus, sedem & sacra in insulam *Gradam* transtulit. Tunc & *Riuoaltus*
 frequentius quàm priùs coli, & novæ semper insulæ substructionibus firmari, & habitari cœptæ. Mox *Patauia* iterum
 ab *Agilulpho* excisa omnes ferè incolæ suas in insulas transfudit; quæ migratio
 templorum tum frequentius tum augustius in illis ædificandorum causam dedit,
 & plures Episcoporum sedes in illis locatæ memorantur; *Capruiana*, *Heracliana*, *Torcellana*, & *Metamaucensis*; è
 quibus hæc cum insula ipsa paulò post structurarum mole pressa subsidisse dicitur

tur. Sub extremis igitur *Justini* Imperatoris temporibus in Italiam descendunt Longobardi : *Justino* verò successit *Tiberius*, & *Tiberio Mauritius*, inter quem & *Gregorium* primum, Pontificem Romanum graue intercessit de sedis Constantinopolitanæ prærogatiua dissidium; quibus de rebus, quum ad rem maritimanam non spectent, nil attinet hoc loco dicere. Sed quum *Mauritius* Longobardorum, quàm Pontificum potentiam in Itàlia crescere mallet, contrà *Gregorius Mauritium* vt Imperii desertorem infamem ad populùm vbique faceret, & *Mauritius* ipse duodecim captiuorum Romanorum millia, vnico per capita nummulo, praua stueritatis & disciplinæ militaris iactantia, redimere recusasset, addè in omnium ordinum odium venit, vt *Phocas*, vix tum ordinum Ductor, eo depulso ad Imperium capeffendum vocaretur. Verùm & hic ipse *Phocas*, quum Imperium annos octo & quatuor menses infelicitè tenuisset, magnasque clades à Persis accepisset, cædibusque interim & stupris grassatus fuerat, omnium in se odium concitauit. Pugna igitur nauali, in ipso portu Constantinopolitano, vt refert *Cedrenus*, ab *Heracliano* victus, in Regiam confugit; vndè poscente populo extractus, *Heraclio*, *Heracliani* filio, victus

ctus traditur. Is in anteaetæ vitæ vindictam, manibus, pedibus, pudendis, capite denique truncatū projici jussit. Populus ne quid ejus in terris integri superesset, flammis tradidit, & *Heraclium* *Heracliani* filium Imperatorem salutavit. Sub cujus Imperii initio Rex Persarum *Cosdroas*, aliàs *Cosroës*, per Armeniam, Mesopotamiam, Syriam, Arabiam, Phœniciam & *Cosdroæ expeditio.* Judæam, omnia armis subigendo, in Ægyptum descendit; qua etiam sub jugum missa, ad mare usque occiduum & Atlanticum, capta in itinere Carthagine, peruasit: indeque via qua venerat in Persidem reuersus, omnem rursus Asiam minorem ad Ægæum usque mare subegit; in Græciam inde Italiamque & Galliam, exterminamque Hispaniam, si daretur copia, peruasurus; nec ullus vnus vnquam Rex tantum terrarū vincendo obuiisse in vlla historia memoratur. *Heraclius* quū se imparem viribus sentiret, pacem à *Cosdroa* per Legatos petiit. *Cosdroas*, propositi tenax, omnem pacis mentionem respuit, nisi Imperator Christo renuntiaret. Arma igitur *Heraclius* inuitus induit, tribusque grauissimis præliis ita *Cosdroæ* Persarumq; res accidit, vt in intima Persidis suæ latibula ultra Tigrim cogerentur refugere; *Heraclius* Persidem cum exercitu ingreditur: ibi *Razatenum* copiarum Persicarum Ducem, pugna à Solis ortu ad occasum continuata, egregiè vicit & occidit. Ipse verò *Cosdroas*, vt olim *Sennacherib*, à filio suo natu majore, nomine *Syrochio*, quod *Medarsen* fratrem, se præterito, in regni consortium accepisset, captus primò, deindè cum

Medarse in vincula coniectus, & denique occisus est. *Syrochius* quicquid terrarum ad Romanum Imperium antea spectabat, *Heraclio* restituit, præter Arabiam.

Cap. 3.

Mahumetis
ortus.

Saraceni.

In Arabia, sub vicissimū *Heraclii* Imperatoris annum, monstrum humani generis, & verè Antichristus ille *Mahumet*, qui novam religionis telam orbi terrarum texuit, se' efferre cepit; Quam religionis suæ formam quum semel Arabibus insinuasset, incredibile dictu est, quam infando rerum terra marique gestarum successu, quamque brevī tempore eam ab extrema Perfide & Indo vsque flumine ad *Herculis* columnas, per Ægyptum, Lybiam & Africam, proferbat. Vulgò creditum inuenio, *Mahumetem* istum tum primū Arabas & Agarenos suos *Saracenos* appellasse; quo in errore (si fas dicere) *Pium* ipsum secundum Pontificem Romanum in sua *de rebus vsique gestis Historia* versatū fuisse video. Nam, ut alios omittā, *Ammianū Marcellinū* in libro decimo quarto historiæ, ubi de Gallo & *Constantio* agitur, de *Saracenis* mentionem facere inuenio; super quorū origine & moribus, se prius locis multis, præsertim verò in vita *Marcis Antonini* Philosophi (qui quadringentos antè *Heraclium* annos imperavit) retulisse narrat; vsq; adeò à vero absunt qui gentis hujus nomen antè *Mahumetem* inauditū fuisse putant. *Saracenorū* verò titulo gloriari, gentisq; originē ad *Sarā Abrabæ* vxorē potius quā ad *Agar* ancillā referre, primus eos *Mahometes* docuit; eoque titulo & prærogativa, gentem hanc solā in terris liberā, solā mysteriorū diuinorum

norum capacē, quæq; non religione magis quā
 imperio cresceret, dignam esse apud vulgus ja-
 ctitabat. Et hoc quidem incendium *Heraclius*,
 dum ultra opiniones & vota non est processum,
 satis foeliciter repressit. Arabas enim, præsertim
 nobiliores, ut quæq; hac peste maximè laborare
 sensit, militiæ suæ statim ascripsit, eosque à suis
 finibus ad alios, & quidem longinquiores sub
 honestioris militiæ specie amandauit. Post ali-
 quot verò annos, ut refert, *Paulus Diaconus*,
 (quo certiores in istis autorem non habemus)
 accidit, ut exercitibus *Rogæ quædam* (authoris *Rogæ,*
 verbo vtor) hoc est, vel largitiones extra ordi- *quid?*
 nem, vel stipendia consueta, quæ castrensi vo-
 cabulo *Erogationes* prius dicebantur, militibus
 viritim diuidenda essent; Quæstor autem, quū
 inter alios Saraceni ad suas rogæ recipien-
 das venissent, *Scilicet*, inquit, *Dominus meus*
vix quod militi Græco & Romano largiatur ha-
bet, & isti canes se accepturos esse sperant? Hac igi-
 tur occasione crimibus arrepta *Mahumetes* Ara-
 bum animos ad defectionem sollicitare cœpit,
 seruitutem illis & paupertatem, & tributorum
 exactionem, & stipendiorum subtractionem,
 sed antè omnia contumeliam à Quæstoribus
 illatam multis verbis exprobrando. *Vos*, inquit,
filiis Abrabæ, seruituti mancipari? vos semen
promissionis canes appellari? vos prærogativa cæ-
lesti gentibus prælato, Græculis istis usq; adeò post-
haberi, ut cum illis comparati, non sagulo, non sti-
pendio, non appellatione militari, sed contumeliis, op-
probriis & contumeliis aigui existimemini? mul-
 tis deindè de *Gabriele Angelo*, de reuelatione
 N 2 diuina;

diuina, de Lege cœlitus tradita, de suo cum Angelis consortio, fanatici more cum differuisset, forte accidit, ut vectigaliū & tributorū collectores, in conspectum venirent; quo animaduerso, *En*, inquit, *fortunarū nostrarū birudines*; nec plura moratus primo occurrentē ipse ferro strenuē obruncat. Qui aderant, reliquos eodem exemplo maſtant. Nec difficile jam erat, tali sanguine imbutos ex desperatione veniæ ad quodlibet facinus impellere. Itaque facta manu, latronum primū more, in Arabas, Syros & Mesopotamiæ incolas excurrit, & ita ubique religionem armis, cœdibus cultum diuinum miscuit, facile ut omnibus, quos affandi modò potestatem nancisci potuit, gladios è manibus extorqueret. Jamque non pro latrone, sed pro iusto hoste haberi cœpit. Mox *Theodorum Heracii* fratrem cum exercitu missum, ingenti acie victum interficit: inde *Damascum* profectus, urbem capit, & magno omnium consensu Calipha, hoc est, Rex salutatur. Tum Hierosolymam proficiscitur, ibi *Abrabamum*, *Moysem*, & *Ieremiam* prophetam sibi in via occurrissē finxit, urbemque superstitionibus addictam infomniis & vaticiniis omnem impleuit. Inde reuersus Persidem omnem Parthiamque vastauit, Parthorumque nomen penitus deleuit. Persas etiam non vltra suo, sed Saracenorum nomine, ipsumque Regnum non Persicum sed Saracenicum dici & censi voluit; idque aliquandiu tenuit. Ista verò omnia sex annorum spatio confecit: quatuor enim reliquos vitæ annos regno simul & religioni firmandis dedit. Mortuus de-

Regnum
Saraceni-
cum.

mum

mum Mecchæ conditur. Sunt qui ferreo loculo inclusum ad diuinitatis fidem, vi magnetis in templi fastigio positæ attractum pendere referunt. Id verò *Gilbertus* nostras, medica non *Mahometis sepulchrū.* ita pridem arte clarus, in doctissimo suo *de Magnete* libro, refellit, vsus eorum testimonio qui se Mecchæ sepulchrum ejus aliorum more humi positum præsentis vidisse retulerunt. Quicquid autem de hiis sit, istud certè generis humani portentum ad sepulchrum suum Mecchæ positum pro diuo colitur, & toto Oriente susceptis pregrinationibus & supplicationibus (proh dolor) adoratur. *Osmanus* autem Califatū iniit anno 137 Al-Hegiræ suæ, qui in annum salutis septingentesimum quinquagesimum quartum incidit. Nec me fallit, quosdam *Califatus, quid?* primæ notæ scriptores, Califatū, non regnum, sed Vicariatū interpretari. Quā in re multum, mea quidem sententia, errant. Vicarii enim hii, hoc est, prouinciarum Præsides, non *Amiral-lus unde dictus.* Califæ, sed Ammires, siue Armirathes, siue Ammiræi, ex quo nostrarum classium Præfetti Ammiralli nomen inuenerunt, appellabantur. Erant tamen postea Califæ plures, sed qui principatum omnium tenebat, temporum *Mirama-molinus.* successu, non Caliphæ, sed Miramamolinus vocabatur. Ad inferos autem abiit *Mahometus,* anno Salutis nostræ sexcentesimo tricesimo secundo, anno verò Al-Hegiræ suæ, siue à Califatu Damasci accepto, siue à fuga sua ex Mecchæ vrbe computes (parum enim interest) decimo plenè exacto: ei verò superuixit tredecim annos *Heraclius;* Vir multis & egregiis

facinoribus insignis, præterquam quod in Monothelitarum hæresim incogitantè, ut ait *Paulus Diaconus*, inciderat. Duas enim in Christo voluntates (quum neutra alteri vnquam repugnaret) indiscriminatim vnam esse censuit. Sed Romani Scriptores nullum vnquam post *Mauritii* & *Gregorii* dissidium, de Imperatoribus malè vel dicendi, vel scribendi modum tenuerunt. Itaque *Heraclium* hunc, tot quamuis victoriis aduersus Persas & Saracenos nobilitatū, fungū, tamen, & hebetē, & hominē bello inutilē, nec Imperio idoneū, hæreticū insuper & ariolū appellant. Quibus licibus sub hoc tempus semel irretitus, nullum deinceps temporis momentū ad res Imperii, seu bello, seu pace gerendas liberū habuisse dicitur. Qua occasione vsi *Abubecrus* primò, qui *Mabumetis* in Califatu successerat, & post illū *Omsr*, siue *Hannar*, Ægyptū primò versus Austrū, deinde ad occasū versū, omnem Africam ad Oceanum Atlanticum Romano Imperio eripuerunt. Nondum tamen Saraceni in mare descenderant: ea enim gloria *Osmanno*, qui *Hannaro* successit, reservata fuit. Hunc recentiorum aliqui *Almansorem* appellant. Ego verò apud antiquos nullū Califarū, antè *Abugiasar*, filium *Mahumedis*, *Abbasidarum* Regem, *Almansorem* appellatum inuenio. *Osmannum* inito statim Califatu *Mubaniam*, quem Latini Scriptores ferè omnes *Mabuiam* efferunt, ad Cyprum insulam, medio Asiam inter & Ægyptum spatio positam, expugnandam misit. Erat *Mabuiam* insignis bello Dux, multaque & egregia terrestribus aduersus Imperium

Cap. 4.
Mabuiam

rium præliis facinora in Asia ediderat; Quam
viri industriam, & in rebus bellicis virtutem
cum incredibili fortuna conjunctâ *Osmannus*
perspiciens, dum alii Africam debella rent, cum
ad Cyprum, ut diximus, inuadendam misit. *Cyprus à
Saracenis
capta.* Is
igitur cum validissima septingentarum navium
classe profectus, insulam intrauit, Constantiam
urbem in ea & ditissimâ & munitissimam vi ce-
pit, captamque diruit; insulamque ipsam tri-
butariam *Osmanno* fecit. Incidit autem hæc
Cypri à Saracenis clades in annum Domi-
ni nostri sexcentimum quadragesimum septi-
mum, quarto *Osmanni* Califatus anno. Jamq;
Osmannus Asiæ & Africæ Imperio non con-
tentus de Europa inuadenda cogitare cœpit.
Aucta tamen classe, eundem *Mabuïam* Rho-
dum insulam prius expugnare jussit. Is Rhodū
venit. Nulla tum Imperatoris toto illo tractu
classis erat: turbatæ quippè erant Imperii res;
Constantinum Heraclii filium veneno sustulerat
nouerca *Martina*, ut *Heraclionem* fratrem imperi-
ali solio admoueret: sed eum populus, in cædis
Constantini vindictam mox morti dedit: post
quē *Constans Constantini* filius Imperiū adeptus,
& *Pauli* Episcopi Constantinopolitani impulsu *Constans
Imperator.*
Monothelitismum amplexus, mille malorū causa
fuit. Interim *Mabuia* Rhodū nullis viribus de-
fensam capit. Fœlix illa omni tempore insula,
sed nulla vnquam ætate rerum affluentia major.
Author est *Sabellicus* ex *Mutiano*, quem ter *Rhodus à
Saracenis
capta.*
consulem fuisse refert, septuaginta tria signo-
rum millia olim Rhodi fuisse censa, præter cen-
tum Colossos, hoc est, ingentis molis Deorum

Colossus.

hominumvè statuas, quas *Plinius* ibidem suo tempore numeratas refert. Sed inter omnes, eminebat illa à *Demetrio* Rege, quo tempore urbem illam obsidebat, *Charetis* Lindi artificio erecta. Hanc alii Solis, *Strabo* *Jouis* fuisse dicit. Cujus cujus autem fuerit, inter mundi miracula à *Strabone* recensetur. Hæc statua, multis antè sæculis terræ motu quassata fractis cruribus corruerat. Eam verò restituere, veteres Rhodii, religione incussa, neglexerant. Sed eam nunc *Mabuzia*, septuaginta cubitorum longitudine quum esset, in frusta comminutam asportavit. Nonaginta autem camelorum onus fuisse dicitur. Decem certè cubitis *Nabuchodonosoris* illo, qui *Belo*, hoc est, *Joui* Assyrio dicatus fuerat, altioreni fuisse constat. Erat enim hic sexaginta tantum, ut est apud *Danilem* Prophetam, ille verò septuaginta cubitorum fuisse traditur. Sed hoc ipso quinque pedes altior fuit Colossus, postea à Romanis, *Vespasiano* septimum, *Tito* quartum consulibus, via sacra collocatus, ut refert *Dion*.

Cap. 5.

Pugna prima navalis inter Christianos & Saracenos ad Neapolim.

Expilata Rhodo Saraceni Cycladas aliasque maris *Ægæi* insulas vastare pergunt. Vndè digressi Siciliam appellant. Totam primùm oram maritimam populantur. Mox interiora peruadunt. Nec dubium erat quin, crescentibus successu rebus, ipsam Italiam breui inuasuri essent. Qua re intellecta *Olympius* *Rauennæ* Exarchus cum classe, quam ex vetere *Augusti* instituto, *Rauennæ* tenuit non procùl *Neapoli* occurrit. Quoniam verò primum hic cum novo hoste in mare contrahendum certamen erat, ideo

ideò Olympius cautiùs omnia administrabat; naues quam potuit firmissimas, & cum cætero instrumento & apparatu, tum præcipuè milite instructas, duxit. Milites verò cum quo genere hostium res futura esset, per singulas naues discursando, monet. Nouam & impiam, & Christo aduersam nuper sectam in Arabia pululasse monstrat. Eam maritimis præliis hætenus parùm assuetam esse ostendit. *Mahumeti* illos gladiatorio Prophetæ fidere, se in Christo Dei filio fiduciam potere. Nec *Mahua* ad suos silentium tenuit. Prophetam *Mahumetem*, & Dei amicum, pugnantibus in prælio ad futurum spondet. Sc *Abrahe* semen, se *Sara* oriundos, ad se terrarū orbem diuinis vaticiniis spectare jactat. Proindè pugnam, auidè ineant; nec se indè nisi victores reuersuros voueant. Hiis præceptis imbuti in pugnam vtrinque ruunt, & atrox utrobique cædes editur. Nec jam artibus sed viribus certatur. *Mahua* *Mahometem* inuocat; Christiani illum procùl indè ad Meccham jacere per ludibrium vociferantur. Ad extremum pulsi Saraceni fugiunt, & Siciliæ littus repetunt. *Olympius* fugientes insequitur: & in terram simul cum fugientibus se eiecit. Nec priùs destitit, quam Saracenos ad vnum omnes, qui pugne supererant, insula expulisset. Ingens erat in hac pugna Saracenorum strages. Nec incruenta Christianis victoria mansit. Ipse *Olympius* non vulnere, sed contracta ex diutino labore & fatigatoine febre, lætus & veluti ludibundus paucis post diebus expirauit: nam ad cæteros, qui in nauali illa acie ceciderunt

Cap. 6.

Aradus insula & ciuitas.

cecidere attinet, nemo erat, qui eorum sortem superstitibus & victoribus non anteferebat.

Mabnia viuis ex hoc incendio elapsus & in Ægyptū vnde soluerat reuersus, ingenti mala Christiano nomini machinatur, & Aradum, antiqui nominis insulam, non procū à Tyro positam, inuadit. Jacet autem Aradus, ut Tyrus, in ipso mari, longiùs tamen à continente quam ipsa Tyrus distita: nec aliud quam petra erat, septem stadiorum spatium suo ambitu complexa. Par spatio murus erat. Habitatoribus vrbs plena adeò, vt domus pluribus tabulatis in altū surgerent; singulaque fere tabulata, vt in frequentissimis vrbibus fieri solet, singulas familias habuerunt. Aquæ vena nulla in ipsa vrbe reperitur: itaque vel pluuias cælo cadentes cisternis accipiunt, vel ex continente, ad vberiorē copiam, aquationem faciunt. Si tamen bellum aliquando ingruat, diuina quadam sorte, quæ nullum locum suis ad victum donis carere patitur, adiuuantur. Juxta enim urbem in ipso maris profundo, fons perennis & dulcis aquæ scatet; in quem veluti in puteum situlam, plumbo grauē, ventre laxā, ore angustam, operculo munitā, funiculo demittunt: vbi ad fundū peruenit, operculū attracto funiculo aperiunt: vbi plenum senserint, rursus remisso fune os vasis claudunt, & ad se trahunt. Erat porrò hæc vrbs, post *Alexandri* tempora commune omnium Regum gentiumque asyllum: nec noxæ illis dabatur, si quem vel ære alieno pressum, vel quocumq; scelere contactum, recepissent, & postulatum dedere recusassent; ideis eo faciliùs ab

ab omni hominū genere delatū est, quòd cum classē validissimā haberent, Cilicas tamen Ifauros in vicinia positos, & latrociniis maritimis omni tempore infames, odio semper habuerunt, nec vnquam in piraticæ societatem cum illis vt venirent, induci potuerunt. *Mabua* totā urbem classē circundedit, omniq; arte militari ad muros subruendos vtitur. Sed quū tota ciuitas muro & mari cingeretur, senesq; paritèr & mulieres ad mœnia tutanda accurrerent, adueniente jam hyeme, obsidionem soluit. Neue frustra tempus brumale tereret, classē longē quam prius ampliorem, & operibus machinisque instructiorem comparat. Rebus ad votum comparatis, proxima æstate Aradum reperit: urbem vallo nauali vndiquaque claudit. Aradii, cum quo hoste res esset memores, nec vllam præterquam in victoria salutis spem habentes, eadem qua prius virtute mœnia tuebantur. Sed cum *Mabua*, catapultis, aliisque missilibus & tormentis, ex turribus, quæ nauibus impositæ erant, excussis, muros defensoribus nudasset, subierunt statim arietes, & mœnia, nemine iam impediēte, quatiebant. Mox etiam scalas muris admotas cerneret. Itaque vel per patentes ruinas muros iruebant, vel quā facultas dabatur, ex ipsis muris, quos scalis ceperant, se in urbem demiserunt. Crudelis erat hæc intra urbis mœnia decertatio, consipatusque viro vir, vt in angustiis deprehensi, diuicabant, vmbonibusq; alteros alteri protrudebant; donec ad extremū cæsi Aradii omnes interierunt. *Mabua*, victoriam tanto labore & sanguine partam

*Aradi ex
pugnatio.*

partam exosus, quum jam hostem in quem vitæ sœuaret, superstitem non haberet, in moenia, & ædificia vrbis iram crudelitè effudit. Locum verò ipsum, quod de Tyro olim vaticinio prophético cantatum fuerat, in *petram limpidam* reduxit; adeò quidem ut per aliquot indè sæcula cultorem aut incolam non inueniret.

Cap. 7.

Capta Arado, *Osmannus* rem naualem impensius quam antè curare cœpit: quumque alii ferè principes, Archidapiferos, Archipincernas, Stabuli etiam & Fabrorum Comites habere soleant, hic *Fabrorum naualium Comitens*, siue Præfectum, quendam nomine *Ablutberem* constituit; cui id vnum muneris incubuit, ut classes quâ maximas semper & ex optimo genere constructas in naualibus haberet. Anno igitur decimo tertio *Constantii* Imperatoris, *Osmannus* classè ad Tripolim in Syria non procùl Arado conuenire iussit. Falsusq; errorem, quod Siciliam longè positam prius aggressus fuerat, ipsam jam nunc urbem Constantinopolim eodem *Mabnia* Duce inuadere parabat. Erant eo tempore, in vrbe Tripolitana, duo fratres, buccinatoris cuiusdam filii. Hi quum quid pararetur persensissent, pridie quam proficiscendum erat, audaci incepto ad carcerem Tripolitanum, cum æqualium suorum globo, accedunt, carcerem effringunt, Romanorum vim magnam, qui eo inclusi tenebantur, solvunt: factoque in ipsum Ammiram, hoc est, classis Præfectum, à *Mabnia* huic expeditioni destinatum impetu, eum obtruncant. Quo facinore patrato, ad portum pergunt: nauibus,

navibus, vt stipatæ stabant, ignes diuersis partibus injiciunt, nec ex tanta classe vnâ nauiculam Sol posterus ex illo incendio remanentem vidit. Iuuenes, æterna ob tam fidelem Christianis nauatam operam memoria celebrandi, scapham nacti, & priusquam dilucesceret, arrepta fuga, Constantinopolim abierunt.

Constans, quum quanto in periculo versaretur animo perpendisset, magnam & ipse classem contrahit; Enimuerò hostem non sub Constantinopolis mœnibus expectandum, sed vtrò in Syriæ littoribus quærere instituit. Interim *Mabius* de Constantinopoli inuadenda dies noctesque cogitat. Et *Ablulathern* nouam classem Saracenica potentia, quæ ingens jam in mare esse cœperat, dignam extruxerat: cum qua *Mabius* ipse, (cognito per exploratores quod Imperator Romanus non procùl indè ad Phœnicem Lyciæ ciuitatem cum classe staret) profectus, ante portum aciem explicuit. *Constans*, quamuis insomniis, vt aiunt, turbatus & territus, moram tamen pugnæ facere, nec ex Majestate, nec ex usu suo fore existimabat: Omnia enim circà loca hostilia erant: nec dubitabat quin si se in statione teneret, hostis eum ad anchoras stantem (quo nihil iniquius) vtrò inuasurus esset. Itaque naues educit, & signum pugnæ fiduciæ testem prior dedit. Antè tamen quam pugnam iniret purpuram Imperatoriam vni ex buccinatoris, quem dixi, filiis gestandam tradidit; ipse sago militari indutus, non vno in loco pugnam ciet. Sed discurrendo, seque suis quacunque venerat confessus, omnes vir-

Cap. 8.

Pugna navalis ingens sed Christianis luctuosa.

tutis

tutis stimulos pugnantis admouit. Famam, fidem, salutem, fortunam, suam, liberorū, Imperii, omnium, in illorum manibus & virtute, illo die posita esse vociferatur. Hos eosdem esse Saracenos, quos *Olympium* nuper ad Neapolim è mari in Siciliam, è Sicilia in mare tam vasta cæde expulisset. Et Exarchus, inquit, Rauennæ canes istos latrantes compescere, & in morsum ruentes trucidare potuit, ego Imperator vester eorum impetum sustinere & retundere non valebo? Interim verò *Buccinatoris filius*, vt non paludamento magis quam virtute, & re strenuè gesta, hostem falleret, summa nauis prætorix puppe stans, & vtrique aciei fulgente purpura & armis conspicuus, ingentia belli edidit facinora, omniumque in se, sed præsertim *Mahuiæ*, oculos conuertit. Verum insuperabilis erat illo die Saracenorum vis; nam & viribus, & nauium quū genere, tum apparatu, & præsertim militum multitu line præstabant. Et quacunq; se inferebant, ordines hostium turbabant, nauesque alias incursum fregerunt, alias terrore & impetu auerterunt, saltuque se in hostium naues vndiq; dederunt. Jamq; passim Christianorum labare cunei; sed *Constans* vbiq; nudata facie, vt à suis agnosceretur, fluctuantibus & jam terga vertentibus occurrit, aciemq; restituit. *Mahuiæ*, quum classē hostilem omni parte inferiorem, sola Imperatoris virtute & exemplo stare, & pudore magis quam virtute à fuga se temperare persensisset, firmissimarum, quas habuit, nauium cuneum in Prætoriam direxit, omnesq; simul, vt Imperatorem seu com-

minus,

niinus, seu eminus, peterent admonuit. Tan-
 dem disiectis, quæ Prætoriam circumstabant,
 hostium nauibus, ad ipsam peruasit. Buccina-
 toris filius, quum jam irrumpentes cerneret, è
 puppe in foros defilit; comminusque cum ir-
 ruentibus congressus, stragem dedit. Nec diffi-
 cile fuerat pugnātem interficere, sed *Mabuiā*
 Imperatorem Romanum viuum capere, quam
 occidere, malebat. Interim *Constantis*, quum
 nulla ampliùs aciem restituendi, capta præto-
 ria, disiectis & distractis reliquis, facultas aut
 spes relinqueretur, vili sed velocissimo nauig-
 io, quod ad subitos casus in parato habebat,
 exceptus, aufugit. Quò pugna diuturnior, &
 virtus pertinacior erat, eò & cædes in resisten-
 tes major edebatur. Ferunt eò die totum inter
 Lyciā, & Cyprū mare, sanguine Christiano infe-
 ctū apparuisse. *Buccinatoris filium*, quo longius
 fugiendi spatium Imperatori suo daret, hostium
 errore diutius abutebatur; donec tandem agni-
 tus, à *Mabuiā*, in ludibrii vindictā, cū reliquis,
 qui viui in potestātē venerant, occiditur. Sunt
 qui rē eandē aliter referunt. *Constantem*, non à
 pugnæ initio, sed in extremo demum periculo
 constitutū, vestē Imperatoriā gregaria mutasse;
 buccinatoris verò filiū eū inuiū & restantem, in
 aliud nauigiū transfuisse, & ejus clamyde in-
 dutum ultro mortem pro Domino, qui interim
 aufugit, oppetisse. Sunt etiam qui non *Ma-
 buiam*, sed *Abluttherem* Fabrorum naualium
 præfectum, hanc victoriam adeptum memo-
 rant; alii *Mabuiam* hanc victoriam adeptum
 non negant, verum non *Osmanni*, sed suis au-
 spiciis

spiciis rem gessisse tradunt; Ego magis existimo ipsum *Mabuiam*, idque non suis sed *Osmani* auspiciis huic prælio interfuisse; ea ductus ratione, quod, quum paulò post *Hoamem* Saracenorum Ammiras, à suis interfectus esset, *Mabuias* per Syriam & Ægyptum Ammiras in ejus locum suffectus sit, casoque demùm *Osmano* in Califatus disceptationem cum *Aly* venit: quorum neutrum fieri potuisset, si *Mabuias*, decimo tertio *Constantis* anno, quo *Osmanum* in viuis fuisse constat, *Califas* fuisset. *Constans* Constantinopolim reuersus, nihil vltrà aduersus Saracenos mouit. Et forte accidit, vt graue bellum de Præfectura Ægypti inter *Mabuiam* & *Mahumetem Abubecri* filium ortum, omnia in Oriente pacata Christianis redderet.

Cap. 9.

Imperator tempus hoc idoneum ad res in Occidente contra Longobardos gerendas esse ratus, classé Athenis conuenire iussit. Ipse eodem pedestri itinere quum venisset, oram soluit, & sine omni maris ventorumuè injuria in Italiam peruenit; vbi nulla ei facultas res contra Longobardos gerendi relinquebatur. Sed mora ei à *Martino* Papa & *Maximo* Presbytero de Monothelitismo lite, omiſſis Longobardis, aduersus hos se tueri coactus est: multaquæ, frendens quòd à rebus contra communes Imperii & Ecclesiæ hostes gerendis diuerteretur, egit, quæ ex suopte ingenio facta esse nollet. Indè vt sanguinis, & expilatarum Ecclesiarum reus à Romanis scriptoribus exagitur: Igitur *Constantinus*, quum consiliorum suorum exitum,

tum in Italia non inuenirent, in Siciliam concessit, breui inde in Græciam transmissurus. Sed à suis, quos sibi fidissimos existimabat, in balneo, situlâ in caput ejus ab *Andreas* quodam, quo ministro utebatur, impactâ periit, quum septem & viginti annos imperâisset.

Constantinus filius audita patris nece, va- Cap. 10.
lidam confestim classem comparat, & in Siciliam profectus, pœnas de parricidis, ut pium filium facere par erat, sumpsit. Hic est ille *Constantinus*, qui *Pogonatus* dicitur; ea scilicet de causa, quod quum vix prima lanugine Constantinopoli profectus esset, tandem toto sexennio in Sicilia exacto, barba non plena solum, verum etiam promissa reuertisset: & verò opportunè admodum Constantinopolim reuerit: compositis enim jam inter se Saraceni rebus, nihil humile aut mediocre, sed de ipsa Imperii sede, & vrbe Constantinopoli inuadenda rursus cogitare cœperant; antè tamen quàm obsidionem hanc adornarent, classibus in occidentalem Africanam missis, incredibilem ibi hominum pecudumque & ædificiorum strage edita, infinita millia captiuorum abduxerunt. Alia etiam in Siciliam classe missa eam sæde diripuerunt. Nec ipse *Constantinus* curis interim Constantinopoli vacauit: stultus enim populus, prauo ingenio, sed impio consilio & abominando, quum duos fratres bonos, viles & sui amantissimos Imperator haberet, utrosque cum eo pari Imperio esse oportere vbique vociferabantur, eo scilicet vsi elogio, *Si in Trinitatem credimus, tres simul Imperatores coronemus.* Quid absurdius?

sed eò tamen perducta res est, ut Imperator rem gratam se habere simulans, diem ad eam peragenda præstituerit; quumq; conuenissent, autores consilij, immisso nuite, nec opinantes protriuit: fratres verò suos in custodiam missos, primum naribus (ea tum supplicij placebat ratio) deinde eorum alterum contumaciùs agentem vita insuper, quandoquidem imperii rebus, quæ tum grauissimè instabant, gerendis obsterent) priuauit.

Cap. II.

Dum hæc geruntur, moritur *Osmannus*, & ingens inter *Alim* & *Mahuiam* de Califatu discordia oritur; ea verò tandem, intercedentibus amicis, hiis conditionibus finitur, ut positis armis, *Alie* Iracam, hoc est, Arabiam & Ægyptum, *Mahuias* Syriam obtineret; neque alter alterius ditionem cum exercitu aut prædatione ingrederetur. *Mahuias*, qui non alia re magis, quam strage Christianorum crescere cupiebat, cognito quid Constantinopoli per illos dies ageretur, & in tam discordi ciuitate omnia armis suis prona & oportuna fore ratus, *Mahumatem* & *Caifum* Duces, in Ciliciam & Lyciam cum classe apparatusissima præmisit, & copias in supplementum eo loco expectare iussit. Nec ita multò post, *Sæum* cum alia classe æquè valida, & potestate pari misit, ut simul iuncti urbem Constantinopolitanam terra marique obsiderent. *Constantinus* rebus, ut potuit, magis quàm ut voluit, domi constitutis, magnam & ipse classem apparat; triremes plerasque, miræ tum & insolitæ magnitudinis, quæque veterum Rhodiorum more ignem rostris præferabant

bant, & Dromonas adjecit: quæ quamvis & ipsæ trireniū numero interdum accenseantur, minoris tamen molis & ad cursum habiliores erant. Anno igitur quinto Imperii *Constantini* ingens illa classis Saracenica ad urbem venit. Saraceni omnia ab *Hebdoma*, quod ex suburbiis vnum ad Occidentem spectabat, vsque ad Cyclobium, quod ad Orientem protendebatur, occupabant. *Constantinus* ex omnibus simul naualibus, (quatuor autem Constantinopoli tunc erant) educit; commissoque acriter toto die prælio, æquo Marte sub vesperam discessum est. Mirum est, quod de hac oppugnatione traditur, maritima enim omnis ferè erat: quæ cum à primo Vere ad Autumnum perdurasset, rarò vlla dies sine vniuersarum copiarum congressu abiit. Sub hiberni fideris ortu, Saraceni Cyzicum, urbem in Asiæ littore paulò inferiùs juxtà Hellespontum positam, se in hiberna receperunt; vnde primo vere soluentes instructa ad pugnam classe rursus Constantinopolim accedunt. Venientibus fit obuiam cum sua classe Imperator. Fit pugna: neutro inclinata victoria, nox prælio finem fecit. Vtque rem longambreui oratione complectar, totas septem ætates continuis præliis inter se naualibus, quod nunquam antè fando auditum, absumunt. Quo toto tempore, nunquam Imperator obsessæ urbis mœnibus, præterquam ad manum cum hoste conferendam, præsens semper interfuit. Fortunamque nunc prosperam nunc aduersam, animo semper æquabili, & prout res ferebat, vel moderato, vel forti tulit. Digna pro-

*Continua
septem æ-
statum pu-
gna.*

fecto res, seu urbem, seu bellum spectes, quæ
 • *Homerici* versibus decantaretur; quum ta-
 men nec artis, nec virtutis vllum exemplum
 editum in horum temporū historia reperiatur.
 Interim ingens vis hominum vtrunque cæsa, &
 jactura navium incredibilis facta: nec in tam
 pari virtute tamque æqualibus copiis facile æ-
 stimari potuit, veram in partem fortuna incli-
 naret, donec ad extremum, quidam nomine

Ignis Græci inuentor. *Callinicus*, (alii *Galenum* nuncupant) genere
 Syrus, Constantinopolim transfuga aduenit.

Hic Imperatori operam pollicetur, excogita-
 vitque genus quoddam ignis, qui profundo
 merfus, sub aquis vires suas exerceret, non se-
 cus quàm in aëre, singulaque navigia ad cari-
 nas incenderet. Lætus tanto artifice, quique
 tam dubiis rebus, & in tanto periculo constitu-
 tis tam præsens tamque certum auxilium pro-
 mitteret *Constantinus*, hominem ingentium
 mercedum spe onerat. Et ille, opus aggressus,
 magnam classis Saracenicæ partem vno ignis
 impetu corripuit. Saraceni, quum ignem è
 mari surgentem cernerent, nouitate rei attoniti,
 toto statim mari sparguntur, nec se nisi supera-
 to Hellesponti freto tutos fore sperantes, cõ ce-
 leritèr, & confusis ordinibus contendunt;
 confertimque fretum ingressæ naues mutuis
 inter se ictibus multæ perierunt. Græci fu-
 giehtes iniequi noui ignis metu non audebant,
 veritèr & ipsi iisdem flammis, si propiùs ac-
 cederent, haurirentur: classis verò Saraceni-
 ca extra Hellespontum progressa in terribilem
 incidit tempestatem; qua classis reliquæ pœnè

omnes

omnes absumptæ sunt. Nec in præsens modo utile erat hoc inuentum, sed sæpe aliàs, superiores Saraceni alioqui in congressibus futuri, ostenso igne, subito territi aufugerunt; ignis vero iste variis nominibus appellatur: nunc enim Græcus, nunc marinus, nunc submarinus, nunc humidus apud autores appellatur. Tanta autem fuit hæc victoria, ut *Mabdia* primum, deinde ejus siue exemplo, siue hortatu, cæteri omnes gentis Saracenicæ Amiræ, siue Amirathes, pacem à *Constantino* sub certo stipendio peterent. *Constantinus* pacem cum Infidelibus facere noluit, sed inducias iu triginta annos dedit: Verùm quam gloriôsæ fuerunt hæc induciæ Saracenis datæ, tam deformis fuit à gente Bulgarica paulò post, sub annuo tributo, accepta pax: quam rem, quandoquidem mare non tangit, nos etiam intactam hoc loco relinquemus; vtraque verò, tam pacem quam inducias, suo & Imperii malo filius & successor ejus *Justinianus* ejus nominis secundus violavit.

Hic Cyprum, quam Saraceni tenebant, Cap. 12.
inuasit: Arabasque omnes nauigiis vno com-
meatu impositos migrare jussit: navigan-
tes truculenta & fera tempestas inuasit, pau-
cosque admodum vel homines, vel naues super-
stites reliquit. Multa etiam *Justinianus* tam
in domo sua quam in Imperio crudelia admisit.
Quibus commoti vrbis Constantinopolitanæ
ciues eum, præcis prius naribus, in exilium
egerunt. Tum *Leontius* Imperio admotus;
cum verò *Abfamarus* imperiali culmine detur-

bavit. Sed utrumque post aliquot annos in exilium actos, cum sectoribus suis, in potestatem redegit *Justinianus*, & variis suppliciis cruciatos, morti tradidit. Forte accidit, ut dum à ciuibus reuocatus Constantinopolim classe peteret, in ferocissimam tempestatem incideret. Quumque in eo essent omnes ut singulis momenti subuersionem expectarent, quidam ex amicis, *Rogo te, inquit, Imperator, ut votum Deo facias, te inimicis parciturum*; at ille, *Si fecero, inquit, Deus me hic confestim mergat*. Victoriæ igitur Bulgarorum auxilio mox partem crudeliter exercuit; nec ulli hominum, qui vel leuissima conspirationis aduersum se initæ suspitione contactus fuerat, pepercit. Restitutus verò, Imperatricem, numerosa ad deducendum classe missa, ab exilii loco accersiuit. In itinere inauditæ feritatis tempestas nauigantes occupat: in qua magna hominum nauiumque iactura facta memoratur. Cujus rei fama accepta, Bulgarorum Rex per nuntium non immerito hanc ei cladem contigisse monuit; nam quid, inquit, tanta classe, ad rem, quæ tribus quatuorue ad summum nauigiis æquè commodè transigi potuisset, opus? gravis hæc quidem clades, nisi grauior mox incidens illius sensum omnem & memoriam hominum mentibus exemisset. Chersonæ, in Ponto ciuitate, exul vixerat *Justinianus*: à cuius urbis ciuibus malè habitus fuerat, & à quibus ni subito aufugisset, in Tyranni *Absimari* manus vel uiuus, vel mortuus traditus fuisset. Itaque nullam unquam vindictam tantæ injuriæ parem,

aut

aut se dignam, nisi cum urbis excidio conjunctam, fore ratus, classem & maximam & apparatissimam, & ex omni navium genere (triremes, Dromonas, Chimæras, ut apud *Diacorum* legitur, sed vero nomine Cameras, & Chelandia) constantem, collata ab omni hominum genere stipe, ædificari jussit; quâ cum in mare deduxisset, nec sociis modò nautalibus, verumetiam milite ad urbem Chersonam expugnandam idoneo affatim complêssent, editis abominandæ sævitiae mandatis vela facere & remos aptare jubet. Superato ad Bosphorum freto, & jam ipsum Pontum nauigantes, mense Octobris, sub exortu Pleiadum, truculentissima ventorum rabies fluctibus inuoluit. Hoc naufragio, septuaginta & tria hominum millia perierunt. *Justinianus*, quum post aliquot dies nullum de classe sua nuncium accepisset, ipse arreptis aliquot nauigiis Chersonam nauigare pergit. In itinere (nec procùl ierat) classem in aduersum tendentem conspicatus, prælagio motus, & insolito horrore correptus retrò cursum flexit, pauldusque & tremens, Constantinopoli se condit. Qui aduentabat *Philippicus Bardanes* erat; Chersonitæ enim quum aduersus se nauigari cognouissent, & mandata contra se ab Imperatore edita non ignorarent, & fortè *Philippicus*, ab exilio reuertens, eodem tempore ad Chersonam venisset, eum Imperatorem, tanquam virum cœlitus ad se missum, effusis præ gaudio lacrymis, salutabant; rogât ut sui, ut ciuitatis suæ, ut Imperii Romani, vâ denique generis humani misereri vellet, & hanc pestem ex orbe terrarum

Naufragiū.

rum tolleret. Ille, quum quid classi hostili contigisset, & ex naufragis in littus expulsis, inaudisset, & tabularum, remorum, palmularum, ipsorumque submersorum corporum eodem ejectorum multitudo fidem faceret, conscensa statim classe Constantinopolim contendit. In itinere, naue Imperatoria ex insigniis, quanquã è longinquo, agnita, conclamant omnes, & *Bardanes*, En, inquit, commilitones, en belluã illã, quam vltro se nobis veluti victimam ad cædem offerentem cernitis. Nunc viribus, nunc lacertis opus; vt prius quàm terram capiat, in vestram vel viuus, vel mortuus potestatem veniat. Sed *Iustinianus*, nauigii celeritate fretus, prius portum intrauerat, & indè trepidus ad domum Augustalem confugerat. *Philippicus* magna fiducia fugientem insequitur, & jam frequentiore ciuium quam militum multitudine stipatus, *Iustinianum* ad cædem deposcit. Nihil vnquam ciuibz gratius lætiusuè contigisse potuit. Itaque non tam iussu *Philippici*, quam consensu populi, missi ex templò, qui latitantem perquirerent. Illi iussa exequuntur, & occisi caput referunt; factum crudele, si vlla in tanti sceleris inumanitate vindicanda crudelitas esse potuisset. Indè pax cum Saracenis & Bulgaris repetita.

Cap. 13. Hoc ipso tempore, *Blondus*, vno quasi impetu, Saracenos, omnem prius Africam ad Oceanum Atlanticum mirabili successu perdomuisse, & septimo indè mense à Septa in Hispaniam transmittentes, eam omnem pari celeritate sub jugum misisse refert; istaque omnia
sub

Sub primis ferè *Justiniani* Imperatoris annis contigisse memorat; sed nullo judicio. Rebus certè Imperii per *Justiniani* Imperatoris facti, infecti, refecti, confecti, *Leontii*que & *Absimari* tempora distractis, *Johannes* quidam Africæ, à *Leontio* Imperium adepto Præfectus, primos Saracenorum insultus multa virtute repreſſerat. Sed veritus ne ſi iteratò cum claſſe appellerent, tam fero hoſti par futurus non foret, cum claſſe quam habuit, Conſtantinopolim, Imperatorem de periculo, cui tum provincia illa expoſita videbatur, certiorè præſens facturus, nauigavit. Saraceni igitur hac occasione uſi (ut milite ſemper abundabant) cum ingenti ſimul claſſe, & exercitu in Africam redeunt, eamque omnem, nemine prohibente, occupant; & ſedes ibi ſuas, (*Muſa* Admirathe, ab *Ulid*, gentis Saracenicæ per Arabiam, Ægyptum & Africam Miramamolino ſive Principe, conſtituto) locant. Transitus verò Saracenorum in Hiſpaniam antè annum Domini ſeptingenteſimum decimum tertium, ut diſertè teſtatur *Rodericus Toletanus*, non eſt factus: iſque per hanc cauſam contigit: Erat quidam *Julianus* in magna dignitate apud *Rodericum* Gothorum in Hiſpania Regem poſitus, pluribus etiam belli facinoribus inſignis; hujus filiam *Rodericus*, *Hiſpania à Saracenis inuafa.* *Juliano* per ſpeciem legationis in Africam amandato, vitiauerat. *Julianus* priuatam injuriam ulturus, ad *Muzani* Saracenorum in Africa Amirathem proficiſcitur, injuriam ſibi illatam à Rege ſuo queritur, ſubſidium ad vindictam rogar, flagitat, obteſtatur; denique per

per quicquid in terris sancti sit, se, modo exercitus præberetur, totam Hispaniam Saracenis in manus traditurum esse spondet. Quoque magis credat, Regis vitia, populi odium, opes, clientelas, necessitudines suas, non vanè memorat. *Admirathes* Miramamolinum ejus rei certiorē facit. Miramamolinus, hominis Christiani fidem in minoris momenti re prius explorandam ratus, quàm vniuersus ei exercitus committeretur, quatuor tantum nauigiorum classem, cum, quantam illa capere posset, cohorte tradi jubet. *Julianus* nihil recusare; quatuor tantum nauibus profectus, equitesq; centum & quadringentos pedites ducens, extra fretum in Bætica terram capit. Eique statim multi odio *Roderici* transfugæ se adjungunt. Itaque refertus spoliis, numeroque auctior, exercitus in Africam redit. Qua re perspecta, Miramamolinus quendam nomine *Taricum*, cum justo exercitu, comitante *Juliano*, in Hispaniam, ad eam Saracénico Imperio jungendam, mittit. Ne uè nauibus parandis, rerum quæ pararentur rumor ortus, ad Gothos in Hispania maneret, contractum longè à mare exercitū, Mercatorum nauibus, quæ tum fortè ad *Septa* stabāt, subito imposuit. Erat antiqua vrbs, ab *Hercule*, *Heractia* olim dicta, in monte Calpe ad mare extra còlumnas in Hispania posita. Eam *Taric* primò vi capit, captamque à suo nomine *Gebal Taric*, hoc est lingua Saracénica, *Montem Tarici*, qui nunc corrupto vocabulo *Gibraltar* dicitur, appellauit. Indè fretum subiectum, *Gibraltar angustia*, communiter vocatum.

Gibraltar.

tatum. Prælium. deindè terrestre erat, in quo
 ultra centū hominum millibus cum ipso Rege
 cæsis, regnum Gothorum in Hispania concidit:
 nec vlla ejus pars ab hac servitute immunis
 fuit, præter Asturas & Cantabros. Hii monti-
 bus & scopulis, sed præter omnia, ut sæpè aliàs,
 paupertate sua tuti, Saracenorum impetum &
 Imperium vitarunt. Hiis igitur contemptis,
 infra triennium, quam in Hispaniam venerant,
 transiissis Pyrenæis, in Galliam descende-
 runt; specie quidem ut reliquias Gothorum in
 Galliam refugos persequerentur, re ipsa ut
 Galliam Germaniamque, & Europam omnem,
 continuata victoriarum serie, subigerent; fecis-
 sentq; forsitan, nisi *Carolus*, cognomento *Mar-*
rtellus, eis terrestri acie occurrisset. Fit duo-
 rum tum potentissimorum populorum Fran-
 corum & Saracenorū ad ripam Garunnæ, non
 procul Burdegalia, vel ut Galli volunt, ad Li-
 gerim, juxta Turones, (idque veriùs putò) con-
 gressus. In quo trecenta & septuaginta Sarace-
 norum millia, cum ipso Rege *Abderame*, à Fran-
 cis cæsa fuisse ex Lateranensi Bibliothecario
 tradit *Sabellicus*. Annales verò Gallici huic nu-
 mero quindecim millia addunt. Quis non exi-
 stimaret hac tanta strage Saracenorū vires fra-
 ctas & debilitatas fore? id verò tantū abfuit, ut
 paulò post novus Rex, siue *Almirathes*, *Athinus*,
 in *Abderami* nuper cæsi locum suffectus, cum
 magna classe in Galliam Narbonensem venerit.
 Quumque ostium Rhodani subiisset, exposi-
 milite, vrbes, Nemausensem, Narbonensem,
 Lugdunensem, S. Pauli, & demùm Avinionen-
 sem

sem, cum omni Romana Prouincia, & Burgundia parte, occupauerint. Caput tunc rerum in Gallia *Carolus Martellus* erat: is confestim Auinionem aduolat, urbem obsidione claudit. Interim alter *Amiras*, nomine *Amorraeus*, Pyrenæo monte superato, cum alio non minore Saracenorum exercitu, auxilio *Athino* accurrit. Qua re intellecta, *Martellus*, nè cum utroque simul hostium exercitu configere cogessetur, cum longè maxima legionum suarum parte, *Amorraeo* occurrit, & prælium cum eo, cæso cum Duce exercitu, transigit. Indè cum cruentato exercitu Auinionem reuersus, urbem expugnat, *Athinumque* cum suis qui supererant ad naues præcipites egit. Multaq; hominum millia vel in fluminis ripa, vel in maris littore hærentes occidit. *Athinus* conscensa classe, nè nihil planè acto domum inglorius reuertetur, Corsicam, Sardiniam, aliasque vel Italiae, vel Hispaniæ conterminas insulas immani hominum pecudumque, & testorum strage deformauit.

Cap. 14.

Verùm vt ad *Philippicum Bardanem*, à quo diuertit, reuertatur oratio: Is anno Domini septingentesimo quarto Imperium accepit. Sed Imperium sanguine quæsitum, sanguine amisit; infrà biennium in ipsa vigilia Pentecostes, effossis oculis in ordinem redigitur: author hujus supplicii erat quidam nomine *Anthemius*, sed qui post Imperium acceptum *Anastasius* vocabatur. Hic Saracenorum motibus intentus, sub legationis specie exploratores Alexandriam misit, cum *Ulad* veluti de pace acturos:

acturos: .ii reuerſi omnia, non Alexandriæ modò, verumetiam per totam Ægyptum & Phœnicem apparatibus tam naualibus quam terreſtribus aduerſus urbem Conſtantinopolim faciendis ſtrepere renuntiant. *Anaſtaſius*, hoc audito, Conſtantinopolis mœnia firmat, portus munit, urbem frumento, aliaque annona ad triennii obſidionem tolerandam inſtruit. Tela, machinas, tormenta, partim antiqui generis, partim nouitèr excogitata, per muros diſponit; ciuium militumque animos ſpe & fiducia implet. Hii verò ſumptus, collata à ciuibz ſtipe, fiebant. Quam ſi quis conferre vel reuſaſſet, vel præ inopia non poſſe fateretur, eum urbe ſtatim cum familia excedere juſſit, ne in futura obſidione urbi propter annonam grauis fieret. Antè omnia claſſi parandæ intentus erat, Præfectumque ei rei procurandæ dedit, ſeruique & liberæ conditionis opifices in ergaſtula concluſi dies nocteſque pangendis nauibus inſtabant; ſumma verò ei cura de Dromonibus igniferis, & magnæ molis trieribus comparandis erat: has multis vigiliis & ſudoribus, extruxit. Quumque interim per exploratores comperiſſet, Claſſem quandam Saracenorum ad Phœnicem, in Aſiæ littorè poſitam, ad lignum cupreſſinum (quo genere ad nauigia firmiſſima ſtrueda utebantur veteres) cædendum ſtare, ilico claſſem ſuam ad ea loca dirigit, editis mandatis, vt in intinere claſſem auerent, naueſq; hoſtium, vnà cum lignis, incendio conſumerent. Claſſis Anaſtaſianæ Præfectus nomine *Johannes* erat: is quum

quum Rhodum venisset, mandataque Imperatoris, & quid pararetur, exposuisset, subito à præfidiariis confoditur; tumultuq; orto, *Theodosius* quidam, nullius numeri vir, sed tributorum publicorum collector, Imperator salutatur: cumque ille post salutationem clam se in solitudinem abripuisset, diligentèr quæsitus, & bono animo esse iussus, neuè Imperium oblatum præ timore respueret rogatus, vi tandem victus paruit, seque rebus, quas nunquam antea attigerat, & publicis & bellicis gerendis accingit, & contracta classe urbem Constantinopolim, quandoquidem necesse erat, obsidione terra marique claudit. *Anastasius* classe, & munitionibus, quas aduersus Saracenos paraauerat, contra rebelles suos uti coactus, omnia diligentissimè administrabat. Nec ciulum ei fauor defuit. Classis vrbica, in portu *Mammææ*, (nomen locus à *Mammæa Alexandri* Imperatoris matre olim accepisse dicitur) stationem habuit. Indè educta per sex continuos menses, ita ut vix vna diecula intermitteretur, classe, cum hostibus conflixit. Quibus exactis, *Theodosius* rem toties frustra tentatam, ad tempus omisit. *Anastasius* indolem & vires hostium senescere jam ratus, classem *Neorium*, urbem non longè positam, quicquid erat negotii, nauigare iussit. Quam occasionem, qui intra urbem *Theodosii* partibus fauebant nacti, eum cum exercitu, per Blachernarum portam, noctu intromiserunt: ibi fœda strages per omnes domos edita; ipse *Anastasius* viuus in hostium potestatem, pacta salute, venit. Nec *Theodosius* fidem læ-

fit, habitu modò monachali eum induit. Ita *Anastasius* post annum & tres Imperii menses, regiam cum priuata vitam commutauit. Nec *Theodosius* vltra annum Imperium sic quæsitum tenuit. *Leo* enim, quem nunc *Cononas*, nunc *Isaurum* cognominant, Orientis tum Prætorio Præfectus, se quàm *Theodosium* digniorem ratus, Imperium inuasit, & *Theodosium* se dudentem, nihilo, quam ille *Anastasium*, duriùs tractauit, sed pro Monacho, in Ecclesiæ Constantinopolitanæ in clericum unà cum filio totondit.

Hic est ille *Leo*, qui disciplinam militarem

Cap. 15.

proximorum Imperatorum, *Theodosii*, *Anastasis*, *Philippici*, *Iustiniani*, ignauia corruptam & collapsam sentiens, *Tactica* illa, quæ etiamnum extant, imperiali autoritate munita, in lucem edidit. In quibus, quicquid ad arma, & armaturas, quicquid ad tela, & tormenta, ad insidias, ad expeditiones, ad copias vel comparandas, vel alendas, vel instruendas, vel conseruandas, vniue in bello, vel inferendam, vel propulsandam, quicquid denique ad acies, siue terra, siue mari dirigendas attinet, eo ingenio & iudicio traduntur, vt omnes omnium historicorum libros frustrà præ illis & inutilitè scriptos fuisse putes. Ab hoc vero Leone, non ab aliquo priorum, *Tactica* illa edita fuisse inde constat, quod omnes belli artes in illis traditæ, aduersus Saracenorum, Bulgarorum, & *Turcorum* apparatus excogitatæ fuisse discretè memorantur; quarum quidem gentium nomina illorum temporibus vix audita, nullo

Leonis Tactica.

certè

certè facinore celebrata fuerant. Hoc verò regnante ad immensam omnes potentiam excreuerant, bellaque vel inter se, vel aduersus Græcos magnis viribus gerebant. Magnus planè in omni genere vir, quique summorum Imperatorum famam gloria æquasset, nisi imaginum causam aduersus Romanæ Ecclesiæ sectam oppugnasset. Huius enim vnus sceleris apud illos reus quibus non conuictis à Latinis paritèr Græcisq; Scriptoribus laceratur? verba *Sabellici* apponenda censui. *Nescio* (inquit) *quo malo fato, multò fuit hic Leo diuturnior, quam humanis rebus expediret; viginti enim & quatuor imperauit annis, oribodoxæ, enim fidei, & Romanis Pontificibus, rectoris dogmatis odio, fuit plus quam hostis.* Interim res amplissimas ab eo gestas adeò parcè & malignè recitat, planè vt eum partium studio hominis vel virtutibus, vel successibus inuidisse scias; idem & *Blondus*, quem *Sabellicus* imitatur, facit. Nos verò decet eam præsertim victoriarum ejus, quæ mari quæsitæ sunt partem, quandoquidem ex sola ad nostrum institutum pertinent, verè & fidelitèr perscribere, nec tantam viri virtutem in obscuro esse pati. Faciã autem, si prius, quod in omni historia facere par est, temporū, in quibus versamur, rationem paucis habuero. Septingentesimum nimirum æræ Christianæ annum ingressi sumus.

Cap. 16. Anno igitur septingentesimo decimo tertio Longobardorum, (quos à *Nisete* in Italiam sub exitu *Justini* Imperatoris vocatos diximus) Rex regnū iniit, anno verò sequente *Gregorius*

gorius secundus Pontificatum Romanum accepit: *Leo* verò cognomento *Isaurus*, anno, vt Historici ferè volunt, decimo quarto, vt Chronologi septimo decimo super sepringentesimum Imperium iniiit: Cui altero ab initio Imperio anno, *Zulzimim*, aliàs *Zulzimen*, quem Latini, vulgato jam nomine, *Solymannum* vocant, Saracenorum per Asiam, seu Armirathem, seu Calisam (variè enim traditur) cum ingenti classe in Thraciam transgressum, urbem Byzantii terra mariq; obfessurum, esse nunciatur, quoniam verò vrbs ipsa, vtpote in peninsula posita, maiore sui parte ad mare exposita erat, ideò præcipua maritimæ obfisionis cura vtrumque tenuit. *Solymannus* ter mille nauium classem, vt *Blondus*, trahens, primo statim aduentu, omnia circum loca occupabat: Secundo verò quam aduenisset die, copias omnes educit & hosti pugnandi copiam facit: tanta autem nauium multitudo erat, vt omne inter Magnaurũ & Cuclobium spatium complerent. Nec minorem *Leonauium* vim habuit: nam præter eas quas *Anastasius* parauerat, multas ipse vel nouas festinato opere extruxerat, vel aliunde accersitas armauerat: & nauium insuper genere præstabat: Saraceni enim Cumbariis, magnis illis quidem, sed plane caudicariis & crudi materia structis, & tardioribus utebatur. *Leo* verò præter magnum eximie magnitudinis triremium numerum, ceteros omnes, siue Galeas hoc est moneres, siue biremes, exquisitissimas omnes arte paratas, & omni instrumento bellico refertas habuit. Maximam tamen spem in tormentis

Siphones.

tormentis igniferis ponebat. Ea verò non vnius generis erant. Siphones erant æneæ, quibus ignes cum tonitru & fumo in hostem ejaculabantur. Est autem Siphon, autore *Hesychio*, fistula siue canalis, quo ad restinguenda incendia aquas ejaculare consueverunt: cujusmodi fortè & nos hodiè Londini aliisque in vrbibus ad subitos incendiorum casus vimur. Vnde sumpto exemplo tormentum ad ignem magna vi & cum spiritu protrudendum, fabricati jam fuerant. Nec video quid inter bombardos nostros, & Siphonas illas intersit, nisi quod veteres hiis ad ignes, nos illis ad lapides, vel plumbeos ferreosue globulos in hostem emittendos, vimur. Erant tamen & Siphones minores, quas Græci *Cheirosiphonas* dixerunt, nos *Siphonas manuales*, vel *Plinium* sequuti *Siphunculos*, dicere malumus, quas ipsis manibus, vt nos Sclopetos, tenentes, in hostes dirigebant. Erant & ollæ testaceæ calce viuo plenæ, quibus dum injicerentur confractis, calcis viui pulvis igni admissus in ora & oculos sic volabat, vt non solum visum auferret, verum etiã spiritum ipsum intercluderet. Sed maxima in igne marino, de quo antea mentione fecimus, vis erat; eratque hosti maximè formidabilis. Sic igitur instructus *Leo* classem ad pugnam educit, veritus ne hostis vltro in ipsos vrbis portas inuectus stantes adoriretur, murosque penitus subiret, tormentaq; & machinas per mœnia dispositas frustrareretur, & ex ipsis nauibus muros vrbis scanderet. Sed ventus in Austrum subito conuersus, & Saracenorum classem longè à mœnibus summoquebat, & *Leonis*
classsem

classeni majore vi in summos ferebat. Edito igitur signo, magno impetu naues igniferæ, primis in ordinibus constitutæ, in hostis Cumbaria mole sua laborantia impetum fecerunt; simul ignes omni parte Siphonibus emissi classem hostilem flammis protinus inuoluerunt. Nihil illo die, gladiis, sagittis, hastis, ballistis, aliouè telorum genere actum; ignis omnia occupabat, Siphonumq; & ollarum igniferarum fragor, veluti tonitru nubibus excussum, Saracenorum animos turbabat, mistusque infania & desperatione luctus, genitus & ejulatus tota hostium classe audiebatur. Antè omnia ignis marinus vndiquaq; emicans timore constrictos, & veluti vinctos, tenuit. Nam quid, *inquiunt*, ignes aquis restinguere paramus, quum mare non ardere modò ipsum, verum etiam naues nostras à carinis incendere videremus? *Leonem* verò ea vna cura perstrinxit, nè sui hostibus se temerè immiscerent, pugnaeque minimè, vt res ferebat, necessariæ cupiditate flagrantès, suis ipsi ignibus conflagrarent. Interini Saraceni fugam trepidè parabant: sed quâ, quouè fugerent, fumo cœlum subtexente, nesciebant; nec si scissent, profuisset fuga, quum lethalis planè ignis nauium & lateribus, & carinis penitus adhærens omnia depasceretur. Itaque tota impiorum classis momento temporis deflagrauit. Pauca modò nauiculæ maturè fugientes nuntia cladis abierunt, in quarum vna exceptus *Solimannus* salutem in præsens fuga quaesuit; quanquam & is ipse paucis post

P 2

diebus,

diebus, siue ex dolore animi, siue inter pugnandum igne afflatus periit. Sunt tamen qui eum in ipsa obsidione ex morbo decessisse scribant. *Solimanno* verò in Califatu successit *Hannar*. Is primo vere *Suphian* classis Ammiram, ad Constantinopolim rursus obsidendam & expugnandam ex Ægypto misit: quanta verò fuerat hæc classis, indicio fuerit, quod quadringentas naues onerarias, quæ reliquæ classi conmeatum ferrent, ad Hellespontum venisse memoratur. Cujus aduentu cognito *Leo* Imperator classem eduxit, & pugnandi copiam hosti Propontidem ingressio fecit. *Suphian* verò simul ac in conspectum venit, & Siphonas ad proras nantium extantes vidit, ipso aspectu territus, Bithyniam, ad dextram constitutam, se fuga contulit, & in portu Boniagri latuit. Paulò post & alia in supplementum classis ex Africa, cujus *Gizia* Ammiras fuit, Propontidem intrauit. In hac classe trecentæ naues bellicæ erant, præter onerarias: occurrunt *Leo*, fugit *Gizia*, & Choartam, portum satis munitum, in Asiæ littore non longè à Boniagro situm, petit. Erat in utraque Saracenorum classe Ægyptiorum magna vis; hii noctis concubio clam congressi, formidinemque mutuam ab igne illo humido siue Græco facti, consilium ineunt ad Imperatorem transfugiendi. Sed quum naues ipsas Saracenorum portibus educere non valerent, lincubus, qui onerariis deferuebant, usi, adultæ jam noctis tenebris egressi, Constantinopolim transfugiunt. Ab hiis, de omnibus quæ

quæ apud hostes agerentur, edoctus, vereri cœpit *Leo*, nè tantæ Saracenorum classes sic in vicino stantes, occasionem nactæ, vel portubus, vel mœnibus vrbs subito & improuisò inciderent, & graue aliquod incommodum, aut forsitan exitium, inferrent. Sed quum diligentius perquirendo, hostium naues propter multitudinem, quod necesse erat, confertissimas in vtroque portu stare, nec excubias more nauali agere, conuerisset, naues aliquot è suis omni ignis apparatu armat, easque, secunda vigilia, in vtrumque portum à Saracenis infestum, succensas immittit. Nec tam prudenti incepto euentus defuit. Vtramque classem ignis depaſcitur, & ingentem militum nautarumque vim, semisomnes hos, illos somno oppressos perdit. *Haumar*, quū quid classibus suis, contigerat accepisset, rem toties frustra tentatam tandem omittere censens, classem alteram, copiasque omnes, quæ in Thracia, vario euentu, per aliquod tempus bellum gesserant, cum Duce Musulmano, omiſſa Europa, ad se in Asiam redire iubet. In itinere insolita tempeſtas, & qualis olim Sodomam & Gomorrhæm vrbes oppressit, nauigantes afflixit. Verba *Pauli Diaconi* ascribenda censui; *Granda*, inquit, ignea descendens super eos, aquam maris ebullire fecit: & pice nauium liquefacta, simul cum hominibus naues inductæ sunt in profundum. Ex tanta classe decem tantum naues incendium vitarunt, quarum quinque in hostium mox potestatem venerunt; reliquæ, quantumuis laceræ, viuæ

Naufragiæ.

tamen ad *Haumarem*, cladis nuntiæ redierunt; cladis, in qua suprâ triginta Saracenorum millia desiderata fuisse, author est rerum Turcicarum scriptor diligentissimus *Lonicerus*.

Cap. 17. Nec quietiores interim res in Occidente erant. *Luitprandus* Longobardorum, ut antè dixi, Rex totam, qua patet, Italiam Imperio completi nititur, ipsique vrbi Romanæ obsidionem & excidium denuntiat. Quæ res *Gregorium* Pontificem anxium & sollicitum habebat. Venetorum verò ciuitas hoc tempore non vno malorum genere laborabat, sed intestina Insulanorum discordia præcipuè grauabatur: cuius illa causâ & origo erat; quod singulæ ab initio insulæ, à suo Tribuno, veluti tyranno aut regulo, regebantur: inter quos, non iurgiis, non fustibus, sed gladiis, & Internecino sæpè bello dimicatum est. Quæ res, iuncto Longobardorum à terra, & Piratarum à mari metu, vniuersis de summa rerum cogitationem & sollicitudinem iniecit. Communi igitur consilio

Paulus primus Venetiarum Dux.

Ducem creant. Is notæ præter omnes iustitiæ, prudentiæ, fortitudinis vir *Paulus*, cognomento *Heracliensis*, erat; qui Ducatû adeptus, Tribunatus omnes sustulit, *Luitprandum* placuit, & certis conditionibus cum eo pacem fecit; ut hoc metu pro tempore solutus, rem Venetam aduersus futura cum Longobardo certamina firmaret. Quoniam verò plurima circum flumina in stagnum Venetum se emittunt, Padus, Natison, Athesis, & alia, per quæ ex continente latrones schaphis insulas inuesti deprædabantur,

bantur, ideò omnium fluuiorum ostia munitionibus & præfidiis firmari curat. Edicit deindè vt vnaquæque Insula pro facultatû modo certum nauium bellicarum numerum militari-
tè instructum & in procinctu haberet, naua-
liaque & casulas nauales extrueret; quarum
vestigia ad suam vsque ætatem mansisse refert
Coccinus. Nec struxisse sat erat: munimenta na-
ualibus addere iussit; planè vt cum Ducatu
nouum ver in humido illo Venetorum campo
refloruisse videretur. Hiis vero rerum funda-
mentis jactis, decessit *Paulus*, eique in Ducatu
successit *Marcellus*: cui post nouem annos de-
functo successor datus est *Horleus*, cognomento
Ursus. Is res nauales, à *Paulo* ad salutem com-
paratas, ad ciuitatis illius gloriam amplian-
dam, & Imperium in majus prouehendum ver-
tit. Sub hæc tempora, *Ildebrandus Luitprandi*
nepos, & copiarum Longobardicarum Præ-
fectus, Rauennam inopinatò aggreditur: quo
ausu, toti primum mari supero, deindè & vni-
uersæ Italiæ, terribilis apparuit: Nec magni
moliminis res erat; Classensè primum oppidû
improviso occupat, classemque in nauali con-
ditam incendit. Mox eodem impetu urbem ip-
sam nihil hostile à Longobardis propter fœ-
dera metuentem inuadit. Exarchus (cui nomen
Paulus) vt in re trepida profugit, Imperato-
rem per litteras rei certiore facit, vrbes Im-
perii per Italiam constitutas circuit. Sed
quum nihil opis aut auxilii tota reliqua Italia
inueniret, Romam venit. Ibi cum Pontifice

Horleus
Venetorum
Dux.

Gregorio, infensissimò *Leoni* Imperatoris hoste, supplex egit, ne imaginum studio Imperium Romanum in Italia usque ruere, & in barbari potestatem venire sineret. Quumque Pontifex nihil in se opis aut subsidii aduersus tam potentem hostem esse responderet, Exarchus, saltè ut per litteras ad Senatum Venetum datas, ei causam Imperii commendaret, petit. Id Pontifex non grauàtè fecit. Mittuntur litteræ. Quibus lectis, visum est Senatui, Pontificem parum verecunde à se petere, ut in alieni hominis gratiam tantum bellum sibi concitarent. Egit tamen rursus cum Pontifice Exarchus, & obtinuit, ut secundas ad Senatum litteras daret; Quumque sub idem tempus litteras etiam à *Leone* in eandem sententiam, & ad Senatum scriptas, accepisset, utrasque ipse pertulit. Quibus utrisque motus *Horleus*, postero die Exarchum in Senatum introduxit: ubi longa oratione multisque rationibus contendit, ut sibi jam profugo, ut *Gregorio* Pontifici, ut *Leoni*, ut Italiæ, ut Imperio denique Romano succursum esse vellent; & Rauennam urbem fero, barbaro, immani hosti, à quo nunc capta tenebatur, è manibus eriperent; facillè incendium hoc à Rauenna Venetias transiturum esse subinde monens. Nec quicquam nunc in Italia, præter ipsam Romanam capiendam restare, antequam vniuersas vires ad Venetiarum urbem, vel delendam, vel subjugandam conuerterent. Sardis omnium, præterquam vnius *Horlei*, aubus omnia caneantur: non quod vera quæ audiebantur

diebantur non esse existimarent; sed religione turbatæ erant mentes, propter fœdus non ita pridem cum Longobardo à *Paulo* duce suo initum; Impium & profanum bellum in profugi gratiam suscepturos, quod Deo mox Sanctisque omnibus iratis gesturi essent: pugnam scilicet inirent, violatorum fœderum & perjurii rei. Frangere & attollere vires in milite plerumque causam; quam nisi justam esse senserint, arma sæpe è manibus medio in conflictu, ni potius in primo congressu excidere. Quod ut sensit *Horlem*; eninunerò eam rem ad se maxime pertinere dixit: Ideò se tam consentientibus omniū studiis Ducem electum, ut ciuibz suis violatorum fœderum & perjurii author fieret? Longè, inquit, hoc ad *Horkei* consiliis, votis, cogitationibus absit. Ego multum Pontificis litteris, plurimum Imperatoris legationi, communi Italiæ, Ecclesiæ, & Imperii saluti omnia tribuo. Sed me vita prius destituat, quam hæc cogitatio animum meum subeat, fidem, qua res Veneta hætenus stetit, in ullius vnquam gratiam esse violandam. Quam eandem cum vobis nientem inesse video, perpetuis temporibus, ut inquit, voueo. Verum ad rem præsentem quod attinet; Quis, inquit, fidei, aut fœderis violati metus? aut quod nos vnquam cum Longobardo fœdus sanximus, quod non illi jamdudum per scelus ruperint? Fœdus non ita pridem cum *Luitprando* icimus: sed in quo disertè cautum sit, ut ita fœdus teneret, si Longobardi ab Imperii & Romanæ Ecclesiæ rebus vim abstinerent.

Itaque

Itaque ut Ecclesiæ res omittam, quas Longobardus variis præliis, & multarum urbium depredationibus fatigavit, Rauennâ modo intuemini, urbem Imperii, Exarchatus sedē, quæ capta, nihil in Italia, quod Imperator suū esse dicat, super futurū est. Eam Barbarus contra fœdera nuper cepit, Exarchum eiecit, reliquæ Italiæ omni imminet; ipse Exarchus, non humanæ modo conditionis spectaculum, verumetiam urbis ab hoste barbaro miserrimè direptæ veluti spectrum adest; vestram opem, vestram fidem implorat; & nos purum & pium, cum Longobardo bellum gesturi simus necquē dubitamus? nam ad reliqua quod spectat, nulla unquam à jactis urbis fundamentis vberior, vel gratiæ apud amicos, vel gloriæ ad externos, vel potentiæ aduersus finitimos quærendæ occasio oblata fuit; quam si in præsentī omiserimus, frustra eam postea, nec sine dedecore & ludibrio requiremus. Fœderis deinde instrumentum proferri, & verba recitari iussit. Magno omnium consensu audiebatur, & torpentes prius religione animos excitari apparebat. Gratiæ deinde in Senatu Duci actæ, quod plus cæteris vidisset, quod errore Senatum, religione Rempub. exoluisset. Exarchum in Senatum reuocari, reuocatum bene sperare iubent. Inde capita, de re transigenda, conferunt. Placuit, ut Exarchus, in præsentī, tanquam negatis auxiliis, tristis è Senatu & vrbe excederet, tempus & modum rei gerendæ præstituunt. Tristis ad suos abit Exarchus, & ad exercitum, qui non
longè

longè à Rauennæ mœnibus sedebat, redit. Postridie spargitur subitus, per Venetiarum primò urbem, mox per littora adjacentia, rumor, Saracenos cum ingenti classe aduentare. Propere igitur, ut in re trepida, deducuntur, armantur, complentur naues; jamque in altum exierant, quum subito conuersi, ad Rauennæ muros sera nocte naues applicant. Editio signo, *Paulus* auersam murorum partem cum exercitu aggreditur. Fit clamor, omnes ad vim hostium arcendam accurrunt. Interim *Horleus* silente classe ad mœnia accedit, milites exponit; ii primum nuda subsidiis mœnia inveniunt, priusque scalas mœnibus admouerant, & portam mari obuersam perfregerant, quam Longobardi oppugnationi, quæ à terra inciderat, intenti, vllum à mari periculum instare sentiant: tum partitis copiis vtrinque pugnari cœptum, & magna vtrinque cædes, utpote in arcto congressis, & confertis edita. Sed *Horleus* cohortem militum ad eam portam, qua *Paulus* pugnam instruebat, refringendam miserat; qua aperta, *Paulus* cum exercitu irrupit. Ibi Longobardi in medio cæsi; atroxque per tenebras grassabatur cædes. Prima luce à cædibus temperatum, & *Ildebrandus*, militiæ Longobardicæ Præfectus, viuius in *Horlei* potestatem venit. *Horleus* urbem sua virtute receptam Exarcho *Raenna* tradidit: Nec plura moratus, *Ildebrandum* se-recepta, cum captiuum trahens, Venetias magna cum gloria prius redit, quam quo tetenderat vulgo ciuium innotuerat. Hic primus dies Venetæ virtuti

virtuti per orbem terrarum lucem dedit, eratque illi vrbi verè alter natalis. Ex hoc enim tempore Venetiarum vrbs mundo se ostendere, & pro magna virium accessione, quacumq; se inclinauerat, haberi cœpit.

Cap. 18. Verùm vt ad *Leonem* redeam, vndecimo Imperii anno, maior eum belli inoles ab infensis ciuibz vrgebat, quam quæ paulò antè à *Solymanno* Saraceno vel *Haimare* ingruerat. Erat in Imperio vir magnis opibus & autoritate *Agallianus*; is ex tota Græcia, insulisque adjacentibus, classẽ contraxerat. Coniurationis verò participes, classis Imperatoriæ Praefectos, *Stephanum* & *Cosmum* habuit. Causa rebellionis erat infœlix illa de imaginum adoratione, quæ ex Italia in Græciam iam transierat, controuersia. Quarta decima igitur Kalendas Maii totis Imperii viribus ante vrbs mœnia nauali prælio configitur. *Agallianus*, quum in eo esset vt caperetur, in mare se præcipitauit. *Cosmus* & *Stephanus*, viui in *Leonis* potestatem veniunt. Vtrique caput præciditur, & pax Imperio ad tempus redditur. Non omitrendum hoc loco censui quod paucis ante hoc bellum motum diebus in mare contigisse traditur. Duæ sunt iuxta Atticâ insululæ, quarum altera *Tbera*, altera *Tberasia*, (quæ nunc *Santorini* est) dicitur. Medio inter has & Atticâ spatium, ignis ex profundo maris erupit; idq; incedium per aliquot dies tenuit. Neq; verò ignis hic sua materia, qua aleretur, caruit. Sulphur erat, quod è terra expulsum, & tactu aquæ primum,

Nauale
prælium.

mum, mox aëris densatum, pastum flammæ à se genitæ præbebat. Quo demum excocto, pumices, in quorum cauernulis sulphur, crudum adhuc, ut in fauorum latebris mel, vel in spongiis aqua continetur, pondere jam vacui toto mari fluitabant. Id verò non magis mirum rectè intelligentibus videri debuit, quam quod in lacu Asphaltite singulis annis fit: Vbi bituminosa materia ex imo lacu in aquæ superficiem liquida surgit; sed contracto mox aëre concrefcit, & duritiem, quam bituminis propriam esse videmus, contrahit. Idem in flumine Euphrate supra Babylonem sæpenumerò contingere, author est *Procopius*. Quid? quod *Herodotus*, fluvium nomine Inbitumen liquidum in Euphratem effundere testatur. Hoc tantum interest, quod in istis bitumen è terra cum fumo expellitur; in hoc, sub terra priùs incensum & inflammatum, per mare deinde non aliter quàm per *Ætnæ*, vel *Vesuvii* spiracula, in maris summitatē protrudebatur. Quippe omne sulphur hoc in se à natura habet, ut si incenderis, aquæ resistat; nosque paulò superiùs ignem submarinum, & sub ipso mari vires suas exercentem, arte confectum fuisse docuimus. Nam quod de pumicibus toto mari post incendium fluitantibus dixi, nihil ea re (ut à nautis accepi) in mare ad *Insulam S. Michaelis*, ex *Azoribus* vnam, usu frequentius euenire solet. Nec qui sic fluitantes vident, aliud eos esse putant, quam sulphuris subterranei reliquias, & veluti testas è terra in maris superficiem expulsas. Argumento fuerit,

rit, quod pumices hodiè & plurimi, & præstantissimi, in Insulis Æoliis, juxta Siciliam positis, (quas totas sulphureas esse nemo nescit) reperiantur. Denique bis teruè hoc ipsum in Mari Mediterraneo per hæc tempora contigisse, testantur illorum temporum historiæ. Veruntamen hæc res ut spectantium oculos ipso visu terruit, ita futura præscientium animos aliorum aliter affecit. Hii numinis à Leone propter imaginum cultum ab eo impugnatum offensi, signum, illi in Pontifices propter cultum à se ad tabulas & lapides translatum irati, manifestum indicium esse interpretabantur. Sed ut hoc in obscuro erat; ita illud nihil in se ambigui habuit, quod supererat *Leoni* viræ, totum infœlicis hac aduersus Pontifices Romanos concertatione evanuisse.

Cap. 19. Interim *Gregorius* secundus, decimo sexto Pontificatus sui anno, qui fuit *Leoni* Imperatoris decimus quintus, æræ verò Christianæ septingentesimus tricesimus primus, moritur, & *Gregorius* tertius in ejus locum sufficitur. Is, quum habito Italarum Antistitum conuentu obtinuisset; ut *Sanctorum imagines*, (verba *Blondi* pariter & *Sabellici* sunt) *majorè quàm unquam veneratione in templis colerentur*, ipsum *Leonem* contra tendentem piorum communionem priuauit, tributum fisco per Italiam inferri vetuit, vrbs Præfectum vrbe eiecit: nec vllus Imperatori, propter tot bella tanta virtute aduersus Saracenos Christi, hostes gesta, reuerentia aut honos habitus: sed eo expulso *Galum*

lum in partes vocabat. Ne uè Pontifex Romanus inutilis *Gallo* cliens censeretur, *Zacharias Gregorii* successor Francorum regnum à iusto Domino in *Martelli* filium *Pipinum*, cognomine *Brenem*, transtulit. Mox etiam *Leo* tertius *Carolum Pipini* filium cognomento *Magnum* occidentalis Imperii insignibus ornauit; quo facto Saracenis primò, mox etiam Turcis, via in Christianos per Orientem constitutos impunè grassandi data est. Confestim enim *Aaron* Saracenorum Armirathes cum trecentis hominum millibus ex *Ægypto* in *Asiam*, quâ terra, quâ mari irrupit, ut vrbes & prouincias, quæ Saracenicæ tyrannidis, vel odio, vel metu, Imperio Romano hætenùs adhæserant, auelleret; nec *Nicephorus* Imperator, accisis jam Imperii viribus contra tendere audebat, sed pacem annuo tributo constituto emit: pudendam planè, sed necessariam, nec tam ipsi, quàm *Carolo Pipini* filio, & Pontifici Romano opprobrio dandam: Interim res in mari longo annorum curriculo, præsertim in Occidente siluerunt: cujus rei ratio hæc erat. Hispania anno Domini 712 maxima sui parte edomita, qui in *Asturas* & *Cantabros* confugerant, *Pelagiū* Ducē sequuti, latrociniiis primū, mox iusto bello, arma, ex montiū anfractibus, & inaccessis rupibus, saxetisq; & syluis (Saracenis loca plana & culta tenentibus) mouebant. Quumq; aliquot victorias de Saracenis ductu *Pelagii* reportassent, eū communi omniū consensu Regē Hispani, non Gothorū sed Hispanorū creant. Ad hunc *Pelagium* Hispanorū ad hunc

hunc diem Reges genus suum referunt. Mor-
tuo verò *Pelagio*, eundem aduersus Saracenos
belli gerendi cursum tenuit filius ejus *Fanila*.
Cui sine prole defuncto successit *Alphonsus* :
qui propter eximiam religionis Christianæ cu-
ram *Catholicus* cognomen meruit. Qui titulus
Recaredo Gothorum Regi propter repudiatam
Arrii sectam in Concilio Toletano olim tribu-
tus fuerat. Et patrum nostrorum ferè memo-
ria, à *Julio* secundo *Ferdinando* Arragoniæ Re-
gi, propter hos ipsos Saracenos, ductu *Gonsalua*,
Hispania ejectos pro insigne honoris traditus,
ad posteros ejus veluti gentilis & hæreditarius
descendit. Sed hæc omnia bella inter Christia-
nos & Saracenos siue in Hispania, siue in ipsa
Gallia gesta terrestria erant: nec minores aduer-
sus Germanos, Burgundiones, Aquitanos &
Longobardos, hoc eodem sæculo res à *Carolo*
Martello, & ejus filio *Pipino* gerebantur, sed
quæ ad mare pertinerent nullæ. Deniq; magni
illud & memorabile bellum, quod à *Carolo Magno*
aduersus Saracenos in Hispania gestum erat,
quodque ab *Ariosto*, Poeta Italo, eodem plane
modo quo Trojanum ab *Hæmero*, nec nunc in-
genio decantatur, nihil in se quod ad mare, ad
naues, ad classes vllò modo spectare videatur,
habet. *Sabellicus* modò *Carolum Magnum* clas-
sem ad Bononiam, qua in Angliam aduersus *Of-
sam* Merciorum tum in Anglia Regem trajice-
ret, parasse refert. Nostri etiam Annales simul-
tates inter duos Reges ortas, & interdictum hinc
inde Mercatoribus commercium non negant.

Sed

Sed *Offa* pensatis rebus, & cum quo hoste, omnium scilicet Europæ gentium domitore, rem habiturus esset, animo quum reputasset, nullis Legatis iratum Galli animum placavit. Corpus verò Saracenicum hoc ipso tempore, præterquam quod à *Leone Isaurō* gravitèr afflictū, civili insuper bello diuulsum, & in membra distractum fuerat, quorum quodlibet per se sumptum magni Imperii instar habuit. Tota vni Asia, alteri Ægyptus & Æthiopia, tertio Africa, eaque mox in quatuor ingentia regna, Fessæ, Moroccæ, Tunetis, & Tremisen distributa, quarto Hispania cum Insulis adjacentibus, cesserat: sed nihil in mare ab alteris in alteros per hos annos motum legitur. Nam ad Græcos Imperatores quod attinet, ægrè illi se aduersus finitimos Bulgaros hoc tempore tuebantur: nec Saracenos in Asia, quamuis mutuis inter se cladibus attritos, mouere, consiliū erat. Enimuerò maioribus illi bellis, tam domi, quam in Italiâ, propter imagines impugnatas laborabant.

Enimuerò *Leo*, inconsultiùs multò quam rerū Cap. 20. suarum, & temporū illorū ratio ferebat, signa & imagines longo vñ receptas, tota vrbe Constantinopoli conuelli iussit: populus factò concitus in regiam irrupit, & Imperatoris familiares, & ministros obuios obtruncat. Eam injuriam *Leo* sacræ scholæ incendio, & professorum in ea docentium nece vindicauit. Inde Græci, tam qui insulas, quam qui continentem incolebant, classē aduersus Imperatorem contrahunt; & cum aliis belli instrumentis armant, tum igne

Græco affatim instruunt. Dum confertim nauigant, ignis aduersus Imperatorem paratus in ipsos vertit, temerèque succensus, vniuersam classem incendio absumpsit. Major tamen rerum in Italia superabat moles: *Gregorius* ejus nominis tertius, Pontifex Romanus, vt Christianæ religionis hostem anathemate percussit, & populos à Sacramenti religione soluit: Inde Rauennæ, Romæ, Capuæ, Præfectorū *Leonis* sequutæ cædes. Quum verò de nouo Imperatore in Italia creando consilia ciues agitent, *Gregorius* (cujus mens tota aliò spectabat) ne id fieret, intercessit; anno verò sequenti, qui erat Christi septingentesimus vicesimus septimus, omisso noui Imperatoris creandi consilio, vniuersus populus Romanus solenni Sacramento, se Pontificis vitam, statumque in perpetuum defensuros, atque ejus, in omnibus rebus, auctoritati obtemperaturos iurauit; quo facto, Roma, Romanusque Ducatus, à Græcis, ad Romanos Pontifices translata sunt. Id *Gregorio* curæ prius, nunc cordi erat: id consilium gratum ratumque habuit; quam rerum inclinationem sequutæ sunt omnes per Tusciam & Latium, & magnam Campaniæ partem cum ipsa Capua ciuitates. Hoc autem *Caroli Sigonii* in sua de regno Italiæ historia fidem sequutus retuli; quæ si vera sint, potentia profectò Pontificiæ natalis, non ad *Constantini*, non ad *Caroli Magni* tempora & donationes, sed ad hunc annum, & hunc Pontificem, cujus potestas, hoc primum jurejurando munita, sacrosancta esse cœpit, referri debet. Hac verò opera Romanæ sedi nauata

Romani
Pontificis
auctoritas.

Sed *Offa* pensatis rebus, & cum quo hoste, omnium scilicet Europæ gentium domitore, rem habiturus esset, animo quum reputasset, nullis Legatis iratum Galli animum placavit. Corpus verò Saracenicum hoc ipso tempore, præterquam quòd a *Leone Isauro* graviter afflictum, ciuili insuper bello diuulsum, & in membra distractum fuerat: quorum quod liber per se sumptum, magni tamen Imperii instar habuit. Tota uni Asia, alteri Ægyptus & Æthiopia, tertio Africa, eaque mox in quatuor ingentia regna, Fessæ, Moroccæ, Tunesis, & Tremisen distributa, quarto Hispania cum Insulis adjacentibus, cesserat: sed nihil in mare ab alteris in alteros per hos annos motum legitur. Nam ad Græcos Imperatores quod atinet, ægrè illi se aduersus finitimos Bulgaros hoc tempore tuebantur.: nec Saracenos in Asia, quamuis mutuis inter se cladibus attritos, mouere, consilii erat, quum præsentioribus ipsi bellis tam domi quàm in Italia, propter imagines impugnatas laborarent.

Enimuerò *Leo*, ineonsultius multò quàm rerū Cap. 20. suarum, & temporum illorū ratio ferebat, signa & imagines lōgo vsu receptas, tota vrbe Constantinopoli conuelli iussit. Populus factò concitus in regiā irrupit, & Impeātoris familiares & ministros obuios obtruncat. Eam verò injuriam *Leo Sacra Scholæ* incendio, & professorum in ea docentium nece vindicauit. Inde Græci, tam qui Insulas, quā qui continentē incolabant, classē aduersus Imperatorē contrahunt; eamq; cum aliis belli instrumentis armant, tum igne

Q

Græco

Græco affatim instruunt. Dum confertim nauigant, ignis aduersus Imperatorem paratus in ipsos vertit, temerèque succensus, vniuersam classem incendio absumpsit. Major tamen rerum in Italia superabat moles: *Gregorius* ejus nominis tertius, Pontifex Romanus, vt Christianæ religionis hostem anathemate percussit, & populos à Sacramenti religione soluit: Inde Rauennæ, Romæ, Capuæ, Præfectorum *Leonis* sequutæ cædes. Quum verò de nouo Imperatore in Italia creando consilia ciues agitant, *Gregorius* (cujus mens tota aliò spectabat) ne id fieret, intercessit, anno verò sequenti, qui erat Christi septingentesimus vicesimus septimus, omisso noui Imperatoris creandi consilio, vniuersus populus Romanus solenni Sacramento, *sc Pontificis vitam statumq; in perpetuum defensuros, atq; ejus, in omnibus rebus, auctoritati obtemperaturos jurauit;* quo factò, Roma Romanusque Ducatus, à Græcis ad Romanos Pontifices translatus est. Id *Gregorio* curæ prius, nunc cordi erat: id consilium gratum ratumque habuit. Quam rerum inclinationem sequutæ sunt omnes per Tusciam & Latium, & magnam Campaniæ partem, cum ipsa Capua ciuitates. Hoc autem *Caroli Sigonii* in sua de regno Italiæ Historia fidem sequutus retuli.

Quæ si vera sint, potentia profectò Pontificiæ natalis, non ad *Constantini*, non ad *Caroli Magni* tempora & donationes, sed ad hunc annum & hunc Pontificem, cujus potestas, hoc primū jurejurando munita, sacrosancta esse cœpit, referri debet. Hac verò operâ Romanæ sedis nauata

Romani
Pontificis
auctoritas.

uata, moritur *Gregorius*, eique sufficitur *Gregorius* ejus nominis quartus, qui prædecessoris sui vestigia premens, totam sibi Italiam conciliare, & ipsos Longobardos officiis sibi obstringere nitebatur: Id videns *Leo*, copiis Italicis non amplius fidendum ratus, decimo sexto Imperii sui anno, classem cum exercitu in Italiam misit; quæ quum prospera nauigatione ad Mare Adriaticum peruenisset, ibi graui tempestate oborta, disjecta passim, & sæuo naufragio lacerata perit.

*classis
Græca fin-
ctibus op-
pressa.*

Fuit huic *Leovi* filius nomine *Constantinus*, ejus nominis sextus. Is anno Domini septingentesimo quadragesimo primo patri in Imperio successit. Vir strenuus & Imperio utilis. Hunc, quod in Baptisterio olim, dum lauaretur exquisita naturæ (vt fama erat) reddidisset, *Copronymum*, hoc est, *Stercoreum* abominando cognomine appellabant; malumque & impium, & iconoclasten scriptores in conolatrici subinde nuncupant; Veruntamen multas hic magnasque res aduersus Bulgaros gessit, clarasque de hostibus victorias reportauit; plures reportaturus, si suis & Imperii viribus aduersus communes nominis Christiani hostes uti licuisset. Jam primum Imperium ingressus cum classe validissima, Saracenicæ regni caput, Ægyptum bello petere & debellare instituit. Sed nondum terræ illius littora attigerat, quum per nuntium certior fit, *Arthansum*, Iconoplastarum perfidia, ipsam urbem Constantinopolitanam cum tyrannide inuasisse: Itaque omiſſa Ægypto Constantinopolim redit, urbem obsidione

*Cap. 21.
Constanti-
nus Copro-
nymus.*

& operibus capit; capto *Arthausus* viuis in potestatem venit; Imperator lumina ademit; spiritum in tenebris ducendum reliquit. Bis deinde classem aduersus Bulgaros adornauit, bis aduersis tempestatibus naufragium in Euxino fecit. *Sabellicus* vnus tantum naufragii meminit; sed in quo, bina ferè nauium millia periisse refert. Triginta quatuor hic annos imperauit; filiumque reliquit nomine *Leonem*, ejus nominis quartum. Hic viuo adhuc patre, *Irenem*, Scythicæ gentis mulierem, vxorem duxit, & ex ea *Constantinum* filium, Imperatorem ejus nominis septimum, suscepit. Quem, ipsa quæ in lucem edidit, inaudito scelere, luminibus postea priuauit, Imperioque, vt sola rerum potiretur, dejecit. Incidit autem hoc *Irenis* in filium suum facinus, in annum Domini septingentesimum nonagesimum septimum. Trennio verò post, hoc est, anno reparatæ Salutis octingentesimo, *Carolus*, genere Francus, cognomento *Magnus*, Imperator Occidentis à *Leone* tertio, Pontifice Romano, Romæ creatus & consecratus est.

Cap. 22.

*Danorum
in Angliam
aduentus.*

Anno mihi non hac vna re memorabili; nam & hoc eodem anno Dani, qui Cimbri olim erant, primum in hanc nostram Angliam appulerunt. Omni quidem ætate gentes illæ Boreales maris vsu multum valuerunt. Indicio fuerit, quod quum *Druſus Germanici* pater, littus Germanicum classe olim armata legeret, in *Visurgi* fluminis ostio classem hostilem reperit, cum qua concurreret. *Tacitus* etiã in libro, quem de moribus Germaniæ inscripsit, *Suionas*, hoc est, *Suedos*, gentem in ipso (vt ait) Oceano positam clauibus

classibus valuisse, diuersamque à cæteris, & sibi propriam nauium formam habuisse memorat; Nosque superius diximus Saxonas, ejusdem tractus populos, circa annum Domini quadringentesimum & quinquagesimum, terræ Britannicæ dulcedine allectos, huc appulisse. Sed *Dani in Angliam veniunt.* nulla istarum gentium cum Danis comparanda fuit: Hii igitur, bis eodem anno, diuersis partibus, terram in Anglia ceperunt: alii ad Portlandiam, alii ad Humbri fluminis ostium; vtroque prædas agunt; sed quum latrocinii in modum, non belli more agerent, facile ad naues sunt compulsi; nec inde quicquam præter loci notitiam pro tempore retulerunt. Anno verò sequenti Lindisfernam intrarunt, vbi Saxonas, qui tum rerum in Anglia potiebantur, graui prælio affligerunt; peracta verò cæde ad mare reuerfi Occidentale Insulæ latus, Hiberniæ obuersum inuaserunt. Vbi cum Britannis Indigenis conjuncti, aduersus *Egbertum* Saxonem, primum Angliæ Monarcham, magno, sed luctuoso, Britannis simul & Danis, prælio depugnarunt. Veruntamen anno sequenti auctis classibus Thamesim fluuium, & *Sceppiam* in eo insulam occuparunt. Indè Londino vrbi, Cantique prouinciæ graues incubuerunt. Sed indè tamen, *Egberti* viribus ejecti, breui abierunt. Frustrà ego omnes Danorum in hanc insulam nostram appulsus, & impetus commemoraue-
rim; erant enim, vt non magni, singuli, ita omnes numero infiniti, nec vllus regni porticulus erat, in quem illi nauibus nunc pluribus, nunc paucioribus non appellerent. Sed sub annum

Domini octingentesimum tricesimum octauū, regnante tum *Ethelwolpho Egberti* nepote, rursus Thamesim cum trecentarum quinquaginta nauium classe subierunt; incensisque omnibus quas adibant urbibus, in ipsa insulæ viscera penetrabant, omniaque ferum in modum ferro & igne depopulabant. Vno tamen prælio fracti, ad mare classenque suam veluti ad natale solum se receperunt; auctioribus mox copiis reuersuri. *Etheldredo* enim, *Etheolfi* filio nati minimo regnante, sub annū Salutis octingentesimum sexagesimum sextum, cum classe ingenti ad Orientale insulæ latus, Ducibus *Hungaro & Hubba*, appulerunt: nec minoribus copiis, alia ejusdem gentis classis Occidentalem insulæ partem sub *Seerego & Haldeno* Regulis occuparunt. Hii junctis copiis *Etheldredo* bellum, de totius insulæ gleba decertaturi, intulerunt; cruentaque prælia diuerso euentu depugnata, quorum altero Danorum Regulus *Haldenus*, altero *Etheldredus* Rex anno Domini octingentesimo septuagesimo secundo occubuerunt.

Cap. 23.

*Belli inter
Venetos &
Gallos
causa.*

Verum ut ad *Carolū* Occidentis, ut tum vocari cœpit, Imperatorem redeam; is Imperium adeptus, & extincto Longobardorum in Italia regno, confestim in Germaniam abijt, filiumque *Pipinum* Italiæ Regem dedit. Is Venetis bellum intulit. Belli causa hæc erat: Diuiso inter *Carolū* & *Nicephorū*, qui dejectæ *Ireni* in Oriente successerant, Imperio, Sicilia aliæque insulæ Italiæ conterminæ, cum toto illo Italiæ angulo, qui Græciam spectat, Imperio Constantinopolitano cessit. Solis Venetis

tis cautum est, *ut neutri Imperio accenserentur*, sed liberum illis cum utroque commercium esset. Verùm quum vrbs ipsa mercaturis faciendis staret, brevī temporis curriculo perspectum est, ciues ipsos promptioribus in Græcos, quam in Gallos animis propendere. Qua re animaduersa, non deerant qui calumniam hanc ad *Cārolum & Pipinum* filium deferrent. Sed crimen hoc apud patrem, consilio & annis maturum, missi Legati facilè diluerunt. *Pipinus* & natura & ætate, & regia insuper dignitate ferox, nihil eorum, quæ vel ad defensionem, vel ad excusationem afferebantur, admittere; nec Venetos posthac pro *neutralibus*, seu communibus amicis, sed, ni imperata facerent, pro hostibus habendos esse dicere. Classẽ indè apparat; idem & Veneti magnis animis faciunt, & è vestigio Legatos ad *Nicephorum* auxilia petitū mittunt. Is beneficii à Venetis olim ad *Rauennam* accepti memor classẽ instructissimā subsidio mittit. Sedes Ducalis eo tempore *Metamanci* erat. Quam quum *Valentinus* Dux aduersus tam potentem hostem parū in se firmitatis & præsidii habere cerneret, sedem ipsam indè ad *Rialtum* transtulit. Quod vt ad summam rerum, summo consilio factum erat, ita partibus exitium in præsentī attulit: statim enim, quotquot in *Rialtum* veluti in arcem & *Capitolium* cum Duce confugere non possent, desperata salute *Gallo* se dedunt. *Pipinus* quam facilè cæteras omnes insulas occupauit, tã difficilè *Riali* obsidionẽ fore videns, multa variaq; consilia animo agitabat; ante omnia comœatu

excludere parabat. Sed tot flumiina in stagnum illud, ubi sita est vrbs, irrumpentia, victum aliaque bello necessaria ex omni circumjecto litore abundè suppeditabant. Nec classẽ *Pipinum* partiri, & ad singulorum fluuiorum ostia per stationes distribuere audebat, ne Veneti, sic diuisas carperent, & vniuersæ classi exitium afferrent. Placuit igitur per Legatos de pace agere. Cujus mentionem Veneti non libentibus modò, verum etiam auidis animis arripuerunt; vt si nil aliud, tempus saltem, quo classis Nicephoriana appelleret, lucrarentur. Sed quum missi à Venetis Legati ad *Pipinum*, de pace acturi, accessissent, ille eos, *ad pacemne petendam, an ad urbem dendam venissent*, ferox interrogabat: at illi, nos verò ad pacem, inquit, ô Rex, idque æquis conditionibus faciendam venimus. Qua fiducia & libertate offensus iuuenis, *Bellum igitur parate, inquit, fortunam, quam fors dederit, habituri*. Feruntur & abeuntes à Gallis irrisi, & quod in mari degerent, *Piscatores* appellari. Legati quum reuersi non pacem se, sed bellum à *Pipino* afferre pronuntiassent, accipere se omnes respondebant, sit timque per vicos ad arma discurrunt, veluti illa ipsa hora cum hoste congressuri. Sunt qui tradunt, *Pipinum* ab Heraclia ad Rialtum pontem, trium millium spatio, lintribus doliisque confertis struxisse; pontem verò ipsum, quà vi ventorum, quà hostium impulsu, diffractum Gallo stragem dedisse aiunt. Nec à veri similitudine abhorret, *Gallum* copiis & omni apparatu bellico abundantem ejusmodi quid aduersus urbem,

urbem, in stagno lato magis quam alto positam, tentasse. A quo tamen incœpto maturè destitit, & ad pugnam naualem cum hoste conferendam se vertit; idque Veneti lætis oculis viderunt, utpote qui summam & ipsi in usu nauali spem & fiduciam positam haberent. Itaque omnes, qui per ætatem arma ferre possent, Ducis Imperio convenire iussi: deducuntur inde naues, totique classi præficitur Victor ex Heraclia vrbe oriundus; vir animi ferocia Gallo quam Italo propior, sed usu maris & scientia nauali præcipuus. Is pridie quam confligendum esset vniuersum exercitum naualem, de Ducis licentia, in Rialtum conuocauit, orationemque ad eos habuit; qua, quum causæ primùm suæ iusticiam, hostium injuriam, superbiam, perfidiam, & insolentiam multis verbis ob oculos proposuisset, eo tandè descendit, ut ex comparatione virium fiduciam suis faceret. Cum eo nimirum, inquit, hoste res in mare erit, qui mare vix vnquam antè vidit. Nostri certè stagni vada, canales, flexus, circuitus, & Mæandros notos non habent. Nam quod nos homines superbissimi per ludibrium & contemptum *Piscatores* vocant, faxo, vos modo adniti mini, ut nos noui geueris piscatores esse sentiant. Harpagonas pro hamis injiciam, hiisque vadis veluti retibus inclusos capiam, & vel viuos vinctosque ad terram traham, vel mortuos piscibus, & monstris marinis deuorandos tradam. Ite, corpora curate, animos ad imperia, quod in hiis angustis necessum est, subita accipienda intentos, & ad omnia pericula, non in

Pugna navalis inter Venetos & Gallos.

vxorum

*Pugna na-
uilis.*

vxorum & liberorum vestrorum magis, quam in ipsius patriæ conspectu subeunda, paratos habetote. Quæ omnia, tam excelsa elatoque ex fiducia, siue vera illa, siue simulata, virium amo loquutus dicitur, ut ex toto exercitu nemo esset, qui non certam victoriæ spem animo præciperet: *Duceret, jubent; Se sequuturos; & nomen Venetum, vel vita, vel morte, si non inuidum, at ad posteros memorabile & clarum facturos vount.* Postero die Pipinus Comaclo egressus classem explicuit. Idem Victor summa cura facit, leuioraque nauigia veluti velites in fronte locat. His imperat, ut hostem laceffendo, & subindè refugiendo, & metum simulando in breuia pertrahant: *Pipinus* contempta nauium paruitate, & verè piscatores Veneros appellari, qui cymbis ad pugnam conferendam prodirent, jactans, gressum infert. Veneti, ut imperatum erat, ubi prima tela emisissent, veluti inipares, & fugam simulantes, retrocedunt. Tum Galli sublato clamore fugientes insequi, & locorum ignari, in breuia ferri. *Victor* ubi totam Gallorum classem vadis penitus implicari vidit, & recedente jam aestu, alias hæere, subsidere alias, aquarum penuria omnes laborare sensit, suis signum dat. Illi seruatîs ordinibus, ut locorum gnari, & leuioribus vsi nauigiis, hostem circumstunt, fundisque & telis, & scorpionibus incessunt, missiliumque multitudine vniuersos obruunt. Tum harpagonibus injectis ollas picis liquidi & calcis desuper infundunt; quo factum est, ut Galli in tabulatis suis stantes, gressum prælubrico

brico figere non possent. Itaq; à pugna in rabie vertuntur Galli, & omnia mala piscatoribus precantur. Infandū! hīc naues flammas correptas, ibi in latus reclinatas, illas aquis haustas, has ad Venetas religatas, & ad Rialtum abstractas, & diffractas cerneret; ingens vis hominum vel ferro, vel flamma, vel aquis perit; vixque ipse *Pipinus*, ex naui grandiore in scapham defiliens, periculo ereptus Comaclum refugit. Hæc pugna nomen Venetum ad omnes *Venetorum* gentes celebre effecit, ferocemque *Pipini* animi *aduersus* mum, ad pacem æquis conditionibus sancien- *Gallos in* dam mouit. Superuenit pugne classis à *Nice-* *maris victo-* *ria.* *phoro* in subsidium Duce *Cessberano* missa. Veneti quum *Cessberanum* Sinum Adriaticum ingressum esse intellexissent, expeditissimam suæ classis partem in occursum mittunt, veriti nè altera *Pipini* classis, quæ in sinibus Illyrici stationem habuit, vim sociæ classi inferret; Galli verò, quum & infelicitis ad Venetias pugne famam, & Venetorum insuper classem *Cessberano* suppetias laturam cursum intendere accepissent, veriti nè in medio deprensi opprimerentur, maturè in altum se proripuerunt. Veneti quum *Cessberano* congressi, gratias & Imperatori, & ipsi Duci, quod sua salus utrique curæ fuisset agunt. Intus tamen & in sinu lætabantur, quod post pugnam transactam, & victoriam à se partam aduenissent; satis persuasi, si Græci in tantillam laboris partem venissent, victoriæ laudem, quæ jam tota sua erat, cum illis communicatā, non integrā ad se peruenturam fuisse *Pipinus* classis alterius submersæ, alterius

rius fugatæ sensu percitus, vrbes à se priùs captas, sed hætenùs seruatas, diruit, Albiolam, Palestrinum, Fossam Clodiam, Brundulum, Metamancum, Forsitan & Heraclia, &, quam Iesulam nunc vocant, Equilium, non suo olim, sed comuni hoc Venetarum vrbiù incendio, deflagrarunt; idque dubio seposito verum est, si, quod plerique scriptores volunt, semel tantum *Pipinum* Venetis bellum intulit. Incidit autem hoc prælium, & ex eo pax, in annum conditæ Venetiarum vrbs trecentiesimum quinquagesimū, anno verò Salutis nostræ octingentesimum circiter & quintum. *Nicephoro* enim adhuc superstite, quod omnes fatentur, pugnatum est; *Carolus* autem sub finem anni octingentesimi Imperator declaratur: anno verò sequente, dejecta *Irene*; *Nicephorus* Orientis Imperium accepit, in quo vltra quadriennium non duravit, sed in prælio contra Bulgaros commisso cecidit. Ex quo fit, vt infra annum quintum supra octingentesimum, pugnam hanc commissam esse necesse sit. Certum enim annum, nedum diem, huic pugne adiectum non inuenio. Veneri tantis successibus elati sedem Ducalem in Rialto insula publico decreto statuunt, palatiumque Duci, Regum ædificiis vel materia, vel opere par struendum curant: Sexaginta verò Insulæ, quæ Rialtum vt ancillæ dominam circumstant, tum primùm pontibus, vt nunc visuntur, jungi cœptæ. Hæ simul sumptæ amplissimam urbem, quam propriè Venetias vocant, faciunt.

*Venetiarū
vrbs.*

Cap. 24. Sub hoc ipsum tempus præliis naualibus toto orbe

orbe pugnatum est. *Gothofredus*, Danorum Rex, cum ingenti classe in Frisiam venit. Aduersus quem mouit *Carolus Magnus*; sed priusquam in conspectum venit, *Gothofredum* à suis interemptum, & Danos, relicta Frisia, ad suos rediisse allatum est. Saraceni verò, arrepta ex diuisione Imperii occasione, omnes Christianorum terras variis incursibus infestarunt. Nihil ego hoc loco de *Aurone*; qui cum tercentum milibus hominum in Asiam irrupit, & ipsum *Nicephorum* ad iniquissimas, quod antè diximus, pacis conditiones egit referam. Pudeat modo *Blondum*, aliosque Historicos Latinos omnes, afflictum hoc tempore orbis Christiani causam in *Nicephorum* rejicere; nisi fortè Fimbriam ei litein mouere libet, quod totum telum corpore non recepisset, nec Dalmatiam, Calabriaque, & Sicilia, post reliquam Italiam, ultro priuari se sustinuerit. Misit itaque *Nicephorus* classem; quæ, mare inferum ingressa, Populonium, urbem in eo littore positam, vi cepit; nec ultra injurias suas persequi, propter perpetuos Saracenorum in omnes Archipelagi insulas incurfus, licuit. *Pipinus* verò, omissis Venetis, Mauros, hoc est, Saracenos ex Africa venientes, missa classe, è Corsica, quam tenebant, depulit. *Ademarum* Genuæ Comitem ad id bellum missum aiunt, qui ferociter; magis quam prudenter & cautè in hostem pugnans cecidit. Nec tamen, ut fere fit, ad Ducis casum, perculsa magis quam irritata est multitudo omnis. Itaque non prius incæpto destiterunt, quam Saracenos ex insula penitus deiecissent: paulò post, & alia Saracenorum ex Hispania

Hispania classis Corsicam & Sardiniam eodem tempore aggressa utramque vi cepit: contra hos missus à *Carolo Pipini* patre *Buccaredus* Comes, prælio nauali cum hoste circa Sardiniam felici euentu conflixit: in hac pugna quinque Saracenorum millia amissa; iterum ad Corsicam pugnatum, & Saraccenos magna parte classe exutos ferunt; veruntamen quum omnem à Marsylia ferè per Hispaniæ, Africæ, Ægypti, Syriæ & Asiæ circuitum & Hellepontum usque, oram Imperio tenerent, nec mare ipsum, nec vrbes ad mare positas, à latrociniiis momento temporis quiescere passi sunt, nosque in sequentibus quæ memoria digna videbuntur breuiter tradituri sumus. *Nicephoro* verò Imperatori in prælio aduersus Bulgaros cæso, dejecto ejus filio *Staurasio*, successit *Michael Curopalatus*; is fœdus cum *Carolo* à *Nicephoro* de finibus Imperii percutsum renouauit. Sed in eo Venetis expressè cautum est, ut in Imperii Orientalis partibus censerentur, quo factum est ut nunquam deindè Occidentalis Imperii jura Veneti recognoscerent. *Curopalato* defuncto successor datus est *Leo Armenius*; quo sublato Imperiū inuasit *Michael* cognomento *Bilbus*, anno à *Caroli* inauguratione decimo secundo, quo tempore Saraceni, qui Africam tenebant, in aduersam Siciliam, ut olim Pœni semper facere consueuerant, trajecerunt. Et primum littoralia omnia vastant, prædasque agunt, villisque & agris flammam inferunt; mox ipsum *Panormum* occupant. Quam sedem belli quum constituisent, indè omnem Siciliam diris populationibus

tionibus infestam reddunt. Siculi tanto miseriarum cumulo oppressi, gentes omnes Christianas legationibus ad opem ferendum fatigant :

Erat eo tempore quidā nomine *Bonifacius*, Cap. 25.
Bonifacius. •
 Corsicæ Comes, à *Carolo Magno*, post Saracenos ultimò indè expulsos, constitutus. Is, Siculorum misertus, quū, quam petebant, opem ferre non posset, aliud animo agitare cœpit, & repetito veteri illo *Agathoclis* tyranni Siculi exemplo, cum *Bertario* fratre, aliisque magni nominis Ducibus classem contrahit, & in ipsam Africam transmittit; fore ratus, ut populationibus & incendiis fatigati demum Mauri, copias suas è Sicilia ad sua tuendū reuocarent. In Africam quum venisset, expositis militibus, Uticæ primū, deindè & Carthaginis juxta stantis muros inuasit, vrbesque incendit. Concurso igitur ex omni Africa ad hoc incendium restinguendum facto, *Bonifacius* magno animo, nec minore successu cum hoste terrestri prælio congressus, eos impetu ferocissimo vicit, fugauitque: quumque Saraceni bellum à terra in mare transtulissent, & quater totis viribus inter Uticam & Carthaginem conflixissent, *Bonifacius* ex singulis præliis egregiam victoriam retulit; tantam verò stragem terra marique dedit, ut Saracenorum Armirathes copias ex Sicilia, ad Carthaginis & Africæ tutelam, propere reuocaret. Ita tota Sicilia decessum, & Panormus vrbs Siculis restauranda traditur. *Bonifacius* verò, quum, quod quærebat, Sicilianis Saracenis vacuum, pristinis Dominis restitutam esse comperisset, successu lætus, exerci-
 tum

*Bonifacius**Sabbas Sa-
racenorum
Dux.**Trudonicus
Venetiarius
Dux.**Venetorum
clades.*

tum cum præda nauibus impositum in Corsicam reduxit, ingentemque inde laudem apud omnes gentes parauit; verè ut eum nomini suo respondisse, & ex rectè factis *Banifacii* nomen indeptum fuisse dicerent. Nec diu Saraceni in Africa quieuerunt; Anno enim sequente *Sabbas* Ducem cum numerosissima rursus classe ad Siciliam repetendam mittunt. Quare percepta, *Michael*, cognomento *Balbus*, classem sub *Theodoro* Præfecto (alii *Theodosium* vocant) ad Saracenorum conatibus obsistendum misit. *Theodorus* quum Saracenos numero longè præstare cerneret, viribus suis diffusus Venetias se confert: Dux illo tempore *Trudonicus* erat. Hunc rogat, obsecrat, & obtestatur, ut pro vetere inter Dominum suum, & urbem illam amicitia, se classe aduersus Saracenos adiutum velit. Veneti sexaginta triremes, sine mora è naualibus eductas, armis, milite, commeatu, affatim instructas præbent. Quibus fretus *Theodorus*, quum jam eum virum suum non poeniteret, Siciliam petit; ex itinere in sinum Tarentinum quâ quâ de caulis diuertit. Quo cognito *Sabbas* Crotoniatum litus legit. Quumque in vicino classes starent, eos ad certamen, neutra partium id quærente, casus, qui consiliis sæpè plus potest, traxit. In quo Christianorum classis grauiter afflictâ est: Venetorum ad vnam omnes fortissimè præliantes vel mersæ, vel captæ sunt. *Theodorus* tota classe, quam Constantinopoli aduexerat, amissa, vix fuga salutem quæsiuit. *Sabbas* hac victoria elatus, quum nullum amplius in mare hostem, quem timeret, superesse

superesse confideret, Dalmatiam oram in opposito littore sitam appulit. Austense oppidum vi caprum diripit: naues Venetas complures è Syria redeuntes, & mercibus onustas in ipso maris sui ostio intercipit, homines verò ad vnum omnes in illis reptos (memor qua pertinacia gens illa in sinu Tarentino modò purgauerat) jugulari mandat. Indè Anconam urbem in littore Italico sitam capit, diripit, incendit. Interim Venetiis trepidatum, timore incusso, ne Sabdas urbem nauium præsidio nudatam eodem impetu adoriretur. Sabdas verò rebus omnibus incredibili successu & celeritate confectis, ommissa ad quam expugnandam venerat Sicilia, nec Venetiarum vada tentare ausus, in Africam gloria opibusque plenus redit. Quibus rebus incensi statim aliorum ejusdem terræ Saracenorum animi, cum ingenti hominum multitudine Siciliam inuadunt. Id verò non temerè, nec latrocinantium more, sed à Duce suo cum justo exercitu eo profecto, & ad ipsam insulam Imperio Saraceno adjungendam misso tentatum, & graui Christianorum flagitio primùm, mox damno gestum est. Rei verò gestæ modus à me nunc paucis referetur. *Michael*, què dixi, Imperator quendā nomine *Euphemium* legatū in Siciliā ad Saracenorū impetus coercendos miserat; idq; *Euphemius* non instrenuè, quo tempore *Bonifacius* Africam bello petebat, fecerat. Saracenis verò in Africam, metu *Bonifacii* reuocatis, cepit *Euphemius* flagitiis nequiter indulgere: Quumque libidini effusiùs dederetur, spretis

*Sicilia à
Saracenis
per quam
causam oc-
cupata.*

aliis in virgine sacrata oculos defixit, sacrarioque extracta ad libidinem explendam abutebatur. Habuit ea virgo duos fratres, bonæ imprimis indolis, & vindictæ, si possent, jure, si non possent, manu armata sumendæ avidos. Placuit igitur jure prius experiri. Itaque querelam ad loci Magistratum deferunt. Magistratus factum damnare, sed nihil in se opis, aduersus Legatum legionibus succinctum esse, dicere. Ab eo igitur rejecti ad Imperatorem querébundi vadunt. Id primùm *Euphemia*, quandoquidem ipsum Imperatorem idem non ita pridem factitasse, & virgini Deo sacræ pudicitiam per vim rapuisse neminem latebat, ridiculum videri; nec aduertit imprudens, multa reges ipsos peccare solitos, quorū nihil priuatis impunitū esse volunt. Quū verò litteris à Constantinopoli ad se datis, Imperatorē duorū fratrum querelā non auribus modo, verum etiā animo admisisse, accepisset, ne illud quidem magni faciendū existimabat. Quum verò alteris litteris, aliis super aliis missis, cum de vindicta sumenda rationem seriò iniisse, & loci Exarcho, ut fontem in vincula conjiceret, mox naribus præcisus, tota vrbe spectandum traduceret, traductumque morti traderet, mandasse intellexisset, desperata venia, nec salutem nisi ab extremo remedio petendam ratus, audax & impium facinus aggreditur. Militum animos, quā licentia, quā beneficiis sibi antè deuinxerat. Hos nunc ad concionem vocat: eorūdem & priuatim suam, & communiter omnium, Exarcho ab Imperatore, prolatis, quas ipse confinxerat,

rat, tabellis, mandatam esse docet. Hortatur
 ut rem ideò justam quia necessariam fortibus
 animis aggrediantur; ut Exarchū primū sup-
 plicii ministrum, deindè & ipsum Imperatorem
 è medio tollant; sibi & illis sic factò esse opus.
 Milites, factò ab illis qui ad hoc antè educti &
 instructi fuerant initio, vna voce consilium lau-
 dant; Exarchum furibundi ad necem quærunt,
 ipsum verò *Euphemium* Imperatorem vocant.
 Idem non Syracusæ modo, verumetiam reli-
 quæ ferè omnes Siciliæ ciuitates faciunt. Quæ
 res quum ad *Balium* relata essent, confestim ille
 de exercitu in Siciliam mittendo agit; copias
 que summa diligentia contrahit. *Euphemius*
 quum se tantis viribus parem non fore animo
 prospiceret, aliunde auxilium quærendum
 censuit. Legatos igitur ad *Abrahamum Halbi*,
 Saracenorum in Africa Armirathū vnum, ad
 subsidia hac lege petenda misit; ut ipse Græco-
 rum Imperator, *Abrahamus* verò totius Siciliæ
 Rex esset. *Abrahamus* legatum laudat, seque
 in tempore affuturam spondet. Et confestim
 classeni quadraginta armatorum millibus in-
 structam *Halcamo* Saraceno, viro strenuo, impi-
 gro & multis egregiisq; aduersus Christianos
 facinoribus insigni Duçi, ad Siciliam occupan-
 dam mittit. Is Susa maritimo regni Tunetensis
 oppido soluens, tertio die ad Siciliā applicuit,
 militeque in terram, nemine impediēte, per o-
 rtium exposito, classi ipse suæ incendium immi-
 sit. Qua veluti tessera intellectum est, non præ-
 dam jam ex ea terra, sed ipsam terram pro
 præda peti. Venientem *Euphemius* benigne

*Halcami
Saraceni
fuerunt.*

*Euphemius
caesus.*

*Sicilia per
ducentos
& amplius
annos à Sa-
racenis in-
fusa.*

accepit; isque vicissim *Euphemium* Imperato-
rem salutat: junctis viribus Selinuntem pri-
mò, mòx reliquas insulæ ciuitates multas vi,
deditione plerasque capiunt. *Halcamus* Seli-
nuntios vi captos, viuos in ahenum coniectos
coxit. Quod tam efferum tamque inauditum
supplicii genus, Sicularum animos sic fregit, vt
paucæ admodum restarent vrbes, quæ se vel vi-
tro, vel primo hostium aduentu non dederent.
Omni igitur Sicilia, præter Syracusas & Tau-
rominium, in Saracenorû potestatem redacta,
Euphemius idmodò restare ratus, vt priùs quàm
Constantinopolim contenderet, Imperator à
Syracusarum etiàm vrbe appellaretur, eò cum
paucis venit; ibi inermis ipse sine copiis, sine
satellitio ciuium oculis obseruatur. Vique Im-
perator declarètur, non pro potestate, sed pre-
cibus, & argumentis à Saracenorum potentia
petitis, agit. Quod quum iuuenes duo, virginis
quam dixi stupratæ fratres, conspexissent, con-
tracto parium suorum, & vel sanguine, vel aliis
necessitudinibus junctorû globo, hominè factò
impetu medio foro obtruncant, recisumq; ca-
put *Michaeli* mittunt. Interim Saraceni Sicilia
vt suam possident, eamq; totos ducentos & tri-
gintà inde annos, cum ingenti Italiæ Græciæq;
incommodo, tenuerunt. Quam rem disertius
ideò perscribendam censui, quod & occupatæ à
Saracenis Siciliæ materia per se grauis est, &
Tho. Fazelus rerum Sicularum scriptor non
indiligens, quem hac in parte sequutus sum, se
primùm veterem receptumque Siculæ gentis
errorem ex *Johanne Europalato*; Græco illorum
temporum

emporum autore, sed qui paucorum manibus
volueretur, correxisse gloriatur. Sicularum e-
nim animis ea penitus infederat opinio, Sara-
cenos, quum hoc tempore Siciliam inuassent, à
Georgio quodam *Maniace*, (viro suo tempore
forti, & bellatore strenuo) statim ejectos Afri- *Georgius*
Maniaces.
cam repetisse. Atqui *Maniaces* ille res qui-
dem præclaras aduersus Saracenos in Sicilia,
sed diuersa planè ab hiis temporibus ætate, &
regnante demùm *Constantino Monomacho*, sub
annū Christi millesimum octuagesimum gessit.
Nam ad *Michaelē Balbum* quod attinet, ægrè
ille *Syracusas* & *Taurominium* aduersus Sara-
cenos in Sicilia hac tempestate tueri valuit.

Sub hoc tempus *Pipinus Caroli* Imperatoris Cap. 6.
filius moritur; In cuius locū *Carolus* suū ex *Pi-
pino* nepotē *Bernardū* Italici Regē dedit, & Sara-
ceni ex Africa *Corficā* insulā perpetuis incurssi-
bus inuaserunt. Et vir fortis nonnīne *Erminga-
rius*, majorē ex *Balearibus* insulā, quā *Major-
cam* nunc dicimus, pro *Bernardo*, valido præsi-
dio tenebat. Hic Saracenos in mari adortus,
magna vi pepulit, & quingentos Christiani no-
minis homines recepit. Saraceni pulsi ab *Ermin-
gario*, Italiam petunt. Centumcellas, urbem in
Hetruriæ littore positā, vi capiunt. *Narbonen-
sem* indè oram in *Gallia* populant, *Sardiniam*
reperunt. Ibi tum fortè idem *Ermingarius* e-
rat; qui contracta insulanorum manu, Sarace-
nos licentiùs grassantes subito ad naues compul-
sit: dumque naues tumultuosius conscendunt,
Ermingarius eos ad lassitudinem vsque contru-
cidauit. Saraceni, magna parte & classis &

exercitus amissus, trepidi in Africam redierunt; nec viuentem *Ermingario* quicquam ultra à Saracenis in mari Tyrrheno motum. In Oriente verò *Balbus* variis rerum procellis agitur: *Thomas* quidam, factione militum suffultus, purpuram induit, & Imperatoris copias variis præliis concidit, ipsumque tandem Constantinopoli inclusum terra marique oppugnabat.

Thomas
cum classe à
Balbo caesus

Balbus verò maritimis copiis fretus, *Thomas* classem semel iterumque graviter afflixit, & demum uniuersam igne Græco immisso penitus deleuit, rebellemque cepit & occidit. Jamque *Carolus* ille *Magnus* Aquisgrani in fata

Ludovicus
Caroli Magni
filius.

concefferat, & *Ludovicus* filius in Imperio successerat. Sensit autem Christianus terrarum orbis quantum vindicem amisisset, senserunt & Saraceni. Itaque *Haidoni* Aquitaniae Præfecto, *Ludonici* igniuiam pertæso, & aduersus Imperatorem auxilia flagitanti, subsidia cupidè miserunt. Hispaniarum Armirathes illo tempore

erat *Abdegamanus*: Is *Abumanem* consanguineum suum cum validissima classe misit. Saraceni per Oceanum inuecti, & cum *Haidone* iuncti, totam Barchinonensem regionem, & quicquid ad Garumnæ ripam situm est agri, Burdegalam usque & Tolosani, depopulati, ingentem inde prædam abegerunt. Parte verò alia, Italiae ferocius incubuerunt. Genuani primò, de-

Italia à
Saracenis
direpta.

indè Centumcellas vi capiunt; Indè citato agmine Romam petunt. *Fazelus* vrbe potitos ait: id *Sabellicus* falsum esse confirmat. Vaticanum tamen nullis tum munitionibus circumseptum, aut operibus firmatum diripuisse non negat.

negat. Barionæ templum, toto orbe augustissimum, ferro & igne deformarunt; proxima tecta diruunt, & suburbana omnia fœdum in modum depopulantur. Urbem ipsam oppugnare in animo habebant barbari: sed cum ex Gallia Cisalpina suppetias aduenire accipissent, eo incepto destiterunt: soluta verò obsidione, inter Appiam & Latinam vias omnia loca sacra juxta & profana rapina, sanguine, incendio fœdarunt. *Pauli* basilicam, *Hostiensis* via, secundo ab vrbe lapide positam, opibus & ornamentis, quibus maximè abundabat, spoliant; ignem deinde ipsi fabricæ injiciunt. Longum esset singula commemorare: sed *Liri* denique flumine, qui nunc *Garilianus* dicitur, ad dextram relicto, præda onusti mare repetunt, & classe recepti in Africam vnde venerant victores abierunt. Vnde è vestigio reuersi, *Syracusas* & *Taurominium*, *Siciliæ* vrbes, quas solas in fide Imperatoris mansisse diximus, obsidione claudunt: illæ *Paschalem* Pontificem, *Syracusæ* & *Paschalis*, *Ludouicum* Gallum, vt miseris sub-*Saratenis* uenirent, legationibus fatigat. *Ludowicus* *Siciliam* non ad se, sed ad *Michælem*, Imperatorem Græcum, pertinere respondet; dignam scilicet mercedem, quam translati nuper à Græcis ad Francos Imperii, Romani reciperent. Incidit autem illa Romanæ ditionis vastatio, in annum Salutis nostræ octingentesimum tricesimum tertium, vt author est *Sabellius*. Nec res Venetæ interim quiescere; inuâserat olim, viuentē adhuc *Carolo Magno*, Ducatum quidam nomine *Obelerius*: is metu partium in Galliam ob-*leuius*

transfugerat. Mortuo deinde *Carolo*, quum nullam in *Ludonico* spem haberet, res domi nouandas censuit; itaque Carictam insulam, quæ postea *Veglia* dicta est, occupat. *Johannes Partitiacus*, *Iustiniani* defuncti filius, Dux Venetus eò cum classe accurrit. Classi s magna pars Metamaucenses erant. Hii vt mos est populari suo (erat enim ex Metamauco oriundus) fauentes, ad *Obelerium* transeunt. *Partitiacus* subita Metamaucensium defectione commotus, missam *Vegliae* obsidionem in præsentem facit, & Venetias reuersus, nouas copias, & ab *Obelerii* factione integras, conscribit. Cum hiis cæsus profectus Metamaucū oppugnat, expugnatamque iu transfugarū odiū & inuidiam diruit & incendit. Inde ad *Vegliam* obsidendam redit; & quotquot Metamaucensium in potestate venerunt, cum ipso *Obelerio*, ultimo supplicio affecit. Hoc tempore Veneri res suas domi firmabant; tanta enim erat Saracenorum in mari potentia, vt Veneri illis occurrere non auderent; & ex vulnere in pugna *Sicula* non ita pridem accepta, tardiores ad bella foris gerenda incedebant. Veronenlibus tamen, aduersus lacus *Benaci* incolas, translatis in ipsum lacum nauigiis auxilia præbuerunt. Ne uè fenesceret per otium nauale Venetorum studium, à *Narentanis*, maris superi accolis, piraticis incursionibus subinde sollicitantur. *Narentani*, aduersis Venetorum casibus elati, ex *Dalmatia*, *Caprulas* vsque, ad *Limenis* fluminis ostium positas, prædabundi processere. *Trudonico* ab aduersa factione cæso, suffectus in Venetiarum

*Obelerius
rebellis sup-
plicio affe-
ctus.*

rum Ducatu est *Ursus Particiacus*, inuitus quidem: sed quam nolentè Ducatum recepit, tam strenuè eū fœlicitérq; & prudentèr gessit. Primoq; statim ingressu pacè cum Narentanis, siue piratis, siue justis hostibus (nec puduit obsides in eam rem dare) fecit. Viginti pòst *Saracenorū incursum.* annis, quam *Sabbas* memorabilem illam de Græcis & Venetis in sinu Tarentino victoriam parauerat, alia Saracenorum ex Ægypto clas- sis, Cretam insulam inuasit; quumque eam penitus possedissent, cum classe profecti, & sinum Adriaticum ingressi, Dalmatiam petunt; oram omnem maritimam populantur, & ipsam *Gradum* in Venetiarum conspectu positam adoriri parant. *Ursus* properè classem, quam magna cura multò antè parauerat, educit; secumque filium *Johannem*, egregiæ indolis adolescentem ducens, cum hoste manum conferturus proficiscitur. Hic alii pugnatum, alii sine pugna Saracenum trepidè aufugisse ferunt. *Bonitendus*, quem *Sabellicus* antiquorū omniū diligentissimum rerum Venetarum Scriptorem laudat, *Ursum* & ad *Gradum* hostes in fugam vertisse, & fugatos persequutum rursus in sinu Tarentino ad pugnam traxisse, & egregiè vicisse, & labem aduersa olim contra Saracenos pugna contractam ipso loco eluisse memorat. Quibus in præliis tanta vel patris, vel filii, vel vtriusque virtus enituit, ut Veneti, nec rogati, vno ore, filium patris in Ducatu collegam darent. Nec Narentani, gens latrocinii assueta, diù ab incursum maritimis quievere, sed Hi- *Narentani.* stros, Venetorum socios, terra marique aggrèdiuntur.

Saraceni à Venetis fugati.

diuntur. Histri ab *Urso* subsidia contra hostem communem petunt. *Ursus* triginta protinus triremes è naualibus eductas, aduersus Narentanos ducit, confertoque prælio egregiè vicit. Græcorum Imperator hoc tempore *Basilius* erat: Is res ab *Urso* aduersus Saracenos, gestas tam pio gratoque animo accepit, vt eum Imperii *Protospatharium* (quæ summa post Imperatorem dignitas habebatur) crearet; raro vt vllus Venetiarum ad illum diem Dux cum *Urso Particiaco*, vel virtute, vel felicitàte comparandus repertus fuerit. Ducatû hic decē & septem annos tenuit, & decedens *Iohannem* filium in Ducatu superstitem reliquit. Is *Comaclum* ex aduerso non procùl *Rauenna* positam vrbeni, si pax esset, oportunam, sin bellum, infestam, Reip. Venetæ adungere votis omnibus exoptabat. Quoque honestiorem rei consequendæ titulum haberet, fratrem suum *Bodoarium* ad Pontificem Romanû, auctor vt fieret, rogatum misit. *Comaclum*, rei Venetæ nempe partem olim fuisse: vt quid nunc diuerso jure censeretur? *Zachariam* Pontificem, *Pipino*, regnum Gallorum, detenso Domino, ad se trahendi autorem factum; quid ni & Sanctitas sua in *Comaclo* Reip. Venetæ adjungendo auctor fieret? Erat tum *Comaclo* Comes quidam nomine *Marinus*. Is *Bodoarium*, dum per agrum *Rauennatensem* transit, aggressus capit, & inter capiendum lethalitèr vulnerauit. Viuum tamen Venetias remisit, pactum priùs ne de re *Comaclina* legationem vltrà obiret. *Bodoarius* Venetias reuersus ex vulnere moritur.

Cujus

Comaclum
Venetis ad-
junctum.

Cujus necem *Johannes* vlcisci volens, validam statim classem parat, Comaclumque à mari inuadit, & capit, & in eos, qui fraterum cædis conficii fuerant, ut fratrem decebat, sæuit. Urbi deinde validum præsidium imponit, & cum reliquo exercitu progressus, Rauennatium, quos eadem cæde respersos compererat, agros, cum hominum pecudumque strage dirum in modum depopulatur: inde Venetias voti compos redit: quumque paulò post in aduersam valetudinem incidisset, consensu populi, fratrem suum *Petrum* successorem nominauit. Sed quum ipse præter spem conualuisset, ne frustrà successor datus videretur, *Petrum* populus *Johanni* collegam dedit: *Petro* verò infra paucos dies mortuo, fratrem alterum *Petro* natu majorem, nomine *Ursus*, in Ducatus societatem cooptauit: *Ursus* verò oneris pertæsus, non ita multò post, Ducatu se abdicauit. Cujus exemplum sequutus *Johannes*, facta populo potestate, nouum quem vellet Ducem creandi, ipse etiam Ducatu abiit, Populus *Petrum Candianum* ei surrogauit: Ducatus insignia *Johannes Candiano*, populo spectante, tradidit; quo facto in priuatas ædes secessit. *Candianus* Na-

Candianus
Dux Vene-
tus à Na-
rentanis
prælio na-
ualis cæsus.

rentanos in mare græsantes cum duodecim triremibus adortus, ad pugnam ineundam co-

git, in qua superior aliquandiù fuit. Sed quum pugna in ipsa Liburniæ ora ad Miculum promontorium committeretur, atque inter pug-

nandam nouæ semper Narentanis superueni-

rent copię, *Candianus* mole magis & multitu-

dine, quam virtute hostium oppressus, cecidit:

quo

quo casu perculsa ciuitas, *Johannem*, qui Ducatu abierat, instanter rogant, ut Reipub. tam sæua tempestate afflictæ gubernaculo manum tantisper admouere vellet, dum de nouo & idoneo Duce substituendo ratio iniri posset. Post aliquot igitur dies, *Petrus* cognomento *Tribunum* Ducem creant, rursusque *Johannes* magistratu se abdicauit; gloriosius ratus, summo magistratu semper dignum censi, quam perpetuo frui. Narentani successu elati urbem ipsam perpetuis incursionibus fatigant; ipsis tectis ferrum, flammam, exitium denique inferre parati, *Tribunus*, quæ urbs periculo maritimo maximè exposita videbatur, murum duxit. A muri verò angulo, qui *S. Georgii* fanum spectat, catenam transversam, ad subitos hostium inpetus frangendos, tendit. Rarè vlla ciuitas tot difficultatibus eodem tempore laborauit. Hinc Narentani piratæ, inde Saraceni cum *Ægypto*, alii *Africa* profecti, alii suis quique classibus & exercitibus terribiles instabant.

Venetiarii
statu.

Cap. 27.

Sed hiis omnibus potentior Hunnus, nouo milite, vetere fama subnixus, terrorem iniecit. Enimuero, perinde ac si *Attila* à mortuis reuixisset, gens Hunnica *Auarica* permixta, & vno ex duobus confuso nomine Hungari tū primū appellati, finibus suis egressi, alii Germaniam omnem ad Oceanū vsq; hoc tempore vastabant, alii Danubio ad dextram relicto trita à maioribus suis via per vallem *Telinam* in Italiam descendunt. *Berengarius* hoc tempore Imperiū in Italla tenuit, *Caroli* enim *Magni* domus nepotū discordia

discordia Imperii titulum amiserat. Is prauo
 vsus consilio, cum quindecim millibus homi-
 num, Hungaris, supra Carnorum fines venienti-
 bus, in acie occurrit: sed fusus fugatusque ho-
 sti animos auxit, Italos verò omine (quod ex
 primo congressu ferè capi solet) non minus
 quam clade terruit. Auxit insuper formidinem,
 quod cætorum cadaueribus hostes vesci dice-
 rentur. Jamque Mediolanum petituri erant,
 quum ciuitatis Venetæ & diuitiarum ejus fa-
 mia barbaros ad eam oppugnandâ traxit. Lem-
 bos igitur ex virgultis confestim texunt, eos
 coriis inducunt. Quibus freti sparsas per stag-
 num insulas minores primo impetu expugnant;
Heracliam (quæ post *Pipini* tempora magnifi-
 centius restaurata *Ciuitas noua* vocari cœpit) vi-
 capiunt. Inde *Jesulam*, *Clodiam*, Caput agge-
 ris, inuadunt, quo latior & liberior ad *Rial-*
tum oppugnandum via fieret. *Tribunus* (hic
 is est, quem vulgò *Tronum* vocant) quanto
 in periculo res Veneta versaretur videns, clas-
 sem magna cum cura parat; eam sociis nauali-
 bus militibusque seuerissimo delectu instruit.
Hunnus, præter ingentem lintrium scediarum-
 que, quas ex vicinis syluis temerè confectas in
 mare deduxerat multitudinem, magnū insuper
 nauigiorum, ex insulis quas ceperat, numerum
 comparauerat; tanta autem fuit, veriusq; gene-
 ris vis, vt, præ nauium multitudine, stagnū suum
 Veneti ex *Rialto* magno spatio vix videre pos-
 sent; *Hunnus* vada metuens, more minimè bar-
 baro leuibus primū præliis hostem tentauit,
 vt sui, parta primū locorum notitia, maiore
 fiducia

fiducia hostem adorirentur. Idq; quā aliquor
dies fecisset, tandem cum vniuersis copiis in a-
ciem descendit. *Tribunus*, pridie quam pugna
futura erat, Nauarchis cum magistris, & primæ
notæ militibus ad se in Rialtum vocatis, orati-
onem habet rei & tempori convenientem;
Qua virtute maiores sui illo ipso in loco *Pipi-
mum* Regem eadem, quæ nunc Hunnus, temere
tentantem semel iterumque fregerant, in men-
tem reuocat. Ea omnia, quæ pro Venetis tum
stabant, nunc etiam stare; nauium genus, rei
naualis vsum, locorum peritiam; quæ verò
Gallis illo in prælio contraria erant, ea Hun-
uis vel tantundem, vel maiorem in modum
nunc aduersari. Gallū classem sat firmam ha-
buisse, hos lintres vimineos plerosque, & co-
rio inductos, ipsa lenitate ad consistendum,
quanto magis ad pugnandū instabiles habere;
vi & labore & concursu ad illa perrumpenda
fuisse opus; lintres istos, digito si tetigeris, sub-
uertī. Nam ad vadorum notitiam quod attinet,
satis hos ignorantiam suam, leuibus præliis ex-
periundo, & veluti in tenebris palpano, pro-
dere. Animis modo iisdem nunc opus esse, quī-
bus maiores suos vfos esse accepissent; quan-
quam de gloria cum Gallis & libertate certan-
dum esse. Itaque ad pugnam forti animo, vbi il-
luxerit, ineundam se pararent, suumque Ducem
intuerentur: fugiat, inquit, quicumque me ce-
dentem videt: subeat vos eadem, quæ me
jamdudum subiit, cogitatio; hocque apud
se quisque statuatur, nisi victoribus ex pugna

non esse redeundum. Inde quisque digressus, se ad ultimum discrimen parat. Si Deus Venetias tam foelicibus auspiciis conditas, tantisq; rebus hætenus gestis prouectas diutius stare nolit, se tamen foelices, ante patriæ casum occubituros. Sin sua morte victoriam vrbi Venetæ pepererint, quanto gloriosius debitum patriæ per virtutem, quam naturæ per ignauiam spiritum reddituros: victoriam tamen omnes non precari modò, verumetiam sperare, & certa fiducia præconcipere; nunquam Deum tam insensam sibi rati, vt quos Gallorum furore liberauerat, eos rabiei Hunnicæ perditos reseruaret. Hunnus, vt constituerat, prima aurora classem, in quam longè maiorem exercitus sui partem constipauerat, educit, spatiumq; omne inter Albiolam & urbem multitudo suorum implet. *Tribunus* Ducalibus insigniis conspicuus prætoriam conscendit, se tamen intra vada tenet, pugnamque lenibus velitationibus tantisper trahit, donec, æstu recedente, vada breuiora fierent. Tum, signo dato, in confertissimas hostium naues infertur. Prima cura fuit, vt firmiora hostium nauigia vel auerteret, vel opprimeret; idque igne injecto maxima parte faciebat. Tela simul omnis generis grandine densiora volabant; quibus territi hostes, locoque moti, in vada præcipites incidebant. Quo conspecto, clamor ingens non à classe modò, verumetiam à Rialto, quam moestum hætenus ex metu silentium occupauerat, exoritur. *Tribunus*, de victoria jam securus, ad stragem vertitur; quaque vada patiebantur, in lintres

Pugna navalis Venetorum contra Hunnos.

cum

*Venetorum
de Hunnis
victoria
navalis.*

*Tribuni
laus.*

cum tota classe incurrit. Hos primo statim non impulsu sed contactu evertit, multaque simul hominum millia in mare effudit. Quod si in quas transuersus incideret, eas totas cum milite vno impetu depreffit; vix vt vlla memorabilior, vel victoria, vel pugna in mare contigerit. De cæsorū numero nihil proditum inuenio; insignem fuisse ex eo constat, quod Hunni ea clade affecti, retrò trepidè abierunt. Interim magna erat *Tribuni*, & gentis Venetæ, non in Italia modò, verumetiam apud omnes populos gloria, *Tribunum* Hunnum hostem, cui cessit *Berengarius*, sustinuisse; & à quo victus hic sit, illum profligasse memorabant. Venetos autem vallum & propugnaculum Italiæ (nec immeritò) appellabant. Pugnam verò hanc, cum *Victoris* sui nuper contra Gallos, cum *Martelli* aduersus Saracenos, cum *Ætii* olim aduersus eosdem Hunnos, consertam omni genere vel laudis, vel felicitatis æquabant. Adeoque hæc laus Venetis illo tempore inuidiæ non erat, vt ipse *Berengarius*, quem ab hiis iisdem Hunnis victum & profligatum fuisse diximus, *Tribunum* summis vbique laudibus absentem efferret.

Cap. 28.

Narentani.

Hunnico metu depulso, subierunt rursus Narentani, gens Liburna, & ad latrocinia maritima omni ætate assueta: Hii *rupto*, quod cum Venetis pepigerant, *scdere*, in Mercatores toto primùm sinu Adriatico grassari, mox in ipsam urbem cum tumultu sæpè incidere ausi, causam patribus bellum indicendi præbuerunt. *Vrsus Bodoarins*, Dux *Tribuno* suffectus, ad hoc bellum instructa classe proficiscitur: Narentani
suis

suis viribus diffusi, pace inpetunt, eam Veneti ^{Narentani}
 duris, sed justis conditionibus reddunt; ut dam- ^{pax data.}
 na, quæcunque ad id tempus Venetis intuis-
 sent, æqua æstimatione resarcirent. Grauius
 deinde bellum ab Histris ejusdem littoris acco-
 lis Venetæ-urbis ingruit. Ex æde Dini Petri, in
 ea Venetiarum urbis regione quod Castellum dici-
 tur posita, virgines quasdam desponsatas, quarum
 nuptiæ tum fortè more gentis eo loci celebra- ^{Venetorum}
 bantur, cum quicquid ornamentorum habebant, ^{de Istri}
 nauibus subito inuecti rapuerunt Istri. ^{victoria.} *Badoa-*
rius, rei indignitatem non ferens, classem edu-
 cit, & circa Clodiam insulam aggressus hostes
 fudit, omnesque captos in virginum vindictam
 cecidit, cæcosque in mare projecit; ut per om-
 nem sinum fluitantes, cæteris exemplo essent, ne
 quid simile in Venetos mouerent. Cujus rei
 memoria, solennibus quotannis ludis, ad po-
 steros continuata est; ludi ipsi vel Mariarum,
 vel Mariani dicti, quibus duodecim virgines, ^{Ludi mari-}
 auro gemmisque ornatae, per frequentissimos ^{ani.}
 urbis vicos spectandæ ferebantur. Sed hic mos,
 ad gratias Deo de parva ex hostibus victoria a-
 gendas institutus, temporis processu, in fœdis-
 simum exemplum (ut ferunt) transiit. Veneti
 autem, virium jam suarum fiducia subnixa, Ju-
 stinopolim, urbem in sinu Adriatico positam,
 & in Justiniani secundi gratiam olim conditam,
 quod Histriani sceleris conscii fuissent, bello
 aggressi, suæ ditionis tum primum fecerunt:
 mox Coniacum obsidione premunt; seque de- ^{Venetorum}
 dentes Comacinos in fidem perpetuò mansu- ^{sines propa-}
 ros accipiunt. Inde ortum Venetis fines pro- ^{gantur.}

pagandi initium. Interim Saraceni Africa egressi Calabriam in Italia, Apuliamque omnem, & Lucaniam, non tam fœdum in modum depopulati sunt: quam in eo, ut suæ ditionis has deinceps terras facerent, laborabant

Cap. 29. Interim Saraceni, quos in Hispania sedem fixisse superius commemorauimus, quum multitudine abundarent, & rerû ob id angustias premerentur, ab Armirathe suo petunt, ut sedes exteras quærere liceret. Data copia, *Amor-*
Creta à Sa- *ummæ*, cognomento *Apothaps*, parata classe,
racenis in- vela, quo ferret fortuna, facit; tandemq; ven-
sess. tris actus ad Cretam appulit. Ipse, militibus expositis, & prædandi causa longius abire iussis, ad classem substitit; quumque suos è conspectu abisse peruidisset, classi ignem subijcit. Milites reuersi, quum classem exustam cerne-
rent, nos vero, inquit, classe incensa, vnde-
nam quæ necessaria bello fuerint comparabi-
mus? & ille, si viri, inquit, estis, rerum omnium,
non ad necessitatem modò, verumetiam ad libi-
dinem abundè habetis. Sedes exteras quærere
vos velle ipsi dixistis. Ego vos ad terram melle
& lacte fluentem (Judæorum religione ex longinquo imbutum scires) duxi; ingredimini
modò, & inuenietis. Itaque necessitate in vir-
tutē, ut sæpè fit, versa, & multitudine sua freti,
vniuersam insulam nullo ferè certamine suæ
ditionis & potestatis faciunt. Qua re intellecta
Imperator *Balbus* classem ad Saracenos inde
deturbandos misit: sed exercitus in terram e-
gressus, fusus fugatusque, & ad naues compul-
sus est. Aliam igitur extemplo classem *Cratæ*

Duce

Duce misit; Qui res initio prosperè quidè gessit, negligètia, ex re benè gesta, crescente, nihil ille sed pro more militari deinceps facere nō intra munimenta se tenere, non excubias agere. Quare animaduersa, *Apochaps* dormientes oppressit; vix ipse *Craterus* inter ignes & gladios ad mare effugit; vbi nauigio mercatorio, quod ibi forte stabat, receptus hosti deditur. *Apochaps* vitā ei suspendio eripuit. Nec tamen ideo *Balbus* tam nobilis insulæ curam abjiciendam esse censuit: itaq; alium rursus Ducē, *Oppiam* nomine, cum classe misit: is rem & cautius & fortius, quàm cæteri fecissent, administrabat, breuique tempore Saracenos omnes, non ex Creta modò, verum etiam ex circumuicinis insulis, quas unā cū Creta occupauerant, penitus expulit; & nobilissimam insulam, Saracenis ereptam, Imperio restituit. *Balbus* rebus multo cum sudore, sed queni successus sæpè leuabant, gestis, nono denum Imperii anno, sed non plenè exacto moritur. Cui in Imperio successit *Theophilus* filius: qui decimo tertio Imperii anno fato cedens, filiū *Michaelē* successorem habuit: quorum neuter quicquā in mari gessit.

Michael verò *Theophili* filio imperante, Saraceni rursus ex Hispania Cretā cū classe occuparunt, & toto Imperii illius tempore, quod in annum Christi 866 excurrerat, tenuerunt. *Michaelē* verò sequutus est *Basilus* cognomento *Macedonicus*, quo imperante, multæ præclaræque res, variante quamuis fortuna, cum Saracenis gestæ memorantur. Prima illi cura de Creta è Saracenorum manibus eri-

Cap. 30.

Basilus
Imperator

pienda fuit. Ad hanc rem *Christopherum* quendam Ducem cum classe misit; is in terram cum exercitu egressus multiplici victoria hostem attenuavit. Ipse interim in Orientem profectus, varias etiam victorias ex Saracenis reportavit, sed terrestres omnes, de quibus nihil attinet hoc loco dicere; quin potius ex Oriente in Occidentem transeundum, ubi Saraceni, qui Africam tenebant, Italiam magna parte obtinebant, & Ragusium in Epiri littore ex aduerso positam obsidione arctissima premebant. Ragusini subsidia à *Basilio* per Legatos petunt. *Basilius* centum naues bellicas subsidio mittit. Quo audito Saraceni eam exemplo obsidionem solvunt, & alias Italiæ partes, maxime Longobardiam, prædandi studio petunt. Ciuitates Italiæ, ut quæque vel obsidebatur, vel obsideri metuebat, Ragusinorum exemplo, rebus afflictis subsidia à *Basilio* petierunt. *Basilius*, & ipse auxilia prompto studio petentibus subministrauit, & Gallorum Regi, (*Carolus Calvus* fuisse puto, qui tum forte in Italiam cum exercitu venerat) ut contra communem nominis Christiani hostem auxilio esse vellet, per Legatos & litteras sollicitabat. Nec Gallustam pio postulato restitit. Itaque iunctis armis cum Saraceno terrestri prælio congregiuntur; in qua pugna, Saracenorum Sultanus, siue princeps, viuis in eorum potestatem venit; Sed Francorum Regi traditus, post biennium, quum se mira arte in Galli familiaritatem insinuasset, fuga se eripuit, & ingentium postea malorum causa Christianis fuit. Hoc eodem

Ragusium
obsessit a.

eodem tempore *Esmannus* Admirallus siue Præfectus Ciliciæ, Tarso profectus, cum classe Eubœam insulam tentavit, sed frustra; ipse telo ictus cum multò majore exercitus sui parte occubuit. Interim *Apochaps*, quem ex Hispania in Cretam ad sedes novas quærendas venisse, eamque insulam, classe sua incensa, occupasse diximus, confirmato jam regno, & classe parata, Præfectum ei dedit quendam nomine *Phoetium*, multis militaribus factis insignem. Is accepta classe, nihil per totum mare Ægæum securum aut tutum incolis reliquit. Sæpè etiam in continentem egressus, agros, villas, oppida, vrbes populabatur, ipsi mox vrbi Constantinopolitanæ, ut fama erat, arma & ignem illaturus. Hiis auditis *Basilus Nicetam*, cognomento *Coripsum*, classis Præfectum delegit: Is cum *Apochape* congressus ignem Græcæ, classi Sarcenicæ immisit, quo magna pars classis conflagrauit; in reliquas impetum ferro fecit, & magnam vim hostium neci dedit. Qui supererant, fuga abrepti, Cretam petierunt, atque rursus classe, Occidentale Peloponesi latus omne vastaverunt, multasque vrbes vi vel captas, vel deditione receptas nullo discrimine euerterunt. Qua de re *Nicetas* certior factus, veteri comento animum adiecit; veritus nimirum, ne si Peloponeso circumnavigata hostem quæreretur, aduentus ejus hosti, vel è speculis, vel per nuntios significaretur, ad Cenchreas, portum ad Isthmi Corinthiaci latus Orientale positum, cum classe accelsit: ibi milite exposito, quo potuit silentio, sed magna festinatione

De Sarace-
nis victo-
ria.

naues, hominum jumentorumq; vi in alterum Isthmum latus, & ad portum Lechæum traduxit. Vnde milite subito imposito soluens, hostem improvise adortus, vniuersam eorum classem partim igne incendit, partim fluctibus submersit; captiuum neminem cepit, sed ipsum Photium, viuum ad se adductum, occidi iussit. Cretæ tamen insulam, quod exercitum terrestrem non habebat, petere non audebat. Nec ita multo post, alia sexaginta triremium classis ex Africa, ad insulas Græciæ vicinas inuadendas, venit. Huic *Basilus Narsanem* Præfectum in occursum misit. Jamque concursuri erant, quum sub nocte magna sociorum naualium pars, deserta classe, aufugerunt. *Narsanes* subita re perculsus, nec congregi jam ausus, in loca tuta se recepit, & Imperatorem eorum quæ acciderant certior fecit. Imperator desertores exquisitissima diligentia conquiri iussit; Inuentos in carcerem, veluti ultimum mox supplicium subituros, coniecit. Præsentium tamen rerum consideratione motus in desertores legem agi vetuit: ne tamen aduersus militarem disciplinam praua indulgentia peccare videretur, ciuium expectationem laudabili commento elusit. Habuit eodem ergastulo inclusos Saracenos quos bello forte ceperat; Hos capite obuolutos carcere educit, eductos medio foro, spectante populo, virgis cædi, & in Peloponnesum ad *Narsanem* mitti, & palis ibi coram classariis defigi mandat. Senferunt Imperatoris pietatem classarii necne, nihil in alterutram partem affirmare ausim; sed siue desertores ipsos tam horribili

horribili & inusitato supplicio enectos, seu eorum loco, Saracenos sic affectos rati erant, procedente bello aduersus hostem fortissimè dimicarunt, vniuersamque Saracenorum classem nullo captiuorum aliusuè prædæ respectu, deleuerunt, ipsosque Saracenos, qui ex Creta mouentes magnam Peloponesi partem occupauerant, inde penitus expulerunt. Inde *Narsanes* in Siciliam & Italiam profectus cum *Procopio* Protobestiario, (is illo tempore titulus honoris erat) & *Leone Apostypa*, terrestrium *Basilii* copiarum Ducibus, iunctis viribus, multas Apuliæ Calabriæque ciuitates Saracenis eripuit; & cum nouam ex Africa classem hostibus subsidio aduentare accepisset, classem ipsæ suam è contrà instruxit, & certamine acerrimè conferto, victoriam de hostibus, multo quidem sanguine emptam, sed gloriosam repperit. Inde Constantinopolim reuersus summo cum honore à *Basio* recipitur. Populus verò Italiæ abeuntem sic prosequutus est, vt ei necdum defuncto diuinos honores faceret.

Procopius verò & *Leo*, eo discedente, pari potestate, sed disparibus studiis, res administrabant, quum nullū interim Saraceni classium ex Africa in Italiam & Siciliam mittendarum finem facerent. *Narsanes* igitur digresso, statim nouæ inde suppetiæ Saracenis à Carthagine submissæ appropinquare ferebantur. *Procopius* verò & *Leo*, plus semper naualibus quam terrestribus copiis confisi, ambo classe apparatissimè instructa hosti obuiam in mare eunt. Vtque diuersis cornibus inter pugnandum præerant,

*Procopii
mors.*

fortè accidit, vt *Leo* in dextro egregiè vinceret, *Procopius* in sinistro à multitudine hostium laboraret. Idque videns scienſque *Leo*, ferre opem laboranti, quum posset, noluit. Itaq; *Procopius*, quod vnum licuit, cum sua cohorte fortissimè pugnando cecidit. Nec defuerunt, qui hoc tantum flagitium *Leoni* statim exprobrarent. *Leo*, ad delendam hanc ignominiam, Tarentum à Saracenis possessū obsidet, obsessumque magna virtute cepit, militique ad conciliandum gratiam in prædam concessit. Et erat quidem ea res Imperatori, vt par erat, grata. Veruntamen tantum flagitium, in ciuem, in exercitum, in ipsum Imperium & maiestatem admissum, impunitum esse noluit. Itaq; Constantinopolim accersitum exautorauit, exautoratum verò in exilium misit; ægrè retentus, quo minùs in eum ultimo supplicio animaduerneret. Sed pensatis rectè ab eo perperam factis, vitam ei in rerum benè gestarum gratiam & mercedem reliquit; honores verò & opes in sceleris admissi vindictam & pœnam sustulit.

*Leonis exi-
lium.*

Cap. 32.

Saraceni, cum *Narsanem* Constantinopolim reuersum, classem verò Italiæ tutandæ destinatam, Ducum dissidio, maiore ex parte cum *Procopio* viro fortissimo periisse, & ipsum *Leonem* qui supererat Constantinopolim ad pœnā reuocatum intellexissent, nullum vnquam tempus, ad Syracusas, quæ vnà cum *Taurominio* ab *Euphemiis* temporibus in fide Imperatoris manserant, inuadendas opportunè aduenisse rati, classem in Siciliam cum ingenti exercitu, mittunt.

mittunt; terraque urbem & mari, operibus & omni tormentorum genere oppugnant. Cujus rei quum Syracusani *Basilium* per litteras certiozem fecissent, is confestim parem Saracenice classẽ cum exercitu in supplementum mittit. Dux erat quidam nomine *Adrianus*, aulicorum vnus; is, circumnavigata Peloponneso, ad portum *Hieraca* felicibus ventis peruenit. Ibi vento in contrarium verso substitit. Syracusani tam propinquæ opis spe omnia obsidionis mala fortissimo animo tolerabant; & Saraceni, rem antr ejus aduentum transigendi studio, urbem omni parte, nullum vt respirandi tempus obsessis darent, fortius quam vnquam & ferocius oppugnabant. Erat, vt dixi, *Adriano* ventus quidem Siciliam ab *Hierace* portu vela facturo contrarius, sed lenis adeo, vt remis facile nulloque negotio euerberari posset. Istamen, seu hostium metu, seu loci illecebris & amœnitate, seu insita aulicis ignauia captus, nisi vento addicente, pedem se inde moturum negat. Interim Saraceni, cum infanda fuorum strage, completis cadauerum multitudine fossis, vi & virtute muros occupant. Nec eò tamen fracti sunt ciuium animi, sed vulnere mortisque obliti, in hostem vbique veluti in aperta acie feruntur: cædunturq; vicissim & cædunt, donec ad extremum, effractis portis, totus Saracenorum exercitus intromittitur. Tum verò & classarii, relictis nauibus, porta ad mare versa irrumpunt, omniaque urbis loca sanguine & cæde complent, ducique suo *Hocob*, qui dum inter confertissimos mœnia urbis scanderet,

*Syracuse à
Saracenis
capte.*

Defectus
 classis igna-
 via causa
 flagris cæ-
 sus & in
 exilium
 missus.

Basilii laus.

scanderet, tormento trajectus perierat, Chri-
 stianorum sanguine impii parentarunt. Fe-
 runt nocte hanc cladem sequente vocem in pa-
 ludibus vrbi Hieraci circumjectis exauditum,
Captas esse Syracusas, idque continuis aliquot no-
 ctibus esse factum; *Adrianum* verò rumore mo-
 tum, cadente mox Sole, ad locum accedentem
 eandem vocem auribus quum accepisset, attoni-
 tum recessisse; Manè verò proximo nuntium
 cladis, incendio elapsum, cum ad Hieraca ap-
 pulisset, rei gestæ tempus congruenter expo-
 suisse. *Adrianus* suæ jam ignaviæ, sed serò, per-
 tæsus, retrò Byzantium, vnde profectus fuerat,
 nauigavit; vbi quum malum sibi ab Impera-
 tore *Basilio* intentari comperisset, ad ædem sa-
 cram confugit. *Basilium* verò inde extractum
 publicè flagris cædi iussit, cæsumque in exi-
 lium, vt meritis erat, perpetuum misit. Sub
 hoc ipsum tempus Saraceni, qui Thraciam jam
 olim occupauerant, inde cum classe soluentes,
 mare omne Ægæum, & vrbes imperiales, in
 Asiæ littore sitas, gravitè afflixaerunt: aduer-
 sus quos *Basilium* validam classem emisit: &
 multus vbiq; nunc Saracenorū, nunc Christia-
 norum sanguis effusus; multū, inquā, sanguinis
 in mari, longè verò plus terrestribus præliis
 absumptum. Nec alius vllus Græcorum Im-
 perator tot præliis, tamque cruentis, terra, ma-
 ri, in Occidente, in Oriente, tam horrendis ac-
 ceptis illatisque cladibus cum Saraceno hoste,
 seu per se, seu per Legatos suos depugnasse le-
 gitur. Hic *Leonem*, cognomento *Philosophum*, fi-
 lium & Imperii successorem habuit, virum
 omni

omni doctrinæ genere eruditum, nec virtute bellica carentem, præliis tamen Bulgaricis, & terrestribus magis quam Saracenicis & maritimis exercitatum. Cujus ea ratio fuit, quod illo primùm regnante, Turcæ à Persis implorati, Saracenos tota Perside expulerunt, nomenque regni Persici, quod à tempore *Heraclii* Imperatoris, per *Mahumetem* ejusque successores Babyloniz Califas, Saracenicum dictum fuerat, restituerunt. Vnde magnum Imperatoribus Græcis, ad multos annos, à terrestribus incurfibus quies parta fuerat. Qua illi, ad luxum, libidinem, auaritiam, & cædes priuatas & publicas, & parricidia abusi, nihilo se quam Saracenos meliores esse ostendebant.

At nos relicto mari Mediterraneo, Græco-
 rumque & Venetorum Saracenorumque rebus
 (quæ ad quinquagesimū indè & ampliùs annū
 nec multæ, nec magnæ in mare erant) ad tēpus
 omiffis, Oceanum nostrum, Danorumque &
 Normannorum in illo classes & prælia repeta-
 mus. Qua in re illud primùm non omitten-
 dum censeui, illos qui à nostris Historicis Dani
 vocantur, aliarum gentium Scriptoribus Nor-
 mannos, hoc est, homines Boreales, seu Septen-
 trionales dici. Idque rectiùs forsitan ab hiis
 quā ab illis fieri. Non enim vnus Cherfonesi aut
 gentis erant immensa illa hominū non exerci-
 tus, sed examina, quæ hiis temporibus in omnes
 Europæ partes se effuderunt. Sed misti cum
 Danis Noruegi, Gothi, Suedi, Fenni, omnes
 deniq; maris Baltici accolæ, mitiorem cœli
 plagam sequuti, sedes nouas ad Austrum naui-
 bus

Cap. 33.

Dani &
 Normanni.

Rollonis Nor-
manni in
Britanniâ
appulsus.

bus quærere cœperunt. De quibus quum superius verba facerẽ, dixi duas ingentes Danorum classes, alteram *Hungaro* & *Hubba*, alteram *Seerrego* & *Haldone* Ducibus, sub annum Domini octingentesimum sexagesimum sextum in hanc nostram Britanniam diuersis partibus appulisse; sed junctis mox exercitibus, cum *Esteldredo* Rege, cruento, sed sibi funesto prælio decertasse. Decimo verò inde anno, hoc est, anno Salutis nostræ octingentesimo septuagesimo sexto, *Rollo* præcipuæ nobilitatis apud Danos vir, & rerum gerendarum audus, contracto cum classe ex omniibus conuicinis gentibus exercitu in hanc nostram primum insulam descendit. Eo tempore Anglorum Rex *Elfredus* erat, cum quo congressus *Rollo*, longo & difficili prælio, sed victoria (nocte prælium dirimente) dubia dimicauit. Ferunt ea nocte in somnis monitum, vt relicta insula melioribus auspiciis sedes in Continente, quæreret. *Polydorus Virgilius* hunc *Rollonis* in Britanniam appulsam in annum Domini octingentesimum octuagesimum septimum, sed nemine, quod sciam, assentiente rejicit. Priorem certè calculum *Meierus* in Annalibus Flandriæ, & ex nostris *Dunelmensis*, & *Honedenus* tuentur. Sub hoc igitur tempore è sinu Baltico Normanni, eo, quem dixi, *Rollone* Duce egressi, omnia fere per Europam, quæ modo mare quantumuis ex longinquo spectabant, loca, cum trecentarum quinquaginta nauium classe, Constantinopolim vsque, vt ait *Blondus*, suis deprædationibus infesta reddiderunt. Qua in re à *Sabellico*, vt nimius

A Rollone
editæ in
Continente
strages.

nus & regionum ignarus reprehenditur: Quippè rem incredibilem planè esse, vnam gentem ad loca tam dissita piraticam faciendo progredi potuisse. Quasi verò mercaturæ faciendæ causâ illæ ipsæ nunc gentes vltra Constantinopolim vela non facerent; quasi Scythæ olim ex intimo Ponto & Mæotidis palude, hoc est, ex locis immensum quid vltra Constantinopolim positis progressi, *Dioclesiano* imperante, in hæc nostra maria, vt *Carausio* jungerentur, non peruenissent. *Rollo* igitur, seu somnio monitus, seu consilio ductus, die pugnam sequente retrò ad naues abiit: quibus properè conscensis, primum Frisiam in Germania tentauit. Longius inde progressus Sequanæ ostium subiit, oppida & vrbes iuxta positas vastauit. Mirum est potuisse: sed omnia loca, à Sequanæ fluminis ostio Parisius vsque nauibus subeuntes peruaserunt. Ibi barbara & inaudita crudelitate aduersus omne hominum genus, sed supra omnes contra Sacerdotes & Clericos gens barbara & Pagana grassabatur. Hos enim veretris & testiculis suspensos ad mortem ludentes adigebant. Inde versiculus qui in templo Sanctæ *Genofuena* Parisius ad hunc vsque diem inter missarum solemnia decantari dicitur, *Liber nos Domine à furore Normannorum*. Omnibus certè in Scholis & Academiis, apertum inter Parisienses & Normannos dissidium est, & sæpè cædes. Cujus originem ab hac Normannorum in Parisienses edita crudelitate tractam fuisse, quum olim Aureliis Juri ciuili operam darem, intellexi. Fines deindè Nannetum, qui
Ligeri

Ligeri fluuio alluuntur, vicinosque Andas, longiusque aduerso flumine subeuntes, Turonas, & Aurelias in Gallia veluti meditullio positas, inde ad dextram flectentes, si quid adhuc regni illius interius erat, & Pictonas depopulati, nihil ferè toto illo tractu inconuulsum reliquerunt. Nam & Garumnæ fluuium eodem tempore cum alia classe subeuntes, Burdegalam incenderunt, & vniuersam dextra læuaque Aquitaniam, Santonasque & Lemouicos prædabantur; ea hominum pecudumque strage, planè vt veritos fuisse crederes, ne Hunnis, Gothis, Vandalis, Longobardis & Saracenis, crudelitatis laude cessasse viderentur. Cum hiis *Carolus* Franciæ Rex & Imperator, cognomento *Caluus*, varia fortuna sæpiùs confligit; sed in Italiam ipse euocatus, liberum in Gallia grassandi spatium Normannis dedit. Autores habeo tota Gallia latitudine emensa ad Burgundos vsque arma prædabundos protulisse. Interim affluente semper multitudine, parte alia Flandriam inuadunt, Gandarum hibernis deligunt; Menapios ad internecionem cædunt: Audomaropolim incendunt. Teruannum & Tornacum in Morinis positas vastant. Aldenburgum, Roderburgum, Osburgum, Toraltum, Furnos, Bononiam, Heckelsbekam, Gronenburgum, Cassetum, Baliolum, Steenlordium, Popringham, Hypram, Virouiacum, Duacum, infinita alia loca, quæ in Menapiis, quæ in Morinis, direptis opibus, & fuso ciuium sanguine, incendio tradiderunt. Sed quid maritimis regionibus immoror? Augustam Treuironum, urbemque

urbemque Mediomatricum pari strage deformarunt. Id modo dubium, hoccinè ab iis Normannis perpetratum fuerit, quos per Sequanam, Ligerim & Garumnâ fluuios Galliam ingressos, an ab iis, quos annû post in Flandria terram cepisse, diximus. Illud constat, qui per Ligerim & Garumnâ ingressi sunt è Burgundia ad naues sospites rediisse; inde ad Hispaniæ littora progressi, maritimas Hispaniæ oras omni belli injuria affecerunt. Ac primùm Galleciæ oram omnem infestarunt, & ad portum Brigantinum appulsi terram ibi ut caperent & arma inferrent laborabant. Sed *Ramirus* Regulus Christianus, qui loca illa contra Saracenos tuebatur, cum classe occurrit, commissoque nauali prælio, hostem egregiè vicit, & sexaginta eorum naues, vel cepit, vel submersit. Inde cû clade rejecti Vlissiponâ, quæ cum à Saracenis & Mauris tenebatur, veniunt. Nec diù ibi morati Gades petunt; Hispalim terra marique obsident, circumjectam regionem ferro & flamma vastant. Denique quatuor grauissimis præliis, aliis terra, aliis mari commissis Saracenos vincunt: Sed quum *Abderrahmanum* Regem cum instructissima classe aduentare comperissent, abierunt; fretumq; Gaditanû ingressi, breui Normannorû nomen toto mari mediterraneo formidabile reddiderunt. Hoc nimirum illud tēpus esse videtur, quo *Blondus* eos Constantinopoli, quamuis quē autorem sequutus nescio navibus vim intulisse memorat. Interim *Carolo Caluo* Mantuæ in Italia, à *Zedechia* Judæo, quo medico utebatur, sublato,

Carolus,

*Normanni
pugna na-
uali à Ra-
mirus
miro Hispano
victi.*

Carolus, quem alii *Crassum*, alii *Grossum* nuncupant, (quum quanto successu creuerant Normannorum res cerneret) fœdus cum *Rollone* pepigit, & Neustriæ prouinciâ illi celsit; quod fœdus *Carolus Simplex*, qui *Crasso* successit, cum *Rollone* renouauit: Isq; suscepta tricesimo à suo in Galliâ aduentu anno Christi fide, & ducta in matrimoniû Regis filia, Neustriâ prouinciâ in qua stabilem demùm sedem reperit, à suis Normannis Normanniam appellauit; Se verò à baptismo, non *Rollonem* amplius, sed *Robertum* dici maluit. Denique ne non justam temporum in historia scribenda rationem habuisse existimemur, illud lectorem moneri volumus, hunc *Rollonem* vltra annum Christi nongentesimum vitæ spatium protulisse, eamque parî demùm cum *Leone Sexto*, *Basilii* filio, Græcorum Imperatore, termino clausisse.

Cap. 34. Jamque in tempora confusa planè & verè tartarea, quibus nulla virtutis, doctrinæ, religionis lux affulsit, descendimus. Religio Christiana, præsertim in Occidente, tota ad imaginum & cadauerum cultum & adorationem defluxerat; artium & disciplinarum nulla ratio habita. *Caroli Magni* stirps in Germania & Italia penitus defecerat, & in ipsa jam Gallia mox extirpanda degenerabat. Suborta igitur est in Germania noua Saxonum, in Italia *Berengariorum*, in Gallia *Capetiorum* familia, quæ sine horribili rerum confusione fieri non potuerat; omnium vero teterrima pestis hoc sæculo erat Romana sedes. Anno Salutis nongentesimo quinto moritur *Formosus* Pontifex, cui

cui viginti sex, (alii triginta numerant) suo ordine Pontifices, nunc singuli, nunc simul plures successerunt; quorum nullus (vnum *Stybanum* si exceperis) aliquid in se, non dicam Pontificis, non Sacerdotis, non Clerici, non denique Christiani, sed, præter formam, hominis habere videbatur. Non dicerem, nisi omnes temporum illorum, aut qui de illis temporibus scripserint, autores, & inter hos Platinam, hominem & doctum, & Pontificio nomini addictissimum testes afferre possem. Vnius Præpositi Tubingensis verba ascribam; *Hii*, inquit, *posthabito diuino cultu inimicitias non secus ac senuissimi Tyranni inter se exercebant; suas voluptates postea expleturi, quum non extarent, qui eos cohercerent. Quare Deus illos tanquam monstra breui sustulit.* Scelera ipsa silentio prætereo; quid enim attinet dicere? & quidem si attineret, prudens tamen præterirem, si non sedis ipsius, quam maiorum suorum tuetur gloria, attamen Christiani nominis verecundia.

Verum ut ad Mare Mediterraneum, perpetuum rerum naualium theatrum redeam, Veneti, tot tamque insignibus contra Gallos, Hunnos, & Saracenos, partis in mare victoriis elati, maiora jam animis concipere cœperunt, & imperium extra paludes suas proferre jamdudum gestiebant; sed vitio temporum, ciuitas hætenus optimis moribus vsa, factionibus intus agitari cœpit; & *Caloprini Maurocenos* medio foro trucidabant; quumque *Tribunum* Ducein Maurocenorum causæ fauere comperissent, *Oibonem*, qui ad vrbis res ordinandas in

Cap. 35.

T Italiam

Venetie ab
Othone
obsesse.

Italiam ab *Othone* patre missus venerat, supplices adeunt. Princeps factionis *Caloprino* *Stephanus* erat: is opem non aduersus Maurocenos magis, quam contra totam Venetiarum ciuitatem perit, seque ei vicissim Urbem Venetam in manus traditurum esse spondet. *Otho* quoniam & res ipsa gravis, & rei author non leuis erat, Caloprinos bono animo esse iubet: se causæ eorum defuturum non esse pollicetur.

Nec mora bellum Venetis inferre parat. Memor tamen quo successu *Pipinus* primùm, mox Hunni in stagno illo depugnassent, nouum genus obsidionis excogitat. Edicto primùm Italis Venetorum commercium interdixit. Venetis deindè, nè Imperii vrbes commercii causa adeant, denuntiat; Senserunt Venetæ quid *Otho* moliretur; nempe ut ciuitatem mari undique conclusam com meatibus à terra excluderet. Sed quum hoc ejus conatu annonam ciuibz difficilem magis, & angustam, quam ipsi vrbi daninosam futuram esse cernerent, rem dissimulant; certi omnia prius, quam seruitutem pati. Jamque ad aliquantulum inopiæ ventum erat, quum *Caput Aggeris* à Venetis nomine defecit; Cujus incolas ad se venientes *Otho* omni humanitatis genere excepit. Nec suas modò res sine omni injuria sibi habere jussit, verumetiam ex vicino agro prædia plerisque concessit, vt illa veluti esca cæterorum animos ad defectionem sollicitaret. Quum verò angustior indies annona fieret, plebs concitata, Caloprini nominis ædes, tota vrbe diruunt, vxores eorum & liberos custodiæ tradunt, bona di-

ven-

vendūt; nec quorsum surda illa obsidio euasura
esset civibus constabat, quū subito mors *Orbonis*,
qui Romā sub illud tempus profectus, ibi expi-
rauit, oportunē nuntia tur. Eo extincto cōmerci-
Venetæ ciuitati redditurum, et Caloprini, gra-
tiā factā, Venetias redierūt. Vbi paulō post Mau-
rocceni, tres *Stephani*, (qui Caloprinae factionis
caput erat), filios à cœna redeuntes interimunt.
Indē grauius quā prius in vrbe tumultuatū. Ip-
seque Dux sceleris conscius vulgō ferebatur.
Itaque aduersa ora ciuium non ferens, Ducatu
se abdicauit. Quo facto, *Petrus Urseolus*, com-
muni omnium consensu, ducatum adeptus est,
sub quo res Veneta domi forisque, suprà quam
sperari potuit, incrementa cepit.

Urseolus enim inito statim Ducatu à *Basilio*, & Cap. 36.
fratre ejus *Alexio*, (alii *Constantinum* vocāt) qui *Urseolus*
simul eo tempore in Oriente imperabant, missa *Ventia-*
legatione petiit, vt toto eorum Imperio Veneti *rum Dux*.
nominis negotiatores terra marique à vestigali-
bus & portoriis immunes haberentur. Vere-
cundia erat, Venetis tam benè de Imperio &
vniuersa Rep. Christiana meritis rem petitam
negare. Quæ res Veneto nomini, non solūm
commodo priuatim, verum etiam publicè, &
apud exterarum gentes honori fuit. Vnum erat,
quod *Urseoli* animum momordit. Sæpius Ve-
neti, (quod jamdudum memorauimus) cum Na-
rentanis de sinus Adriatici dominio conflixe-
rant. Id enim Narentani longo vsu sibi vt
hæreditarium sumpsèrant, & ipsos Venetos eo
nomine sibi vestigales quandoque fecerant.
Quod flagitium *Urseolus*, non ultra ferendum

*Bellum Na-
rentanis à
Venetis in-
dictum.*

ratis, bellum Narentanis inferre statuit. Mo-
lientem legati ex Dalmatia frequentes, que-
stum de Narentanorum injuriis, adeunt. Pub-
lico nomine agunt, si in Dalmatiam aduersus
Narentanos, cum valida classe transmitteret, o-
ramque littoralem ab eorum injuriis vindica-
ret, fore ut vniuersa Dalmatia, cum Liburniæ
Histriæque ora, quæ tota sinus Adriatici longi-
tudine protenditur, in Venetorum fidem & cli-
entelam concederet. Ad hanc legationem erecti
sunt omnium animi; maximè *Urseoli*, qui hanc
propagandæ Venetæ ditionis occasionem, se potissi-
mum Duce, oblatam esse lætabatur. Exemplo
classis valida paratur. Militibus impositis,
Dux ipse in Templo Oliuolensi, à loci Antistite
cum sacra benedictione vexillum solennitèr ac-
cepit. *Malamocco* egressus Aquileiam primò
venit. Vbi loci Antistes cū clero suo, effuso toto
etiam veluti ad spectaculum populo, progressus,
& aduentum ejus honorificè gratulatus,
vexillum à Diui illius loci altari desump-
tum, inter patria Venetorum signa deferen-
dum tradidit. Mouit *Urseolum* & munus ip-
sum, & auctor muneris, & auctoris in tradendo
pietas. Et, *Accipio*, inquit, *venerande Antistes*,
omen: tuque nobis faustum iter, & felicem reditum
precare queso. His dictis in Istriam transmisit. Ibi
Parentium urbem classe occupare parat. Sed nil opus
armis erat: loci Episcopus occurrit: ciuitatis
nomine urbem dedit. Inde Polam in eodem lit-
tore positam contendit. Polani vltro se fidei
Venetorum committunt. Huc Legati ex om-
nibus vicinis ciuitatibus se, fortunasque suas

omnes

omnes *Urseolo* ut sinus Adriaci vnico in terris vindici, cōmittentes confluunt. Itaq; dati aliqui legationibus audiendis, populis in fidem recipiendis, & (quia vltro naues offerebantur) militibus, sociisque naualibus, quibus comple- rentur, conscribendis dies. Inter cætera illud Venetis nec opinantibus datū erat, ut inter sa- crorum solemnias, post Imperatorem, Ducem populūque Venetum, laudibus & votis cele- brarent. Jamque ad inferiorem Dalmatiæ par- tem, & Narentanorum ditionē ventū est; qui om- nes tantā rerū inclinationē, & ducis præsentiam reueriti, positis armis, legatos vndiq; de pace mittunt. *Urseolus* pacē haud abnuere: de condi- tionibus aliquantisper certatū est. *Urseolus* has dedit. *Fidem christianam, religiosius quam prius, colerent; damna Venetis omnia resarcirent: impen- sa belli rescirent: ne tributum à nauigantibus exigerent: neve Reguli piraticam amplius exerce- rent.* Nihil eorum à Narentanis (quippe qui- bus præsens exitium, ni imperata facerent, im- minebat,) recusatū. Duæ modò restabāt Insulæ; *Corcyra*, (quæ *Melena* antiquitus, postea verò, *Corcyra nigra* vocabatur, nunc *Curzolo* dicitur) & *Pharus*. Hæc olim *Paros*, quod à *Pariis*, qui *Paron* in *Ægæo* mari insulam, templo olim *A- pollinis*, & marmoribus nobilitatam incolebant, huc ad vestis coli cæperat, appellata fuit. Volebāt & hæc, eisdem quibus aliæ, conditionibus recipi. Sed quum aliam aliarum urbium, aliam suam causam esse, ab *Urseolo* responsum esset, belli a- leam experiri placuit. Erant nimirum hæc duæ insulæ sinui Adriatico veluti compedes injecti:

nulla ut navis, hiis inuitis, mare illud vel tutò
 intrare, vel inde exire, vel uspiam se, sine peri-
 culo, temere mouere posset. Haru igitur duarum
 insularum vrbes, in accolarum & mercatorum
 gratiam solo æquare in animo *Venetus* habebat.
 Parenfes verò primum aggredi visum est. Et
Vrsolus primo impetu portum occupat. Paren-
 fes loci & natura & munitionibus freti, acriter
 se defendunt. Sed quum & à mari & à terra
 telorum multitudine maznia defensoribus nu-
 darentur, subeunt Veneti, scalasque quas ad hoc
 adduxerāt, arci, quā præcipuè *Parenfes* fidebant,
 admouent. Nec ultra vnus diei obsidionem
 reserat. Dux, deditibus se parci, resistentes
 occidi, urbem & arcem dirui iubet; idem &
 Corcyræ factum. Inde Ragusium mota castra.
 Sed omnia ibi Venetorum armis patuerunt.
Ragusinus Antistes vltro venienti Duci occur-
 rit, clauēs vrbis tradit, imperata Ragusinos fa-
 cere paratos docet; ne in deditorum vel cor-
 pora vel fortunas sæviret, per sacra, quæ mani-
 bus gestabat, rogat. Omnia à Principe, qui &
 miti per se ingenio erat, & clementiæ laudem
 affectabat, facillè impetrata. *Vrsolus* rebus com-
 positis, cum summa gloria Venetias redit. Vbi
 quum habita concione, res à se gestas, & omnem
 ab Histria ad extremos Dalmatiæ, quæ Epiro
 iungitur, fines, oram suo ductu Venetorum
 imperio subiectam esse exposuisset, succlama-
 tum ab vniuersa concione est, & Dalmatiæ dux
 ab omnibus salutatur. Inde Venetiarum Ducis
 titulis Dalmatia adiecta. Idemque postea Ve-
 netiarum & Dalmatiæ dux appellari coëptus.

Dalmatiæ
Dux.

Gratiæ

Gratiæ insuper à Principibus totius tractus illius, Rebusque publicis per Legatos actæ, quod eorum opera maria à latrociniiis, quibus per aliquot jam sæcula infesta fuerant, purgata conquiescerent, tutaque mercatoribus pateret via. Hic finis belli Narentani fuit; quum per annos centum circiter & septuaginta, de maris illius possessione vario sæpè euentu inter duos populos pugnatum fuisset; ut author est *Sabellius*. Erat autem Narentinum ciuitas peruetusta, sed Illyriorum, qui Teucâ olim Reginâ, jus suum in illo mari contra Romana arma aliquandiu sustinuerant, vera, vt âte dixi, & genuina soboles, et inter Dalmatiz populos à Ptolomæo recensita, supra finum Rhizonicum, ad Narona flupium, ad cuius ostium vrbs Narenta collocatur, posita. Hii loci oportunitate freti, vectigal siue portorium mare illud nauigantibus antiquis temporibus indicere solebant: & si qui pendere recusabant, hostium loco habuerunt. Id littoris utriusque accolæ purum putum latrocinium appellabant; querelamque super ea re suam ad S. P. Q. R. bello Punico primo statim finito, vt nos superiùs memorauimus, detulerunt. Quumque Romani legatos suos ad *Teucam* Reginam misissent, illa populi sui jus consuetudine tuebatur. Et est illud quidem verum, prævalentis tum populi Romani viribus, jus illud, qualecunque demum fuir, ad multa sæcula fuisse interceptum. Nec è maiestate populi Romani esse videbatur, in tantarum victoriarû cursu portoriis exigendis immorari. So-

luto verò demū Romano imperio, loci incolæ, ad pristinum jus & ingenium suum redierunt. Inde quū res Veneta successibus creuisset, his inter duas gentes, veluti inter riuales, orta est; eaque conditionibus sæpè sic finita, vt Narentani Venetis portorium nunc indicerent, nunc remitterent; Veneti Narentanis nunc soluerent, nunc soluere recusarent. Donec ad extremum aucti potentia Veneti, Narentanos funditus euerterunt. Quo edito facinore, omnis dominii in mare illo exercēdi mētio ad tempus filuit. Sed confirmatis mox rebus, nemine contra nitente, jus Narentanis ademptū suis vsibus Veneti applicuerunt. Tanta enim erat Venetorū nō potentia modò, verū etiam propter Saracenos toties à se fusos, apud maris illius accolæ gratia, vt ad jus Narentanis hostibus ademptū, communis insuper gentium consensus & auctoritas hac in re accesserit. Inde cōsuetudo paulatim inducta: quæ tā iustis rationibus subnixæ, vim juris processu temporis obtinuit. Sublato tamen mox Saracenorū metu, non deerant qui jus hoc cauillarentur. Inde res non sermonibus modò apud imperitum vulgus, verū etiam apud viros doctos & Juris consultos editis libris agitari cæpta est. Sed vicit semper ea sententia, quæ maris Adriaci dominium & possessionem, & regalia, in eo exercendi jus Venetis addixit, vt non solum titulo à Narentanis recepto, & consuetudine, iustissimis rationibus introducta, Christianiq; Populi consensu roborata, verū etiam responsis prudentum & rebus iudicatis jus suum & possiden-

*Venetorum
maris do-
minium in
sinu Adri-
atico.*

di causam nunc dierum Veneti tueantur. Celebreque olim per omnes gentes fuit illud eorum ad Pontificem responsum. Nempe quum ab eo imperiosius per legatum edere juberentur, qua tandem, aut cujus Principis donatione freti, quovè alio titulo, domini jura in mari illo usurparent: Enimverò, parum justè, nec pro more facere Pontificè, responderunt, qui tabulas illas ab ipsis proferri flagitaret, quas S. S. penes se Romæ in archiviis repositas haberet. *Donationem* modò *Constantini* exquireret: in ejus enim tergo, quod quærebat, inuenturum. Quo tam facere, sed mordaci responso, satis indicabant prudentissimi viri, nec Pontificem ipsum tot vrbes & regiones in terra, nec se Domini in mari exercendi jus, vllò Imperatoris vel Græci vel Romani diplomate aut donatione, sed usurpatione, longa eorum, quorum præcipuè intererat, scientia & patientia, hoc est, consensu & autoritate confirmata possidere: bello se defensuri, si quis tam legitimè quæsitam, & tam diuturna præscriptione munitam possessionem turbare velit.

Nam ad eos quod attinet, qui mare do-
minio teneri, aut omninò possideri posse ne-
gant, næ illi, legem primæ rerum creationi à Deo datam animadvertisse non videntur. *Do-*
minamini inquit piscibus maris? Piscibus, opi-
nor, qui in mari sunt, dominari fas est; ipsum ve-
rò, cui pisces insunt, mare possidere nefas. Nam
si verba hæc jus in mare non tribuant, ne illa
quidem quæ sequuntur, jus vel in aere quo ve-
scimur,

Cap. 37.

Mare an
dominio te-
neretur pos-
sideri possit.

scimus, vel in terra quam calcamus, tribuunt. *Dominamini*, inquit, *piscibus maris, & volatilibus cali, & animantibus qua mouentur super terram*. Harum nimirum rerum, veluti clauium traditione, vniuersi domiciliū hujus possessionem humano generi à Deo datā fuisse nemo dubitat. Quid? quod terram possideri & dominio teneri; nemo nescit. Atqui terra & mare vnum orbem, & idem vniuersi centrum faciunt. Itaque si terra dominiū capax sit, utique & mare erit, nec res, vna quum sit, diuerso jure censi debet; Neque verò ad rem facit, quòd *fluidum sit mare*; nam & *flumen omne à fluendo dicitur*: & quis tamen flumina vel priuatim vel publicè possideri negat? At, inquit, *mare fluidum quum sit, finiri nequit*. Stultus igitur *Procopius*, qui in Gotthicis suis, *mare Tyrrenum ab Adriaco, ducta à Pachino Sicilia Promontorio ad insulam Melitam linea determinari docuit*. Stultus *Ptolomæus*; stulta omnis Geographorum natio, qui ductis à centro ad cœlos lineis, maria æquè ac terras suis terminis *finiri*, & commensurari posse demonstrarunt. Nempe quam opem pali, perticæ, fossæ, lapides terminales, rusticis in prædiorum suorum finibus statuendis præbent, eam lineæ doctis, in terræ marisque plagis describendis & regundis, præstant. *Alexander Sextus*, Pontifex Romanus, arbiter sumptus, quum Indiam vtramque inter Hispanum & Portugallum diuidere vellet, lineis quibusdam, non per terram, sed per mare ductis, id effecit. Non dico, quo jure: (cōstat enim nullo) sed quo ingenio: quo plurimo

mo in hoc opere Pontificæ vsû fuisse non ambi-
 gatur, Nobis etiâ & Hispanis cōcordes sunt citra
 Æquatore[m] animæ; vltra quam, Austrum ver-
 sūs, si alteri alteris occurrimus, infestis statim
 armis & animis concurrimus, planè vt alii repē-
 tē homines, transito illo limine, facti esse videamur.
 Quare si mare, fluidū quamuis sit, finiri
 tamē possit, vtiq; & ipsis cōcedentibus, possideri
 potest. Nā si pergūt molesti esse, si mare propter
 mobilē suā naturā finiri, & proinde possideri nō
 posse pugnant; nihil planè impedit, quo minùs
 Cyrenaicam in Ægypto, & immēsas alias per A-
 fricam et Æthiopiam regiones, nullius in bonis
 esse eodē ingenio contendāt. Ibi enim haud mi-
 nores arenarū, quā in mari aquarū, voluntur
 montes; vtque fluctibus in mari classes, sic
 in terris illis arenarum molibus toti sæpè ob-
 ruuntur exercitus: quod *Cambysis* olim Per-
 sarum Regis copiis, aduersus Ammonios ten-
 dentibus contigisse proditur. Et tamē hæ soli-
 tudines, proprios dominos agnoscunt. Quid ni
 igitur & suos, diuersis mundi partibus, agnoscat
 mare? *Causa*, inquit, est quòd *Principes qui domi-
 niū in mari querunt, nullis limitibus natura aut
 manu positis, sed imaginaria quadā linea se tuētur.*
 Atqui hæc linea, quā sic per contēptum *imagi-
 nariam* appellant, illa ipsa res est, qua, vt à se, vel
 inuēta vel perfecta, effert se maximè & gloriatur
Ptolomeus; & hanc regionum per lineas à centro
 ad circumferentiam ductas, & per gradus dispo-
 sitas & comparatas describendarum rationem,
 omni nensorum & metatorum operā, vt diui-
 niorem multò, ita longè certiorē esse probat.

Nec

Nec, dum ista scribo, vereri soleo, *ne Geometria nobis terram eripiant.* Quin potius Ægyptios, quum terra sua omnis limo ex Nili inundatione obducta, sic olim quotannis confundi solebat, ut nemo quid agrorum suum, quid alienum esset, internoscere potuerit, Geometriæ demum arte inuenta, terminorum suorū noticiam conseruasse memini. Nedum Astronomos, *ne illi celum nobis suis lineis ereptum eant* metuo: maximè quum *Axem* illum, quo sustinetur, & circa quem rotatur cœlum, nihil aliud quàm lineam à polo ad polum per vniuersi centrum ductam, hoc est, Astronomorum opus totum esse sciam. Nam quæ tandem est hæc animi peruersitas, spretis, quæ mente & diuina quadam ratione excogitantur & statuitur, finibus, limites manu factos in maris profūdo flagitare? & hiis argutis, viam ad arma, ad cædes, ad laniernas, per vniuersum jam mundū quærere? Verū enimvero *commune quid est mare: & proinde à nemine, ut suum, vendicari potest.* Quasi verò communis omnium nostrū parens terra non esset: & tamen eam fodimus, aramus, & de qualibet ejus gleba contendimus, meamque eam & tuam, nullo (ut opinor) scelere appellamus. Quid ni igitur nostrum appellemus & mare? quod ut sit comunissimum, terra tamen ipsa, vel aere, ab initio certè, cōmunius non fuit. Nempe tria hæc, *aer, aqua, terra*, sinaturam spectas, æquè semper cōmunia habita fuerunt:

Cap. 38.

Et quoniam quibus hæc in arena ludere aliquando placuit, poetarum dicta, pro autoritatibus proferre non dubitarūt, nos etiam in eadem

ad eundem rem facere, quid ni audeamus? Terram igitur à principio communem fuisse, poterat Latinorum Princeps ille in Georgicis ostendit. *Ante Jonem* (inquit) *nulli subigebant arua coloni*: Nec signare quidem, aut partiri limite campum, *Fœderat*: & in eandem sententiam, à prinio proximus poeta *Ovidius*, in Metamorphoseon primo, post *Saturnum*, & sub *Jovis* demuni Imperio, rerum vendicationem & possessionem cepisse docet; *Communemque prius, seu lumina solis & aura*, *Cautus* (inquit) *humum longo signavit limite mensor*: & disertius adhuc *Horatius*; *Nam propria telluris herum natura, nec illum, Nec me, nec quemquam instituit*. Ex quibus quidem efficitur, privatū terræ ipsius dominium & possessionem, non à natura, sed ab humano instituto esse. Itaque si terra, quæ ab initio communis & libera, nec limitibus vllis, veluti compedibus astricta fuit, singulorum postea vel hominum vel populorum vñibus mancipari, si signari, si vrbari, si in partes diuidi, distribui, scindi, nulla humani generis, nulla juris gentium injuria, potuit, cur idem in mari & licuisse olim, & jam licere non existimemus? aut quid habet in se mare, quod possessioni, scilicet, *reluctari* magis, quam ipsa terra, videatur? nam si communitatem affers; æquè terram ac mare cōmunem fuisse docui; & tamen terra omni possessionis & dominii genere tenetur. Idem igitur & mare jus? Nec me nioret si vetus author *Placentinus*, mare ita cōmune esse dixit, *ut in nullius dominio sit, nisi solum Dei*. Primū enim, dixerit ita *Placentinus* necne, planè nescio. Nec vbi id dixerit

rit, (quanquam cura non defuit) rescire potui; sed dixerit sanè: Quid ad rem? nam & *Terra Domini est & plenitudo ejus*: ut author est, *Placentino* multò & vetustior, & omni dignatione major & melior, Psalmista *David*. Nos enim, si rectè vel loqui vel sentire volumus, terræ hujus non Domini, sed usu fructuarii, sed coloni, sed inquilini, vel potius nihil horum, sed in ea hospites sumus & peregrini; & tamen si vnam glebulam possidemus, *Terrarum*, scilicet, *Domini* nuncupamur. Quid ni igitur & maris, si quam ejus partem possidemus, *Domini* appellemur? Verum *J. Faber*, vir doctus & eruditione clarus, asserit: *mare relictum fuisse in suo jure & esse primæuo, quo omnia erant communia*: Id scilicet curant Principes; Sed esto; Quum terra olim in singulorum usus raperetur, mare in medio relictum, & à privatorum possessione exemptum fuit. Quæro, qua lege? quo jure? quo humani generis scito? vel, (quoniam ad juris gentium æquitatem reuocamur¹) quo Prætoris mundani edicto, id sancitum fuisse docet? Nam si nihil horum sit, quid refert, si eruditiorum aliquis tale quid, animi causa, ebullierit? *multum* inquit. *Ubi enim est illa in mare corporis ad corpus adjunctio, sine qua nulla dominia ceperunt?* Non sum *Oedipus*, sed tamen, ut puto, *Pedis positionem* ad possessionē & dominiū in mari inchoandum requirit. Id verò si ita est, primū in *laeu*, inquā, de *Genesisaride*, quod requirit vir doctissimus invenisse potuit. Ibi enim, & *Christus* olim & diuus *Petrus* mari, ut scimus pedibus inambulârunt. Quæ si nō essent,

essent, at *Pontum Euxinum* & *Propontidem*, tria-
 que illa, *Bosphori Cimmerii*, *Bosphori Thracii*,
 & *Hellepontii* freta, frigore sæpe ita constricta
 fuerunt, ut non minus illa, quam ipsa terra, teri,
 premi, calcari possint. Sed sūt ista intra mediter-
 raneum mare posita: Certè. Quid igitur de O-
 ceano illo quī Græcis, *χρονὶς*, Latinis *Glacialis*
 dicitur existimabimus? nam si Oceanus gla-
 cie constringi possit, utique & calcari, & non
 solum pedis, quem quærimus, humani vestigi-
 gium, verum etiam vngulæ equinæ *positionem*, &
 carrorum pondera non minus quam freta
 illa, pati, ferre, sustinere possit; ex quo
 sequitur & *possideri posse*. Neque, enim ut
 opinor, Oceanus, si congelari incipit, Ocea-
 nus esse definit. Verum ad liquidum Oceanum
 veniamus. Quid ni & ille *pedis positionem* &
corporis ad corpus adjunctionem, hoc est, posses-
 sionem pati posse censeatur? Nam si naui in
 mare fluctuanti insisto, ipsi certè mari insistere
 non negor, aliter si esset, ne equo quidem in-
 fidens, terræ insistere videbor. Id autem si ita
 est, ne si calceatus quidem, pedem in terra po-
 suero, quicquam id agendo, ad *possessionem*
 quod attinet, profecisse videor, nec *corpori cor-
 pus unquam adjunxisse* existimabor, nisi nudis
 pedibus, dum possessionem capio, terram pres-
 fero. At non sic poeta: sed *balenam* olim, ab
Ammonē, ad *Andromedam* deuorandam missam,
 mare sub se positum *possidere* dixit. *Veniens*
 (inquit) *immensò bellua Ponto Imminet, & la-
 tum sub pectore possidet aquor*. Pari igitur rati-
 one vel ipsa naus, vel gubernator, qui veluti for-
 ma

ma quædam naudem animare videtur, mare sub
 lepositum possidere dici potest. Aut si hoc for-
 te duriusculum videatur, illud tamen quàm
 apertum? quod apud eundem poetam *Dædalus*,
Terras licet (inquit) *& Undas Possideat Minos*;
celum patet: Undas igitur, id est, maria, nō minùs
 quàm terras à Minoe olim possessa fuisse vides.
 Cur non igitur & hujus sæculi Regibus, Rebus-
 que Publicis eodem jure uti, & sua maria possi-
 dere liceat? Aut quæ tandem est ista quam pro
 sic certa venditant, à notatione nominis argumen-
 tandi ratio? nihi enim profectò, non solum fal-
 lax sapè, verùm etiam infirma semper, & ple-
 runique deridicula videtur. Nec video in quo
 hoc totum genus à mera verborum & syllaba-
 rum aucupatione differat. Nam si nulla posses-
 sio sit, nisi quæ *pedis positione* fiat, cur diues illa
 in v oculis fingendis & nouandis Græcia par
 huic rei nomen non invenit? *Theophilus*,
 certè, *Assessor* in Græca sua Institutionum
 versione, pro possessione, non *πρόδος θέσιν*, sed
τὴν νομὴν ponit. Sic *longi temporis possessionem*,
τὴν χρονίαν νομὴν, Rem quæ possidetur, *τὸ πρᾶγμα*
ὃ νέμεται, Rei possessorem, *τὸν νεμόμενον*, denique
Bonæ fidei possessionem, *Βοναπίδαι νομὴν* vertit.
 Alio etiam pro eadem re utuntur Græci verbo,
 sed quod nihil ad *pedis positionem* faciat. *κλήσασθαι*
 enim pro possidere ponūt. Quis autem nescit v-
 trumq; verbū, tam *νέμειν*, quàm *κλήσασθαι* sua virei
 cujusq; acquisitionē significare? sed quia quic-
 quid acquirimus, idē ferè & possidemus; ideo
 eadē verba ad utramvis rem significandam po-
 nunt. Quoniam igitur *Minos*, aliiq; Principes
 maris

maris dominium acquirere possunt, ideo recta & loquendi & scribendi ratione, ipsum possidere dicuntur. Neque verò in hoc vertitur hujus (vt opinor) controuersię cardo, sed in eo magis, vt intelligatur, an maris commercium aliquod ita sit, vt quocunque titulo jus in eo aut *Tiulus*, hoc est, possidendi causa allegari & probari possit. Qua in re, dubitandi ratio quæ sit, equidem non video: præsertim si poetas audire volumus. Audiamus igitur (si vacat) *Neptunum* è *Saturni* Regis Cretensis filijs vnum, apud *Maronem*, jus suum aduersus Fratrem acerrimè tuentem, & magno stomacho affirmantem: *Non illi imperium pelagi, sæuūq; tridentem Sed sibi sorte datum.* Sortitò igitur maris (Cretici puta vel alterius cuiuscunq;) dominium dari potuit; quid ni igitur, vel legari, vel donari, vel alio quocunque titulo transferri possit? At fabulæ hæ sunt, inquit: non nego; sed tamē istæ fabulæ satis indicant, nihil in se absurdi, aut à ratione alieni habere, si quis commercium maris esse, ipsumque titulo possideri & alienari posse dixerit. Commercium enim earum omnium rerum esse dicitur, quæ vsibus hominum, dominioque subijci, & in obligationem deduci, alienarique & acquiri possint; cuiusmodi mare quum esse hoc exemplo constet, simul commercium ejus esse planè negari nequit. Imò, inquit, Jure gentium libera est inter quosuis; modò nauibus eo perueniri possit, mercatura. Equidem non existimo. Quid enim, si gens nunc aliqua (quod multæ olim iustissimis de causis fecerunt) mercatores

L: Postlimi-
nii Di. de
Capti.

res peregrinos ad se accedere prohiberet? eti-
amne inuiti ad mercatores suscipiendos jure
gentium cogi possint? Id verò tantum abest,
ut si quis ex aliena terra, quæ nobis nec amici-
tia, nec fœdere, nec hospitio jungitur, ad no-
stram appulerit, jure servus fiat: quam in rem
verba Pomponii Juris-consulti profero. *Si cum*
gente, inquit, aliquis neque amicitiam, neque hos-
pitium, neque fœdus amicitia causa factum habet-
mus, hi hostes quidem non sunt: quod autem ex
nostro ad eos pervenit, illorum sit, & liber homo no-
ster ab iis captus servus sit, & eorum. Idemque est,
si ab illis ad nos aliquid perveniat. Non igitur
peregrinis, quasvis terras inuitis Dominis ac-
cedere impunè licet: siue mercaturæ id, siue
disciplinæ, siue alia quacunque de causa fiat:
si faxint, clarigatio est & postliminium, siue pe-
dibus eò siue navibus accesserint. Quod si ter-
ram nostram vestigio premere non licet, ne
mare quidem nostrum navigare, aut acre no-
stro, nobis inuitis, vasci licebit. Ista enim om-
nia amicis, hospitibus, fœderatis, sociis denique
nostris patent; hostibus verò aut alienis non i-
tem, nisi nostra id voluntate & permissione fiat;
nedum littora nostra occupare, retia siccare,
piscis vel in mari nostro capere, vel captos in
littore nostro aut condire aut indurare licet;
nisi id pacis legibus vel fœderis conditionibus
contineatur. Quis igitur non videt hæc quo-
rundam hominum effata: *Mare liberum, mare*
commune, mare incomprehensibile, mare domini
& commercii expers esse, mare possessioni reluctari,
& similia, ex illa officina, quæ omnia commu-
nia

nia esse vult, si non originem suam trahere, at-
tamen ad ejus similitudinem componi? Quasi
verò Veneti à sinus Adriaci, aut Danorum
Rex à sui freti, quam *Zundam* vocant, aut se-
renissimus Dominus noster *Carolus* Magnæ
Britanniæ, Franciæ & Hiberniæ Rex, maris
Britannici possessione, quam per tot annos sin-
guli tenuerunt, istis non rationibus sed ludi-
briis se pelli passuri sint; aut quasi hii primi cer-
ti maris dominii sibi vendicassent, ac non mos
hic omni sæculo in mari invaluisset. Cretes
enim primi, mox Lydi, Thraces, Byzantini,
Athenienses, Lacedæmonii, Rhodii, Persæ, Sy-
ri, Phœnices, Ægyptii, Pœni, infiniti alii vel
populi vel Principes, suis quique temporibus,
maris imperium & dominium nunc tenuerunt,
nunc amiserunt. Qui autem maris imperium
habet, is omnia in eo sic habet, ut alteri, eo in-
uito, nihil in mari magis quam in ipsa terra
movere liceat; idque per singula currendo ma-
nifestum fiet. Romani Pœnis, ne quid bellica-
rum navium, ultra præfinitum numerum habe-
rent, quum pacem petentibus secundò darent;
edixerunt. Quo in genere, quum eos peccasse
Romani semel comperissent, tertium illis bel-
lum, quod cum Carthaginis excidio finitum
est, continuò indixerunt. Antiocho postea, ne
citra Chelandias siue Chelidoniæ insulas, plus
quam vna monere nauigaret, imperârunt; pa-
ruit Rex orientis maximus, & parendo, Roma-
nos victores maris non minùs quam terrarum
Dominos fuisse fassus est. At verò ista in medi-
terraneo fieri fortasse potuerunt; in Oceano

alia res est. Atqui *Cludius* Imperator ipsi (ut est apud *Senecam* in *Apolocyntosi*) *Oceano* leges dedit. Verba quin etiam apponenda censui: Ille *Britannos*, *Ultra noti Littora Ponti*, & *ceruleo Cute Brigantes*, *Dare Romuleis Colla catenis* *Jussit*, & ipsum nona *Romane Jura securis* *Tremere Oceanum*. Quid *Constantium*, cognomento *Chlorum*, *Constantini* magni patrem memorem? qui devictis prælio nauali *Francis*, & oppresso *Carausio*, adjecisse Imperio terris omnibus majus elementum, hoc est, *Oceanum*, in *Eudemi* Panegyrico prædicatur. Non quòd hoc prælio, vniuersum, quà patet, oceanum, *Atlanticum*, *Australem*, *Paruanum*, & ultra *Californiam* ad occidentem, mare verò *Indicum* cis & ultra *Gangem* ad orientem, *Chin* usque & *Japonas*, (de quibus nec cognitum quid tum Romanis nec cogitatum fuit) Imperii fascibus subjecisse putandus sit; sed quòd oceanum orbi Romano usque quaque adjacentem, tani insigni victoria, *Juris Romani* effecisset. Verba enim scriptorum cum *mica* (quod dicitur) *salu* capienda sunt. Nec si in ipso *Euangelio* audieris, exiisse edictum à *Cæsare Augusto*, ut vniuersus describeretur orbis; tu de *Bactris* hoc aut *Sogdianis*, aut *Parthis*, sed de orbe Romano, intelligendum esse putes. Itaque quo jure *Constantinus* vniuersum, quà *Africa*, quà *Hispania*, quà *Gallia*, quà *Germania*, quà *Britannia* adjacet, oceanum Romanis fascibus parere iussit, eodem planè jure & serenissimi *Anglorum* Reges in suis maribus, & *Danorum* forsitan *Principes* in sua *Zanda* imperium ad se

& coronas suas pertinere asserunt. Qua in re,
 ne vi magis grassari quam jure tacere Reges vi-
 deantur, *Baldi*, ut acutissimi, ita profundissimi;
 Jurisconsulti verba, de toto hoc genere attendi-
 te quæso. *In mari juri dictio est*, inquit, sicut in Bald. ad l. 2
 terra. Nam mare in terra, i: in alueo suo funda- Li. de Rec.
 tum est, quum terra sit inferior sphaera: & videmus, dini.
 inquit, de jure gentium, in mari esse Regum distin-
 cta sicut in arida terra: ergo & jus civile, i: præ-
 scriptio, illud idem potest (in mari scilicet quod in
 terra) operari. Et hæc præscriptio quandoq; aufer-
 tur alteri: sed quum applicatur alteri, ita quod
 alii non auferatur, ista est consuetudo; & sic Vene-
 tiarum & Faniensium, sua maria distincta ex in-
 veteratissima consuetudine habent. Sed num quid
 hoc prætextu navitibus per ipsorum mare, pos-
 sunt imponere gabellas, & confiscare merces, incon-
 sulto Principe? Quod sic: Quia totus mundus hoc
 jure utitur: & infra; minime, inquit, mutanda
 videntur, quæ consuetudinem certam semper habue-
 runt. Vides, lector, isto veluti oraculo, ad om-
 nes contra tendentium argutias responsum
 dari. Jurisdictionem, dominium, commercium,
 hoc est, dominii, siue per præscriptionem,
 siue per consuetudinem, siue alio quocunque
 titulo transferendi jus, distinctosque limites
 & fines, idque non vi, sed jure, eoque non ci-
 vili tantum, verum etiam gentium, non Impe-
 ratoribus modò, sed & singulis Regnis & Rebus
 pub. in mari æquè atq; in terra constitui posse.
 At enim Lex ipsa dominium omne in mari, si-
 ue extero siue concluso, respuit. Quæ tan-
 dem? Illa, inquit, quæ ab *Antonino Pio* olim e-

L: A'ΞΙΩΣΙΣ
Dial. de Le.
Rhod:

edita in Pandectis ponitur. Ego quidem mundi Dominus, Lex autem maris. Lege id Rhodia, quæ de nauticis est, judicetur. At, inquam, constitutio ipsa græcè edita, latina illa versione, depravatur. Verba enim græca sunt, Εγώ μιν ἡ κοίτη τοῦ κυρίου, ὁ δὲ νόμος τῆς θαλάσσης ἡ δὲ νόμος τῶν ποδῶν κερνίδων τῶν ναυτικῶν. Hic quæro, vocula illa latina (Id, quid tandè in Græco habet cui respondeat? planè nihil. Illa igitur vocula è contextu sublata, apertè constat, conjecturam Seldenianam, qua ipsum græcum codicem vitiosæ interpunctionis ad verbum θαλάσσης arguit, pro responso prudentis capiendam esse. Sic enim textus alteruter inoffenso pede curret. Ego quidem mundi Dominus. Lex autem maris lege Rhodia, quæ de nauticis est, judicetur. Idq; Dionysius Gothofredus in doctissimis suis ad eandem legem annotationibus prius sensisse videtur, quum non aliud ejus sensum esse notet, quàm si sic dictum esset, *Mundi sine Terra lex, Princeps ipse quidem est, lex verò maris à lege Rhodia petenda est.* Jacobus certè Gothofredus, tanto patre dignus filius, in suo *de Imperio maris ὑπομνήματι* non ita pridem in lucem edito, vulgatam hujus legis interpunctionem, falsi planè damnat, idque patrem suum primùm vidisse, primùm ostendisse docet. Ineptum est igitur, Imperatorè Maris dominium hoc edicto refutasse. Nec lex Rhodia hoc vnquam statuisse vel statuere potuisse noscitur. Plura adderè, si aut historiæ scribendæ ratio id pateretur, aut si J: Seldenus nostras, vir, in interioris, ut loquitur Tullius, disciplinæ studiis versatissimus, in suo, qui *Mare Clausum*

sum inscribitur libro, totam hanc causam, extra omnem, quod dici solet, alæ jactum non posuisset.

Cap. 39.

Incidit autem illa Venetorum de Narentanis (inde enim digressi sumus) victoria in cal-
culi Christiani annum nongentesimum circiter
& nonagesimum, paucis admodum ante *Otho-*
ni Tertiū, qui propter rerum gestarum glori-
am non *magnus*, sed, ut ait *Naucerus Mirabilia*
mundi vocabatur, primum in Italiam aduentum.
Id autem nono *Iohannis*, Pontificis Romani, e-
jus nominis decimi sexti anno, qui fuit salatis
humanæ nongentesimus nonagesimus secundus,
accidit. Tanta autem *Othone* juvenem tum,
seu urbis Venetæ, seu ipsius ducis *Vrseoli*, visen-
di incessit cupido, ut compositis Romæ rebus,
inde in Germaniam rediens, ex itinere Rauen-
nam diuerteret, & alieno habitu, clam præter
ipsum *Vrseolum* omnibus, Venetiarum urbem
intraret; ubi, quo tectior res esset, humili quo-
dam cœnobio exceptus, urbem ipsam & celebri-
ora urbis loca, Templâ, & Porticus, sub privati
hominis imagine interdum lustrabat; *Vrseoli*
verò consuetudine per noctes fruebatur. De-
cedens *Pannum aureum*, qui ex fœdere Impera-
tori Romano annuus debebatur, Venetis in
perpetuum remisit: *mercatisque & portus* (ut
ait *Sabellicus*, in sua *Rerum Venetarum Decade*
prima, lib. 4.) celebrandi jus concessit. Quod
quid sibi velit, planè non intelligo; nisi illud
fortasse, quod quemadmodum prius in oriente,
ita jam in occidente, & per omnes Imperii vr-
bes, portus, & ciuitates, jus mercati, & portori-

orum libertatē ab *Othone* impetrauerint. Neq; enim dubitari potest, quin Veneti, ad id fastigii rebus gestis euecti, jus mercati & portus in sua ciuitate, quinimo & dirione omni habuerint. Aut si petendum tum restabat, à Græco profecto Imperatore, cuius partibus ex fœdere inito addicti fuerant, potius quā à Romano peti debuit. *Vrseolus* vnde vigesimo ducatus sui anno, summa auctus gloria, & lachrymis civium, dum adhuc decumberet, inundatus moritur: eique successit *O. ho* filius; qui, statim inito ducatu, cum Murcimiro Crœatiæ Regulo Jaderenses, Venetæ ciuitatis subditos (mare an terra non traditur) infestante conflixit, & egregiam de eo victoriam reportauit. Mari tamen contractum certamen, ideo magis puro, quia *Otho* statim ab hac pugna, omnes Dalmatiæ nuper à patre suo in fidem acceptæ ciuitates classe lustrabat; nouaque sacramenta, si qua opus erat, aut obli-des imperabat.

Cap. 40.

Edgarus.

Dum hæc Venetiis & in oriente geruntur, interim in Britannia miris successibus crescunt Anglorum res; pulsisque Danis, *Atbelstanes* primus insulæ monarchiam occupauit: sed maior omnibus *Edgarus*, non Angliam modò, verum etiam Scotiam, Hiberniam, omnesque adjacentes insulas suo Imperio adiunxit. Nec dubitarunt illius sæculi scriptores eum *Romulo*, *Cyro*, *Arsaci*, & *Carolo magno* Francorum Regi æqualem facere. Hic regnum anno 959 accepit: Quo tempore, erat quidam nomine *Malcusius*, alii *Muxentium* efferunt, qui quum nullam terræ glèbam titulo possideret, mare

mare omne, ut olim *Carausius*, infestum latro-
ciniis fecit; quumque non aliud quàm Archi-
pirata re ipsa esset, inter præcipuos tamen illo-
rum temporum Reges, & veluti alter *Neptunus*
habebatur. Hæc mihi causa videtur fuisse quæ
Edgaro tantam Classis parandæ curam injecit;
ter mille sexcentarum navium classẽ in pro-
vinciã habuisse omni annalium nostrorum fide
constat: neue quis hoc de scediis aut leuibis
navigiis interpretetur, *Rogerus Hovsdenns* eas
omnes robustas fuisse tradit. Nec ullus unquam
post *Ptolomaum* Rex tantam Classẽ in nume-
ros relatam ad perpetuam regni sui custodiam
& tutelam habuisse proditur. Nec habuisse
contentus, totam Classẽ in tres æquales exer-
citus diuisit; quumque mille ducentas naues
in orientali, totidemque in occidentali, & alte-
ras mille ducentas in septentrionali insulæ pla-
ga instructas semper & expeditas haberet, hunc
ad extremũ vitæ suæ spatium niorem tenuit, ut
Paschali solemnitate emensa, conscensa quæ ad
orientem erat Classe, omnia à Tamesis ostio
ad ultimum Cornubiæ, quæ ad occidentem
protenditur, angulum littora, lictorumque an-
fractus & porticulos, summa cura lustraret;
dabatque operam ne quod piratis latibulum
toto illo qui Angliam & Galliam interfluit
freto relinqueretur; quo peracto, Classẽ
quæ venerat, ad stationem suam in oriente re-
misit, & accepta quæ in occidente erat, na-
vium cohorte ad septentrionem pari cura &
studio tendebat; inuisabatque non Angliæ mo-
do, verum etiam exteriora pariter & interiora
Hiber-

Hiberniæ littora, Hibridasque, & omnes ad septentrionem positas Insulas. Inde fatigatum militem ad occidentem redire iussit; ipse indefessus tertiam classem conscendit, nec ullam sibi requiem, prius quam lecto Scotiæ Angliæque littore ad Tamesis ostium, tota Insula circumita, rediisset, dabat. Quod quum singulis, quibus regnabat (sedecim autem erant) annis faceret, vniuersum hoc Mare ab omni præterquam à ventis periculo immune, & à latronibus omni portu tutius præstitit; Quòq; potentia ejus in mari conspectior fieret, flumine *Dena*, quod Cestriam urbem alluit, lusorio aliquando nauigio euectus, septem quibus imperabat Reges remis nauem agere, ipso gubernaculum moderante, iussit; Idq; non barbaro, nec quo *Sesostri* olim, aut *Tamerlans* (qui currus suos Regibus junxisse perhibentur) ingenio, sed civili planè, & moderato, nulla regum ipsorum contumelia, nulla offensa fecit. Indicio fuerit, quod ad vitæ exitum usq; in fide ejus omnes manserint. Sed isto tamen veluti pignore maris imperium, ipsis quorum intererat vltro tradentibus, sibi desponsabat. Itaque nulla cuiusquam inuidia, maris hujus dominium sibi posterisq; suis Anglorum Regibus deinceps vindicavit; nec vindicauit modo, verum etiam justo titulo ad posteros transmissit, transmissumque posteris (Christiani orbis accedente consensu) hæcenus tenuerunt: tenetque modo inclytus Rex noster *Carolus*, Angliæ, Scotiæ, Franciæ & Hiberniæ Rex, & propitio nomine tenebit, nec maris magis quam soli Britanici domini-

dominium sibi unquam eripi patietur. Neue
 juris hujus & tituli origo in obscuro esset, *Navi*
Regiæ nuper extractæ (cujus similem ab anti-
 quis illis *Ptolomei*, *Demetrii*, *Hieronis* temporibus
 mare non vidit) causam inscribi fecit, *Ab*
ENGELRO *quatuor maria vendico*. Animus
 modò nobis, ô Ciues, idem nunc insit, qui in
 majoribus nostris, temporibus *Alfredi*, *Atbel-*
stani, *Edgari* hujus, ejusque filii *Ethelredi*, *Ca-*
nuti, aliorumque deinceps Regum fuit; neue
 priuatæ impensæ tædio, rem naualem (qua res
 Anglorum ad hunc usque diem stetit) & cum
 ea spem simul salutemque nostram prono anne
 ferri, & in profundo mergi patiamur. Ast mi-
 hi à prælio Acciaco, mille circiter annorum
 emenso spatio, tempus vela iterum contrahere,
 haud ignaro quanta rerum moles in sexcento-
 rum qui supersunt annorum cursu conficiendo
 superanda maneat.

FINIS.

Sit laus Deo.

Errata sic corrige.

PAG. 11. Liburna, *adde* Rotata. p. 27. Canthosque
le. Cauchosque. p. 30. vix, *le.* vixque. p. 47. est *le.* sit.
 p. 59. nec, *le.* quā non. p. 83. sex, *le.* bis. p. 9. rapidus *le.*
 s. rapidius. p. 92. ea *le.* eam. p. 94. fæderum, *le.* federe.
 p. 117. structa acies, *dele.* p. 131. quo, *le.* à quo. p. 133.
 incepta, *le.* concepta. p. 135. insolitudines, *dele.* in. p.
 156. currens, *le.* accurrens. p. 159. in hærentis, *le.* in-
 dulgentis. p. 160. illenè, *le.* illecnè. p. 167. in *le.* à (p. 4)
 obsiderunt, *le.* obsederunt. (p. 11) Rauennæ, *le.* Ro-
 manæ. p. 179. diuidenda, *le.* diuidendæ. p. 187. Cilicas
 tamen Ifauros, *le.* Cilicastamen & Ifauros. p. 193. in-
 uenirent, *le.* inueniret. *ead.* p. incredibilem, *le.* incredi-
 bile. p. 194. Aliis, *le.* Ali. p. 195. conferendam præsens,
le. conferendam excessit; sed præsens p. 208 sola, *le.* solæ.
 p. 210. ejaculare, *le.* ejaculari. p. 122. aubuste. auribus.
 p. 221. contracto, *le.* contacto. p. 228. capto Arthausus
 viuius in potestatem venit Imperator, *le.* Arthausus viuius
 in potestatem venit. Capto Imperator. p. 230. succeffe-
 rant, *le.* succefferat. p. 232. dendam, *le.* dedendam. *ead.*
 p. appellari, *le.* appellati. p. 235. flammæ, *le.* flammis.
 p. 240. causis, *le.* causâ. p. 241. oram, *dele.* p. 248. cæsus,
le. copis.

Ad Beneuolum Lectorem.

HÆC sunt, Beneuole Lector, præcipua hujus Impressionis er-
 rata; sunt tamen & alia vel lateralialia, vel interpunctionum,
 hic alieno loco insertarum, illic omissarum præcata. Est &
 unum plarimorum foliorum, inter paginas 167, & 169, à Typog. a-
 pho, eurrente prælo, præteritorum infigne vitium. Hec suo
 loco, quum ad notitiam nostram peruenisset res, inferi, & eorum
 numeros hujusmodi () parenthesi includi facimus. Vale Lector, &
 si mei in hoc opere conatus, iudicio tuo parte aliqua satisfaciant,
 Typographo in mei gratiam facilis ignosce.

